

421
Dis4 (R)
B407a to
1843

JESUS

OHNIHDE WICAYE CIN ORANYANPI QON:

QA

PALOS WOWAPI KAGE CIQON;

NAKUN,

JAN WOYAKE CIQON DENA EEPI.

TAMAKOCE OKAGA.

THE

ACTS OF THE APOSTLES;

AND THE

EPISTLES OF PAUL;

WITH THE

REVELATION OF JOHN;

IN THE DAKOTA LANGUAGE;

TRANSLATED FROM THE GREEK,

BY STEPHEN R. RIGGS, A. M.

PUBLISHED BY THE AMERICAN BIBLE SOCIETY.

CINCINNATI:


KENDALL AND BARNARD, PRINTERS.

1843.

WAKANTANKA CINHINTKU marpiya kin ekta kihde cin he iyokaham tona taokiye wicaye cigon taku wakanyan econpi qa oyakapi qon hena wowapi kin de en un.

He ehan Palos Wakantanka Cinhintku ortehda qa tona wicadapi kin hena xicaya wicakuwa qa karka wicahnaka, tuka icimani icunhan Jesus itkokipa. He wanyaka unkan, Itancan niturwe he, eya niyan. Unkan Itancan kin he heya, Jesus xicaya yakuwa kin he miye ce. Palos Jesus towitan kin wanyake cin he on anpetu yamni wiwanyake xni un. Wanna akisni unkan hehan ecahankeya Jesus oyaka, Wakantanka Cinhintku kin he hee ce; qa Juda oyate Ikce-wicaxta ko wicehna woyake un, qa ota owicakih. He iyohakam oyate tona awacinpi otomwewe kin en ecekeen yakonpi kin hena wowapi wicakicage cigon hena de en un.

Jesus taokiye wangi waxte dake cigon Jan eciyapi, he wanna wicarınca qehan teriya kuwapi, Jesus yaotanin kin heon, qa rewo-skantuya wita wan ekta iyaye yapi. He ohna ixnana yanke cin icunhan taku nakaha un kin, taku tokata u kte cin koya wanyaka, unkan hena unkokiyakapi. Iho wocekiye eyaya wowapi kin de yawapi, qa Jesus woartani on ihduxna qon he wacinyan po. Iye we kin he woartani owasin kajuju kta okihi. Hecetu nunwe. Taku xica owasin etanhan eunhdaku po.



JESUS

OHNIHDE WICAYE CIN ORANYANPI QON.

THE

ACTS OF THE APOSTLES,

IN THE DAKOTA LANGUAGE;

TRANSLATED FROM THE GREEK, BY S. R. RIGGS, A. M.

WICOWOYAKE 1.

1. Teopilos, wicoie tokaheya wakage cin he en Jesus tokaheya taku econ qa waonspekiye cin *omdaka*;

2. Woniya Wakan eciyatanhan ohnihde unpi kin wicakarnige *cigon* hena wahokonwicakiye cin iyohakam anpetu wan en wankan eyakupi kin hehanyan.

3. Iye kakije cin iyohakam hena ege en ni un taniniçiya, wowapetokeca ota en, anpetu wikcemna topa hehanyan on wanyakapi qa Wakantanka tokiconze taku tawa kin cajehdata ece;

4. Qa witaya yukanpi he ehan Jerusalem etanhan ye xni wicaxi qa Ate yapi kin wahowicaye *cigon* he ape *yanke wicaxi*; He miye eciyatanhan nayaronpi;

5. Awicakehan Jan mini on baptem. wicaqu tuka tokata anpetu tonana ihan hehan Woniya Wakan on baptem niçupi kta ce, *eya*.

6. Hena witaya yukanpi unkan; Itancan wanna dehantu Israel *oyate* wokiconze kin piya wicayaqu kta he, *eya iwangapi*.

7. Waniyetu makoncage ko Ate ekihnake cin hena sdonya iyenihantupi xni;

8. Tuka Woniya Wakan en anihipi kinhan wowaxake duhapi kta, qa Jerusalem ekta qa Judeya *makoce* owancaya qa Samariya qa maka ihanke kin hehanyan mayadaotaninpi kta, *ewicakiya*.

9. Hena hecen *eya* hehan wanhdakapi icunhan yuwankan icupi qa wanyakapi kin etanhan marpiya xapa wan eyaku.

10. He wankan iyaye cin marpiya ekta etonwan yukanpi he icunhan wicaxta nom ska ihduzapi en wicikiyadan najinpi.

11. Qa, Galile wicaxta, tokeca e marpiya ekta etonwan nayajinpi he. Jesus e qe niyepi etanhan marpiya ekta eyakupi kin he marpiya ekta wankan

iyaya wandakapi kin he iyecen ake u kta, ewicakiyapi.

12. Hehan Oliwe paha eciyapi kin hetanhan Jerusalem ekta icicawin hdapi; he Jerusalem etanhan anpetu wakan eca wicohnihde wanji hee.

13. En hdipi qa wankan tipi wanji tin iyayapi qa hen iyukanpi, Inyan qa Jakob qa Jan qa Andreyas, Pilipos qa Tomas, Bartolomeyas qa Mateyos, Jakob Alpeyos *cihintku* qa Simon Zelotes, qa Judas Jakob sunkaku;

14. Hena owasin tawacin wanjidan wocekiye-eyapi qa kida yukanpi, winorinca kin hena kici qa Mariya, Jesus hunku, qa iye hunkawanjitekupi kin hena ko *en opapi*.

15. Unkan anpetu kin hena en Inyan ookiye unpi kin wicacokaya najin, (wicacaje owasin opawinge sanpa wikcemna nom wicayawapi.)

16. Qa heya; Wicaxta hunkawanjinciyapi, Judas tona Jesus iyarpayapi qon en mdetahunka kin he on ehanna Woniya Wakan Dawid i kin eciyatanhan ie ciqon wowapi en kagapi kin he ecetu yapi kta hunxte.

17. He unkiyepi om yawapi qa wicortani kin de en opa.

18. *Wicaxta* kin he woartani iyunwin kin maga wan iyopekiye qa ehna makata irpaya unkan tancan kin kamdas irpaye qa xupe kin owasin tankan hiyu.

19. Tona Jerusalem en yakonpi sa owasin he sdonvapi; qa heon maga kin he iye iapi kin eciyatanhan, Akeldama eciyapi, he We maga, eyapi.

20. Psam wowapi kin en kaken kagapi; He tukten ti qon rewoskan yanke qa tuwedan ohna ti xni nunwe; qa, Awanhdakapi wicoran yuhe ciqon he tuwe tokeca icu kta.

21. Heon etanhan wicaxta kin dena ohiniyan om unyakonpi, Jesus Itancan kin unkopapi ti mahen i qa tankan ye cin,

22. Tokaheya Jan bapiem qu kin hetanhan anpetu kin en unkiyepi etanhan wankan eyakupi kin hehanyan, hena wanji om piya ikicage cin he unyaotaninpi kta.

23. Unkan nom najin wicakiyapi Josep Barsabas eciyapi, he Owotanna eya caxtonpi, qa Matiyas.

24. Hehan cekiyapi qa heyapi; Itancan niye wicacante owasin sdonya nanka, wicaxta kin dena uman tukte yakarnige cin he yutanin wo.

25. Ookiye wicoran qa ohnihde unpi kin de en ope kta, Judas iye oyanke tawa kin ekta hde kta e etanhan hinrpaye cin he.

26. Hehan woohiye erpekiyapi, unkan woohiye kin Matiyas ahirpaya; qa hecen ohnihde unpi ake wanjipidan kin opeya yawapi.

WICOWOYAKE 2.

1. Anpetu iwikeemna zaptan kin wanna iyehantu unkan owasin tawacin wanjidan witaya yukanpi.

2. Hehan ihnuhanna, tate wan waxagya uye cin he iyecen, oqo wan marpiya kin eciyatanhan

hiyu qa tipi ohna yukanpi kin ocowasin ojudan.

3. Unkan wicaceji yuxpaxpapi kin peta se ececa en wicatanin qa otoiyohi en wicahinajin.

4. Unkan owasin Woniya Wakan kin on ojupidan qa wicaceji toktokeca on iapi, Woniya Wakan ie wicakiye cin he iye-cen.

5. He ehan wicaxta owotanna Juda wicaxta kin hecapi, marpiya ihukuya oyate hiyeye cin etanhan Jerusalem en yakonpi.

6. Wicaho kin de otanin unkan wicota en mniciyapi qa irniyanyanpi, otoiyohi iye iapi kin hena ia yukanpi he nakironpi kin heon.

7. Owasin inihanpi qa yuxinyayapi qa otoiyohi hekiciyapi; Tona ia yukanpi kin hena owasin Galile wicaxta kin hecapi xni he.

8. Token on otoiyohi iapi kin yuha untonpi kin hena ia nawieunronpi he.

9. Parti qa Medi qa Elami qa Mesapotamiya en yakonpi sa, Judeya qa Kapadokiya, Pontos qa Asiya,

10. Perugiya qa Pampuliya, Egupta qa Libuwa makoce kin ekta, Kurene ihdukxan, tona Rome ekta iyukanpi, Juda wicaxta qa en ope wicakiyapi qon,

11. Kerete qa Arabe kin *hecuncapi* tuka Wakantanka taku tanka kin unkiapi kin eciyatanhan hena ia oyakapi naunronpi ce, *eyapi*.

12. Owasin inihanpi qa yuxinyayapi qa otoiyohi hekiciyapi; De taku kapi hwo.

13. Qa wanjikxi irarapi qa;

Dena mini xa teca on imnanpi ce, *eyapi*.

14. Tuka Inyan ake wanjipidan kin om najin qa ho yuwan-kan icu qa hewicakiya; Juda wicaxta tona Jerusalem en dukanpi ko owasin he de sdonyapi qa mioie kin anagoptan po.

15. Niye hecanipi kin hecetu xni, wanna anpetu kin en napei-wanka ape cin hehantu heon wicaxta kin dena witkopi xni.

16. Tuka Joel wicaxta wokcan oyake ciqon he dee.

17. Unkan anpetu ihankeya kin en (Wakantanka eya) mitaniya kin wicacerpi owasin awicawakaxtan kta; unkan nicinkxipi nicunkxipi ko wokcanpi kta, qa koxka nitawapi kin wowanyake kin wanyakapi kta, qa wicarinea nitawapi kin wowihamde ihamnanpi kta ce.

18. Anpetu kin hena en wicaxta taokiye qa winyan taokiye mitawa kin hena en mitaniya awicawakaxtan kta qa hena e wokcanpi kta.

19. Unkan wankan marpiya kin ekta taku on yuxinyayapi wicawaqu kta qa kuya maka kin akan wowapetokeca kin, we qa peta qa xotojudan.

20. Itancan taanpetu tanka wowinihan kin he hi xni itokam anpetu wi kin otpaza icu kta qa hanyetu wi kin ix we icage kta.

21. Unkan tona Itancan caje kin cajeyate cinhan hena nipi kta ce, *eya*.

22. Israel wicaxta wicoie kin dena naronpo; Jesus Nazareyon wicaxta wan niyepi kin en Wakantanka hdutanin qon, wicowa-

xake taku on inihanpi qa wowa-petokeca niyepi cokaya Wakan-tanka econ kiye ciquon hena on *hecon* e niye sdonayapi.

23. Unkan he qe Wakantanka atayedan wakiconze ça iye o-sdonye kin eciyatanhan qupi qon he iyacupi qa nape xixxica on icipawer oyakatanpi qa yakte-pi.

24. Hee Wakantanka ekice-tu ye ça wiconte icaxke kin ki-yuxka, en yuhapi kta okihipica xni nakaex.

25. Dawid he ke ça kaken eya; Ohiniyan mitokam Jehowa wanmdaka, mietapa kin ekta yanke ça heon pahoho xni waun kta.

26. Heon micante kin iyuxkin qa miceji kin ipsica; qa micerpi kin woape en wanke kta.

27. Minagi kin he hades ekta erpemayakiye xni qa wanji wakan nitawa kin he wicarwin wanyake kta e on yaqu kte xni.

28. Wiconi canku kin sdonye mayaye kta; qa niite kin etanhan wowiyuxkin on imna mayaye kta.

29. Wicaxta hunka wanjinci-yapi Dawid hunkakeyapi un kin he eciyatanhan taninyan ocici-yakapi kta; he te ça rapi qa an-petu kin dehanyan ohna hnakapi kin unkipi wanka.

30. He wicaxta wokcan kin heca qa Wakantanka wokconze on konza, wicacerpi eciyatanhan iye tancan aicage kte cin he e-tanhan Mesiya, iye oiyotanke kin akan iyotanke kta e icarye kta he sdonya;

31. Hecen tokaheya tanhan he wanyake ça Mesiya ekicetu ya-

pi kin he cajeyata, nagi kin ha-des ekta erpekiyapi kte xni qa cerpi kin wicarwin wanyake kte xni.

32. Jesus iye qe Wakantanka ekicetu ye cin he unkiyepi owa-sin unyaotaninpi kta.

33. He Wakantanka etapa kin ekta yuwankan icupi qa Atkuku kin Woniya Wakan iwahoye ciquon he icu, heon nakaha taku wandakapi qa nayaronpi kin he akaxtan.

34. Dawid e qe marpiya ekta wankan iyaye xni, tuka kaken eya; Jehowa Itancan mitawa kin kaken eciya, Mietapa kin eciya-tanhan iyotanka wo,

35. Tona toka niye cin hens nisiha oahe kin ewahnake kte cin hehanyan.

36. Heon etanhan Israel tiyo-hnaka owasin de tanyan sdonya wo, Jesus icipawer oyakatanpi qon hee Wakantanka Itancan qa Mesiya kaga.

37. He naronpi unkan cante kin ekta iyoyakapi qa Inyan ohnihde unpi umanpi kin kici; Wicaxta hunkawanjin unniyanpi token econkupi kta he, ewicaki-yapi.

38. Hehan Inyan hewicakiya; Ihduecetu po, woartani kajujupi kta e on Jesus Mesiya cajeyan otoiyohe baptem niçupi kta ee; qa Woniya Wakan niçupi kin he iyacupi kta.

39. Wahoyapi kin de niye nitawapi qa nicincapi qa tona itehanyan yukanpi kin owasin, tona Itancan unkita Wakantan-kapi kin wicakico kte cin hena.

40. Wicoie tokeca ota on wi-cakiyatanin qa wahokonwicaki-

ye ça heya; Wicoicage xice cin de etanhan ni içiya po.

41. Unkan tona oie kin iyuxkinyan icupi hena baptem wicaqupi qa anpetu kin he en wicanagi kektopawinge yamni en opapi.

42. Qa ohnihde wicaye cin woonspe kin en opeya yukanpi, qa takodakiciyapi, qa aguyapi kiyuxpapi qa wocekiye eyapi kin hena en.

43. Unkan wicanagi owasin nina yuxinyayapi; ohnihde unpi taku wakanyan econpi qa wwapetokeca ota econpi kin hena on.

44. Tona wicadapi kin hena owasin witaya yukanpi qa taku owasin ptaya yuhapi.

45. Qa tona mága qa woyuha yuhapi kin hena e wiyopekiyapi qa otoiyohi cinpi kin iyecen owasin wicakipamnipi.

46. Qa anpetu otoiyohi tawacin wanjidan tipi wakan kin ohna yukanpi qa tipi iyaza aguyapi kiyuxpapi wowiyuxkin cante okonwanjidan ko yuha taku yutapi icupi.

47. Wakantanka yatanpi qa oyate kin owasin en wowaxte yuhapi. Unkan Itancan kin tona nipi kte cin heca okodakiciye kin en ope wicakiya.

WICOWOYAKE 3.

1. Unkan hehan Inyan Jan kiei tipi wakan kin ekta kaitawankanhde yapi, yamni ape cin, wocekiye eyapi eee e kin hehantu.

2. Unkan wicaxta wan tonpi kin ehantanhan huxte un kin he

yuha ahipi, anpetu otoiyohi tipi wakan tiyopa wan Waxte eciyapi kin he en ehdepi, tona tipi wakan tin yapi kte cin hena taku wicakida kte cin heon heconpi.

3. He Inyan Jan kiei tipi wakan kin timahen yapi kta wanwicayake ça taku wicakida.

4. Unkan Inyan Jan kiei he oparta najin qa; Ekta unkatonwan po, eciya.

5. Taku okini kta kecin qa hecen anawicagoptan yanka.

6. Hehan Inyan; Maza ska maza ska zi ko takudan mduhe xni tuka taku mduhe cin ciçu kta, Jesus Mesiya Nazareyon he caje on najin qa mani wo, eciya;

7. Qa nape etapa kin en yuze ça najin kiya, unkan ihnuhanna siha ixkahu ko waxag hinhda.

8. Hehan wicaxta kin he psin iyaye ça najin qa mani qa om tipi wakan kin timahen iyaya, mani qa psipsica qa Wakantanka idowan.

9. He mani qa Wakantanka idowan kin oyate kin iyurpa wanyakapi;

10. Qa wicaxta tipi wakan tiyopa Waxte eciyapi kin en hiyotanke ça taku da ece qon he dee sdonyapi qa taku ecakiconpi kin on etanhan nina inihanpi qa yuxinyayapi.

11. Wicaxta huxte qon wana okizi kin he Inyan Jan kiei wicayu's najin hena en oyate owasin kiwitaya inyang iheyapi qa nina yuxinyayapi, omanipi Solomon tawa kin hetu.

12. Inyan he wanyaka unkan oyate kin hewicakiya; Israel wi-

caxta, tokeca he on niyuxinya-
yapi qa tokeca opaunrtapi na-
yajinpi he; unkiye wowaxake
qa wowaxte unhduhapi kin heon
wicaxta kin de mani unyanpi *ke-*
canunuyakinpi seca.

13. Abereyam qa Izak qa
Jakob Wakantanka tawapi; hun-
kake wicunyanpi Wakantanka
tawapi kin he Cihintku Jesus
wanna hdutan, he niyepi yaqupi
qa Pilate kiyuxke kte rinca tuka
he itokam ayaktapi xni.

14. Tuwe Wakan Owotanna
un kin he ayaktapi xni qa wica-
kte sa wan kiyuxkapi yacinpi.

15. Qa Wiconi Itancan kin
he yaktepi; he qe Wakantanka
wicaxte cin etanhan najin kiye
cin unkiye unkoyakapi ce.

16. Qa iye caje kin, caje wi-
cadapi kin heon, wicaxta kin de
wandakapi qa sdonyayapi kin
he yuwaxaka; wowicada iye
eciyanhan un kin he wicaxta
kin de tanyan okizi ya, niyepi
owasin en.

17. Unkan nakaha mihunka-
wanji, iyukean xni hecanonpi,
niyepi qa wicaxta itancan wica-
duhapi kin hena nakun, he sdon-
waya.

18. Tuka Wakantanka Mesi-
ya token kakije kte cin wicaxta
wokcan kin owasin i kin eciya-
tanhan oyake ciquon hena he en
hduecetu.

19. Heon ihduecetupi qa ihdu-
homni po, wayartanipi kin nici-
cajupupi kta ce; hecen anpetu
yuecetupi kin Itancan itohnake
kin eciyanhan u kta.

20. Jesus Mesiya tani onici-
yakapi kin he u xi kta.

21. He qe marpiya kin ekta

eyakupi kta, taku owasin ekicetu
yapi kta anpetu kin hehanyan,
Wakantanka maka icage cin he-
tanhan wicaxta wokcan wakan
wicahduhe cin owasin i kin eci-
yatanhan oyake ciquon hee.

22. Mowis iye qe hunkake
yapi kin hewicakiya; Nihunka-
wanjtkupi kin etanhan wicaxta
wokcan wanji miye iyemaceca
Jehowa Wakantanka nitawapi
kin icar niciciyapi kta, he taku
eniciyapi kte cin owasin anaya-
goptanpi kta.

23. Qa wicanagi otoiyohi wi-
caxta wokcan kin he anagoptan
xni kinhan he oyate kin etanhan
ihang yapi kta ce.

24. Qa wicaxta wokcan owa-
sin Samuel hetanhan tona iyo-
hakam woyakapi qon anpetu kin
dena cajeyatapi.

25. Wicaxta wokcan cincapi
kin he niyepi qa wookiye waho-
yapi Wakantanka nihunkakepi
kin wicaqu qon he en *oyapapi*;
he Abereyam kaken eciya; Un-
kan nicinca kin on etanhan wi-
cowazi maka akan un kin owa-
sin yuwaxtepi kta ce.

26. Wakantanka Cihintku Je-
sus najin kiye qa niyuwaxtepi
kta e on niyepi tokaheya en u
xi, otoiyohi wayartanipi kin
etanhan ihduhomni niyanpi kta
heon *hecon*.

WICOWOYAKE 4.

1. Hena hecen oyate kin ewi-
cakiyapi unkan Woxnapi kaga-
pi qa tipi wakan en itancan kin
Sadukayon ko en wicahipi.

2. Oyate kin waonspewicaki-
yapi qa Jesns eciyanhan wi-

conje etanhan woekicetu kin he oyakapi kin heon xihdapi;

3. Qa nape on iyawicarpayapi qa wicakaxka tipi kin en iye-wicayapi, ihanrana kte cin hehanyan, wanna rtayetu naka-ex.

4. Tuka wicoie naronpi qon hena wicota wicadapi unkan wicaxta kektopawinge zaptan iyadan ihdawapi.

5. Unkan ihanrana hehan wicaxta itancanpi, wicaxta tankinkinyan Wowapi kagapi ko Jerusalem en mniciyapi;

6. Qa Annas Woxnapi kagapi itancan, qa Kaiapas qa Jan qa Aleksandros qa Woxnapi kagapi itancan takuwicaye cin hena koya.

7. Unkan hena wicacokaya ewicahdepi qa wiwicawangapi; Taku wowaxake qa tuwe caje kin on hecanonpi he, eya *iwicawangapi*.

8. Hehan Inyan Woniya Wakan on ojudan hecen ewicakiya; Oyate en wicaxta itancanpi qa Israel en wicaxta tankinkinyan;

9. Anpetu kin de wicaxta huxte qon tanyan ecakiconpi qa token on okizi kin he on wiunyanungapi hecinhan;

10. Niyepi owasin qa Israel oyate kin owasin de sdonya po, Jesus Mesiya Nazareyon kin icipawer oyakatanpi qon Wakantanka wicate cin etanhan ekicetu ye cin he caje on wicaxta kin de nitokam okizi najin.

11. Inyan kin de ticagapi yaunpi kin ayaktapi xni tuka he oise en itancan kin ee.

12. Qa tuwe tokeca en wiconi wanica; qa caje tokeca marpiya

kin ihukuya wicaxta wicaqupi on unnipi kte cin wanica.

13. Inyan Jan kici waditakapi kin he wanyakapi qa wicaxta taku ota onspeiçiciyapi xni wacin ksapapi xni kin hecapi e sdonyapi unkan nina yuxinyayapi qa Jesus kici unpi qon he iyukecanpi.

14. Qa wicaxta okizi yapi qon he en wicanajin wanyakapi unkan taku awicayuptapi kte cin takudan yuhapi xni.

15. Tuka omniciye kin etanhan tankan ye wicaxipi hehan he akiapi;

16. Qa iyakitedan hekiciyapi; Wicaxta kin dena token ecawicunkiconpi kta hwo; wowape-tokeca tanka kin de econpi kin he tona Jerusalem en yakonpi kin owasin sdonyapi qa anaunrmanpi kta unkokihipi xni.

17. Tuka he oyate kin en anaptapi kta e heon nina wokipe wicunkicagapi kta qa caje kin de on tohini wicaxta wowicakikiyakapi kte xni *unkeyapi* kta ce.

18. Unkan hehan wicakicopi qa Jesus caje kin on takudan ie xni qa waonspekiye xni wicaxipi.

19. Tuka Inyan Jan kici awicayuptapi qa heyapi; Wakan-tanka itokam, niyepi anaunnigoptanpi kta qa ix Wakantanka anaungoptanpi kta uman tukte owotanna kin nix iyukecan po.

20. Taku sdonunyanpi qa naunronpi qon hena oyake xni unyakonpi kta e unkokihipi xni.

21. Hehan ake wakokipe wicakicagapi tamwicakiyapi qa hde wicaxipi, taku on taku iya-

wicaonpapi kta takudan iyeyapi xni, oyate kin on etanhan; taku econpi kin heon owasin Wakan-tanka yatanpi.

22. Wicaxta wookizi wowa-petokeca kin he en econpi qon he wanna waniyetu wikcemna topa sam iyeya.

23. Kihde wicayapi unkan iye etanhanpi kin en kipi qa Woxnapi kagapi itancanpi, wicaxta tankinkinyan ko taku token ewicakiyapi qon hena ohdahapi.

24. Hena hecen naronpi unkan witaya Wakantanka hoyekiyapi qa heyapi; Itancan Wakantanka he niye, marpiya, maka, miniwanca qa taku ohnaka ko owasin yakaga.

25. Dawid nitaokiye kin i kin eciyatanhan kaken ehe cin; Tokeca e Ikcewicaxta kin oqoyapi qa oyate kin taku ecinxnyan yukcanpi he;

26. Maka wicaxtayatapi kin najin hiyaye ça wicaxta itancanpi kin witaya mniciyapi, Itancan kin en qa Mesiya tawa kin en *takpe upi* ce.

27. Awicakehan Jesus nicinkxi wakan sdayakiye ciqon he en Herode qa Pontiyos Pilate, Ikcewicaxta Israel oyate ko mniciyapi;

28. Ehanna taku ninape nitawacin ko on econ yakonze ciqon he ecen econpi kta heon etanhan.

29. Unkan nakaha Itancan, token wakokipe unkiagapi kta tamunkiyapi kin he wanyaka wo qa nitaokiye kin nioie nina waditagya oyakapi kta e wicaqu wo;

30. Wawokiziya on ninape kin yahdugate cin heon; qa Jesus nicinkxi wakan caje kin on taku wapetokeca qa on yuxinyayapi kte cin hena econpi kta.

31. Wocekiye eyapi hehan tukten witaya yukanpi kin he yuhuhuzapi qa owasin Woniya Wakan kin on ojupidan qa Wakantanka oie kin waditagya oyakapi.

32. Unkan wicota wicadapi kin hena wicacante wanjidan wicanagi wanjidan ko yuhapi, qa taku tonpi tuwedan taku tawa keiciye xni tuka taku owasin witaya yuhapi.

33. Unkan ohnihde unpi kin hena wowaxake tanka on Jesus Itancan kin piya ikicage cin he oyakapi qa wowaonxida tanka owasin en un.

34. Qa hena tuwedan takudan icakije xni. Tona maza qa tipi yuhapi qon hena wiyopekiyapi qa taku wiyopeyapi kin on taku icupi kin he ahipi,

35. Qa ohnihde unpi kin sihapi kin en ehnapapi qa wicaxta otioyohi taku token cinpi kin hecen pamni wicaqupi.

36. Unkan Joses, he ohnihde unpi kin Barnabas eya cajeyatapi (wicakicanpte cihintku kin he kapi) Lewi wicowazi qa Kupros oyate kin etanhan,

37. Hee makoce onxpa hduhe cin wiyopekiye ça maza ska kin hdohi qa ohnihde unpi kin sihapi kin en ehnapa.

WICOWOYAKE 5.

1. Unkan wicaxta wan Ananias eciyapi, tawicu Sappira

kici maga yuhapi kin wiyope-kiye,

2. 'Ca maza ska apa anakirbe, tawicu kin ix nakun sdotkiya; unkan apa ahi qa ohnihde unpi kin sihapi kin en ehnaka.

3. Tuka Inyan heciya; Ananiyas tokeca e Satan nicante kin ojud niyan on Woniya Wakan oiyaton kte xni qa maga iyoheyapi kin apa anayakirman he;

4. Naharin ecen un qon he ehan yahduhe xni he; qa wiyopekiyapi kin he ehan nakun nitawa xni he. Tokeca nicante ekta hecen econ wacani he. Wicaxta akantu kin hee xni tuka Wakantanka en iyatonxni.

5. Unkan Ananiyas hena oie kin naron hehan hinrpaye qa niya xni iyaya. Unkan tona hena taku kin naronpi kin owasin nina wikipapi.

6. Unkan koxka kin najinpi qa *wicaxta* opazuntapi qa tankan ayapi qa rapi.

7. He iyohakam wihiyayedan oape yamni hehan tawicu kin taku econpi qon sdonye xni ecen tin hiyu.

8. Unkan Inyan heciya; Kana on maga iyoheyakiyapi he, omakiyaka wo. Unkan ix; Han, kana on, eya.

9. Unkan Inyan; Token on sakim Itancan Taniya kin iyutan yayapi kta ecen wacinduzapi he. Wanyaka wo, tona nihihna rapi kin hena sihapi kin tiyopa kin en najinpi qa niye nakun tankan aniyampi kta, eciya.

10. Hehan ix ihnuhanna *Inyan* siha kin ekta hinrpaye qa

niya xni iyaya. Unkan koxka qon en hiyupi qa wanna qa wanyakapi unkan tankan ayapi qa hihnaku kin kici rapi.

11. Unkan okodakiciye kin ocowasin qa tona hena taku kin naronpi owasin nina kokipapi.

12. Unkan ohnihde unpi kin napepi kin on oyate kin en woinihan wicoran qa wowapetokeca ota econpi. Unkan owasin wicacante wanjidan yuha Solomon omanipi tawa kin ohna yukanpi.

13. Qa wicaxta tokeca tuwedan en owicapa okihi xni tuka oyate kin wicakinihanpi.

14. Qa tona wicadapi kin sanpa ota Itancan kin en opapi, wica winyan ko wicota.

15. Hecen tona wicayazan kin hena canku otoiyohi en awicahipi qa ohehdepi owinja ko ohna en ahiwicahdepi, Inyan hen hiyaye cinhan hunr ohanzi wicaye kte cin heon *heconpi*.

16. Qa otonwe itan ihdukxan kin hena etanhan wicota Jerusalem en hipi qa tona wayazanpi, tona taku wakan xica wicayuhna xkinyanpi ko en awicahipi, unkan owasin asnipi.

17. Hehan Woxnapi kagapi itancan kin najin qa tona om un kin hena (Sadukayon wicoun kin hee) winawizipi on ojupidan:

18. Qa nape on ohnihde unpi kin iyawicarpayapi qa wicakaxka tipi ikceka kin ohna ewicahnakapi.

19. Tuka Itancan taohnihde ye cin he hanyen wicakaxka tipi tiyopa kin yuzamni qa tankan awicau qa heya;

20. Hunktiya po, tipi wakan kin ohna inajinpi qa wiconi kin de oie kin owasin oyate kin owicakiyaka po.

21. He naronpi unkan hanrana rin tipi wakan kin timahen yapi qa wowicakiyakapi. Hehan Woxnapi kagapi itancan qa tona om un kin hena witaya iheyapi qa omniciye kin Israel cinca wicaxta tankinkinyan ko owasin wicakicopi, qa wicakaxka tipi kin etanhan wicahuwe ye wicaxipi.

22. Tuka akicita tancan kin wicakaxka tipi kin en hipi qa iyewicayapi xni; hehan hoxi hdapi;

23. Qa heyapi; Awicakehan wicakaxka tipi kin sutaya onatakapi ecen iyeunyanpi qa tiawanyagwicakiyapi kin tiyopa kin itokam najinpi; tuka unyurdokapi qehan tuwedan en wanunyakapi xni.

24. Woxnapi kagapi itancan qa tipi wakan en itancan kin Woxnapi kagapi ko hena oie kin naronpi unkan he taku kapi kin yukeanpi xni.

25. Hehan wanji en hi qa heya wowicakiyaka; Wanyaka po, wicaxta wicakaxka tipi kin en iyewicayayapi qon hena tipi wakan kin ohna najinpi qa oyate kin waonspewicakiyapi.

26. Hehan wicaxta itancan kin akicita tancan ko ekta yapi qa iwaxtedan awicahipi, oyate kin inyan on wicakininpi kta e kokipapi heon etanhan.

27. En awicahipi qa omniciye kin wicacokaya najin wicakiyapi; unkan Woxnapi kagapi itancan kin wiwicawanga,

28. Qa heya; Caje kin de on wowicakiyake xni unnixipi xni he; unkan ito woonspe duhapi on Jerusalem ojudan yayapi qa wicaxta kin de we kin en unka-yaupi kta wacanipi.

29. Hehan Inyan ohnihde unpi kin umanpi kici ayuptapi qa heyapi; Wakantanka ee tokaheya anaungoptanpi kta qa wicaxta akantu kin iyohakam.

30. Jesus yaktepi qa can en otkeyayapi qon he hunkake wicunyanpi Wakantanka tawapi kin hduekicetu :

31. Wakantanka he yuwan-kan ehdaku, iye nape etapa kin on, Itancan qa Wanikiya un kta qa Israel *oyate kin* ihduecetupi qa woartani kajujupi kin wicaqu kta heon *hecon*.

32. Qa unkiye hena oie kin unkoyakapi ece qa Woniya Wakan tona Wakantanka ana-goptanpi wicaqu kin he ix eya hena yuotanin ece.

33. Hena taku kin naronpi unkan nina xihdapi qa token te wicayapi kta akiapi.

34. Hehan Parisiyan wan Gamaliel eciyapi woope waonspekiya qa oyate kin en okinihan he omniciye kin en najin qa ohnihda unpi kin cistiyedan tankan aye wicaxi :

35. Qa hehan hewicakiya; Israel wicaxta, wicaxta kin dena taku ecawicakicon wacanipi kin he itonpa po.

36. Anpetu kin dena itokam Tudas icaga, he taku wicaxta keiciya, unkan wicaxta opawinge topa ikiyadan opapi; he ix ktepi qa tona wicadapi kin

owasin enanakiya iyewicayapi qa takuni xni aya.

37. Qa he iyohakam Judas Galile etanhan, wamnayanpi anpetu kin he ehan icaga, qa oyate ota ihakam iyayapi; he nakun ihang yapi qa tona wicadapi qon owasin enanakiya eyaya.

38. Heon nakaha heciciyapi; Wicaxta kin dena wicireyata najinpi qa awiciyuxtan po, wokonzé qa wicoran kin de wicaxta akantu kin etanhan hecinhan atakuni kte xni;

39. Tuka Wakantanka eciyatanhan un kinahan yujujupi oyakihipi xni, okini Wakantanka kici yecizapi kta ce.

40. Unkan he anagoptanpi qa ohnihde unpi kin wicakicopi qa wicakaxtakapi hehan Jesus caje kin on woyake xni wicaxipi qa awicayuxtanpi.

41. Unkan ix omniciye kin etanhan hdapi qa *Jesus* caje kin on wowixtece en awicaupi iyehantu wicayawapi kin heon wiyuxkinpi.

42. Qa anpetu otoiyo hi tipi wakan kin ohna qa tipi iyaza wahokonwicakiyapi qa Jesus Mesiya oyakapi yaxtanpi xni.

WICOWOYAKE 6.

1. Unkan ookiye unpi kin wanna wicota aya anpetu kin hena en Heleniston *wicaxta* Heberi *oyate* kin awicakinicapi anpetu otoiyo hi wapamnipi kin en wiwazica wicayuhapi kin hena owicakaptapi kin heon etanhan.

2. Hehan ake nonpapi kin

ookiye unpi kin owasin wicakicopi qa hewicakiyapi; Wakan-tanka oie kin unkayuxtanpi qa wahna wotapi wiyeya eunhnakapi kte cin hecetu xni.

3. Heon hunkawanjin unniyanpi enitanhanpi wicaxta owotanna yawapi qa Woniya Wakan wicoksape ko on ojupidan xakowin wicakarniga po, wicoran kin de awanyag wicunkiya-pi kta.

4. Tuka unkiye qe wocekiye qa wicoie oyakapi kin en ohiniyan ye unkiçiyapi kta ce.

5. Unkan oie kin de oyate owasin iyokipipi; qa Stepanos, wicaxta wowicada Woniya Wakan ko on ojudan kin he karnigapi, qa Pilipos qa Pocoros qa Nikanor qa Timon qa Parmenas qa Nikolayos Antiyoka ekta en ope kiyapi qon.

6. Hena ohnihda unpi kin wicacokaya ewicahdepi; unkan wocekiye eyapi qa hehan nape on awicaputakapi.

7. Unkan Wakantanka oie kin icage qa Jerusalem en ookiye unpi kin nina yuotapi, qa Woxnapi kagapi ota wicadapi qa anagoptanpi.

8. Unkan Stepanos wowicada wowaxake ko on ojudan taku on yuxinyayapi qa wapetokeca tanka econ, oyate kin en.

9. Unkan wicaxta wanjikji omniciye tipi wan Libertina ewicakiyapi tawapi kin etanhan qa Kureneyon qa Aleksandron wicaxta kin qa Kilikiya qa Asiya etanhan, hena najinpi qa Stepanos kici hdokinicapi.

10. Tuka Woksape Woniya ko on ie cin he okihipi xni.

11. Hecen wicaxta opewica-tonpi kin; *Wicaxta* kin de Mowis taku akaga qa Wakantanka nakun naunronpi ce, eyapi.

12. Hecen oyate qa wicaxta tankinkinyan Wowapi kagapi ko iyowicapaxtakapi; unkan anatan hipi qa yuzapi qa omniciye kin en ahipi.

13. Qa oitonxni waayatanin kin heca najin wicakiyapi; hena ix heyapi; *Wicaxta* kin de otonwe wakan kin de wicoope ko taku akage cin ayaxtan xni.

14. Jesus Nazareyon otonwe kin de ihang ye ça wicoran Mowis unqupi qon hena yutokeca kta ce eya naunronpi ce.

15. Unkan omniciye kin en iyotankapi kin owasin oparta yukanpi qa ite kin he marpiya ohnihde wan ite kin iyececa wanyakapi.

WICOWOYAKE 7.

1. Hehan Woxnapi kagapi itancan kin; Hena hecetu he, eya iwanga.

2. Unkan Stepanos heya; *Wicaxta* hunkawanjin ciyapi ate ciyapi ko naronpo. Wowitan Wakantanka kin Abereyam ate unyanpi Mesopotamiya en ounye ciqon, Caran ekta ahi ti kin he itokam en tanin ciye,

3. 'Ca; Nita makoce qa nitakuye kin etanhan ya wo, qa makoce wan cicipazo kte cin he ekta u wo, eciya.

4. Hehan Kaldeya makoce kin etanhan hiyu qa Caran en ahi ti. Hen atkuku kin ça, unkan hetanhan makoce kin en nakaha oununyanpi kin den ahi ti.

5. Unkan *makoce* kin tawakte cin he onxpa siha kin hin-skoceca qu xni, tuka he yuhe kta qa iyohakam cinca kin yuhapi kta e qu kta iwahoya; naharin cinca wanica.

6. Unkan Wakantanka kaken eya; He cinca kin makoce tokeca en ounyanpi kta qa wowidake wicayuhapi qa waniyetu opawinge topa hehanyan xicaya wicakuwapi kta.

7. Qa oyate kin hena wowidag wicayuhapi kte cin he wicamdaco kta, Wakantanka eya; qa he iyohakam etanhan hiyupi kta qa makoce kin den ohomadapi kta ce, *eya*.

8. Hehan ohomni baxpapi wicoope kin he qu. Unkan hecen Izak cincaye ça anpetu ixahdogan en ohomni bakixpa. Izak Jakob *cincaya*; qa Jacob hunkake wicayapi ake nonpapi kin *cinca wicaya*.

9. Unkan hunkake wicayapi kin Josep nakiwizipi qa Egipta ekta wiyopekiyapi. Tuka Wakantanka kici un;

10. Qa wokakije kin owasin etanhan ehdaku qa Paro Egipton wicaxtayatapi kin itokam wowaonxida woksape ko qu; unkan Egipta en wicaxta itancan kaga qa iye ti kin ocowasin en.

11. Hehan wicaakiran nina iwicakakije ko Egipta makoce Kanan ko owancaya un; unkan hunkake wicunyanpi kin taku yutapi iyeyapi xni.

12. Tuka hehan Egipta heciya taku yutapi yukan Jakob naron unkan hunkake wicun-

yanpi kin tokaheya ekta ye wicaxi.

13. Unkan inonpa *ekta ipi* hehan Josep hunkawanjin wicaye cin sdotkiye wicakiye ça Josep takuye kin Paro en oyakapi.

14. Hehan Josep atkuku kin wahoye ça kico qa takuwicaye cin owasin nakun, wicanagi wikcemna xakowin sanpa zaptan.

15. Hecen Jakob Egiptu ekta apamahde iyaye ça hen ça, iye qa nakun hunkake wicunyanpi kin.

16. Unkan Sucem ekta ayapi qa hnakapi wan Abereyam Emhor Sucem atkuku cinca kin maza ska on opewicakicaton qon he en hnakapi.

17. Tuka anpetu wahoyapi Wakantanka Abereyam konza iwahoye cion he wanna kiya-dan u hehan oyate kin icage ça Egiptu en ihduotapi.

18. Qa wicaxtayatapi tokeca wan Josep sdoney xni he icaga.

19. Unkan he qe takuwicunyanpi kin wicahnaye ça hunkake wicunyanpi kin xicaya ecawicakicon, hecen hokxiyoqopa kin tankan erpewicakiyapi, nipi kte xni heon *hecon wicaxi*.

20. He ehan Mowis tonpi, Wakantanka ekta wicaxta waxterinca; unkan wi yamni hehan-yan atkuku ti kin ohna icar ki-yapi.

21. Qa tankan erpeyapi hehan Paro cunwintku kin eyaku qa iye cinca kin hecen icar ya.

22. Unkan Mowis Egiptu oyate wicoksape kin owasin onspekiyapi qa wicoie wicoran ko en waxaka.

23. Unkan wanna waniyetu wikcemna topa hehan hunkawanjitku Israel cinca kin wanwicahdag ye kta wacinyuza.

24. Qa wanji xicaya ecakiconpi kin he wanhdake ça okiye ça xicaya ecakiconpi kin he tokiciçon qa Egiptu wicaxta kin kaxtaka.

25. Hunkawanjitku kin, iye nape kin on Wakantanka wiconi wicaqu kte cin he iyuckanpi kta kecin tuka okarnigapi xni.

26. Ihanrana hehan ake kici-zapi kin en tanin içiye ça woo-kiye wicakicage kta wacin qa heya; Wicaxta hunkawanjin yeciyapi, tokeca xicaya ecayeciconpi he.

27. Tuka tuwe xicaya ecawicakicon kin he *Mowis* paha iye-ye ça; Tuwe unkiyepi en wicaxta itancan qa wayaco nicaga he, eya.

28. Rtanihan Egiptu wicaxta yakte qon he iyecen mayakte kta he.

29. Oie kin he on Mowis nape ça Madiyan makoce kin en rewotahedan un qa hen hokxi-dan nom cinca wicaya.

30. Wanna waniyetu wikcemna topa ihuniyan unkan hehan rewoskan makoce kin en Sina re kin hetu can adetka ota wahna peta ide kin en Itancan tahnide ye cin tanin içiye.

31. He Mowis wanyake ça taku wanyake cin on yuxinyaye ça okarnige kta e on ikiyadan ya unkan Itancan ho kin en tanin.

32. Nihunkake Wakantanka tawapi kin he miye; Abereyam ta Wakantanka Izak ta Wakan-

tanka qa Jakob ta Wakantanka kin, eya. Unkan Mowis cancan qa ekta etonwan okihi xni.

33. Unkan Itancan kin heciya; Nitahanpe kin hduxdoka wo, tukten nayajin kin he maka wakan ce.

34. Ekta ewatonwe ça Egupta en mitaoyate token kakijapi kin he wanmdake ça comnihdazipi kin nawaron qa wicamdu-xpe kta e on kun hibu; unkan nakaha u wo Egupta ekta ye cixi kta.

35. Mowis aktapi xni qa; Tuwe wicaxta itancan qa wacyaco nicaga he, eciyapi qon he Wakantanka wicaxta itancan wanikiya ko *kage* ça ye xi, marpiya ohnihde can adetka ota kin en tanin içiye cin nape kin on.

36. *Wicaxta* kin he taku on yuxinyayapi wapetokeca ko Egupta makoce kin en, Mde xa ekta qa rewoskan makoce kin etu waniyetu wikcemna topa hehanyan econ qa hecen tankan awicau.

37. Mowis Israel cinca kin; Hunkawanjin wicayayapi etanhan wicaxta wokcan wan miye iyemaceca Itancan Wakantanka nitawapi kin icar niciciyapi kta, he anayagoptanpi kta ce, ewicakiye ciqon he dee.

38. Qa rewoskan makoce kin ekta okodakiciye kin kiei un qon hee, Sina re kin etu marpiya ohnihde kin okiye ça nakun hunkake wicunyanpi kin; qa he wiconi oie kin unqupi kta e icu.

39. Qa he hunkake wicunyanpi kin anagoptanpi cinpi xni

tuka reyata iyeyapi qa Egupta ekta icicawin hde wacinpi;

40. Qa Aaron heciyapi; Taku wakan unkitokam yapi kte cin unkiçaga po; Mowis Egupta makoce kin etanhan unkaupi qon he tokiya iyaya sdonunyanpi xni, *eyapi*.

41. Qa anpetu kin hena en ptejincadan wan kagapi qa wakagapi kin he taku wakiyuxnapi qa iye nape kagapi kin on etanhan wiyuxkinpi.

42. Hehan Wakantanka ihduhomni qa marpiya ohnaka kin ohodapi kta e *lawicayuxt*an; wicaxta wokcan tawowapi en kagapi kin he iyececa; Israel ti kin woteca ktepi woxnapi ko rewoskan makoce kin en, waniyetu wikcemna topa hehanyan mayaqupi he.

43. Unkan ito Molok tawakeya kin qa Renpan taku wakan duhapi he wicanrpi tawa kin iyacupi; hena wakagapi kin itokam canpexka makehde inayajinpi kta e yakagapi: Unkan ito Babulon akotanhan *wayaka* aciyapi kta ce.

44. Hunkake wicunyanpi kin rewoskan makoce kin en waayatani wakeya kin yuhapi; Mowis econ xi qa token wanyake cin he iyecen kage kta keciye ciqon he iyecen.

45. He hunkake wicunyanpi icupi qa Joxuwa kici Ikecwicaxta tamakoce kin en ahipi, hena e Wakantanka hunkake wicunyanpi itohnake kin etanhan reyata iyaye wicaya, Dawid taanpetu kin hehanyan;

46. He Wakantanka itokam wowaonxida iyeye ça Jakob ta

Wakantanka kin wakeya wan iyekiciciye kta cin.

47. Tuka Solomon tipi kicaga.

48. Hececa tuka Iyotan wankan un kin wakeya wicanape on kagapi kin ohna ti xni; wicaxta wokcan hecen eye ciqon;

49. Marpiya kin he oiyotan-ke mitawa kin ee qa maka kin he misiha oahe kin hee; ecin tukte tipi miyecagapi kta he, eya Itancan kin, qa tukten ozi miçiyekta he.

50. Minape kin taku henana owasin kage xni he.

51. Tahu nisutapi qa cante noge ko ohomni banixpapi xni, ohiniyan Woniya Wakan kin yakizapi, nihunkakepi econpi qon nix iyecen *ecanonpi*.

52. Wicaxta wokcan kin tukte wanji e nihunkakepi kin xicaya kuwapi xni he. Tona Owotanna un kin u kte cin oyakapi qon hena wicaktepi; qa he qe nix niyepi wanna iyoheyayapi qa yaktepi.

53. Marpiya ohnihde ahipi kin he eciyatanhan woope kin iyacupi tuka tanyan yeciuhapi xni.

54. Unkan hena taku kin naronpi hehan cante kin ekta nina iyoyakapi qa on hi hdakokokapi.

55. Tuka ix Woniya Wakan on ojudan marpiya ekta oparta yanke ça Wakantanka towitan kin qa Jesus Wakantanka etapa kin eciyatanhan najin e he wan-yake,

56. 'Ca heya; Wanyaka po, marpiya kin yuzamnipi qa Wicaxta kin Cihintku Wakantanka

etapa kin eciyatanhan najin e wanmdaka ce, eya.

57. Hehan hotankakiya hotaninpi qa nogepi kin ohmus hduzapi qa tawacin wanjidan en iyarpayapi;

58. Qa otonwe kin tankan erpeyapi qa inyan on kininpi. Unkan waayataninpi kin wokoyake kin koxka wan Salos eciyapi he siha kin en ekihnakapi.

59. Qa Stepanos inyan on kininpi, he icunhan cekiye ça heya, Jesus Itancan minagi kin ehdaku wo.

60. Hehan canpexka makehde inajin qa hotankakiya hoyekiya; Itancan woartani kin de iyepi kin en awicau xni wo. Hena hecen eye ça hehan ixtima iyaya.

WICOWOYAKE 8.

1. Unkan he te cin Salos iyo-winkiya. Unkan anpetu kin he en okodakiciye Jerusalem en un kin xicaya wicakuwapi tanka. Qa owasin Judeya qa Samariya makoce kin ekta enanakiya iye-yapi, ohnihde unpi kin henana *owanji yukanpi*.

2. Unkan wicaxta okinihan Stepanos rapi qa nina akiceyapi.

3. Tuka Salos okodakiciye kin yutakuni xni wicakuwa, tipi iyaza tin iyaye ça wica winyan ko wicayuze ça wicakaxka tipi kin en iyewicaya.

4. Unkan heon tona eniciciya iyayapi qon hena oie kin oyakapi, *makoce* optapta iyayapi.

5. Hehan Pilipos Samariya

en otonwe wan ekta apamahde iyaye ça Mesiya owicakiyaka.

6. Unkan oyate kin Pilipos taku wapetokeca econ kin naronpi qa wanyakapi hehan taku tona oie ye cin cante wanjidan anagoptanpi.

7. Taku wakan xica hotan-kakiya hotaninpi qa tona wicayuhnaxkinyanpi kin etanhan inanpapi qa tona țatapike cin huxtepi ko ota okizipi.

8. Unkan otonwe kin he en wiyuxkinpi tanka.

9. Unkan wicaxta wan Simon eciyapi otonwe kin he en wanakaja tanhan wapiyapi econ qa Samariya oyate kin yuxinye wicaye ça iye wicaxta tanka keiciya.

10. He owasin anagoptanpi, cistinpidan tankinkinyan ko, qa; Wakantanka towaxake tanka kin he dee ce, eyapi.

11. Wanakaja tanhan wapiyapi econ kin on yuxinye wicaye cin heon he anagoptanpi.

12. Tuka Wakantanka toki-conze kin qa Jesus Mesiya caje kin eciyatanhan taku Pilipos oyake cin hena wicadapi qehan baptem wicaqupi, wica winyan ko.

13. Qa Simon ix eya wicada qa baptem qupi, hehan Pilipos om un qa wowakta taku wapetokeca tanka ko wanyake cin heon yuxinyaya.

14. Unkan Jerusalem ekta ohnihde unpi kin Samariya Wakantanka oie kin icupi kin he naronpi hehan Inyan Jan kici ekta ye wicaxipi.

15. Hena e ekta apamahde

hipi qa Woniya Wakan icupi kta heon wocekiye ewicakiciyapi.

16. He naharin tuwedan ahin-he xni, Jesus Itancan caje kin on baptem wicaqupi kin hecedan.

17. Hehan nape on awicaputakapi qa Woniya Wakan icupi.

18. Ohnihde unpi kin nape on awicaputakapi kin he eciyatanhan Woniya Wakan wicaqupi kin he Simon wanyaka hehan maza ska wicakahi;

19. Qa heya; Tuwe nape on awaputake cinhan he Woniya Wakan icu kta e wowaxake kin he maqu po.

20. Tuka Inyan heciya; Maza ska nitawa kin niye kici atakuni xni nunwe. Taku Wakantanka wicaqu ece kin he maza ska on opetonpi kta kecani kin heon etanhan.

21. Oie kin de en oyape xni qa takudan nitawa xni; Wakantanka itokamya nicante kin owo-tanna xni.

22. Heon etanhan taku xice cin de on iyopeiciye ça Wakantanka cekiya wo, nicante kin ekta nitawacin kin nicicajujupi kta naceca.

23. Naharin pizi kin nina pa qa woartani icaxke kin en yaun e wanmdaka.

24. Hehan Simon ayupte ça heya; Taku ehapi kin takudan mahiyahde kte xni heon nix itomiye on Itancan kin cekiya po.

25. Unkan wanna yaotaninpi qa, Itancan oie kin oyakapi hehan Jerusalem ekta icicawin hdapi qa *tahepi* Samariya oton-

we ota kin en wotanin waxte kin oyakapi.

26. Unkan Itancan taohni-hde ye cin Pilipos okiye ça heciya; Najin qa itokarkiya, canku wan Jerusalem hetanhan iya-ye ça Gaza en iyorpaye cin he en i wo, he rewoskan kin ee.

27. Hehan ix najin qa iya-ya: unkan ito Etiyopa wicaxta wan yunokos heca, Etiyopa wicaxtayatapi winorinea Kandake eciyapi he ihukuya wicaxta tanka qa woyuha tawa kin owasin kiciyuha un kin he Jerusalem ekta cekiye kta e i.

28. He wanna hde ça canpahmihma ohna kiyotanke ça Esayas wicaxta wokcan kin he yawa yanka.

29. Unkan Woniya Wakan kin Pilipos heciya; Ekta ye ça canpahmihma kin de kici ya wo.

30. Hehan Pilipos ekta inyang ye ça Esayas wicaxta wokcan kin yawa yanke cin he naron qa; Taku dawa kin he oyakarniga he, eciya.

31. Unkan; Tuwedan onspe-makiye xni ecin token owakihi kta he, eye ça, Pilipos en u qa kici iyotanke kta, keya.

32. Wowapi yawa yanke cin iapi kin he dee; Tarinea wan ktepi kte cin en aipi qa tacinca-dan hin wicayuxda kin itokam inina yanke cin he iyecen ix iye i hdukawa xni.

33. Wicawarpanica en un qe-han woyaco yuhe cin yutokan iyeyapi; qa wicoicage tawa kin tuwe oyake kta he; wiconi tawa kin maka kin etanhan ayapi ce,

34. Hehan yunokos kin Pilipos ayupte ça heciya; Ceciciya

ce, tuwe on wicaxta wokcan kin hena hecen eya he, iye içica qa ix wicaxta tokeca ka.

35. Hehan Pelipos i hdukawa qa wowapi kin he etanhan ie ça Jesus e okiyaka.

36. Unkan canku kin ohna hdapi qa mini kin en iyohipi. Hehan yunokos kin; Mini wan-yaka wo, baptem maqupi kta e taku terinda kta he, eya.

37. Unkan Pilipos; Nicante kin ocowasin on wicayada kinhan enicicetu kta, eciya. Hehan ix ayupte ça; Jesus Mesiya he Wakantanka Cihintku kin ee wicawada ce, eya,

38. Hehan canpahmihma kin owanji najin xi qa Pilipos yunokos kin kici mini kin ekta kun iyayapi qa baptem qu.

39. Mini kin etanhan hdicupi unkan Itancan Taniya kin Pilipos icu qa yunokos kin ake wan-yake xni, qa canku kin ohna iyuxkinyan hda.

40. Tuka Pilipos Azotos ekta iyekipapi; qa otonwe kin owasin opta ye ça wotanin waxte kin oyake ça ecen Kesareya ekta iyohi.

WICOWOYAKE 9.

1. Unkan Salos waaiapi tin wicaktepi ko Itancan taokiye kin en awicapogan ecen Woxnapi kagapi itancan kin en i;

2. Qa Damaskos en omniciye tipi kin ekta wowapi wicakicage xi, hecen canku kin de ohna ya-konpi kin tona iyewicaye kte cin, wica winyan ko, wicakaxke ça Jerusalem ekta awicahi kta.

3. Ektakiya ye ça Damaskos

wanna ikiyadan unkan ihnuhan-na ojanjan wan marpiya eciyatanhan kin ihdukxan iyoyanpa.

4. Hehan makata hinrpaye çehan wicaho wan naron, Salos, Salos tokeca xicaya mayakuwa he, eciya.

5. Unkan ix; Itancan nituwe he, eya. Hehan Itancan kin ix; Jesus xicaya yakuwa kin he miye; can pesto kin nayartake cin he terika ce, eya.

6. He cancan qa yuxinyaye ça; Itancan taku ecamon yacin he, eya. Unkan Itancan kin; Najin qa otonwe kin ekta ya wo, token ecanon kte cin oniciyakapi kta ce, eciya.

7. Unkan wicaxta om icimani kin yuxinyaya najinpi, wicaho kin naronpi tuka tuwedan wanyakapi xni.

8. Unkan Salos maka kin etanhan najin qa ixta kamdayapi hehan tuwedan wanyake xni; unkan nape on yus manipi qa Damaskos ekta aipi.

9. Qa anpetu yamni wawan-yake xni un; qa takudan yute xni qa yatke xni.

10. Unkan ookiye wan Damaskos en un kin Ananiyas eciyapi, he wowihanmde en Itancan kin; Ananiyas, eciya. Unkan ix; Itancan, de miye ce, eya.

11. Hehan Itancan kin heciya; Najin qa canku wan owotanna eciyapi kin he ekta ye ça Judas ti kin en *wicaxta* wan Salos eciyapi Tarsos etanhan he akita wo; wanna cekiya un,

12. Qa wowihanmde wan en wicaxta wan Ananiyas eciyapi tin hiyu qa tonwe kta e on nape on aputake cin he wanyaka ce.

13. Hehan Ananiyas ayupta; Itancan wicota etanhan wicaxta kin he Jerusalem ekta tona owotanna wicaduhe cin taku xica ecawicakicon kin hena nawaron;

14. Qa deciya Woxnapi kagapi itancanpi kin eciyatanhan wowaxake yuha un, tona nicaje kin cajeyatapi kin hena owasin wicakaxke kta ce, eya.

15. Tuka Itancan kin ix heciya; Hunktiya wo, wakxiça wakarige cin he wanji ee, micaje kin Ikcewicaxta qa wicaxtaya-tapi kin Israel cinca ko itokam yuha un kta:

16. Qa micaje kin on taku token kakije kte cin he wakipazo kta ce, eya.

17. Hehan Ananiyas ye ça tipi kin timahen iyaye ça nape on aputake ça heya; Salos mi-hunkawanji yatonwe ça-Woniya Wakan on onijudan kta e Itancan kin u maxi (Jesus canku ohna yau kin en tanin içiye ci-qon hee.)

18. Unkan ihnuhanna taku hocexpu kin iyececa ixta kin etanhan hinrpaya; unkan ecahankeya tonwe ça najin qa baptem qupi.

19. Taku yutapi icu hehan waxag hinhde. Unkan Salos anpetu tonana ookiye unpi kin Damaskos en yakonpi hena om un.

20. Qa kohanna omniciye tipi kin ohna Mesiya he Wakantan-ka Cihintku kin ee ce, eya oya-ka.

21. Unkan tona naronpi kin owasin yuxinyayapi qa heyapi; Jerusalem ekta tona caje kin de cajeyatapi kin xicaya wicakuwa

qa nakaha wicakaxke ça Woxnapi kagapi itancanpi kin ekta awicaye kta e on den hi kin he dee xni he.

22. Tuka Salos sanpa waxaka icage ça Juda wicaxta Damas-kos ekta yakonpi kin hena inina yanke wicakiye ça, He Mesiya kin ee e yawicaka.

23. Wanna anpetu ota hehan Juda oyate kin he ƣe yapi kta keya aiapi.

24. Tuka hecen konzapi kin he Salos sdonya. Unkan ktepi kta e anpetu hanyetu ko otonwe tiyopa kin awanhdakapi.

25. Hehan ookiye unpi kin Salos hanyen icupi qa makano-piye wan ohna otonwe conkaxke kin etanhan kun iyeyapi.

26. Unkan Salos Jerusalem en hdi qehan ookiye unpi kin kici un kta cin tuka owasin koki-papi qa wanna ookiye kin heca e wicadapi xni.

27. Tuka Barnabas' he icu qa ohnihde unpi kin en ahi qa token tahepi Itancan kin wanyake ça he okiye ça token Damaskos ekta Jesus caje kin on waditagya oyake cin hena owicakiyaka.

28. Unkan Jerusalem ekta om un qa timahen u qa tankan ya ece; qa Jesus Itancan kin on waxagya woyaka.

29. He ie ça Helenistos oyate kin om hdokinica. Tuka hena ege he ktepi kta akitapi.

30. Hunkawanjin kiciyapi kin he sdonyapi, unkan Kesa-reya ekta aipi qa Tarsos heciya hde xipi.

31. Hehan okodakiciye kin Judeya makoce kin owancaya qa Galile qa Samariya ekta

wookiye yuhapi qa icagapi qa Itancan kin kokipeyahan mani-pi qa Woniya Wakan wicaki-canpte cin en unpi qa hecen ihduotapi.

32. Unkan Inyan makoce kin owasin opta iyaye ça Luda ekta wicaxta owotanna yukanpi kin hena en wicahiyohi.

33. Qa wicaxta wan Eneyas eciyapi hen wanyaka; he wani-yetu xahdogan makan wanka, ƣaƣaka ececa.

34. Unkan Inyan; Eneyas Jesus Mesiya asniniyan, najin qa owinja hdatata wo, eciya. Unkan ihnuhanna najin hiyaya.

35. Unkan tona Luda qa Saron en yakonpi kin hena owasin he wanyakapi unkan Itancan kin ekta ihduhomnipi.

36. Unkan Jope ekta ookiye wan Tabita eciyapi, he Tatokadan eyapi, oran waxte qa ota qa waonxida econ kin on ojudan;

37. Anpetu kin hena en yazan hinnda qa ƣa iyaya. Unkan yujajapi qa wankan tipi kin en ehnakapi.

38. Luda Jope kici icikiya-dan qa Inyan heciya yanke cin he ookiye unpi kin naronpi heon wicaxta nom ekta ye wicaxipi, qa ecadan en wicau kta e iwa-hoyapi.

39. Hehan Inyan najin qa hena om hda. Ekta i unkan wankan tipi kin en aipi unkan wiwazica kin owasin en najinpi qa ohde wokoyake ko Tabita ni un qehan kage ciqon hena pazo yankapi qa ceyapi ece.

40. Tuka Inyan hena owasin tankan iyewicaye ça canpexka mahehde inajin qa wocekiye

eye ça hehan tancan wanke cin ekta ihdamna qa; Tabita najin wo, eya. Unkan ixta kamdaye ça Inyan wanyake çehan iyotan-ka.

41. Hehan *Inyan* ix nape yekiye ça najin kiye ça wicaxta owotanna wiwazica ko wicakico qa ni un ecen wicakipazo.

42. Unkan Jope owancaya he otanin qa wicota Itancan kin wicadapi.

43. Unkan Inyan anpetu ota Jope en wicaxta wakpanyan wan Simon eciyapi he kici yanka.

WICOWOYAKE 10.

1. Unkan Kesareya en wicaxta wan Kornelios eciyapi aki-eita opawinge obe warjidan Italike eciyapi kin he en itancan kin hee.

2. Wicaxta wakinihan qa Wakantanka kokipecyahan un tiyohnaka kici; qa oyate kin taku ota ionxiwicakida qa ohini-yan Wakantanka cekiya un.

3. He anpetu en napciwanka ape cin hehan wowanyake wan en Wakantanka taohnihde ye cin en hi qa; Kornelios eye cin, he taninyan wanyaka.

4. He oparta yanke ça ini-han qa; Itancan taku he, eya. Unkan ix ito heciya; Wocekiye nitawa qa nioran waxte kin hena Wakantanka itokam ki-ksuyapi.

5. Unkan nakaha Jope ekta wicaxta ye wicaxi qa Simon Inyan eciyapi he kico wo.

6. Wicaxta wakpanyan wan Simon eciyapi tipi kin miniwan-

ca kahda han, he om yanka. He token ecanon kte cin onici-yake kta ce.

7. Unkan marpiya ohnihde Kornelios okiye cin he wanna kihda hehan tiawanyag wicakiye cin nom qa akicita waxte ohini-yan tankiyadan wicahduhe cin hetanhan wanji wicakico;

8. Qa hena taku kin owasin owicakiyake ça Jope ekta ye wicaxi.

9. Unkan icimanipi qa ihan-rana wanna otonwe kin ikiyadan hehan Inyan tipi kin akan woce-kiye eya iyaya, wanna wiyotan-he cin behantu.

10. Nina wotektehda qa wote kta cin tuka taku yutapi wiyeya ehna kapi kin he icunhan woki-ksuye xni wan ahinrpaya.

11. Qa marpiya kin yuzam-nipi e wanyaka, qa heciya-tanhan taku wan miniruha ska tanka iyececa, oise topa kin ici-yakaxkapi he kutkiya u qa ma-ka kin ahe kiyapi.

12. He ohna taku maka akan wahutopa ocaje owasin qa wo-teca qa wamakaxkan qa marpi-ya zitkadan.

13. Unkan wicaho wan tanin qa; Inyan, najin qa kte qa yuta wo, eciya.

14. Tuka *Inyan* ix; Itancan hecetu xni, tohini taku ikceka qa axape cin wate xni ce, eya.

15. Unkan ake icinonpa wi-caho kin tanin qa; Taku Wa-kantanka pakinte cin he ikceka eciye xni wo, eya.

16. Yamni akihde hecen econpi qa hehan taku kin he marpiya kin ekta akiyahdapi.

17. Unkan Inyan wowanyake

wanyake cin de taku kin e sdon-
ye xni un he icunhan ito wica-
xta Kornelios u wicaxi qon hena
Simon ti kin akitapi qa wanna
tiyopa kin itokam en hina-
jinpi;

18. Qa panpi qa; Simon In-
yan eciyapi den yanka he eya
iwicawangapi.

19. Wowanyake kin he In-
yan awakicin un kin he icunhan
Woniya Wakan heciya; Wan-
yaka wo, wicaxta yamni oni-
depi.

20. Heon najin qa kun hde
ça takudan ceñunhda xni om ya
wo, hena u wicawaxi, eya.

21. Hehan Inyan wicaxta
Kornelios u wicaxi qon hena
ekta kun wicai qa; Tuwe aya-
kitapi kin he miye ce; taku on
yahipi he, ewicakiya.

22. Unkan ix heyapi; Kor-
nelios akicita opawinge wica-
yuhe cin wicaxta owotanna qa
Wakantanka kokipecyahan un
he Juda oyate kin iyurpa oya-
kapi, hee marpiya ohnihde wa-
kan wan okiye ça tuwe nihuwe
u wicaxi qa iye ti kin ohna
nioie kin naron kta, keya ce,
eyapi.

23. Hehan tin u wicaxi qa
won wicaya. Unkan ihanrana
Inyan hena om hda, qa Jope
etanhan hunkawanjin kiciyapi
wanjikji opapi.

24. Qa hehan ihanrana Ke-
sareya ekta iyohipi. Unkan
Cornelios tona takuwicaye ça
koda wicaye cin hena wicakico
qa om ape yanka.

25. Unkan Inyan en u hehan
Kornelios itkokim ye ça siha

kin en makata erpeiçiye ça
cekiya.

26. Tuka Inyan ix najin kiye
ça; Najin wo, mix eya wima-
caxta ce, eya.

27. Qa kici wohdake cin
ecen tipi kin timahen i qa wicota
mniciyapi kin wanwicayaka.

28. Qa hewicakiya; Juda
wicaxta, oyate tokeca etanhan
wan om un qa en hi kin he he-
cetü xni e sdonyayapi, tuka, tu-
wedan wicaxta ikceka qa axape
cin ewakiye kte xni he Wakan-
tanka sdonye makiya.

29. Heon etanhan mahuwe
ipi kin ecen waceñunhda xni
hibu, heon taku on miyecopi
kin he sdonwaye kta ce.

30. Unkan Kornelios heya;
Wanna etanhanhan anpetu topa
de nakaha ape cin hehantu, han-
wamde, qa napeiwanka ape cin
hehan wati kin en cekiya waun
unkan wicaxta wan wokoyake
wiyatpa koyake cin he en ma-
hinajin.

31. Qa, Kornelios wocekiye
nitawa kin he naronpi qa wo-
waonxida ecanon kin he kiksü-
yapi; Wakantanka itohnake kin
en;

32. Heon Jope ekta tuwe ye
xi qa Simon Inyan eciyapi he
kico wo; he wicaxta wakpanyan
wan Simon eciyapi ti kin mini-
wanca kahda he cin he ohna
yanka. He hi kinhan taku eni-
ciye kta ce, eya.

33. Heon kohanna wahociya;
qa yahi kin he tanyan ecanon.
Heon nakaha unkiyepi kin
owasin Wakantanka itokam un-
kanpi, taku Wakantanka eye

nixi kin owasin naunronpi kta ce.

34. Hehan Inyan i hdukawa qa heya; Awicakehan Wakan-tanka wicaxta itohnake kin iwanyake xni e sdonwaya.

35. Tuka oyate otoiyohi en tuwe kokipeyahan un qa wicoran waxte econ kin he waxte daka ece.

36. Jesus Mesiya he owasin en Itancan kin hee e on wookiye eyanpaha oyake ça oie kin Israel cinca kin wicaqu.

37. Oie kin he sdonyayapi, Judeya *makoce* kin owancaya oyakapi Galile etanhan, Jan baptem oyake cin hehantanhan.

38. Jesus Nazaren etanhan he Wakantanka sda kiya, Woniya Wakan wowaxake ko on; qa he qe taku waxte econ iyaya ece qa tona Wakanxica on yuh-naxkinyanpi -kin hena okizi wicaya; Wakantanka kici un nakaex.

39. Qa taku Juda tamakoce qa Jerusalem ekta econ qon owasin unyaotaninpi ece. He qe ktepi qa can wanji en otkeyapi.

40. Anpetu iciyamni hehan Wakantanka piya icar kiye ça hdutanin.

41. Oyate kin iyurpa xni tuka tona otokakeya ekta Wakan-tanka wicakarnige cigon hena en, waayataninpi kin unkiyepi, wiconŋe etanhan piya ikicage cin iyohakam om wauntapi qa waunyatkanpi ece.

42. Unkan oyate kin waho-konwicakiye unxipi qa nipi ŋapi ko en wayaco Wakantanka kage cin he iye ce, eya oyake unxipi.

43. He wicaxta wokcan kin owasin oyakapi; iye caje kin eciyatanhan tuwe wicada kinhan woartani wokajuju kin yuke kta.

44. Inyan oie kin hena hecen eye cin he icunhan tona oie kin naronpi owasin Woniya Wakan awicahinrpaya.

45. Unkan tona wicadapi ohomni baxpapi kin opapi qon hena yuxinyayapi; Woniya Wakan wicaqu ece kin he Ikce-wicaxta iyepi kaex awicakaxtanpi kin heon etanhan.

46. Wicaceji tokeca on iapi qa Wakantanka yatanpi kin he naronpi. Hehan Inyan ayupte ça;

47. Tuwe mini terinda okihi qa hena baptem wicaqupi kte xni he; hena ege unkiyepi kin iyecen Woniya Wakan icupi ce, eye ça;

48. Itancan caje kin on baptem wicaqupi kta e konza. Hehan anpetu ota en yanke kta e cekiyapi.

WICOWOYAKE 11.

1. Ohnihde unpi kin qa hun-kawanjin kiciyapi Judeya *makoce* kin en yakonpi kin Ikcewicaxta Wakantanka oie icupi kin he naronpi;

2. Qa Inyan Jerusalem en hdi kin hehan tona ohomni baxpapi kin etanhanpi he om aki-nicapi;

3. Qa heyapi; Wicaxta ohomni baxpapi xni kin heca en wicayai qa om wayata ce.

4. Hehan Inyan wohdake ça owasin ecekcen owicakiyake ça heya;

5. Jope otonwe kin en woce-

kiye eya waun unkan wokiksu-ye xni wan en taku wowanyake wanmdaka, taku wan miniruha ska tanka iyececa, oise topa kin iciyakaxkapi, marpiya kin eciyatanhan kun aupi qa miye ekta mahiyohi.

6. He oparta manke a awa-cin waun unkan maka akan taku wahutopa qa wamanica qa wamakaxkan qa marpiya zitkadan, wanmdaka.

7. Qa wicaho wan; Inyan najin qa kte qa yuta wo, emakiye cin he nawaron.

8. Tuka mix; Itancan hecetu xni, taku ikceka qa axape cin tohini takudan mii kin ohna iyaye xni, epa.

9. Tuka marpiya kin eciyatanhan wicaho kin ake amayupta; Taku Wakantanka pakinte cin he ikceka eciye xni wo, eya.

10. Yamni akihde hecen econpi qa hehan marpiya kin ekta owasin hdokiyahdapi.

11. Unkan ito wicaxta yamni Kesareya etanhan miye ekta mahiyu xipi qon hena wanna tipi ohna waun kin itokam hinajinpi.

12. Hehan Woniya Wakan kin ix; Takudan cetunwicahda xni hena om yahde ktrce, emakiya. Unkan kunkawanjin kiciyapi xakpe om imdamde qa wicaxta qon he ti kin en unki-pi.

13. Hehan ix, token marpiya ohnihde wan iye ti kin en hina-jin e wanyake cin unkokiyakapi; hee kaken eciya; Jope ekta wicaxta ye wicaxi qa Simon Inyan eciyapi he u xi wo.

14. He taku eniciye kte cin on yani kta qa nakun tiyohnaka nitawa kin owasin, eya ce, eya.

15. Unkan mix tokaheya iwae cin hehan Woniya Wakan awicahinrpaya, tokag ehan unkiye *unkahinrpayapi* qon he iyecen.

16. Hehan Itancan oie kin kiksuya mahinhda; Awicakehan Jan mini on baptem wicaqu, tuka niyepi kin Woniya Wakan on baptem niçupi kta ce, eye cigon he.

17. Hecen unkiye Jesus Mesiya Itancan kin wicaundapi kin Wakantanka taku unqupi qon he iyecen wicaqu kinhan mix matuwe he Wakantanka wakipajin kta he.

18. Hena oie kin naronpi unkan inina yukanpi qa Wakan-tanka yatanpi qa heyapi; Awicakehan Ikcewicaxta on nipi kta e ihduecetupi kin Wakan-tanka wicaqu.

19. Unkan Stepanos te cin en xicaya wicakuwapi qon heon enanakiya iyewicayapi kin hena Penike qa Kupros qa Antiyoka ekta ipi qa oie kin Juda oyate kin heceden owicakiyakapi.

20. Unkan hena wanjikji Kupros qa Kurene wicaxta kin, hena Antiyoka en hipi qehan Helenes wicaxta kin wowicakiyakapi qa Jesus Itancan kin oyakapi.

21. Qa Itancan nape kin hena om un, qa wicota wicadapi qa Itancan kin ekta ihduhominpi.

22. Hena taku kin okodakiye Jerusalem en un kin noge-

pi kin en otanin qa hehan Barnabas Antiyoka ekta i kta e ye xipi.

23. He ekta i unkan Wakan-tanka towaonxida kin wanyake çehan iyuxkin qa cante kin oco-wasin on Itancan kin opapi kta e owasin iwahokonwicakiya.

24. He wicaxta waxte qa Woniya Wakan wowicada ko on ojudan. Unkan wicota Itancan kin opapi.

25. Hehan Barnabas Salos akite kta e Tarsos ekta iyaya. He iyeya unkan Antiyoka en ahdi.

26. Qa waniyetu mdoketu ahna tipi wakan kin en mniciyapi qa oyate ota waonspewicakiyapi; unkan tokaheya Antiyoka ekta ookiye unpi kin Kristiyan eya cajewicayatapi.

27. Unkan anpetu kin hena en wicaxta wokcan Jerusalem etanhan Antiyoka ekta hipi.

28. Hena etanhan wanji Agabos eciyapi najin qa maka kin owancaya wicaakiran wan tanka u kta e Woniya Wakan kin eciyatanhan oyaka. He Kladiyos Kesar ni un kin hehan ecetu.

29. Unkan hehan ookiye unpi kin otoiyohi token okihipi kin hecen hunkawanjirkupi Judeya makoce kin en yakonpi kin wawokiyapi kin wicaqupi kta e konzapi.

30. Hecen econpi qa Barnabas Salos kici napepi kin on hunka wicayapi kin wicakai wicaxipi.

WICOWOYAKE 12.

1. Unkan hehan Herode wicaxtayatapi kin okodakiciye kin

etanhan wanjikji nagiyewicaye kta e nape yekiye,

2. 'Ca Jakob Jan cincu kin maza sagye on kte:

3. Qa he Juda oyate kin waxte dakapi e wanyaka hehan Inyan nakun icu; (aguyapi on naporyapi codan anpetu kin he ehan.)

4. He icu qa wicakaxka tipi kin en ehnaqe ça akicita ake xakpe awanyag wicaxi, woxnapi kin enakiyapi kinhan oyate kin ekta tankan au kta kecin.

5. Hecen Inyan wicakaxka tipi kin ohna awanyakapi unkan on okodakiciye kin Wakantanka nina cekiyapi.

6. Unkan Herode wanna tankan au kta hehan hanyetu kin he en Inyan akicita nom, uman itan anokatanhan ixtima wanke ça maza icicarira nom on iyakaxkapi, qa tiawanyag kiyapi kin hena tiyopa kin itokam wicakaxka tipi kin awanyakapi.

7. Unkan ito Itancan taohnihde ye cin he en hi, ojanjan wan wicakaxka tipi kin en iyoyanpa, qa Inyan cuwi kin en ape ça najin kiye ça heya; Kohanna najin wo. Unkan maza icicarira kin nape kin etanhan hinrpayaya.

8. Hehan marpiya ohnihde kin; Ipihdag kiton qa hanpokihan wo, eciya. Unkan ix ecen econ. Hehan; Xina hdowin qa miyahna u wo, eciya.

9. Hehan tankan ya unkan Inyan ihakam ye ça marpiya ohnihde taku ecakicon kin he wicaka e sdonye xni, tuka wawanyake wan wanyaka kecin.

10. Unkan wicakaxka tipi to-

kaheya qa iyokihe kin etanhan hinanpapi hehan maza tiyopa kin en iyohipi, he otonwe kin ekta hiyahdeye cin, he iye cinka wicakiyurdog iyaya. Unkan tankan yapi qa canku wanjidan ihunipi, hehan marpiya ohnihde kin *Inyan* erpeya kihda.

11. Unkan Inyan kiksuya hinhda qa heya; Nakaha awicakehan Itancan kin ohnihde tawa kin u xi qa Herode nape kin Juda oyate apepi ko owasin etanhan mayuxpa e sdonwanya.

12. He awakicin qa hehan Jan Markos eciyapi he hunku Mariya *eci-yapi* ti kin ekta i, hen wicota mniciyapi qa cekiya yukanpi.

13. Unkan Inyan tipi tiyopa kin en kabubu yanke cin he icunhan wicinyanna wan Roda eciyapi he ekta naron i;

14. Qa Inyan ho kin iyekiye çehan wowiyuxkin on tiyopa yurdoke xni tuka inyang hdiu qa, Inyan tiyopa kin itokam najin e oyaka.

15. Unkan, Niyuhnaxkinyanpi ce, eciyapi. Tuka ix hecen eya kitan. Hehan, Marpiya ohnihde tawa kin hee ce, eyapi.

16. Inyan tiyopa kin katin-yan katoto yanka. Unkan yurdokapi qa wanyakapi hehan yuxinyayapi.

17. Tuka ix inina yukanpi kta e namwicakicawin qa token on Itancan kin wicakaxka tipi kin etanhan tankan hiyu kiye cin he owicakiyaka, qa; Hena oie kin Jakob hunkawanjin kiciyapi kin kici owicakiyag ya po

eya: hehan tankan inanpe ça token iyaya.

18. Unkan anpa kamdeze cin hehan Inyan toki iyaye cin he akicita kin nina aoqoyapi.

19. Unkan Herode akita tuka iyeye xni hehan tiawanyag wicakiyapi kin hena wiwicawange ça wicaktepi kta e konza. Qa hehan Judeya makoce kin etanhan apamahde iyaye ça Kesareya en oounyan.

20. Unkan Herode Turos qa Sidon oyatepi kin wicakize wacin; tuka hena e wicocante wanjidan en hipi qa Blastos wicaxtayatapi ohehdepi tipi tawa kin awanyake cin he wowaxte kicagapi qa wookiye cinpi, iye tamakocepi kin wicaxtayatapi tawa kin on icar yapi kin heon etanhan.

21. Unkan anpetu wan caje-yatapi qon he en Herode wicaxtayatapi ihduze ça woyaco oiyotanke kin akan kiyotanke ça wowicakiyaka.

22. Hehan oyate kin hotan-kakiya hotaninpi qa; He wicaho xni, Wakantanka ho kin hee ce, eyapi.

23. Unkan ihnuhanna Itancan taohnihde ye cin he kaxtaka, Wakantanka wowitan kin qu xni kin heon etanhan. Unkan wamduxkadan on yutapi qa hecen ça iyaya.

24. Tuka Wakantanka oie kin icage ça yuota aya.

25. Unkan Barnabas Salos kici wawokiyapi qon hduxtanpi qehan Jerusalem etanhan hdiu-pi qa Jan Markos eciyapi he yuha hdapi.

WICOWOYAKE 13.

1. Unkan Antiyoka ekta okodakiciye kin en wicaxta wokcan waonspekiyapi ko wanjikji yukan, Barnabas qa Sumeon Niger eciyapi qa Lukiyos Kurene etanhan qa Manaen, Herode wicaxta itancan ihdawa qon he om icage cin hee, qa Salos.

2. Hehan Itancan kin cekiyapi qa takudan yute xni unpi kin icunhan Woniya Wakan kin ix, Barnabas Salos kici wokicanye iwicaweco kin heon ewicamicihde po, eya.

3. Unkan hehan takudan yute xni wocekiye eyapi qa nape on awicaputakapi qa hecen ayuxtan wicakiyapi.

4. Hena Woniya Wakan tokiya ye wicaxi unkan Selukiya ekta iyohipi qa hetanhan Kupros ektakiya watom yapi.

5. Qa Salamis en iyukanpi hehan omniciye tipi Juda oyate tawapi kin ohna Wakantanka oie kin oyakapi qa Jan he taokiye yapi.

6. Unkan wita kin opta iya-yapi qa Papos ekta iyohipi qehan wicaxta wapiyapi econ kin, wicaxta wokcan itonxni, Juda wicaxta kin heca wan Barjesus eciyapi he wanyakapi:

7. Sergiyos Palos wicaxta okonwanjidan qa makoce kin en itancan kiyapi kin he om un. *Wicaxta itancan* kin ix Barnabas Salos kici wicakico qa Wakantanka oie kin naron cin.

8. Tuka Elumas wapiye cin (caje kin hecen kapi,) he wicakige qa wicaxta itancan kiyapi kin wicadapi kin ayuxtan kiye kta e akita.

9. Hehan Salos (nakun Palos eciyapi) Woniya Wakan on ojudan he oparta najin,

10. Qa heya; Taku wohneye owasin on ojudan, qa wicoran xica owasin, Wakan xica cinca niye qa taku owotanna owasin toka yaye cin, Itancan tacanku owotanna kin kaxeyaye cin he aduxtan kte xni he.

11. Iho nakaha Itancan nape kin iyahdeniyan qa anpetu ota ixta nigonge qa anpetu wi kin wandake kte xni, eciya. Unkan ihnuhanna opo qa otpaza wan ahinrpaya; qa tuwe nape yus mani ye kta e akita iyaya.

12. Hehan taku econpi kin he wicaxta itancan kiyapi kin on nina yuxinyaya.

13. Unkan Palos tona om un kin hena Papos etanhan pa canan-iyeyapi qa Pampuliya ekta Perge en iyohipi. Unkan Jan awicayuxtan qa Jerusalem ekta icicawin hda.

14. Hehan Perge etanhan inanpapi qa Antiyoka Pisidiya en, he ekta ipi qa anpetu wakan hehan omniciye tipi kin en tin iyayapi qa iyotankapi.

15. Unkan woepe wicaxta wokcan ko hena yawapi enakiyapi hehan omniciye tipi kin en wicaxta itancan wicakiyapi kin ix wicakicopi qa, Wicaxta hun-kawanjin unniyanpi wicakicanpte oie wanji duhapi kinhan oyate kin owicakiyaka po, ewicakiyapi.

16. Hehan Palos najin qa namwicakicawin qa heya, Israel wicaxta qa tona Wakantanka kokipapi kin anagoptan yukan po.

17. Israel oyate kin de Wakantanka tawapi kin he hunkake wicunyanpi kin wicakarnige ça oyate kin Egipta makoce kin en yakonpi kin he icunhan yuwankan iwicacu qa isto yuwankan un kin on tankan awicau.

18. Qa waniyetu wikcemna topa hehanyan rewoskan makoce kin en won wicakiya.

19. Qa oyate xakowinpi Kanan makoce kin en ihang wicaye çehan makoce kin woohiye eciyatanhan kicipamni wicakiya.

20. Qa he iyohakam wicaxta wayaco kin heca wicaqu, waniyetu opawinge topa sanpa wikcemna zaptan hehanyan, ecen Samuel wicaxta wokcan qon icaga.

21. Unkan hehan wicaxtaya-tapi wan cinpi; qa Wakantanka Saol Kix cihintku kin Benjamin wicoun kin hetanhan wicaxta kin, he wicaqu, waniyetu wikcemna topa hehanyan.

22. Qa he reyata iyeye çehan Dawid icar wicakiciciye ça wicaxtayatapi kaga; he oyake ça heya, Dawid Jesse cihintku kin he iyewakiya, wicaxta waxte wakidake cin, he mitawacin kin ocowasin ecen econ kta ce.

23. Wakantanka token eye ciqon he eciyatanhan *wicaxta* kin he cinca kin etanhan Jesus Wanikiya kin Israel oyate kin icar wicakiciciya.

24. He hi xni kin itokam Jan tokaheya baptem on ihduacetupi kte cin he Israel oyate kin iyurpa en eyanpaha owicakiyaka.

25. Qa Jan oinyanke kin ihuni ye kte cin hehan hecen eya,

Mix matuwe kecanipi he. He miye xni, tuka wanji mihektam u kin he tahananpe siha kin etanhan kiyuxka owakihi xni ce.

26. Wicaxta hunkawanjin ciyapi Abereyam cinca wicaye cin qa tona Wakantanka kokipapi kin nix niyepi wiconi oie kin de oniciyakapi.

27. Tona Jerusalem en yakonpi wicaxta itancan wicayuhapi ko he iyekiyapi xni qa wicaxta wokcan iapi anpetu wakan eca yawapi ece kin he nakun *iyukcanpi* xni qa he ça yacopi kin en ecetu yapi.

28. Qa taku on te kte cin takudan iyeyapi xni qeyax he ktepi kta e Pilate cekiyapi.

29. Qa on taku wowapi en kagapi qon owasin ecetu yapi qehan can kin etanhan *tancan* kin icupi qa ohna hnakapi wanji en ehnakapi.

30. Tuka wiconte kin etanhan Wakantanka najin kiya.

31. Unkan tona Galile etanhan Jerusalem ekta om hi qon hena wanhdakapi qa oyate kin en oyakapi ece.

32. Unkan unkiye wotanin waxte unkoniciyakapi, nihunkakepi iwahowicaye ciqon he, iye cinca wicayapi he unkiyepi kin en Wakantanka ecetu kiya, Jesus piya icar kiye cin hee.

33. Odowan icinonpa kin en kaken owapi qon, Micinkxi kin he niye, anpe dehan cinca cica-ga ce.

34. Qa wicaye cin etanhan najin kiye ça wicarwin kin ekta i kte xni heon kaken eya, Dawid towaonxida wicake cin hena ci-cupi kta ce.

35. Heon etanhan *psam* to-keca wanji en hecen *eya*, Wanji Owotanna nitawa kin he wicarwin wanyake kta e iyowinya-kiye kte xni.

36. Dawid wicoicage tawa kin tanyan owicakiciran, Wakantanka tawacin kin eciyatanhan, hehan ixtima iyaye ça hunkake wicaye cin kici hnakapi qa wicarwin wanyaka.

37. Tuka tuwe Wakantanka najin kiye cin he wicarwin wanyake xni.

38. Heon wicaxta hunkawanjin ciyapi, wicaxta kin de eciyatanhan woartani kajujupi kin oniciyakapi e sdonya po.

39. Qa taku owasin Mowis tawoahope kin niyuowotanpidan kta e okitpani kin hena kaex etanhan tuwe wicada kinhan iye on yuwotanna kagapi kta.

40. Heon itoniçipa po, okini taku wicaxta wokcan kin en cajejatapi qon he en nihiyahdepi kta.

41. Tona ayaktapi xni kin wawanyakapi qa inihanpi qa yutakuni xni iyeiçiya po; anpetu nitawapi kin en wicoran wanji ecamon kta, qa wicoran kin he tuwe oniciyakapi exta wicayadapi kte xni ce, *eya*.

42. Unkan Juda wicaxta kin omniçiye tipi kin etanhan tankan hdicupi hehan wicoie kin hena anpetu wakan hepiya akta owicakiyakapi kta e Ikcewicaxta kin icekiyapi.

43. Unkan omniçiye kin wana enakiyapi hehan Juda wicaxta qa oyate tokeca etanhan he en ope wicakiyapi qon cekiya unpi kin hena wicota Palos Bar-

nabas kici owicapapi. Hena owicakiyapi qa Wakantanka towaonxida kin en unpi kta e iwahokonwicakiyapi.

44. Unkan ake anpetu wakan hehan Wakantanka oie naronpi kta e otonwe kin iyurpa en kiwitaya iheyapi.

45. Tuka Juda wicaxta kin hena wicota kin wanyakapi qehan winawizipi on ojupidan qa Palos taku eye cin hena akinica-pi qa aiapi.

46. Hehan Palos Barnabas kici waditake içicagapi qa heyapi, Wakantanka oie kin niyepi tokaheya oniciyakapi kta e hecetu tuka he ayaktapi xni qa owihanke wanin wiconi kin iye-nihantupi xni nihdukeanpi kin heon iho Ikcewicaxta kin ekta unkihdamnanpi.

47. Hecen Itancan kin iwahounyanpi; Ikeewicaxta iyoyanpa kin ecihnaka, maka ihanke kin hehanyan wiconi kin he niye kta e heon *hecamon*.

48. Ikcewicaxta kin hena oie kin naronpi qehan nina iyukxinpi qa Itancan oie kin yatanpi. Unkan tona owihanke wanin wiconi yuhapi kta e wicakarnigapi qon hena wicadapi.

49. Unkan Itancan oie kin makoce kin he owancaya oyakapi.

50. Tuka Juda wicaxta kin ix, winorinca okinihan cekiya unpi kin hena, qa otonwe kin en wicaxta itancanpi kin iyowicaxtakapi qa Palos Barnabas kici xicaya wicakuwapi qa makoce kin he etanhan hdicu wicayapi.

51. Tuka ix iyepi hena en

siha watuxekxeca askape cin hdatatapi qa Ikoniyon ekta ipi.

52. Unkan ookiye unpi kin wowiyuxkin Woniya Wakan ko on ojupidan.

WICOWOYAKE 14.

1. Unkan Ikoniyon ekta sakim omniciye tipi Juda wicaxta tawapi kin he en timahen yapi qa iapi, hecen Juda wicaxta Helenes ko ota wicadapi.

2. Tuka Juda wicaxta tona wicadapi xni kin hena Ikewicaxta kin iyowicapaxtakapi qa hunkawanjin kiciyapi kin wicakiyuxe wicayapi.

3. Unkan tehan en yukanpi qa Itancan kin on waditagya iapi, he qe wowaonxida oie kin hdaotanin qa wowapetokeca wakanyan econpi ko econ wicakiya.

4. Tuka otonwe kin oyate kin akipam iyeyapi; apa Juda wicaxta kin kici unpi qa apa ix ohnihde unpi kin hena owicapapi.

5. Unkan Ikewicaxta qa Juda oyate en itancan wicakiyapi ko xicaya wicakuwapi qa inyan on wicakininpi kta e takpe wicaupi kta *keyapi*.

6. He sdonyapi unkan Lustra qa Derbe, Lukaoniya en otonwe kin, makoce ihdukxan ko en onapapi.

7. Qa hen wotanin waxte kin oyakapi.

8. Unkan Lustra en wicaxta wan siha on okitpani yanka, tonpi kin ehantanhan huxte qa tohini mani xni.

9. He Palos ie cin naron; unkan he oparta yanke qa wica-

dapi on asni kte cin yuha e wanyake,

10. 'Ca hotankakiya, Nisiha on bosdan najin wo, eya. Unkan ix psin iyaye qa mani.

11. Palos taku econ kin he oyate kin wanyakapi qehan ho yuwankan icupi qa Lukaoniya iapi kin eciyatanhan, Taku wakan kin wicaxta ihduza unkiye-pi en kun unhiyupi ce, eyapi.

12. Qa Barnabas Diyos eya cajeyatapi qa Palos ix Hermes eya *caxtonpi*, oie kin en itancan kin hee, heon etanhan.

13. Hehan Diyos woxnapikagapi tawa kin otonwe kin en itokam yanke cin he tatanka warca ko *otonwe* tiyopa kin en ahi qa oyate kin kici woxna kta cin.

14. He ohnihde unpi Barnabas Palos kici naronpi qehan wokoyake hdupotapi qa oyate kin en inyankapi qa hotaninpi,

15. Qa heyapi, Wicaxta kin, tokeca hecen ecanonpi he, nix yaunpi kin wicaxta akantu heuncapi qa hena takuxnixni kin aduxtanpi qa Wakantanka ni unkin ekta nihduhomnipi kta e iwahokonunniciyapi; he marpiya maka qa miniwanca taku ohnaka ko owasin kage cin hee.

16. He wicoicage tanina qon he ehan oyate kin owasin canku tawapi kin ohna manipi kta e iyowinwicakiya.

17. Tuka tanyan econ qa marpiya kin eciyatanhan magaju unqupi, makoncage taku ota icar-ye cin hena ko, qa woyute wowiyuxkin ko on imnaunyanpi

kin he eciyatanhan ohiniyan ihduotanin.

18. Unkan hena oie kin on wawicakiyuxnapi kte cin oyate kin kitan ser ayuxtan wicayapi.

19. Hehan Antiyoka qa Ikoniyon etanhan Juda wicaxta wanjikiji en hipi qa oyate kin iyowicapaxtakapi qa Palos inyan on kininpi qa otowwe kin tankan yusdohan ayapi, wanna ʔa kecinpi.

20. Tuka ookiye unpi kin ihdukxan hinajin yukanpi hehan *Palos* najin hiyaye ʔa otowwe kin en iyaya. Unkan ihanrana hehan Barnabas kici Derbe ekta iyaya.

21. Qa otowwe kin he en wotanin waxte kin oyaʔapi qa ota waonspewicakiyapi qehan *Lustra* qa Ikoniyon qa Antiyoka ekta icicawin hdapi.

22. Qa ookiye unpi kin wicanagi waxag wicakiyapi, qa wowicada kin en kitanyan unpi kta e iwahokonwicakiyapi qa wokakije ota iyoopteya Wakan-tanka tokiconze kin en ipi kta e *owicakiyakapi*.

23. Unkan okodakiciye otoiyohi en hunka wicayapi kin wicakagapi qa takudan yute xni wocekiye eyapi qehan Itancan wicadapi qon he awanwicahdake kta e *icekiyapi*.

24. Unkan Pisidiya opta yapi hehan Pampuliya en iyohipi.

25. Qa Perge en oie kin oya-kapi hehan Ataliya ekta apamahde iyayapi.

26. Qa hetanhan Antiyoka e kta watom hdapi, wicortani wana hduxtanpi kin heon, Wakan-

tanka towaonxida kin yuhapi kta e icekiyapi qon he hetu.

27. Hen hdipi qa okodakiciye kin mniciye wicaxipi qa Wakan-tanka token econ wicakiye cin he owicakiyakapi qa wicadapi tiyopa wan Ikcewicaxta kin wicakiyurdoke cin he nakun *oya-kapi*.

28. Qa hen ookiye unpi kin om tehan owanji yukanpi.

WICOWOYAKE 15.

1. Unkan wicaxta wanjikiji Judeya etanhan apamahde yapi qa hunkawanjin kiciyapi kin waonspewicakiyapi qa, Mowis toope kin eciyatanhan ohomni bannixpapi xni kinhan wiconi duhapi kte xni ce, eyapi.

2. Unkan Palos Barnabas kici hena wicakigepi qa nina awicakinicapi hehan wiwicawangapi kin he on Palos Barnabas kici qa iyepi kin etanhan wicaxta tokeca wanjikiji ko ohnihde unpi qa hunka wicayapi kin Jerusalem ekta yakonpi kin hena en wicayapi kta e konzapi.

3. Okodakiciye kin hena hecen ye wicaxipi unkan Penike qa Samariya opta yapi qa Ikcewicaxta ihduhomnipi kin he oyakapi; qa hunkawanjin kiciyapi kin owasin en wowiyuxkin tanka kagapi.

4. Jerusalem ekta ipi unkan okodakiciye ohnihde unpi qa hunka wicayapi kin hena ko tin ye wicaxipi; qa hehan Wakan-tanka token econ wicakiye cin owasin ohdakapi.

5. Qa Parisiyan yuomdecapi kin etanhan wanjikiji najinpi qa

hecen awacinpi qa, ohomni baxpapi qa Mowis toope kin ope wicaxipi kta keyapi ce, *eya oya-kapi*.

6. Unkan oie kin de akiiapi kta e on ohnihde unpi qa hunka wicayapi kin witaya eimniciyapi.

7. Qa nina hdokinicapi hehan Inyan najin qa hewicakiya, Wicaxta hunkawanjin ciyapi kin, ehanna euntanhanpi Wakantanka miye makarnige ça mii kin eciyatanhan Ikcewicaxta kin wotanin waxte oie kin naronpi qa wicadapi kta e konza e sdoniyapi.

8. Qa Wakantanka wicacante kin sdonye cin he wicayaotanin qa Woniya Wakan unkiye *unqupi qon* he iyecen wicaqu.

9. Qa takudan ocitkonze xni unkagapi, iye cantepi kin nakun wicadapi kin on wicakipakinta.

10. Heon nakaha tokeca e Wakantanka iyutan yayapi qa can napinpi wan hunkake wicunyanpi qa unkiyepi kin yuha unkokihipi xni e ookiye unpi kin tahu kin en eyahnakapi kta he.

11. Taku Jesus Mesiya Itancan kin towaonxida kin on ix iyepi kin wiconi *yuhapi kte* cin he iyecen unkix unhapi kta e wicaundapi ce.

12. Hehan omniciye kin owasin inina yukanpi qa Barnabas Palos kici wowapetokeca wakan-yan econpi ko Wakantanka Ikcewicaxta kin ekta econ wicakiye cin hena ecen ohdakapi kin naronpi.

13. Unkan wanna ayaxtanpi hehan Jakob ayupte ça heya;

Wicaxta hunkawanjin ciyapi miye namaron po.

14. Tokaheya ekta token Wakantanka Ikcewicaxta kin etanhan oyate wanji, iye caje kin on, iwicacu kta e ekta wicai qon he Simon oyaka.

15. Qa he kici wicaxta wokean oie qon okonwanjidan, kaken wowapi en kagapi;

16. He iyohakam mihdamna qa Dawid ti kin jujuwahe cin he piya wakage kta, mdecahe cin hena ake wakage ça ecen he wakiye kta.

17. Qa hecen wicaxta okaptapi kin Ikcewicaxta owasin ko tona micaje icajewicayatapi kin hena Jehowa akitapi kta ce, Itancan kin hena owasin econ kte cin he heya ce.

18. Otokaheya tanhan Wakantanka taku icarye cin owasin sdotkiya.

19. Heon etanhan mix kaken imdukean, Tona Ikcewicaxta kin Wakantanka ekta ihduhomnipi kin hena nagiyewicunyanpi kte xni.

20. Tuka wakagapi on axapapi qa wawicirarapi econpi qa we qa taku we ye xni yutapi kin hena ayuxtanpi kta e wowapi wicunkicagapi kta.

21. Wanakaja tanhan tona Mowis oyakapi kin hena otowe kin otioyohi en yukanpi qa anpetu okirpapi eca omniciye tipi kin ohna he yawapi ece, *eya*.

22. Hehan ix iyepi kin etanhan wicaxta karnigapi kin heca Judas Barsabas eciyapi qa Silas, hunkawanjin kiciyapi kin en

wicaxta okinhan hena Palos qa Barnabas kici Antiyoka ekta ye wicaxipi kta e ohnihde unpi, hunka wicayapi kin, okodakiciye kin owasin ko iyokipipi.

23. Qa heciya ayapi kta e kaken wowapi kagapi; Ohnihde unpi kin hunka wicayapi, hunkawanjin kiciyapi kin hena ko, hunkawanjin kiciyapi Ikce-wicaxta etanhan Antiyoka qa Suriya qa Kilikiya en yakonpi kin, Wookiye yukan po.

24. Unkiyepi etanhan wanjikji iyayapi qa wicoie on nagi-yeniyampi qa ninagipi kin nipa-hohopi qa, Ohomni banixpapi qa wicoope kin oyapapi kta ce eniciyapi ce naunronpi, unkiye tohini heye wicunxipi xni tuka:

25. Heon etanhan tawacin wanjidan kaken iyounkipipi, Barnabas qa Palos waxte wicunkidakapi kin hena om wicaxta karnigapi kin ye wicunxipi kta.

26. Hena wicaxta kin wiconi erpekiyapi seca, Jesus Mesiya Itancan unkiyapi kin heon etanhan.

27. Hecen Judas qa Silas ye wicunxipi, hena e oie kin on atayedan hena hecen oniciyakapi kta.

28. Woniya Wakan kici hecen iyounkipipi, Waqinpi tokeca unkanihnakapi kte xni tuka dena taku owotanna kin hecehnana;

29. Taku wakagapi wakiyuxnapi qa we qa taku we ye xni yutapi qa wawicirarapi econpi kin hena aduxtanpi kta. Hena itehanyan yaunpi kinhan tanyan

ecanonpi kta. Tanyan yaunpi nunwe.

30. Ye wicaxipi kin hena Antiyoka ekta ipi qa oyate kin kawitaya iheyapi hehan wowapi kin he wicaqupi.

31. He yawapi unkan wahokonwicakiyapi kin on nina iyuxkinpi.

32. Unkan Judas qa Silas wicaxta wokean kin hecapi heon hunkawanjin kiciyapi kin oie ota on wahokonwicakiyapi qa wicayasutapi.

33. Wanna anpetu ota en yukanpi hehan hunkawanjin kiciyapi kin hena ohnihde unpi kin ekta wookiye hde wicaxipi.

34. Tuka Silas en un kta e iyokipi.

35. Palos qa Barnabas Antiyoka en unpi wicaxta tokeca ota ko *oyate* kin waonspewicakiyapi qa Itancan oie kin oyakapi.

36. Unkan iyohakam anpetu tonana hehan Palos Barnabas heciya, Tukten Itancan oie kin unkoyake ciqon ake otonwe otoiyohi ekta unye ça hunkawanjin wicunye cin wanwicundhake ça token yakonpi kin *sdonunye kta ce, eya.*

37. Unkan Barnabas he ix Jan Markos eciyapi yuha yapi kta cin.

38. Tuka he Pampuliya ekta erpewicaye ça wicortani kin en owicape xni qon heon etanhan Palos he yuha yapi kta e iyoiki xni.

39. Heon nina hdokinicapi qa hecen otoiyohi erpekiciyapi: unkan Barnabas Markos yuha Kupros ekta watom iyaya.

40. Tuka Wakantanka towa-onxida kin yuhe kta e hunkawanjin kiciyapi kin wocekiye eyapi qehan Palos Silas karnige ça iyaye,

41. 'Ca Suriya qa Kilikiya opta iyaye ça okodakiciye kin suta wicakaga.

WICOWOYAKE 16.

1. Hehan Derbe qa Lustra ekta iyohi qa ookiye wanji hen un Timoteyos eciyapi Juda winorinca wicake cin he cihintku tuka atkuku kin e Helenes oyate kin etanhan.

2. Hunkawanjin kiciyapi Lustra qa Ikoniyon en yukanpi kin he, he *ookiye kin* waxte e oyakapi.

3. Hetanhan Palos kici ya cin qa Juda wicaxta hen yukanpi kin hena on he icu qa ohomni baxpa, atkuku kin Helenes heca e owasin sdoniyapi.

4. Unkan otonwe iyaza yapi qa ohnihde unpi kin hunka wicayapi ko Jerusalem en yukanpi kin woahope kagapi qon hena *oyate kin* tanyan yuhe wicaxipi.

5. Hecen okodakiciye kin wicadapi kin en sutaya ahe ça anpetu otoiyohe nina yuota aya.

6. Unkan Pugiya qa Galatiya makoce kin opta yapi qa Woniya Wakan kin Asiya en oie kin oyake xni wicaxi.

7. Hehan Musiya ehan ipi qa hetanhan Bituniya ekta ye wacinpi tuka Woniya Wakan kin iyowicakí xni.

8. Unkan Musiya etanhan iyayapi qa Troas en iyohipi.

9. Unkan hanyen Palos wowanyake wan wanyaka, Wicaxta wan Makedoniya etanhan taninyan inajin qa cekiye ça, Makedoniya en u qa ounkiya po, eya.

10. Wowanyake kin de wanyake cin heon hinnakaha Makedoniya heciya unyanpi kta e uncinpi, Itancan kin hena wotanin waxte kin owicunkiyakapi kta cin heon unkcipi e unhduncanpi.

11. Hecen Troas etanhan pa canan iyeunyanpi qa Samotrake ekta owotanna unyanpi qa hetanhan ihanrana Neapolis en unkipi.

12. Qa hetanhan Pilipi en unkipi, otonwe teca qa Makedoniya makoce onxpa kin he en otonwe tokapa kin hee. Qa anpetu tonana otonwe kin he en unkanpi.

13. Unkan anpetu wakan hehan otonwe kin etanhan inaunpapi qa wakpa wan icahda wocekiye eyapi ece qon he en *unkipi*; hen unkiyotankapi qa winorinca ece en mniciyapi kin hena owicunkiyapi.

14. Unkan winorinca wan Ludiya eciyapi Tuatira otonwe kin etanhan, wokoyake duta ece yuha wopeton kin heca Wakantanka kokipecyahan un he naron yanka: unkan cante kin Itancan kin yuzamni, on Palos oie kin anagoptan.

15. Unkan tiyohnaka kin om baptem qupi hehan ix ceunkiyapi qa, Itancan kin on wicawaka kecanmayakinpi hecinhan wati kin en tin yapi qa ohna

yukan pe, eye ça ecen econ un-kiyapi.

16. Hetanhan wocekiye eya unyanpi eca wicinyana wan itkounkipapi ece he taku wakan woyaka ece kin yuhe ça wakanyan wolhdağ un kin heon tawa yapi kin taku ota wicakicamna.

17. He Palos unkiyepi ko unkihakam u qa, Wicaxta kin dena Wakantanka tehan wankantuya un kin taokiyeye wicayecin, wiconi canku kin unkoki-yakapi kin hena eepi ce, eya hoyekiya.

18. Qa anpetu ota hecen econ. Tuka Palos nagiyeye cin heon hakikta qa, Jesus Mesiya caje on winorinca kin de etanhan tankata inanpe cixi, taku wakan kin eciya; unkan orankoya tankata inanpa.

19. Unkan wicaxta winorinca kin de yuhapi kin heepi taku kamnanpi kte cin he akitakunipi xni kin he wanyakapi e etanhan Palos Silas kici wicayuzapi qa tipi hocoka kin ekta wicaxta tokahe wicakiyapi kin en awicayapi.

20. Qa wicaxta itancan wicakiyapi kin en wicakaipi qa heyapi, Wicaxta kin dena Juda wicaxta kin hecapi, otonwe unkitawapi kin nina nagiyeyapi;

21. Qa wicoran unkieupi qa unkopapi kta e unkokihipi xni kin heca onspewicakiyapi; Roma wicaxta kin heuncapi na-kaex.

22. Unkan oyate kin owasin witaya takpe wicaupi, qa wicaxta itancan wicakiyapi kin tawo-

koyakepi kin awicayupotapi qa wicakapsinpsinte wicaxipi.

23. Ota awicapapi qa hehan kaxka wicahnakapi qa wicakaxka tipi awanyag kiyapi kin tanyan awanwicayag xipi.

24. He hecen econ xipi unkan wicakaxka tipi temahentuya kin he en onawicataka qa siha kin can on kaxkapi ece kin en sutaya kaxka wicahnaka.

25. Unkan hanye cokaya hehan Palos Silas kici Wakantanka cekiyapi qa yatan dowanpi, unkan wicaxta wicakaxkapi kin he naronpi.

26. Unkan ihnuhanna maka kin nina huhuzahan qa tipi ahe cin hena yuhuhuzapi qa tiyopa kin owasin kazamni iyaye ça on pawicartapi kin owasin mdecahan hinhdha.

27. Hececa unkan wicakaxka tipi awanyag kiyapi kin kikta qa tiyopa kin yuzamni han wanyaka unkan wicaxta wicakaxkapi kin owasin kihdapi kecin qa maza sagye ehdaku qa on içikte kta;

28. Tuka Palos nina koyekiyeye ça, Kiuni içiye xni wo, owasin den unkanpi ce, eya.

29. Hehan *tipi awanyag kiyapi* kin petijanjan da qa *yuha* tin iyaye ça cancan Palos Silas kici siha hdepi kin en erpeiçiya;

30. Qa tankan awicaye ça, Itancanpi wani kta e token ecamon kta he, ewicakiya.

31. Unkan, Jesus Mesiya Itancan kin wicada wo, hecen nicinca om yani kta ce, eciyapi.

32. Qa Itancan oie kin oki-

yakapi qa tona ti kin en yukan-pi kin hena owasin koya.

33. Naharin hanyetu unkan iwicaacu qa oape kin wicakiyu-jaja qa hehan baptem qupi, ti-yohnaka owasin ko.

34. Qa iye ti kin en awicaki qa won wicaya; qa tiyohnaka kin om wicada qa iyuxkin.

35. Wanna anpa unkan itancan wicakiyapi kin akicita eyanpaha kin ekta ye wicaxipi qa, Wicaxta kin hena wicakiyuxka po, eyapi.

36. Unkan wicakaxka tipi awanyag kiyapi kin hena oie kin Palos okiyake ça, Itancan wicakiyapi kin niciyuxkapi kta keya hoxi hipi, heon etanhan tankan kinanpapi qa wookiye hda po, eya.

37. Tuka Palos hena hewicakiya, Roma wicaxta heuncapi tuka unyacopi xni ecen taninyan unkapsinsintapi qa onatag eunhnakapi qa hinnakaha anarbeya hde unxipi he: hiya, iye atayedan upi qa tankan unkaupi kta ce, eya.

38. Hehan akicita eyanpaha kin itancan wicakiyapi kin dena owicakiyakapi, unkan Roma wicaxta kin hecapi e naronpi kin heon inihanpi.

39. Qa iye atayedan ekta ipi qa cewicakiyapi qa tankan awicaupi qa otonwe kin etanhan hde wicaxipi.

40. Unkan wicakaxka tipi kin etanhan tankata inanpapi qa Ludiya ti kin en ipi; qa hunkawanjin kiciyapi kin wanwicahdakapi unkan wicakihnanpi qa hehan etanhan tankan kinanpapi.

WICOWOYAKE 17.

1. Unkan Ampipolis qa Apoloniya opta yapi hehan Tesalonike ekta ipi, hen Juda oyate omniciye tipi yuhapi kin wanji han.

2. Unkan Palos token econ ece kin ake ecen econ qa timahen i qa anpetu okirpapi yamni wowapi wakan kin eciyatanhan oyate kin wowicakiyaka.

3. Ie ça Mesiya te kte ça wiconte kin etanhan najin kta e hecetu e yawicake ça, Jesus oci-ci-yakapi kin he Mesiya kin ee ce, eya.

4. Unkan hunr wicadapi qa Palos Silas kici owicapapi, Helenes wicaxta owotanna ota qa winorinca tokapapi kin wani-stinpidan xni.

5. Tuka Juda oyate wicadapi xni kin hena worinyanpi qa wopeton tipi hocoka kin etanhan wicaxta xica wanjikji iwicacupi qa kiwitaya iheyapi qa otonwe kin ocowasin oqoye yapi hehan Jason ti kin takpe ipi qa oyate kin en tankan hiyu wicayapi kta e akitapi.

6. Qa iyewicayapi xni hehan Jason hunkawanjin kiciyapi wanjikji kici otonwe kin en wicaxta itancanpi kin ekta awicaipi qa hotankakiya hotaninpi, Tona maka kin yuohdapsxin-yan erpeyapi qon hena den hipi.

7. Qa Jason hena tin ye wicaxi. Unkan hena owasin Kesar wicoope kage cin opapi xni qa, Jesus he wicaxtayatapi tokeca ce, eya oyakapi ce eyapi.

8. Qa otonwe kin en wicaxta

itancanpi kin oyate ko hena naronpi kin inihan wicayapi.

9. Unkan Jason qa umanpi kin taku iwakta wicayapi hehan awicayuxtanpi.

10. Hehan hunkawanjin kiciyapi kin Palos Silas kici han-yen Bereya ekta awicayapi. Hena ekta ipi qa Juda oyate omniciye tipi yuhapi kin he en timahen yapi.

11. Hena ix Tesalonike oyate kin sam iyeya waditapika, oie kin tawacin inarni icupi qa hena hecetu e sdonyapi kta heon anpetu iyohi wowapi wakan en akitapi ece.

12. Qa ota wicadapi, Helenes winorinca okinihan qa nakun wicaxta ota.

13. Tuka Bereya ekta Palos Wakantanka oie kin oyake cin he Juda wicaxta Tesalonike en un kin hena sdonyapi qehan heciya nakun ipi qa oyate kin wicayaxkixkapi.

14. Unkan hehan hunkawanjin kiciyapi kin Palos miniwanca ohna ye kta e ayapi; tuka Silas qa Timoteyos hen owanji yukanpi.

15. Tona Palos ayapi kin hena Atenas en aipi qa Silas Timoteyos kici kohanna en upi kta e iwahowicaye cin he hoxi hdapi.

16. Unkan hena Atenas ekta upi kta e Palos awicape yanke cin he icunhan otonwe kin wakagapi on ojudan e wanyake qa on wacin iyokixica hinhdia.

17. Qa heon omniciye tipi kin ohna Juda oyate tona wakinihan un kin hena ko om akini-ca qa nakun anpetu otoiyohi

wopeton tipi hocoka kin ekta tona itkowicakipe cin hena om.

18. Unkan hehan Epikureyon qa Stoikon oyate kin etanhan wicaxta ksapapi wanjikji Palos itkokipapi qa, I wakan kin de token eye kta he, hunr eyapi, qa hunr ix, He taku wakan tokeca ehde sececa ee eyapi; Jesus qa wiconte etanhan woekicetu kin hena owicakiyaka heon etanhan *hecinpi*,

19. He icupi qa Areyos paha kin ekta aipi qa, Woonspe teca odake cin he taku kin sdonunyanpi kta uncinpi.

20. Taku wotanin tokeca noge on naron unyayapi kin hena token kapi kin sdonunyanpi kta ee, eciyapi.

21. Atenas oyate qa wicaxta tokeca en hi yukanpi kin owasin takudan tokonpi xni, tuka wotanin oyakapi qa naronpi kin hecedan.

22. Hehan Areyos paha cokaya Palos najin qa heya, Atenas wicaxta kin, taku owasin nina wakan yadapi e wanmdaka.

23. Naka taku wakan yadapi kin en awahimdanda unkan iho wakagapi wan, Taku wakan sdonyapi xni un kin, akan owapi kin he iyewaye. He iyukean-xniyan ohoyadapi kin ee e oci-ciyakapi.

24. Tuwe maka taku ohnaka ko owasin kage qa marpiya maka ko Itancan kin hee, heon wakeya wicanape on kagapi kin ohna ti xni,

25. Qa taku icakije cin heon wicaxta nape kin on okiyapi xni un, qa iye owasin wiconi qa

woniya taku owasin ko wicaqu ece.

26. Qa we wanjidan on wicaxta hiyeye cin maka kin owancaya etipi kta e wicakage ça makoncage tokaheya konzapi kin qa makoe onxpaxpa yuha etipi kin owasin iwicakiciyuta.

27. Heon Itancan kin akitapi kta, okini yutantan akitapi kinhan iyeyapi kta, otoiyohi unki-tehanpi xni un tuka ce.

28. Iye atayedan on unnipi qa unxkanxkanpi qa unyakonpi ce. Wicaxta odowan kagapi ece kin heca enitanhanpi wanjikji hecen eyapi, He cinca unyanpi ce.

29. Wakantanka cinca unyanpi kin heon Wakantanka maza ska zi qa maza ska qa inyan wicaxta wayupika wacinksape cin on bagopi kin iyacinpi kta e unkecinpi kte xni.

30. Wicoicage ksape xni unqon hena on Wakantanka ixta hdakpa, tuka wanna wicaxta hiyeye cin *woartani* on iyopeiçiye wicaxi.

31. Qa anpetu wan en wicaxta kin woowotanna on wicaya-co kta e konza, wicaxta karnige ciqon he on *hecon kta*, qa wiconte kin etanhan najin kiye cin heon, he owasin sdonye wicaya.

32. Wicate cin piya icaryapi kin he naronpi unkan hunr irarapi, qa hunr ix, He on ake nannironpi kta ce, eyapi.

33. Unkan hecen hena wicacokaya tanhan tankan kihda.

34. Tuka wicaxta wanjikji opapi qa wicadapi; Dionusiyos Areyos paha omniciye kin en

ope ciqon he wanji ee qa winorinca wan Damaris eciyapi qa nakun toktokecapı.

WICOWOYAKE 18.

1. Hena iyohakam Palos Atenas ayuxtan qa Korintos ekta i.

2. Qa hen Juda wicaxta wan iyeya, Akula eciyapi Pontos entonpi qa axkatudan Italiya etanhan hiyu, Priskila eciyapi he kici (Kladiyos Juda wicaxta kin owasin Rome ayuxtan wicaxi, heon etanhan.) Unkan *Palos* hena en en wicahi;

3. Qa kici wicortani okonwanjidan heon om un qa kici rtani, wakeya kagapi kin hecapı.

4. Qa anpetu wakan eca omniciye tipi kin ohna wowicakiyaka qa Juda oyate Helenes ko awacin wicaya.

5. Unkan Silas qa Timoteyos Makedoniya etanhan en hipi hehan Palos nagi kin ekta iyopaxtag içiye ça Jesus he Mesiya kin ee ce Juda oyate kin owicakiyaka.

6. Unkan hena ix kipajinpi qa aiapi hehan Palos wokoyake hdatata qa hewicakiya; Niwe kin nipapi kin en aniupi nunwe, miye wakaxote xni waun, iho wo detanhan Ikcewicaxta kin ekta mde kta ce.

7. Qa hetanhan tankan ye ça wicaxta wan Wakantanka ohoda Justos eciyapi he ti kin omniciye tipi kin ikiyadan han, he tipi kin tin iyaya.

8. Unkan Krispos omniciye tipi kin en itancan kin he Itancan kin wicada tiyohnaka owa-

sin kici; qa Korintos oyate kin ota naronpi qa wicadapi unkan baptem wicaqupi.

9. Unkan hehan hanyen wowihamde en Itancan kin Palos heciya, Ihnuhan koyakipe cin, tuka nina ie qa inina yanke xni wo.

10. Miye cicica qa tuwedan kiuniniye kta e takpe niu kte xni; otonwe kin de en oyate ota wicamduha, eya.

11. Unkan hen wi ake xahdogan hehanyan iyotanke qa Wakantanka oie kin onspewicakiya.

12. Unkan Galiyo Akaya makoce kin en itancan un kin hehan Juda oyate witaya Palos takpe ipi qa woyaco oiyotanke kin en ahipi;

13. Qa, Woahope kin eciyatanhan xni Wakantanka cekiya-pi kta e wicaxta kin onspewicakiye cin he dee ce, eyapi.

14. Unkan Palos i hdukawa kta hehan Galiyo Juda oyate kin hewicakiya, Juda wicaxta kin, de taku owotanna xni qa xicaya oranyanpi kin ee unkanx iyowincieiyapi kta;

15. Tuka wicoie qa wicacaje wiwangapi kin heca hecinhan nix ito ekta etonwan po, hena taku kin en wamdaco kte xni ce, eye qa;

16. Hehan woyaco oiyotanke kin etanhan tankan hdicu wicaya.

17. Unkan Helenes wicaxta kin owasin Sostenes omniciye tipi kin en itancan kin he icupi qa apapi, woyaco oiyotanke kin hetu. Tuka Galiyo hena taku kin ekta ewacin xni yanka.

18. Unkan he iyohakam Paulos anpetu ota hen yanke cehan hunkawanjin kiciyapi kin awicayuxtan ye qa Suriya ektakiya watom iyaya, Priskila Akula kici opapi. Kenkreya ekta paha kin bakixda, iconza nakaex.

19. Hehan Epesos ekta iyohi qa hen *tona om un* kin hena erpewicaye qa ixnana omniciye tipi kin tin iyaye qa Juda wicaxta kin om akinica.

20. Unkan en tehan owanji yanke kta e cinpi tuka wicada xni.

21. Qa nape wicayuze qa hewicakiya; Woxnapi u kte cin Jerusalem ekta he owape kta, tuka Wakantanka iyokipi kinhan ake en cihdipi kta, eya; hehan Epesos etanhan watom iyaya.

22. Qa Kesareya ekta huta ihuni qa reyata ye qa okodakiciye kin nape wicayuze cehan Antiyoka ekta apamahde iyaya.

23. Qa hen anpetu ota yanke cin hehan hetanhan inanpe qa Galatiya qa Pugiya makoce kin owancaya ye qa ookiye unpi kin owasin waxag wicakiya.

24. Unkan Juda wicaxta wan Apolos eciyapi Aleksandreya en tonpi, wicaxta wayapike qa wuwapi wakan on waxaka, he Epesos ekta iyohi;

25. Wicaxta kin he Itancan tacanku kin onspe qa cante kin ekta oranko heon ninana ie qa Itancan taku tawa kin onspewicakiya, Jan baptem tawa kin hecedan sdonya tuka.

26. He omniciye tipi kin ohna waditagya ia unkan Akula qa Priskila he naronpi qa Wa-

kantanka tacanku kin sanpa tanyan okiyakapi.

27. Unkan Akaya ekta ye wacin hehan hunkawanjin kiciyapi kin heciya wowapi wicakicagapi qa he iyowinkiyapi kta eiwahokonwicakiyapi. He heciya i qa tona wowaonxida kin on wicadapi qon hena nina owicakiya;

28. Qa Juda oyate kin omni-ciye en nina awacin wicaye qa wowapi wakan kin eciyatanhan Jesus he Mesiya kin ee e yatanin.

WICOWOYAKE 19.

1. Unkan Apolos Korintos en un kin he icunhan Palos ireyata makoce kin opta ye qa Espesos ekta iyohi qa hen ookiye wanjikji iyewicaya;

2. Qa hewicakiya, Wicayadapi kin ehantanhan Woniya Wakan iyacupi he. Unkan ix, Woniya Wakan yukan e naharin naunronpi xni ce; eyapi.

3. Unkan Taku on baptem niçupi he, ewicakiya. Jan baptem kin he *unqupi* ce, eyapi.

4. Unkan Palos, Jan ihducetupi kte cin on baptem wicaqu qa oyate kin tuwe u kte cin he wicadapi kta, kewicakiya, he Jesus Mesiya kin ee ce, eya.

5. He naronpi unkan Jesus Itancan caje kin on baptem wicaqupi.

6. Hehan Palos nape on awicaputake qa Woniya Wakan en wicahi, unkan ceji tokeca on iapi qa wokcanpi.

7. Hena owasin wica ece wikeemna ake nonpa.

8. Unkan omni-ciye tipi kin tin iyaye qa wi yamni waditagya ie qa waknica qa Wakantanka tokiconze taku tawa kin onspewicakiya.

9. Tuka wanjikji suta içicagapi qa wicadapi xni kin hena wicota en canku kin de aiapi qehan hena awicayuxtan qa ookiye unpi kin aiyog iyaye wicaye qa anpetu otoiyo *wicaxta* wan Turanos eciyapi he oyawa tipi yuhe cin ohna oyaka ece.

10. Waniyetu nonpa hehanyan hecen econ unkan tona Asiya en yakonpi kin hena owasin Jesus Itancan oie kin naronpi, Juda Helenes *wicaxta* ko.

11. Unkan Palos nape kin on Wakantanka wapetokeca wakan kin econ kiya.

12. Hecen iye tancan kin e-tanhan napipakinte qa makua-karpe kin wayazanpi kin en akipi unkan wowayazan kin ayuxtan iyaye qa taku wakan xicapi kin tankan inanpapi.

13. Unkan wanjikji Juda wicaxta wapiyapi kin heca tona taku wakan xica yuhapi kin hena en Jesus Itancan kin cajeyata utapi qa, Jesus Palos oyake cin he cajeyan naunron po, eyapi.

14. Qa Juda wicaxta Woxnapi kagapi itancan wanji Skewa eciyapi he cihintku xakowin, hena hecen econpi.

15. Tuka taku wakan xice cin he ayupte qa, Jesus sdonwaye qa Palos nakun sdonwaya tuka nix nituwepi he, eya.

16. Unkan wicaxta taku wakan xica yuhe cin he iyawicar-paya, hecen tancodan capapi

ecen tipi kin etanhan tankan najicapi.

17. Unkan tona Epesos en yukanpi kin Juda qa Helenes oyate kin owasin he sdonyapi; qa wokokipe tanka owasin awicahinrpaya unkan Jesus Itancan caje kin yutanpi.

18. Unkan tona wicadapi kin etanhan ota en ahi qa wohdaka-pi, wicoran qon ohdakapi;

19. Qa tona wicoran wakan yuhapi kin hena wicota wowapi tawapi kin en ahipi qa owasin wicitokam rurnar yapi; hena iyunwin kin hdawapi qa maza ska kektopawinge wikcemna zaptan iyawapi.

20. Hecen Itancan oie kin nina icage qa ohiya.

21. Unkan hena taku kin wana enakiyapi hehan Palos Woniya Wakan eciyatanhan konza, Makedoniya qa Akaya opta ye qa hehan Jerusalem ekta ye kta, qa, Heciya wai kinhan hehan Rome wanmdake kta ce, eya.

22. Qa ookiye wicayuhe cin nom Timoteyos qa Erastos hena Makedoniya ekta ye wicaxi, tuka ix iye anpetu tonana Asiya en owanji yanka.

23. He icunhan canku kin de on nina owodutaton.

24. *Wicaxta* wan Demetriyos eciyapi, maza ska kaga heca, he maza ska tipi ciqadan Artemis kicage qa hecen tona en econpi kin woyuha ota wicakicamna.

25. Hena e qe tona opeya rtanipi kin hena ko wicakico qa hewicakiya, *Wicaxta* kin, wicortani kin de on woyuha untonpi e sdonyayapi.

26. Qa Epesos hecedan xni

tuka Asiya owancaya, Palos *wicaxta* kin de oyate ota wahokonwicakiye qa, Taku wakan nape on kagapi kin hena wakan xni ce, eya owicakiyaka e sdonyayapi qa nayaronpi.

27. Qa hecen on wicortani unhapi kin he atakuni kte xni seca, qa hecedan xni tuka Artemis taku wakan tanka tipi wakan tawa kin taku dapi kte xni qa wowitan hduhe cin yutakuni kte xni, he qe Asiya owancaya qa oyate kin iyurpa ohodapi tuka ce, eya.

28. He naronpi unkan nina canteptanyanpi qa, Artemis Epesos oyate tawapi kin he tanka ce, eyaya hotaninpi.

29. Otonwe kin owancaya nina owodutaton qa Gayos Aristarkos kici Makedoniya wicaxta kin Palos om hipi qon hena iwicacupi qa tawacin wanjidan owanyake tipi kin en inyang yapi.

30. Unkan Palos oyate kin en wicai kta tuka ookiye unpi kin iyokipi xni.

31. Qa Asiya en wicaxta tokapapi wanjikji iye takuwicaye cin hena Palos wahoyapi qa owanyake tipi kin timahen iyorpaye kte xni e cekiyapi.

32. Heon hunr taku eya hotaninpi qa hunr ix togye eyapi; omniciye kin nina oqoyapi qa tokeca e on mniciyapi kin ota sdonyapi xni.

33. Hehan Aleksandros wicota kin etanhan ahiyupi qa Juda wicaxta kin he cokata iyaye yapi. Unkan Aleksandros namwicakicawin qa oyate kin wowicakiyake kta.

34. Tuka he Juda wicaxta kin heca e sdonyapi unkan wihiyayedan oape nonpa hehanyan owasin ho wanjidan hotankakiya hotaninpi qa, Artemis Epesos oyate tawapi kin he tanka ce, eyaya yukanpi.

35. Unkan Wowapi kage cin oyate kin inina un wicakiye çehan hecen eya, Epesos wicaxta kin, Epesos otonwe kin de Artemis taku wakan tanka he tipi wakan tawa kin awanhdag un qa *wakagapi* Diyos etanhan hinrpaye cigon he nakun, he tuwe wicaxta kin he sdonye xni he.

36. Hena taku kin akinicapi-ca xni, heon inina dukanpi qa takudan inarniyan ecanonpi kte xni tuka.

37. Wicaxta kin dena tipi wakan kin etanhan takudan manonpi xni qa taku wakan nitawapi kin takudan i en hiyeyapi xni, tuka den awicayahipi.

38. Demetriyos qa tona om rtani kin hena tuwe en taku aupi cinpi kinhan woyaco anpetu yukan qa nakun wicaxta wayacopi kin; otoiyohi wiyakicionpapi kta.

39. Qa nix taku tokeca on winungapi hecinhan omniciye wicoope kin eciyatanhan un kin he en yacopi kta.

40. Anpetu kin de owodutaton kin on wiunwangapi kta naceca; omniciye kin de on etanhan taku unkeyapi kte cin takudan unhapi xni.

41. Hena hecen eya unkan hehan omniciye kin hdicu wicaya.

WICOWOYAKE 20:

1. Owodutaton kin he hena-keca hehan Palos ookiye unpi kin wicakico qa i iwicaputaka, qa hehan hetanhan ye ça Makedoniya ektakiya iyaya.

2. Makoce kin hena opta iya-ye ça oie ota on iwahokonwicakiye çehan Helenes makoce kin en iyohi.

3. Qa wi yamni hen owanji yanka. Unkan Suriya ekta watom ye kta hehan Juda wicaxta kin narmana ape yukanpi kin heon Makedoniya ekta icicawin hda içiconza.

4. Unkan Sopatros, Bereya etanhan, qa Tesalonike etanhan Aristarkos Sekundos kici, qa Gayos Derbe etanhan qa Timoteyos, qa Asiya wicaxta kin, Tucikos Tropimos kici, hena Asiya ekta Palos om yapi.

5. Hena e tokaheya yapi qa Troas en unkapepi.

6. Unkan aguyapi on napor-yapi codan anpetu kin iyohakam Pilipi etanhan watounpapi qa anpetu zaptan hehan Troas en wicunkihdegapi qa hen anpetu xakowin unkokirpapi.

7. Anpetu tokaheya *eci-yapi* kin he en ookiye unpi kin aguyapi kiyuxpa imniciyapi hehan Palos wowicakiyaka, hanrana hetanhan hde kta, hecen hanye cokaya hehanyan wahokonwicakiya yanka.

8. Unkan wankan tipi ohna mniciya yukanpi kin he en pet-ijanjan ota hdepi.

9. Unkan koxka wan Yutucos eciyapi he ojanjan hdepi kin hen iyotankehan yanke ça ixtima ça; Palos tehan woyake cin heon

ixtima iyaye ça owanka iciya-mni kin hetanhan hinrpaye ça ta ecen eyakupi.

10. Hehan Palos kun ye ça akan erpeiçiye ça poskin yuze ça, Ihnuhan iyokixin niçiyapi kin, taniya kin naharin mahen un ce, eya.

11. Qa ake wankan ye ça aguyapi kiyuxpe ça yute ça tehan ia yanke cin, anpa kamdeze cin hehanyan, hehan hetanhan ki-hda.

12. Unkan koxka qon ni iki-kecupi qa nina pidapi.

13. Unkan unkiye tokaheya wita wata kin ekta unyanpi qa Asos ekta watom unyanpi, heciya Palos en ope unxipi kta unkecinpi; ix eya hehanyan mani kta cin qa heon hecen iwahoun-yanpi.

14. Unkan Asos ekta unki-hdegapi hehan en ope unxipi qa Mitulene en unkipi.

15. Hetanhan iyoopta watom unyanpi qa ihanrana hehan Ciyos en iyotakons unkipi qa ake ihanrana hehan Samos ekta iyo-unhipi qa Troguliyos en owanji unkanpi qa ake ihanrana hehan Miletos ekta unkipi.

16. Palos Epesos en icunom watom iyaye wacin, Asiya en okirpe kte xni qa okihi kinhan anpetu iwikcemna zaptan *eyapi* kin he en Jerusalem en un kta cin qa heon inarni.

17. Qa Miletos etanhan Epesos ekta okodakiciye kin en hunka wicayapi kin *wicaxta* wan wicakico ye xi.

18. Hena en hipi unkan hehan hewicakiya, Asiya en wahi qon anpetu tokaheya hehantan-

han token ohiniyan cicipi waun kin sdonyayapi.

19. Tawacin ocowasin war-bayedan waun qa Itancan kin ohowada qa ixta mnihanpe ota, taku wawiyutanyan un kin, Juda oyate narmana amapepi kin on mahiyahde kin hena ko ehna waun.

20. Qa taku okihiya un kin takudan anaciptapi xni tuka omniciye kin en ociciyakapi qa tipi iyaza onspeciciyapi.

21. Qa Wakantanka ekta ihdu-ecetupi qa Jesus Mesiya Itancan unkiyapi kin wicadapi kin heni-yos Juda Helenes oyate ko owi-cawakiyaka.

22. Unkan nakaha iho minagi kin ekta makaxkapi ecen Jeru-salem ekta mda, qa heciya taku mahiyahde kte cin sdonwakiye xni.

23. Tuka otonwe otoiyohi en Woniya Wakan mayaotanin qa, On kaxkapi qa wokakije amape, keya.

24. Tuka hena taku wada xni qa wiconi mitawa kin terike wa-kida xni, iyuxkinyan ihuniyan waimnanke kta qa wicoran Je-sus Itancan maqu kin Wakan-tanka towaonxida wotanin waxte omdake kte cin hee tanyan mdu-xtan kinhan.

25. Qa nakaha, niyepi kin Wakantanka tokiconze kin oci-ciyag ciipi qon owasin ake miite kin wanmayadakapi kte xni e sdonwakiya.

26. Heon anpetu kin de waayatanin ciciyapi, *wicaxta* owasin we kin on axape xni waun.

27. Wakantanka tawacin kin

owasin ociciyakapi qa takudan anawarbe xni.

28. Heon tanyan piiçiyapi qa optaye owasin en Woniya Wakan waawanhake nicagapi kin hena tanyan *hduha po*, qa Itancan taokodakiciye kin iye we kin on opewicakiton kin hena awanwicahdaka po.

29. Mix wahde cinhan hehan xunktokeca ocin xicapi kin niyepi en niipi kta qa tarinca kin itonwicapapi kte xni e sdonwanya.

30. Qa niyepi enitanhanpi wicaxta icagapi kta qa ix iyepi ihakam ookiye unpi kin u wicakiyapi kta e nina yaxkixkapi kta.

31. Heon kiktahan un po, qa waniyetu yamni anpetu hanyetu ko ixta mnihanpe *amau* qa otoi-yohi wahokoneiciyapi amdaxtan xni, he kiksuya po.

32. Hunkawanjin ciyapi nakaha Wakantanka ix iye qa towaonxida oie kin en niunpi nunwe, he icar niyanpi qa tona ska wicakagapi kin owasin om taku yuhe niciyapi kta e okihi.

33. Tuwe maza ska qa maza ska zi qa wokowake tawa kin *takudan* wakon xni.

34. Qa nape kin dena on taku wacin kin mihdamna qa tona om waun kin hena wicawecamna qon he niye sdonyayapi.

35. Hena owasin en waon-speciciyapi, hecen rtayanipi qa tona waxake xni un kin owicayakiyapi kta qa Jesus Itancan oie qon yeksuyapi kta, Wicakupi kin hee wowaxte qa icupi kin hee aoptetu, eye cigon he.

36. Hena hecen eya unkan

hehan canpexka makehde inajin qa owasin om cekiya.

37. Unkan owasin nina ceyapi qa Palos poskin yuzapi qa i iputakapi.

38. Miite kin ake tohini wanmayadakapi kte xni *eye cigon*, oie kin de on iyotan nina iyokixicapi. Unkan wita wata kin ekta om iyayapi.

WICOWOYAKE 21.

1. Unkan hena erpewicunyanpi qa pa canan iyeunyanpi hehan Kos ekta owotanna unkipi qa ihanrana hehan Rodos ekta, qa hetanhan Patara en iyo-unhipi.

2. Qa hen wita wata wan Penike ekta watom ye kte cin iyeunyanpi qa he en unkopapi, qa hetanhan unyanpi.

3. Qa Kupros taninyan wan-
unyakapi hehan catka tanhan erpeya unhiyupi qa Suriya ekta watom unkupi qa Turos en unhdihunipi, hen wata taku ohnaka kin waretajupi kta.

4. Unkan ookiye unpi kin iyewicunkiyapi qa hen anpetu xakowin unkokirpapi; hena e qe Woniya Wakan eciyatanhan Palos Jerusalem ekta hde kte xni, keyapi.

5. Tuka anpetu kin hena wana unkihunipi hehan hetanhan inaunpapi qa hena ix tawicupi xiceca ko owasin opapi, otonwe tankata hehanyan, qa huta kin ekta canpexka makehde inaunjinpi qa ptaya ceunkiyapi.

6. Qa hehan nape unkiciyuzapi qa unkix wata kin en un-

kopapi tuka iyepi kin tiyata hdicupi.

7. Unkan Turos etanhan wato-papi enaunkiyapi hehan Ptole-mayas ekta iyounhipi qa hunka-wanjin kiciyapi kin nape wicun-yuzapi qa anpetu wanjidan om unkanpi.

8. Unkan ihanrana hehan tona Palos om un kin hetanhan inaunpapi qa Kesareya en iyo-unhipi; qa Pilipos wotanin wa-xte oyake cin he ti kin en un-yanpi, (xakowinpi qon wanji hee,) qa he om unyakonpi.

9. He cunwintku topa witan-xna unpi, hena wokcanpi ece.

10. Hen anpetu ota owanji unkanpi kin he icunhan wicaxta wokcan wan Agabos eciyapi Ju-deya makoce kin hetanhan apa-mahde hi.

11. Qa en unhiyupi hehan Palos ipiyaka tawa kin icu qa on siha nape ko iyaihdxake ça, Woniya Wakan kaken eya, Wi-caxta tuwe ipiyaka kin de tawa kin he Juda wicaxta Jerusalem ekta hecen kaxkapi kta qa Ikce-wicaxta kin nape kin en wicaqu-pi kta ce, eya.

12. He naunronpi unkan tona en un kin hena om *Palos* ceun-kiyapi, Jerusalem ekta hde kte xni.

13. Tuka Palos, Token ecanonpi qa yaceyapi qa hecen can-te mayadutakunipi xni he, Jesus Itancan caje kin on Jerusalem ekta makaxkapi qa nakun maçe kta e owakihi, eya.

14. Unkan wicada xni hehan unkayaxtanpi qa, Itancan tawa-cin kin ecen econpi nunwe, unkeyapi.

15. Anpetu kin hena iyoha-kam owasin piunkiciyapi qa Jerusalem ekta itawankanhde unyanpi.

16. Qa Kesareya etanhan o-okiye unpi kin *wanjikji* unko-papi qa wanji Mnason eciyapi Kupros etanhan wanakaja tan-han en ope cin he ti kin en un-yakonpi kta e tin iyaye unyan-pi.

17. Jerusalem ekta iyounhipi unkan hunkawanjin kiciyapi kin iyuxkinyan tin unkiçopi.

18. Unkan ihanrana hehan Palos om Jakob *wanyag* unyan-pi; unkan hunka wicayapi kin owasin en yukanpi.

19. Hena nape wicayuze ça hehan Ikcewicaxta kin ekta iye woyake cin eciyatanhan token Wakantanka econ qon owasin ecekcen owicakiyaka.

20. He naronpi unkan Itan-can kin idowanpi qa *Palos* heci-yapi, Cinye Juda wicaxta ke-ktopawinge ota wicadapi qa owasin (wicoope kin sutaya a-wakicinpi kin he wandaka.

21. Niye Juda oyate Ikcewi-caxta ehna yakonpi kin hena owasin Mowis toope kin ahdu-xtanpi kta e onspewicayakiye ça cinca kin ohomni bawicakixpa-pi kte xni qa wicoran kin hena eciyatanhan manipi kte xni, he-ha keyapi e naronpi.

22. Heon toketu kta he. Awi-ckehan oyate kin kawitaya ihe-yapi kte. Wanna yahi kin he naronpi.

23. Hecen token unkeniciya-pi kin de ecen econ wo. Wi-caxta tom token içiconzapi kin hena om unyakonpi.

24. Hena en wicai qa om ihduska qa owicakiya wo, hecen paha kin hduxdapi kta. Unkan hecen token oniyakapi naronpi qon hena taku xni qa nix eya owotanna mayani qa wicoope kin opeya yaun kin he owasin sdonyapi kta.

25. Tuka Ikcewicaxta tona wicadapi kin hena wowapi wicunkicagapi qa wicoran kin dena takudan opapi kte xni unkeyapi qon, tuka taku wakagapi wakiyuxnapi qa we qa taku we ye xni yutapi kin qa wawicirarapi econpi kin hena en ihdoipi kte xni ce, hecedan unkeyapi.

26. Hehan Palos wicaxta kin hena en wicai qa ihanrana om ihduska qa ihduskapi anpetu kin wanna henakeca kte cin oyakapi kta e tipi wakan kin tin iyaya; taku qupi wan otoiyohi on woxnapi kta hehantu.

27. Unkan anpetu xakowin qon wanna henakeca kte hehan Juda wicaxta Asiya etanhan hipi kin hena *Palos* tipi wakan en un kin wanyakapi qa oyate kin owasin iyowicapaxtakapi qa *Palos* iyarpayapi;

28. Qa hotaninpi, Israel wicaxta kin ounkiya po, wicaxta kin de oyate kin en qa wicoope kin qa nakun tipi kin de aie qa owancaya hecen onspewicakiya; qa nakun Helenes wicaxta kin tipi wakan kin en awicahi qa hecen tipi iyotan waxte kin de xamya, eyapi.

29. He itokam Tropimos Espesos wicaxta kin otonwe kin en *Palos* om un kin he wanyakapi unkan he Palos tipi wakan kin en ahi, kecinpi.

30. Unkan otonwe kin oco-wasin nina oqoyapi qa oyate kin kawitaya iheyapi qa Palos icupi qa tipi wakan kin etanhan tankan yusdohan ayapi, unkan ecahankeya tiyopa kin ecen iyeyapi.

31. Wanna ktepi kta e akitapi hehan akicita tancantanka akicita wicayuhe cin he; Jerusalem owancaya nina owodutaton ce, eya oyakipi kin he naron.

32. He kohanna akicita tancan ko iwicacu qa inyanke qa en wicaya. Unkan akicita tancan tanka akicita ko wanwicayakapi hehan Palos apapi ayuxtanpi.

33. Hehan akicita tancan tanka en ye qa *Palos* icu qa maza icicarira nom on kaxke wicaxi; qa he tuwe kin qa token econ kin he, eya iwicawanga.

34. Tuka oyate kin hunr taku eya hotaninpi qa hunr ix togye eyapi. Unkan owodutaton kin on wowicake kin sdony okitpani heon conkaxke kin mahen aye wicaxi.

35. Unkan can iyadipi kin en hdipi hehan akicita kin *Palos* yuha ayapi, oyate kin aotins upi kin heon etanhan.

36. Oyate kin iyurpa ihakam yapi qa, Yutokan ayapo, eya hotaninpi.

37. Unkan conkaxke kin mahen ayapi kta hehan Palos akicita tancan tanka heciya, Taku eciciye kta tuka ce, iyowinmayakiye kta he. Unkan ix, Helenes iapi kin onnispe he, eya.

38. Egupton wicaxta anpetu kin dena itokam icage qa wicaxta wabotica kin hecapi kekto-pawinge topa ihakam rewoskan

makoce kin ekta awicaye cion he niye xni he.

39. Unkan Palos, Juda wicaxta Kilikiya en Tarsos *otonwe* kin hetanhan waun, *otonwe* xice xni en imacaga. Ceciciya ce, oyate kin taku ewicawakiye kta ce, iyowinmakiya wo, eya.

40. Hecen iyowinkiya unkan Palos can iyadipi kin akan inajin qa oyate kin namwicakicawin. Unkan inina yukanpi hehan Heberi iapi kin eciyatanhan ie ça hewicakiya;

WICOWOYAKE 22.

1. Wicaxta hunkawanjin ciyapi qa hunkake ciyapi kin, nakaha niyepi en wowahdake cin namaron po.

2. Heberi iapi kin eciyatanhan owicakiyake cin he naronpi unkan iyotan inina yukanpi.

3. Unkan hecen eya; Juda wicaxta kin hemaca, Kilikiya ekta Tarsos en matonpi qa *otonwe* kin de en Gamaliel siha kin ekta icar mayanpi, qa hunkake wicayapi wicoope yuhapi kin tanyan onspemakiyapi qa Wakantanka on nina inawarni, niyepi kin owasin nakaha yaunpi kin iyececa.

4. Qa canku kin de wiconte aiyahdeya xicaya wakuwa, wicawakaxke ça wicakaxka tipi kin en iyewicawaya, wica winyan ko.

5. Hecen woxnapı kagapi itancan qa hunka wicayapi kin owasin mayaotaninpi ece. Hena wowapi maqupi, hunkawanjin kiciyapi kin wicakicagapi kin he, qa hecen Damaskos ekta

imdamde, heciya tona yukanpi kin hena wicawakaxke ça ecen Jerusalem ekta wicakaxtakapi kta e awicawau kta heon etanhan.

6. Ohnihde waun qa Damaskos wanna ikiyadan unkan wi-yotanhe cin hehan iho ihnuhan-na marpiya kin eciyatanhan iyo-yanpa tanka wan aohdute mayan.

7. Hehan makata mahinrpaye ça wicaho wan nawaron, Salos, Salos tokeca e xicaya mayakuwa he, emakiya.

8. Unkan mix amdupte ça, Itancan nituwe he, epa. Hehan ix, Jesus Nazareyos xicaya yakuwa kin he miye ce, emakiya.

9. Unkan tona om waun kin ojanjan kin wanyakapi qa nina inihanpi tuka wicaho kin omákiye cin he naronpi xni.

10. Hehan mix, Itancan token ecamon kta he, epa. Unkan Itancan kin, Najin qa Damaskos ekta ya wo, heciya token ecanon kte cin owasin oniciyakapi kta ce, emakiya.

11. Unkan iyoyanpa wiya-tpa kin on wawanmdake xni hecen tona om waun kin hena minape kin yus amayanpi qa Damaskos en wai.

12. Qa wicaxta wan Ananiyas eciyapi wicoope kin eciyatanhan owotanna, Juda oyate hen yakonpi kin owasin he oyakapi;

13. He en mahi qa najin qa hemakiya, Salos misunka wawanyaka wo. Unkan hehan ekta ewatonwe ça *wanmdaka*.

14. Hehan ix hecen eya,

Hunkake wicunyanpi Wakan-tanka tawapi kin nicarniga, iye tawacin kin sdonyaye ça Wanji owotanna kin wandake ça he i kin eciyatanhan oie kin nayaron kta;

15. Qa iye on taku wandake ça nayaron kin wicaxta owasin owicayakidake kta heon *hecon*.

16. Unkan nakaha taku tokanon he. Najin wo, baptem ni-çupi kta; Itancan caje kin hoye-yakiye kta, hecen wayartani kin yakpakinte kta ce, eya.

17. Unkan ake Jerusalem e-kta icicawin wahdi qa tipi wakan kin ohna cekiya waun hehan woakiktonje wan mahiya-hde;

18. Qa Itancan kin wanmdaka; he kaken emakiya; Inarni qa kohanna Jerusalem etanhan inanpa wo, mayadaotanin kin he wicadapi kte xni ce, eya.

19. Unkan mix hecen epa, Tona wicanidapi qon hena wicakaxka tipi kin en iyewicawaye ça omniciye tipi kin ohna wicawakaxtaka ece, he sdonyapi.

20. Qa Stepanos waayatanin nitawa kin we paponpi qehan hen nawajin qa he iyowinwicawakiye ça tona ktepi tawokoyepi kin awanmdaka.

21. Hehan, Hunktiya wo, detanhan tehan ye cixi, Ikcewicaxta kin ekta, emakiya.

22. Oie kin de hehanyan naron yukanpi hehan nina hotaninpi qa, Wicaxta kin de maka kin etanhan aya po, ni kta e iyecetu xni, eyapi.

23. Hotankakiya hotaninpi qa tawokoyakepi kin erpeyapi qa watuxekxeca wankan iyeyapi.

24. Hehan akicita tancan tanka conkaxke kin mahen aupi qa kapsinsintapi kin on wiwanga-pi kta, keya, hecen tokeca on oyate kin nina aoqoyapi kin he sdonye kta.

25. Unkan termiso on kaxkapi icunhan Palos akicita tancan wan en najin kin heciya, Roma wicaxta kin heca qa naharin yacopi xni tuka yakapsinsintapi kta oyakihpi he.

26. Akicita tancan kin he naron unkan akicita tancan tanka kin hoxi hde ça heya, Taku ecanon kte cin he itonpa wo, wicaxta kin he Roma kin heca.

27. Hehan akicita tancan tanka kin en hi qa heciya, Roma wicaxta kin henica he, omakiyaka wo. Unkan, Han, eya.

28. Akicita tancan tanka kin ayupte ça, Ihduhapi kin he *ma-za ska* ota iyopewakiya, eya. Tuka mix hecen matonpi, Palos eya.

29. Heon kohanna tona Palos wiwangapi kte cin hena ayuxtan iyayapi qa akicita tancan tanka kin nina ikopehda; he kaxka tuka Roma wicaxta kin heca e sdonye cin he etanhan.

30. Unkan ihanrana hehan taku Juda oyate iyaonpapi kin he atayedan sdonye kta heon icaxke kin etanhan kiyuxke ça Woxnapi kagapi hunka wicayapi ko owasin mniciye wicaxi qa hehan *Palos* en ahi qa wicacokaya ehde.

WICOWOYAKE 23.

1. Unkan Palos omniciye kin tehan opawicarta yanke ça, Wi-

caxta hunkawanjin ciyapi, Wakantanka itokam mitawacin oco-wasin waxte, anpetu kin dehan wani, eya.

2. Unkan Ananiyas Woxnapi kagapi itancan kin, tona ikiyadan najinpi kin *Palos* i kin ohna ape wicaxi.

3. Hehan Palos heciya, Conkaxke ska yapi kin, Wakantantanka anipe kta, wicoope kin eciyatanhan mayadaco kta e yahidotanka tuka wicoope kaxeya amape wicayaxi.

4. Unkan tona en najinpi kin, Wakantanka Woxnapi kagapi itancan tawa kin taku i en hiyeyaya he, eyapi.

5. Unkan Palos, Hunkawanjin ciyapi, he Woxnapi kagapi itancan kin ee sdonwaye xni, eya; Wowapi en kaken kagapi, Nitaoyate kin en wicaxta itancan kin takudan ayaie kte xni ce.

6. Apa Sadukayon qa apa ix Parisiyan en opapi, he Palos sdonya unkan hehan omniciye kin en hecen eya hotanin, Parisiyan hemaca qa nakun Parisiyan cihintku kin hemaca qa wicate cin piya ikicagapi kte cin ape waun kin heon etanhan nakaha mayacopi.

7. Hecen eya unkan Parisiyan Sadukayon om hdokinicapi qa omniciye kin akipam iyeyapi.

8. Piya ikicagapi kin wanica qa marpiya ohnihde wanagi ko wanica, Sadukayon eyapi, tuka, Napin yukan ce, Parisiyan eyapi.

9. Nina owodutaton unkan Wowapi kagapi Parisiyan etanhanpi kin hena rajinpi qa wicakigepi qa heyapi, Wicaxta kin

de en taku xica takudan iyeunyanpi xni; tuka wanagi qa marpiya ohnihde wan taku okiyake cin he hecetu kinhan Wakan-tanka kici unkicizapi kte xni.

10. Nina hdokinicapi unkan Palos yuxpaxpa icupi kta e akicita tancan tanka kin kokipe ça heon akicita kin kun ye wicaxi, hena wicacokaya tanhan icupi qa conkaxke kin mahen akupi kta.

11. Unkan he irtayetu hehan Itancan kin en hinajin qa, Palos cante waxte wo, Jerusalem en mayadaotanin kin he iyecen Rome ekta mayadaotanin kta ce, ecia.

12. Anpa kamdeze cin hehan Juda wicaxta wanjikji okodaki-ciye wan kagapi qa witaya içi-conzapi, takudan yutapi kte xni qa takudan yatkanpi kte xni, Palos ktepi xni kin hehanyan kta, keyapi.

13. Wakiconzapi kin hena wicaxta wikcemna topa aktonpi.

14. Hena etanhan wanjikji Woxnapi kagapi itancanpi kin hunka wicayapi ko en wicayapi qa heyapi; Palos unktepi xni kin hehanyan takudan untapi kte xni e wokonze on unki-conzapi.

15. Heon etanhan hanrana niye omniciye kin owasin om akicita tancan tanka kin he en au yaxipi kta, taku sanpa atayedan inungapi kta seca e heon *hehapi kta*; qa unkix he ikiyadan aupi xni hehan unktepi kta e wiyeya unkanpi kta ce, *eyapi*.

16. Hena narmana ape yukanpi kin he Palos tonxkaku kin naron unkan hehan ekta ye

ça conkaxke kin timahen i qa Palos okiyaka.

17. Hehan Palos akicita tancan wanji kico qa, Koxka kin de akicita tancan tanka kin ekta aya wo, taku okiyake kta ce, eya.

18. Unkan heon he icu qa akicita tancan tanka kin ekta ai qa, Palos kaxkapi un kin he mico qa koxka kin de cicahi kta e econ maxi, taku oniciyake kta keya ce, eya.

19. Hehan akicita tancan tanka he nape yuze ça kicixnana icunom iyaye ça, Taku omaya-kidake kta he, eya iwanga.

20. Unkan, Heyakecinhan Juda wicaxta kin omniciye kin en Palos au nixipi kta wanna konzapi, taku sanpa atayedan iwangapi kta e *heconpi kta* keyapi;

21. Tuka nix awicayupte xni wo. Wicaxta wikcemna tom aktonpi kin wokonze on waki-conzapi, Palos ktep i xni hehan-yan takudan yutapi kte xni qa takudan yatkanpi kte xni, hena nakaha wiyeya yukanpi qa nix awicadupte kte cin he ape yukanpi, eya.

22. Hehan akicita tancan tanka koxka qon hdiu ye ça, Hena omayakidake cin he tuwedan sdone ye xni wo, eciya.

23. Qa hehan akicita tancan nom wicakico qa, Akicita opawinge nom taku owasin wiyeya ehnag wicaxi po, qa nakun xuktanka akan yotankapi kin wikcemna xakowin qa wahukeya yuhapi kin opawinge nom, han-yetu kin napciwanka ape cin hehan Kesareya ekta yapi kta;

24. Qa xuktanka Palos akan iyotang kiyapi qa Pelike wicaxta itancan yanke cin he en tanyan aipi kta e wicaqu po, ewicakiya.

25. Hehan wowapi wan kaken kaga;

26. Kladiyos Lusiyas *he miye*, Pelike wicaxta tancan iyotan waxte kin *wowapi cicaga*; Wo-okiye yaun nunwe.

27. Wicaxta kin de Juda wicaxta kin icupi qa wanna ktep i kta hehan akicita hduha en wai qa etanhan iwacu, he Roma wicaxta kin heca e nawaron heon *hecamon*.

28. Qa taku iyaonpapi kin he tanyan sdonwaye kta wacin, heon iye omniciye yuhapi kin en awai;

29. Qa iye wicoope hduhapi kin eciyatanhan wiwangapi kin iyaonpapi wanmdaka tuka taku on ktep i qa kaxkapi kta e iyaonpapi kin takudan iyewaye xni.

30. Qa wicaxta kin de Juda oyate kin anarbeya ape yukanpi kin he omakiyakapi hehan kohanna niye ekta aye wicawaxi qa tona taku en aupi kte cin hena hecen iyaonpeya eniciye wicawaxi. Tanyan yaun nunwe.

31. Hehan akicita ix token econ wicaxi qon ecen *econpi*, Palos hanyen icupi qa Antipatris en aipi;

32. Qa hanrana hehan xuktanka akan yotankapi kin hena hetanhan *Palos* ayapi kta e erpewicayapi qa conkaxke kin ekta hdiupi.

33. Unkan hena Kesareya en

ipi qa wicaxta itancan kin wawapi qupi qa hehan itokam Palos ehdepi.

34. Wicaxta itancan kin he yawa qa makoce kin tokiya tanhan u he, eya iwicawanga; unkan Kilikiya etanhan un kin he sdonya,

35. Hehan, Tona taku iyani onpeya eyapi kin hena nakun hipi kinhan mix naciron kta ce, eya; qa Herode woyaco tipi tawa qon he ohna awanyag wicaxi.

WICOWOYAKE 24.

1. Hetanhan zaptan can hehan Ananiyas Woxnapi kagapi itancan kin hee qa hunka wicayapi kin qa pasipika wan Tertulos *eciyapi* wicaxta itancan kin itokam Palos wiyaonpe kte cin hee, henakiya ekta apamahde yapi.

2. He en kicopi unkan Tertulos taku iyaonpe ça heya, Niye enitanhan wookiye tanka unhapi qa nitowaxte *eciyatanhan* oyate kin de en wicoran waxte econpi ce;

3. Pelike iyotan waxte, he ohiniyan qa owancaya unhapi qa pida unyakonpi.

4. Tuka sanpa nagiyeciye kte xni heon ceciciya ce, nitowaonxida kin on ptenyedan ia naunron po.

5. Wicaxta kin de makoxice qa maka kin owancaya Juda oyate cante okiçuninwicaye cin, qa yuomdecapi wan Nazareyos ewicakiyapi kin he en mdetahunkapi kin wanji he iyeunyanpi.

6. He tipi wakan kin yuxape kta; unkan hehan unkix unkiçupi qa wicoope unkitawapi kin *eciyatanhan* unyacopi kta;

7. Tuka Lusiyas akicita tan-can tanka kin ekta i qa wicowaxake tanka on unnapepi kin etanhan eyaku.

8. Qa tona taku iyaonpeya eyapi kin hena niye kin ekta u wicaxi. Hena wiwicanunge cinhan taku iyaunkonpapi kin owasin atayedan sdonyaye kta ce.

9. Unkan Juda wicaxta kin ayuptapi qa, Hena hecetu ce, eyapi.

10. Hehan wicaxta itancan kin Palos ie kta e namkicawin. Unkan ix ayupte ça, oyate kin de en waniyetu ota wicaxta wacyaco nanka e sdonwaya heon etanhan nakaha iyuxkinyan wowa hdaka.

11. Hecen Jerusalem ekta cekiya imdamde cin hehantanhan wanna anpetu ake nonpa e sdonyaye kta;

12. Qa tipi wakan kin en tuwe om awakinica ecen wanmayakapi xni qa omnieiye tipi kin ohna, qa otonwe kin en oyate kin iyo-wicawapaxtaka waun xni.

13. Qa nakaha taku iyamaonpapi kin hena yasutapi kta e okihipi xni.

14. Tuka de ociciyaka, yuomdecapi kin cajeyatapi qon he canku kin ohna hunkake wicawaye cin Wakantanka tawapi kin ohowada, qa wicoope wicaxta wokean ko en kagapi kin owasin wicawada.

15. Wakantanka awacin manke ça wicate cin waxte xica ko

ake woekicetu kte cin he ape waun, he ix iyepi nakun hecen wicadapi.

16. Wakantanka qa nakun wicaxta kin en tawacin takudan iyaonpepica xni waun kta, heon hecen ohiniyan opimiçiya.

17. Unkan nakaha waniyetu ota iyohakam mitaoyate kin taku qupi woxnapi ko wicawecicau kta e wahdi.

18. Qa hecen tipi wakan kin ohna mihduska waun ecen Juda wicaxta Asiya etanhan wanjikji wanmayakapi, omniciye qa owodutaton kin umana en owape xni.

19. Hena e qe niye en nihiyupi qa taku yuhapi kinhan he iyamaonpapi kta tuka.

20. Qa dena ix, omniciye kin en nawajin kin he icunhan taku xica ecamon kin taku sdonyapi kinhan oyakapi kta.

21. Tuka wicacokaya nawajin qehan oie wanjidat taninyan epa, Anpetu kin de wicaye cin woekicetu kte cin heon mayadacopi, epe ciquon hee, eya.

22. Pelike hena naron unkan canku kin de tanyan sdonye cin heon hdicu wicaye ça, Tohan Lusiyas akicata tancan tanka hi kinhan niyepi kin on taku owasin sdonwaye kta ce, eya.

23. Qa akicita tancan wan Palos awanyag kiye ça kiyuxke xi, qa iye takuwicaye cin tuwe en hi qa okiye kta cin kinhan terinda kte xni, *keya*.

24. Anpetu kin hena iyohakam Pelike tawicu Drusila ecipyi Juda winorinca kin heca, he kici hi, hehan Palos kico

qa Mesiya wicadapi kin he on naron.

25. Unkan Palos wicoowotanna qa iyatahde içiyapi xni qa woyao u kte cin hena oyake cin he icunhan Pelike inihan hinhda qa, Nakaha ekta hda wo, tohan tanyan iyomakipi kinhan ake cico kta ce, eya.

26. Palos kiyuxke kta e on maza ska qupi kta kecin heon kico qa kici wohdaka ece.

27. Tuka wanna waniyetu nonpa hehan Pelike yanke cin hen Porkiyos Pestos hiyotanka. Unkan Pelike Juda oyate kin iyokipi wicaye kta cin qa heon Palos kaxkapi ecen erpeya kihda.

WICOWOYAKE 25.

1. Pestos makece kin he en hiyotanke cin iyohakam anpetu yamni hehan Kesareya etanhan Jerusalem ekta itawankannde iyaya.

2. Unkan Woxnapi kagapi itancan qa Juda wicaxta tokapapi kin, Palos on okiyakapi qa cekiyapi ;

3. Owicakiye ça *Palos* Jerusalem ekta au wicaxi kta, *yapi*; qa ix iyepi tahepi ktepi kta e anarbeya yukanpi kta.

4. Tuka Pestos, Palos Kesareya ekta awanyakapi kta qa iye ecadan heciya hde kta, *keya*.

5. Qa nix niyepi etanhan tona okihipi kinhan opapi qa wicaxta kin he taku en un kinhan wiyaonpapi kta ce, eya.

6. Unkan anpetu wikcemna akton hena om un kin hehan

Kesareya ekta hda qa ihanrana woyaco oiyotanke kin akan kiyotanke cin hehan Palos en au wicaxi.

7. He en hi unkan hehan Juda wicaxta Jerusalem etanhan hipi qon hena ihdukxan najinpi qa wiyaonpapi tanka ota Palos en aupi, tuka yaacetupi okihihi xni.

8. Hehan iye wohdaka; Juda oyate wicoope hduhapi qa tipi wakan kin en qa nakun Kesar en takudan wawartani xni, eya.

9. Tuka Pestos Juda oyate kin iyokipi wicaya cin heon Palos ayupte ça heciya; Jerusalem ekta de ça heciya mitokam dena on niyacopi kta tawatenya-ya he, eya.

10. Hehan Palos, Kesar woyaco oiyotanke tawa kin en nawajin, hen mayacopi kta ce; Juda oyate kin taku xice cin takudan ecawicawecon xni e tanyan sdonyaya.

11. Wawartani qa taku xica on mate kte cin ecamon kinhan maktepi kta; tuka dena taku iyamaonpapi kin taku xni kinhan tuwedan hena mayuhe wicakiye kte xni. Kesar cajemdata ce, eya.

12. Unkan Pestos tona om iyotanka yanke cin hena wiwicawange ça hehan, Kesar cajedata he; Kesar ekta de kta, eya.

13. Unkan anpetu tonana iyohakam Agipa wicaxtayatapi kin Bernike kici Pestos nape yuzapi kta e on Kesareya en hipi.

14. Anpetu ota hen yukanpi hehan Pestos wicaxtayatapi kin Palos on okiyake ça heya, Wi-

caxta wan Pelike kaxka ehnake eiqon he naharin ecen yanka.

15. Jerusalem ekta wai qe-
han Woxnapi kagapi itancanpi qa Juda hunka wicayapi kin hena he kapi qa omakiyakapi qa yacopi kta e cinpi.

16. Hena hecen awicamdupte ça, Wicaxta wan taku iyaonpapi kinhan tona taku iyaonpeya eyapi kin wicitokam wiyaonpapi kin en waayupte iyowinkiya-
pi xni xta te yapi kta yacopi kin he Roma wicoran kin hee xni, epa ce.

17. Heon hena den hipi unkan mdutehan xni tuka ihanrana hehan woyaco oiyotanke kin akan wakimdotanke ça wicaxta kin he en au wicawaxi.

18. Hehan tona taku iyaonpapi kin hena najinpi tuka token wacami qon he iyecen takudan iyaonpapi xni.

19. Tuka iyepi wocekiye eyapi kin eciyatanhan wiwicawangapi kin wanjikji he en aupi, qa nakun wicaxta wan Jesus eciyapi ta wanka tuka he kini ce, Palos eya oyaka.

20. Unkan wiwicawangapi heca kin imdukean xni heon, Jerusalem ekta de ça heciya dena on niyacopi kta yacin he, eya imunga.

21. Tuka Palos Sebastos caje-
yate ça he itokam yacopi kta keye çehan Kesar ekta aye wicawakiye kta hehanyan awan-
yag wicawaxi.

22. Hehan, Mix eya wicaxta kin de nawaron kta wacin, Agipa Pestos eciya. Unkan ix, Heyakecinhan nayaron kta ce, eya.

23. Heon hanrana hehan Agipa Bernike kici wokoyake waxtente kiçun hipi qa wanaron tipi kin tin iyayapi; qa akicita tancanpi kin qa otonwe en wicaxta tokapapi kin hena ko, unkan Pestos econ wicaxi qa hecen Palos en ahipi.

24. Unkan Pestos hecen eya, Agipa wicaxtayatapi kin, qa wicaxta tona den om unkanpi kin, wicaxta kin on Jerusalem ekta qa deciya nakun Juda oyate kin owasin cemakiyapi qa, Sanpa ni kta e hecetu xni ce, eya hotaninpi qon he dee wandakapi.

25. He taku xica econ kin on te kte cin takudan iyewaye xni, qa ix iye Sebastos cajeyate cin heon ekta ayāpi kta e wakonza.

26. Tuka he eciyatanhan mayuhe cin taku wecage kte cin atayedan takudan mduhe xni. He etanhan nakaha en cicahipi, wicaxtayatapi kin niye iniyotan, hecen tohan tanyan wiwangapi kinhan token wakage kte cin taku mduhe kta.

27. Wicaxta wan kaxkapi kin he heciya aye xipi qa wiyaonpapi kin takudan kagapi xni kinhan he hecetu xni imdukean, eya.

WICOWOYAKE 26.

1. Hehan Agipa Palos heciya, Wanna woyahdake kte cin iyowinniciyapi ce. Unkan hehan Palos nape kin hdugate ça wohdaka.

2. Agipa wicaxtayatapi kin, Juda oyate kin taku iyamaonpa-

pi kin owasin nakaha nitokamaya wowahdake kte cin heon imduxkin.

3. Juda wicoran kin wiwangapi ko owasin tanyan hdukean nanka sdonwaya, heon etanhan. Qa hecen eeciya ce, wawacin kta duza tanka namaron wo.

4. Tokaheya tanhan Jerusalem ekta mitaoyate kin om, homakxidan ehantanhan token oranyan waun qon Juda wicaxta kin owasin sdonyapi.

5. Token ohoundapi ece kin owotanna rince cin en opeya waun, Parisiyan hemaca, hena e otokaheya tanhan sdonmayanpi, oyakapi cinpi unkanx.

6. Qa nakaha Wakantanka hunkake wicunyanpi kin iwahowicaye ciqon he *unkapepi* kin on den mayacopi kin ecen nawajin.

7. *Iwahoyapi* kin de ekta wicoun unkitawapi ake nonpapi kin iyohipi kta e ape yukanpi qa anpetu hanyetu ko cekiyapi ece. Agipa wicaxtayatapi kin woape kin de on Juda oyate kin wimawangapi.

8. Wakantanka wicaçe cin ake ekicetu wicaye cin he tokeca e he taku wicadapica xni kecanipi he.

9. Mix eya Jesus Nazareyos caje kin en taku ota kipajinyan ecamon kta kepce ciqon.

10. Jerusalem ekta hena hecen ecamon, qa Woxnapi kagapi itancanpi kin wowaxake maqupi kin on wicaxta owotanna kin ota wicakaxka tipi kin en iye wicawaye ça te yapi kta wicayacopi qehan mix eya wicawada.

11. Qa omniciye tipi kin iyaza otakiya wicawakaxtake ça waoxtehda wicawakiye ça nina canniye wicawaye cin heon otonwe tokeca ekta xicaya wicawakuwa.

12. He icunhan Woxnapi kagapi itancanpi kin wowaxake wowapi ko maqupi kin he yuha Damaskos ekta imdamda.

13. Unkan tahepi iho, wicaxtayatapi, anpe cokaya kin hehantu, iyoyanpa wan anpetu wi kin sam iyeya wiyatpa un kin he wanmdaka, he ihdukxan iyoyanpa maye ça tona om mawani kin hena nakun.

14. Unkan owasin makata erpeunkiçiyapi hehan wicaho wan nawaron, he Heberi iapi eciyatanhan hecen emakiya, Salos, Salos tokeca xicaya mayakuwa he, can pesto kin nayartake cin he terika ce.

15. Unkan mix, Itancan, nituwe he, epa. Unkan, Jesus xicaya yakuwa kin he miye ce, eya.

16. Tuka iyotanke ça nisiha kin on najin wo; token wandake ça tokata taku wanyag ciciye kte cin hena en waayatanin qa ookiye kin cicage kta e heon nakaha wanmayag ciciya.

17. Oyate kin etanhan ecihdaku kta, Ikcewicaxta kin nakun, hena e ekta nakaha ye cixi.

18. Ixta wicadumdaye ça otpaza etanhan iyoyanpa ekta, qa Satan towaxake kin etanhan Wakantanka ekta wicaduhomni kta, qa hecen woartani wicakicicajupupi qa tona ska wicakagapi kin hena om woyuha yuha-

pi kta, wicamadapi kin heon etanhan, eya.

19. Hecen on Agipa wicaxtayatapi kin, marpiya wowanyake kin he ceçunwahda xni.

20. Tuka tokaheya Damaskos en yakonpi qa Jerusalem qa Judeya makoce kin owanca-ya qa nakun Ikcewicaxta kin ihduecetupi qa Wakantanka ekta ihduhomnipi kta, qa ihduecetupi wicoran kin econpi kta hena hecen owicawakiyaka ece qon.

21. Hena on etanhan Juda wicaxta kin tipi wakan kin ohna iyemakiyapi unkan wanna maktepi kta;

22. Tuka Wakantanka omakiye cin heon anpetu dehan wani qa tona cikeiqadan tankinkinyan ko wicamdaotanin qa wicaxta wokcan kin Mowis kici taku u kte cin oyakapi qon henana owicawakiyaka ece.

23. Mesiya kakije kte ça iye tokaheya wicaçe cin etanhan najin kta qa oyate kin Ikcewicaxta ko iyoyam wicaye kte cin.

24. Hena hecen eya unkan Pestos hotankakiya ie ça, Palos niyuhnaxkinyan, taku ota onspeniçiciye cin he wicayuhnaxkinyan en iyenian, eya.

25. Tuka ix, Pestos iyotan waxte kin, mayuhnaxkinye xni, tuka wowicake wicowarbadan oie kin epa ce, eya.

26. Qa wicaxtayatapi kin ix hena tanyan sdonya, heon itokam waditagya wowahdaka, hena takudan narmanpi xni e sdonwaya, karmin wanji en econpi xni nakaex.

27. Agipa wicaxtayatapi, wi-

caxta wokcan kin wicayada he. Wicayada e sdonwaya.

28. Hehan Agipa Palos heciya, Mesiya taoyate kin en opeya awacin mayaya se ececa.

29. Unkan Palos heya, Wakantanka cewakiya ce, niye nixnana xni tuka tona anpetu kin de namaronpi kin owasin, se ececa hee xni, tuka ocowasin mixwaun kin iyecen yaunpi *wacin*, tuka icaxke kin dena ope kte xni.

30. Hena hecen eya unkan hehan wicaxtayatapi qa wicaxta itancan kin Bernike kici qa tona om iyotankapi kin hena ko najinpi;

31. Qa icunom yapi qa, Wicaxta kin de taku on te kte ça kaxkapi kte cin takudan econ xni ce, iyakitedan ekiciyapi.

32. Hehan, Wicaxta kin de Kesar cajeyate xni unkanx kiyuxkapi kta tuka, Agipa Pestos eciya.

WICOWOYAKE 27.

1. Unkan Italiya ekta watom unyanpi kta e wanna konzapi, hehan Palos qa wicakaxkapi tokeca kin akicita tancan wan Sebastos taobe kin etanhan Juliyos eciyapi he wicayuhe kiyapi.

2. Unkan wita wata wan Adramutenos etanhan, Asiya makoce kin ekta tuktektan oihuni kte cin he en unkopapi qa pa canan iyeunyanpi, qa Makedoniya wicaxta wan Aristarkos eciyapi Tesalonike etanhan he kici unyanpi.

3. Unkan ihanrana hehan Si-

dona en unkihunipi. Unkan Juliyos Palos tanyan okiciran qa takuwicaye cin ekta wicai qa hena etanhan taku yuhe kta e iyowinkiya.

4. Unkan hetanhan pa canan iyeunyanpi qa Kupros huta kin en ikiyadan watounpapi, tatoheya unyanpi kin heon.

5. Unkan Kilikiya qa Pam-puliya miniwanca kin unkihunipi hehan Lukiya en *otonwe wan* Mura eciyapi he ekta unkipi.

6. Hen wita wata wan Aleksandreya etanhan Italiya ekta watope kiyapi kte cin he akicita tancan kin wanyake ça he en ope unyanpi.

7. Unkan anpetu ota iwaxtedan watounpapi qa kitan ser Knidos en iyotakons unkipi, tatoheya unyanpi nakaex, hehan Kete ikiyadan Salmone iyotakons watounpapi.

8. Qa he kitan ser kapeya unyanpi hehan makoce wan oihuni waxte eciyapi kin he en unkipi, he Laseya otonwe kin ikiyadan.

9. Wanna anpetu ota qa watopapi kin okokipe aya, hamdepitanka kin wanna enakiyapi, hehan Palos wahokonwicakiye,

10. 'Ca hewicakiya, Wicaxta kin, watounpapi kte cin de on wita wata kin taku ohnaka ko yutakunipi kte xni qa nakun unkiyepi kin iyotan iyeunkiyapi kta e sdonwaya, eya.

11. Tuka akicita tancan kin wahektape cin qa wita wata tawa kin hena anawicakicigoptan qa Palos ie cin he wicada xni.

12. Unkan oihuni kin he en waniyetu osan yukanpi kte cin

he waxte xni heon hetanhan ya-pi qa okihipi kinhan Penike ekta watom ipi qa hen waniyetu owanji yukanpi kta, keyapi, Kete en oihuni wan itokaga tanhan waziyata etkiya huta kin yuxkomya wanke cin hee.

13. Unkan okaga tanhan tate kin iwaxtedan hiyu qa hecen token wacinpi qon wanna ecetu kecinpi, hehan *hetanhan wata* kin kiyuxkapi qa Kete ikiyadan watopapi.

14. Tuka iecadan tateyanpa wan ohitike cin, he en iyapa hiyu, tate taja eciyapi.

15. He wita wata kin nina iyapa unkan hecen tatoheya yapi okihipi xni hehan unkayuxtanpi unkan kaha iyeunyanpi.

16. Unkan wita wan Klade eciyapi he ikiyadan unyanpi hehan kitan rin wata cistina kin ieu unkokihipi.

17. He yuwankan ehdakupi qa icaxke kin unpi qa wita wata kin opta yuskiskitapi, hehan casmu xice cin en iyorpeyapi kta kokipapi qa heon xina on watopapi kin parpapi qa hecen tate on kaha iyewicayapi.

18. Qa nina unkakiranxicapi heon ihanrana hehan *wata kin* etanhan taku tankan erpeyapi.

19. Qa *anpetu* iciyamni hehan unnapapi kin on wita wata kin en taku wowinyunyanpi kin minin erpeunyanpi.

20. Anpetu ota anpetu wi wicanrpi ko tanin xni un qa nina unkakiranxicapi hehan unnipi kta unkecinpi kin wanna unka-yuxtanpi.

21. Tehan takudan yute xni unpi hehan Palos wicacoka-

ya najin qa, Wicaxta kin, ana mayagoptanpi qa Kete etanhan pa canan iyeyayapi kte xni, hecen taku xice qa wicakakije cin de nihiyahdepi kte xni tuka.

22. Qa nakaha ceciciyapi ce, cante waxte po; tuwedan niŋapi kte xni tuka wita wata kin hecedan.

23. Wakantanka ohowada qa iye mayuhe cin he taohnihde ye cin hinhan en mahinajin.

24. Qa, Palos kokipe xni wo; Kesar itokam inayajin kta, unkan tona om watoyape cin owasin Wakantanka niŋu ce eya ce.

25. Heon etanhan, wicaxta kin, cante waxte po; Wakantanka wicawada, token emakiye cin he ecetu kte.

26. Tuka wita wan en iyeunyanpi kta.

27. Otpaza iake topa kin hehan Adreya miniwanca kin ohna tuktektan kaha iyeunyanpi, unkan hanye cokaya hehan wicaxta watope wicakiyapi kin makoce wan ikiyadan upi kecinpi.

28. Qa hehan mazasu haronta ikoyake cin minin iyeyapi qa *mini kin* wiyutapi wikcemna nonpa e wanyakapi. Hetanhan kitanna kapeya yapi qa ake ecen econpi qa wanna wiyutapi ake zaptan.

29. Unkan imniŋa kin en iye-wicayapi kta e kokipapi heon wahektapa kin etanhan maza aspeiŋiyapi tom minin iyeyapi qa anpao kta ape yukanpi.

30. Unkan wicaxta watope wicakiyapi kin wita wata kin etanhan najicapi kta akitapi qa wata cistina qon he mini kin ekta yuhukun iyeyapi, watoka-

pa tanhan maza aspeiçiyapi min iyeya konzapi.

31. Unkan Palos akicita tancan kin akicita ko hewicakiya; Dena wita wata kin ohna yukanpi xni kinhan yanipi kte xni, *eya*.

32. Hehan akicita kin wata cistina haronta ikoyake cin bapsakapi qa *watakin* kun erpeyapi.

33. Wanna anpao kta hehan Palos owasin taku yutapi icu wicaxi, qa heya, Nakaha takudan yute xni yaunpi anpetu iake topa kin he dee, hehanyan takudan iyacupi xni.

34. Heon ceciciyapi ce, taku yutapi icu po, on wanixakapi kta ce, nipahapi sukaça wanjidan hinrpaye kte xni.

35. Henta hecen *eya* hehan aguyapi icu qa owasin wicito-kam Wakantanka cekiye ça ki-yuxpe ça yuta.

36. Hehan owasin cante waxtepi qa wo icupi.

37. Unkan wita wata kin ohna wicanagi owasin opawinge nom sanpa wikcemna xakowin sanpa xakpe unyakonpi.

38. Unkan taku yutapi on imnanpi hehan wita wata kin yukapojedanpi qa aguyapi kin minin erpeyapi.

39. Wanna anpa kamdeza unkan makoce kin iyekiyapi xni tuka karmin wan huta oihuni waxte kin he wanyakapi qa okihipi kinhan he en wita wata kin aipi kta, keyapi.

40. Hehan maza aspeiçiyapi *hakahmonpi ikoyake* cin bapsag iyeyapi qa *minin* erpeyapi, qa iyupse yuze cin icaxke kin

kiyuxkapi; qa hehan xina wato-pe kiyapi tanka kin karbog iyeyapi qa huta kin ektakiya iyayapi.

41. Qa tukten miniwanca nom kokijuya hiyu kin he en iyorpayapi qa hen wita wata kin azi yapi. Unkan watokapatanhan kin he sutaya ihan tuka wahektapatanhan kin taja on kamden iyeya.

43. Unkan akicita kin wicaxkapi kin hena wicaktepi kta e konzapi, okini wanjikji huta kin ekta niwanpi qa kihdapi kta, keyapi.

43. Tuka akicita tancan kin ix Palos ni kiye kta cin heon akicita econpi kte cin iyowicaki xni; qa hehan tona niwan okihipi kin hena tokaheya minin erpeiçiyapi qa huta kin ekta niwan iyaye wicaxi.

44. Hehan tona naharin en un kin hena hunr canmdaska akan qa hunr ix wita wata etanhan onxpaxpadan akan iyayapi. Unkan hecen owasin huta kin ekta tanyan iyohipi.

WICOWOYAKE 28.

1. Unkan ekta tanyan iyohipi hehan wita kin he Melite eciyapi e sdonyapi,

2. Unkan Ikcewicaxta kin nina taku waxte ecaunkiconpi, cetipi qa otoiyohe en unkicopi, kiranxice ça osni kin heon etanhan.

3. Unkan Palos can cikcistina ota pahi qa peta en aonpa hehan wamduxkadan wan iyokatapi kin etanhan hiyu qa Palos nape kin en ikoyag içiya.

4. Ocinxice cin de *Palos* nape kin en ikoyake cin he Ikcewicaxta kin wanyakapi unkan hehan, Awicakehan wicaxta kin de tin wicakte kin heca, miniwanca kin etanhan ni hiyu exta taku owotanna kin he ni kta e iyowinkiyē xni ce, iyakitedan ekiciyapi.

5. Tuka wamduxkadan qon nape kin etanhan peta kin en hdatata erpaye ça tuktedan kiuniye xni.

6. Tuka kapo kta, qa ix ihnuhanna ta iyaye kta kecinpi. Qa tehan ekta etonwan yukanpi qa tuktedan kiuniye xni un kin wanyakapi hehan tawacin kin tokeca hinhdapi qa, De taku wakan kin hee ce, eyapi.

7. Unkan wita kin en wicaxta tokapa he ti kin en han, Publiyos eciyapi, he tin hiyu unxipi qa anpetu yamni tin iyukan unkiyapi.

8. Unkan Publiyos atkuku kin wayazanka tancan kate ça we ece iheya. Palos he en i qa cekiye ça nape on aputake ça asni yan.

9. Hecen econ unkan hehan wita kin en tona wowayazan yuhapi kin hena en hipi qa asni wicaya.

10. Heon etanhan nina unkinihanpi qa hetanhan unyanpi kte cin hehan taku uncinpi kin owasin unqupi.

11. Unkan wi yamni hehan wita wata wan Aleksandrea etanhan he wita kin hen waniyetu wanke cin, he wiyokiyedan yuke cin Diyos cinca nonpa kin hena ee, he ohna watom unyanpi.

12. Qa Surakusa ekta unkinunipi qa *hen* anpetu yamni unyakonpi.

13. Hetanhan ohomni en unyanpi qa Regiyos ekta unkiyi. Qa anpetu wanjidan iyohakam itokaga tanhan tate hiyu qa anpetu iyokihe kin hehan Putiyoli ekta unkiyi.

14. Hen hunkawanjin kiciyapi kin *wanjikji* iyewicunyanpi qa anpetu xakowin om unyakonpi kta e cinpi. Hehan Rome ektakiya unyanpi.

15. Unkan heciyatanhan hunkawanjin kiciyapi kin unkiyepi eciyatanhan naronpi qa itkounkipa au, Apiyoporum qa Tipi yamni kin hehanyan. Hena Palos wanwicayaka unkan Wakantanka wopida eciye ça wakixag içiya.

16. Unkan Rome ekta unkinpi hehan akicita tancan qon wicakaxke cin hena wicaxtayatapi taakicita tancan kin qu, tuka Palos akicita wanjidan awanyag un kin he kicixnana yanke kta e iyowinkiyapi.

17. Unkan anpetu yamni iyohakam Palos Juda wicaxta tokapapi kin wicakico. Qa en mniciyapi hehan hewicakiya, Wicaxta hunkawanjin ciyapi, ate wicunyanpi oyate qa wicoran kin en taku xica takudan ecamon xni exta Jerusalem ekta makaxkapi ecen Roma oyate napapi kin en iyemayanpi.

18. Hena ix wimawangapi qehan makiyuxkapi kta, miye en taku on maşe kte cin takudan iyeyapi xni.

19. Tuka Juda wicaxta kin nina kitanpi qa hecen Kesar

cajeyan makiyapi, mitaoyate kin taku iyawicawaonpe kte cin takudan mduhe xni tuka qon.

20. Heon etanhan nakaha ci-copi, wanciyakapi qa wociciyakapi kta, Israel oyate awacinpi kin he on maza icicarira kin de on makaxkapi, *eya*.

21. Hehan ix *eya* heciyapi, Judeya makoce kin etanhan niye on wowapi unkicicahipi xni, qa hunkawanjin kiciyapi heciyatanhan hipi kin tuwedan taku xica iyanionpe ça oyake xni.

22. Tukanix token nitawacin kin naunnironpi kta uncinpi, yuomdecapi kin de owancaya taku xica en awicaupi e sdon-nyanpi ce, *eyapi*.

23. Qa anpetu wan cajeyatapi kin he en wicota Palos yanke cin en hipi; unkan ix Wakantanka tokiconze taku tawa kin yaotanin qa onspewicakiye ça Mowis toope kin wicaxta wokcan ko etanhan Jesus eciyatanhan oie kin owicakiyaka, anpao kin etanhan otpaze cin hehan-yan.

24. Unkan hunr taku oyakapi kin wicadapi qa hunr ix wicadapi xni.

25. Qa okonwanjidan awakicinpi xni hehan hdapi; Palos oie wanjidan oyake cin he iyo-hakam; Awicakehan Woniya

Wakan kin Esayas wicaxta wokcan kin eciyatanhan hunkake wicunyanpi kin wowicakiyaka;

26. Qa hey, Oyate kin de ekta wicai qa hey wo; Winaronpi kin on nayaranpi kta tuka oyakarnigapi kte xni, qa wawanyakapi kin on wandakapi kta tuka widukcanpi kte xni:

27. Oyate kin de cante kin cepa aye ça nogepi kin on kitan ser wanaronpi qa ixtapi kin ohmus icupi; ixtapi kin on wawanyakapi kte xni, qa nogepi kin on wanaronpi kte xni, qa cante kin on okarnigapi kte xni qa ihducetupi kte xni, qa mix okizi wicawaye kte xni heon etanhan, *eya*.

28. Hecen on he sdonya po, Wakantanka wiconi tawa kin Ikcewicaxta kin wicaqupi, unkan hena ix naronpi kta.

29. Hena hecen *eya* unkan Juda wicaxta kin hdapi qa nina hdokinicapi.

30. Unkan Palos waniyetu nom tipi iyunwin ton odote cin he ohna yanke ça tona en hipi kin owasin tin u wicaxi.

31. Wakantanka tokiconze kin oyake ça Jesus Mesiya Itancan taku tawa kin waditagya onspewicakiya, qa tuwedan terinda xni.

PALOS WOWAPI KAGE CIQON.

THE EPISTLES OF PAUL, IN THE DAKOTA LANGUAGE;

TRANSLATED FROM THE GREEK, BY S. R. RIGGS, A. M.

PALOS OHNIHDEYA UN KIN HECA ROMA OYATE KIN WOWAPI WICAKICAGE
CIN HE DEE.

WICOWOYAKE 1.

1. Palos Jesus Mesiya taokiye, ohnihde unpi kin en kicopi, Wakantanka tawootanin waxte kin en karnigapi;

2. Ehanna wowapi wakan kin en wicaxta wokcanpi kin oyakapi qon hee.

3. Iye Cihintku kin on etanhan; (he qe wicacerpi eciyatanhan Dawid cinca kin hetanhan icaga;

4. Qa wowaxake on Wakan-tanka Cihintku kin hee e yuotaninpi, Woniya Wakan kin eciyatanhan wiconte etanhan piya ikicage cin he en;) Jesus Mesiya Itancan unkiyapi kin hee.

5. He etanhan wowaonxida qa oyate kin owasin woawacin anagoptanpi kte cin heon ohnihdeya unpi kin unkicupi, iye caje kin on.

6. Hena ehna Jesus Mesiya wicakico kin he niyepi.

7. Tona Rome ekta un kin owasin Wakantanka waxte wi-

cakida, yuwotanpidan kte cin on wicakico kin hena, *wowapi cicagapi*. Wowaonxida woo-kiye ko Wakantanka ate unyanpi qa Jesus Mesiya Itancan kin etanhan nicipi un nunwe.

8. Tokaheya, Jesus Mesiya eciyatanhan, niyepi kin owasin on etanhan Wakantanka mitawa kin wopida ewakiya ee, niye wicayadapi kin he maka kin owancaya cajeyatapi kin heon.

9. Wakantanka minagi kin eciyatanhan ohowada, iye Cihintku tawootanin waxte kin en, he sdonmayan, ayaxtan xni wocekeye epe cin en ohinniyan cajeciyatapi;

10. Qa nakaha Wakantanka tawacin kin eciyatanhan ekta ciupi owakihi kte cin heon cewa-kiya ece.

11. Wanciyakapi nina wacin, taku waxte kiciçupi kin wanji-kji ciçupi kta, on niyusutapi kte cin heon etanhan.

12. Mix niyepi en iyuxkin mayanpi kte cin he waka, niye

wicayadapi qa mix éya wicawada kin heon etanhan.

13. Mihunkawanji he de sdonye xni dukanpi kta wacin xni, wanna otakiya ekta ciupi kta kepea, tuka dehanyan iyomakipi xni, niyepi ekta waskuyeca wanjiki-mduhe kta wacin, oyate toktokeca kin en *mduhe* cin he iyececa.

14. Helenes Ikcewicaxta ko, ksapapi wacintonpi xni ko hena otoiyohe wicaye xni waun;

15. Hecen token owakihi kin niyepi nakun Rome ekta yaunpi kin wotanin waxte kin ociciyakapi kta wacin.

16. Mesiya tawootanin waxte kin imaxtece xni; he ni wicaye kte cin on Wakantanka towaxake kin hee, tona wicadapi kin hena en, Juda wicaxta kin he tokaheya qa hehan Helenes wicaxta kin hee kta.

17. Heon etanhan Wakantanka owotanna oranye cin he wicadapi kin etanhan wicadapi kin ekta yuotaninpi; wowapi en kagapi qon iyecetu; Tuwe owotanna un kin he wicadapi kin on ni kta.

18. Marpiya kin etanhan Wakantanka tocanniye kin yuotaninpi, woaktaxni owasin qa wicaxta woartani econpi kin en, tona woartani on wowicake kin anaptapi kin hena ekta.

19. Hena en Wakantanka token sdonyapi kte cin taninyan un, Wakantanka sdonye wicakiya nakaex.

20. Maka kagapi kin hetanhan taku tawa wanyagpica xni kin hena tanin, taku kage cin on etanhan sdonyapi, he towa-

xake owihanke xni un qa Wakantanka towakan kin hena ee. Hecen anakirbepica xni unpi kta.

21. Qa hecen Wakantanka sdonyapi tuka Wakantanka iyeceen yutanpi xni qa pidapi xni, qa tawacinpi kin ekta witkotkoya ikicagapi qa iye cantepi wacinton xni otpas aya.

22. Qa ksape içidapi icunhan witkotkoka icar ayapi.

23. Qa Wakantanka rwinpica xni un kin he towitan kin wicaxta rwin kte cin ounce kin en iyeceen kagapi, qa zitkadan, wahutopa, watutka kin *henakiya iyacinpi*.

24. Heon iye cantiheyapi xice cin en Wakantanka awicayuxtan, ihduxapapi kte qa iye tancanpi kin kiciyuxirtinpi kte cin heon.

25. Hena Wakantanka wowicake tawa kin yutokecapi qa woitonxni kagapi, qa taku icar yapi kin he yuonihanpi qa ohodapi waicarye cin he isanpa, he qe owihanke wanin yawaxtepi nunwe.

26. Heon etanhan wicotawacin warte xni kin en Wakantanka awicayuxtan, winyan ece kin hena wicoicage kin en wicoran owotanna kin he opapi xni qa ihdutokecapi.

27. Qa wica ece kin ix éya winyan yuhapi kin he ayuxtanpi qa ix iyepi otoiyohe winktapi on kiciinpi, wica kin wica kici wowixtece okiciranyanpi qa iye tancan mahen wartanipi kin taku iyohi kte cin he yuhapi.

28. Qa Wakantanka wacin en yuzapi wacinpi xni kin he iyeceen Wakantanka ix éya wicota-

wacin warte xni kin en awicayuxtan, hecen taku wowixtece kin hduxtanpi kta.

29. Hena woartani owasin, wawicirarapi, wicoxice, wahduhahapiktece cin qa wicoran xice cin hena on iyatahdepi; winawiziipi, tin wicaktepi, wakinicapi, wohneye qa wocanniye kin on ojupidan.

30. Waajijipi sa, waaiapi sa, Wakantanca xice dapika, waraniciidapi, wamnaiçidapi, ihdatanpi sa, taku xica kagapi sa, hunlake yapi kin anawicagoptanpi xni,

31. Wacintonpi xni, woope kicaksapi kin hecapi, wacantkiyapi xni, takudan iwacin kiçun xni unpi qa waonxidapi xni.

32. Hena Wakantanka toope kin sdonyapi; (tona hecen econpi kin hena wiconçe iyahde içiyapi,) tuka ix iye hecen econpi qa tona heconpi kin hena en iyuxkinpi ece.

WICOWOYAKE 2.

1. Heon etanhan wicaxta kin nituwe kaxta, wadaco kinhan iyaonpepiça xni yaun kte xni. Taku on wicaxta tokeca daco kinhan he en niye nihdaco, wadaco tuka nix eya he kici taku okonwanjidan ecanon ece.

2. Tona wicoran hecen econpi kin hena Wakantanka wicayaco kin he wowicake eciyatanhan sdonunyanpi.

3. Qa wicaxta kin *nituwe kaxta*, tona heconpi kin wicadaco qa iyecen ecanon kinhan Wakantanka woyaco kin nayecipec kta kecani he.

4. Qa *Wakantanka* towaxte kin qa woape wowijica yuhe cin qa wawacinkta yuza tanka kin hena warte yada xni, qa Wakantanka towaxte kin nihduecetu kta aniye cin hee e sdonyaye xni he.

5. Qa cante terika nihduecetu xni kin eciyatanhan wocanniye anpetu qa Wakantanka woyaco owotanna yut: ninpi iyehantu kte cin en wocantiyahde amnaya-

6. He otoiyohe iye wicoran kin eciyatanhan wicaqu kta.

7. Tona wicoran waxte en ape yukanpi qa wowitan woyuonihan qa *te xni* un kte cin akitapi kin hena wiconi owihanke wanica *wicaqu* kta;

8. Qa tona wakinin unpi, qa wowicake kin anagoptanpi xni, tuka woartani awacinpi kin hena en woxihda qa wocanniye,

9. Woxitkihda qa wokakije, *henakiya* wicaxta otoiyohe taku xica econ kin wicanagi kin *kiciun* kta, Juda wicaxta kin he tokaheya qa hehan Helenes hee kta.

10. Tuka wowitan, woyuonihan wookiye ko tona waxteya oranye cin hena kiciun kta, Juda wicaxta kin he tokaheya qa hehan Helenes hee kta.

11. Wakantanka wicaxta togge wanwicayake cin wanica.

12. Tona woope codan wartanipi kin hena woope codan yutakunipi kte xni, qa tona woope kin en wartanipi kin hena woope kin eciyatanhan wicayacopi kta.

13. Wakantanka ekta tona woope naronpi kin hena owo-

tanna kin eepi xni, tuka tona woose kin ecen econpi kin hena wicayuowotan kta.

14. Ikcewicaxta woose yuhapi xni kin hena iye cinka woose wicoran kin ecen econpi kinhan, woose yuhapi xni tuka ix iyepi woose ihduhapi.

15. Hena ix iye cantepi kin ekta woose wicoran owapi kin he hdutaninpi, iye tawiyukcan kin nakun yaotaninpi qa tawacinpi kin otoiyo hi tuktektan iya-kicionpapi qa akex anakirmanpi ece.

16. Anpetu wan en, Wakan-tanka wotanin waxte mitawa kin eciyatanhan, Jesus Mesiya on wicaxta taku anakirbe cin yaco kinhan.

17. Ito Juda wicaxta eniciyapi, qa woose kin awacin nanke qa Wakantanka on nihdatan,

18. Qa iye tawacin kin sdon-yaye, qa taku tona waxte kin idukcan, woose kin tanyan on-nispe nakaex;

19. Qa tona ixta gongapi kin tanyan ye wicayaye qa otpaza ehna un kin iyoyanpa kin he niye kecanniçin.

20. Qa wacinton xni kin hena waonspekiya niyuhapi, qa hokxiyoqopa kin onspewicaya-kiya ece, qa woose kin en wosdonye wowicake ko ouncage kin yuha yaun.

21. Heon etanhan wicaxta to-keca onspeyakiye cin nix niye onspeniçiçiye xni he. Wamanonpi kte xni keya oðake cin, nix niye wamayanon he.

22. Wawicirarapi econpi kte xni kehe cin, nix niye tuwe wawiyakirara he. Wakagapi kin

warte yada xni kin niye qe ecin-xniyan wayakiyuxna he.

23. Nix woose kin en ini-winkta kin woose kicaksapi kin on Wakantanka wowixtenyaya he.

24. Niyepi eciyatanhan Ikcewicaxta kin Wakantanka caje kin oxtedhapi ece. Kaken owapi qon;

25. Woose yeciyuhe cinhan ohomni baxpapi kin taku okihi kta, tuka woose yecakse cinhan ohomni baxpapi nitawa kin he ohomni baxpapi xni icaga.

26. Heon ohomni baxpapi xni kin he woose woowotanna kin tanyan ope cinhan he ohomni baxpapi xni kin ohomni baxpapi kiciyawapi kte xni he.

27. Qa taku ohomni baxpapi xni ece kin he woose okicipe cinhan he, niye oowa qa ohomni baxpapi kin eciyatanhan woose yecakse cin niyaco kte xni he.

28. Tuwe akan tanhan ecedan hecece cin he Juda wicaxta kin heca xni, qa ohomni baxpapi akan tanhan qa wicacerpi ecedan en un kin he hee xni;

29. Tuka tuwe mahen tanhan hecece cin he Juda wicaxta kin hee, qa ohomni baxpapi kin he oowa kin en he xni, tuka wicnagi kin en un kin hee; he w-witan kin wicaxta akantu eciyatanhan xni, tuka Wakantanka eciyatanhan un.

WICOWOYAKE 3.

1. Hecen Juda wicaxta kin token iyotan un he, qa ohomni baxpapi kin he taku okihi he.

2. Taku owasin on iyotan,

hena Wakantanka oie kin wicakupi kin he tokaheya kin ee.

3. Wanjikji wicadapi xni kin e hecen tokeca kta he. Hena wicadapi xni kin he Wakantanka wacinyanpi kin ecetu xni ye kta he.

4. Hiya, hecetu kte xni; Wakantanka wowicake kta qa wicaxta otoiyo hi iton kte xni: Wowapi en kagapi qon iyececa, Nioie kin on nihduowotanna kta qa niyacopi kin en ohiyaye kta ce.

5. Tuka waunrtanipi kin hena Wakantanka toowotanna yutanin kinhan token unkeyapi kta he; Wakantanka kakix wicaye cin he owotanna xni he, (wicaxta akantu kin iyecen iwaa.)

6. Hiya hecetu kte xni; *hece-tu* kinhan token Wakantanka wicoicage kin wicayaco kta he.

7. Oiwaton xni kin on etanhan Wakantanka wowicake kin wowitan icage cinhan token on etanhan wartani sa kin iyecen mayacopi he.

8. Qa tokeca taku waxte u kte cin heon taku xica econkupi kte xni he, (unkakicagapi qa wanjikji, unkeyapi ce keyapi kin iyececa) hena wicayacopi kin he owotanna.

9. He etanhan tokeca kta; unkiye unkiyotanpi he. Hiya takuxnina on. Tokaheya Juda Helenes wicaxta ko owasin wartani ihukuya yukanpi kin he unyuwicakapi.

10. Wowapi en kagapi qon iyececa; Tuwedan owotanna un xni;

11. Tuwedan okarnige xni; tuwedan Wakantanka akite xni;

12. Owasin ecinxniyan iya-yapi, ptaya ihduxicapi, tuwe taku waxte econ kin wanica.

13. Hena dote kin wicahnakapi yurdokapi kin hee; ceji pi kin on wicahnayanpi ece, ihapi kin en sinterda tage'yukan:

14. Hena ipi kin iapi xica wicoie pa rinca ko on ojudan;

15. Iye sihapi kin we yapi kta e duzahanpi;

16. Tacankupi kin ohna wicotakuni xni wicokakije ko yukan.

17. Qa wookiye canku kin he sdonyapi xni.

18. Iye ixtapi kin itokam Wakantanka wokokipe kin wanica.

19. Wooke kin taku tona eye cinhan tona wooke ihukuya un kin hena hewicakiya ece e sdon- unyanpi. Hecen wicai otoiyo- hi iohmus icupi kta qa wicoicage owasin Wakantanka itokam wo- yaco en iyorpaye kta.

20. Heon etanhan he itokam- ya wooke wicoran kin eciyatan- han wicacerpi takudan yuowo- tanpi kte xni, wooke kin eciya- tanhan woartani sdonyapi.

21. Tuka nakaha wooke co- dan Wakantanka toowotanna kin yutaninpi, he wooke wicaxta wokcanpi ko yaotaninpi qon hee.

22. Wakantanka toowotanna kin Jesus Mesiya wacinyanpi kin eciyatanhan u kin hee tona wicadapi kin owasin en qa owa- sin akan un, qa ocikpanipi kin wanica.

23. Owasin rin wartanipi qa Wakantanka towitan kin iyohi xni unpi.

24. Qa iye towaonxida kin on iyunwin codan owotanna wicayawapi, wopekironpi Jesus Mesiya en un kin he eciyatanhan.

25. He Wakantanka toka qehan ehde, wokajuju kta, iye we kin wacinyanpi kin eciyatanhan qa iye toowotanna oyakapi kte cin heon etanhan woartani wanakaja kin kajujupi kin he eciyatanhan.

26. Wakantanka tehan ape un kin en nakaha iye toowotanna kin oyakapi kte cin heon, hecen ix iye owotanna un qa tuwe Jesus wacinye cinhan he yuowotan kta.

27. Hehan ihdatanpi kin toki un he. He anaptapi. Woope kin tukte e on; wicoran kin hee he. Hiya, wacinyanpi woope kin hee on etanhan.

28. Heon woope wicoran codan, wacinyanpi kin on etanhan wicaxta kin owotanna yawapi e he unyuwicakapi.

29. He Juda oyate ixnana Wakantanka tawapi he; qa Ikcewicaxta tawapi xni he. Hiya, nakun Ikcewicaxta tawapi.

30. Tuwe ohomni baxpapi kin wicadapi kin on yuowotan kte, qa tuwe ohomni baxpapi xni kin wicadapi kin eciyatanhan yuowotan kte cin he Wakantanka wanjidan.

31. Hecen wicadapi kin on woope kin ecetu xni unyanpi he. Hiya hecetu kte xni, tuka woope kin unyusutapi.

WICOWOYAKE 4.

1. Heon Abereyam ate unyanpi kin wicacerpi eciyatanhan

iyeye ciqon tukte e he unkeyapi kta he.

2. Abereyam wicoran on ihduowotanna kinhan taku iwinkta kte cin hduha, tuka Wakantanka itokamy xni.

3. Wowapi wakan kin token eya he. Abereyam Wakantanka wicada qa he wicoowotanna kiciyawapi.

4. Tuwe rtani kin taku qupi kin he wowaonxida iyecen kiciyawapi xni tuka wopetonpi kin he iyececa.

5. Tuka tuwe oranye xni qa tuwe tona wartanipi kin wicayuwotanna kin he wicada kinhan wicadapi kin he wicoowotanna kiciyawapi ece.

6. Wicaxta kin tuwe wicoran codan Wakantanka wicoowotanna kiciyawa kin wowaxte yuhe cin he Dawid oyake ciqon iyececa.

7. Tona taku xica econpi qon wicakicicajujupi qa wartanipi kin yutokan iyewicakiciciyapi kin hena wowaxte yuhapi.

8. Wicaxta kin tuwe Itancan kin woartani kiciyawa xni kin hee wowaxte yuha ce.

9. Wowaxte kin de ohomni baxpapi kin ecedan en au he, qa ix ohomni baxpapi xni kin en au he. Wicadapi kin he Abereyam wicoowotanna kiciyawapi qon, unkeyapi ce.

10. Token he on kiciyawapi he. Ohomni baxpapi ecen un kin he en, qa ix ohomni baxpapi xni kin icunhan, *uman tukte* he. Ohomni baxpapi kin en un kin hee xni, tuka ohomni baxpapi xni icunhan.

11. Qa naharin ohomni ba-

xpapi xni un kin icunhan ohomni baxpapi kin he wowapetog-ton wowicada wicoowotanna ipuspe kin hee icu, hecen tona wicadapi kin owasin ohomni baxpapi kin opapi xni exta he ate yapi kta, qa nakun hena e wicoowotanna wicakiciyawapi kta.

12. Qa tona ohomni baxpapi kin hecepidan xni, nakun tona ohomni baxpapi xni en un qehan Abereyam wacinye ciqon he oye kin ohna manipi kinhan hena ix eya ohomni baxpapi kin en ate yapi kte cin heon.

13. Maka kin tawa ye kte cin Abereyam iye cinca kici iwahowicayapi qon he woope kin eciyatanhan xni, tuka wicadapi wootanna kin eciyatanhan.

14. Tona woope kin eciyatanhanpi kin hena tawapi kte cin heepi hecinhan wicadapi kin he ecetu xni yapi kte, ça wahoyapi qon he nakun iyog iyeyapi kta.

15. Woope kin he wocanniye kaga; tukten woope wanica hecinhan hen woartani nakun wanica.

16. Heon etanhan he wicadapi kin eciyatanhan, wowaonxida kin etanhan un kte cin heon, qa wahoyapi cincapi kin owasin en wicakiciyusutapi kta, taku woope kin eciyatanhan un kin hecedan xni, tuka tona Abereyam, unkiye owasin ate unyanpi kin, wacinye ciqon en opapi kin hena koya.

17. (Wowapi kagapi qon he kaken eya, Oyate ota en ate yapi cicage kta ce,) Wakantanka wicaçe cin ake ni wicaye ça taku

tona un xni kin hena taku un kin iyecen kico kin he wicada kin heon etanhan.

18. He asepica xni tuka woa-pe en awacin un, Nicinca kin iyenaka kta, keyapi qon he iye-ecen, oyate ota en ate yapi kte cin heon.

19. Qa waxagya wacinye cin heon iye tancan kin wanna kan he awakicin xni, wanna waniyetu opawinge ikiyedan, qa Sara tamni kin nakun *awakicin* xni.

20. Qa Wakantanka wahoye ciqon he etanhan wicadapi xni kin on kaktihanhan xni tuka wacinyanpi kin en waxagya un qa Wakantanka yutan.

21. Qa token wahoye ciqon he ecetu kiye kta okihi e sutaya wicada.

22. Heon etanhan he wicoowotanna kiciyawapi.

23. He hecen kiciyawapi kin he iye ixnana on wowapi kin en kagapi xni;

24. Tuka unkiyepi on, he unkiciyawapi kte cin heon etanhan, tuwe Jesus Mesiya Itancan unkiyapi kin wiconçe etanhan najin kiye ciqon he wacinunyanpi kinhan.

25. Iye waunrtanipi kin heon he qupi qa owotanna unyawapi kte cin heon najin kiyapi.

WICOWOYAKE 5.

1. Heon etanhan wicadapi kin on owotanna unyawapi qa Wakantanka kici wookiye unhapi, Jesus Mesiya Itancan unkiyapi kin eciyatanhan.

2. Qa he eciyatanhan wicadapi kin on etanhan wowaonxida

en ahan naunjinpi kin de iya-hanpi unhapi qa Wakantanka towitan kin ape unkiyuxkinpi.

3. Qa hecedan xni, nakun taku icanxicapi kin en unkiyuxkinpi ece; wokakije kin he wacin tankapi kaga e sdonunyanpi;

4. Qa wacin tankapi kin he wiyukeanpi *icar ya*, qa wiyukeanpi kin he woape *icar ya*;

5. Qa woape kin he ixten wicaye xni, Wōniya Wakan unqupi kin he eciyatanhan Wakan-tanka towaxtedake kin uncantepi kin en unkokicicaxtanpi kin he etanhan.

6. Takudan unkokihipi xni kin he icunhan, wanna iyehantu qehan Mesiya wartanipi sa kin on ʔa.

7. Tuwedan wicaxta owotanna kin on ʔe iʔiye kte xni naceca; tuka okini wicaxta waxte on tuwe ʔe kta okihi.

8. Tuka wartanipi sa heunca-pi kin he icunhan Mesiya unkiyepi on ʔe cin he en Wakantanka token cante unkiyapi kin hduotanin.

9. Qa nakaha iye we kin on etanhan owotanna unyawapi kin, he sam iyeya iye eciyatanhan wocanniye kin etanhan eunhdakupi kta.

10. Tōka unyakonpi qehan he icunhan iye Cibintku ʔe cin eciyatanhan Wakantanka kici okiciciye unyanpi kinhan, he sam iyeya, om okiciciya unyakonpi kin, iye ni un kin eciyatanhan ni unyanpi kta.

11. Qa hecedan xni, tuka nakun Wakantanka kin en unkiyuxkinpi, Jesus Mesiya Itanean

unkiyapi kin eciyatanhan, he etanhan nakaha wookiye unhapi.

12. Heon etanhan wicaxta wanjidan eciyatanhan woartani wicoicage kin wicehna hiyu, qa woartani etanhan wiconʔe, qa hecen wiconʔe wicaxta akan iwicayaya, owasin wartanipi nakaex.

13. Wooke kin itokam woartani wicaxta kin ehna un, tuka tukten wooke wanice cinhan hen woartani wicakciyawapi xni ece.

14. Hececa exta Adam Mowis iyotahedan hehanyan wiconʔe ounyan, Adam tuwe u kte cin iyacinpi kin hee wartani qon tona iyecen wartanipi xni kin hena nakun akan *iwicayaya*.

15. Tuka woartani qon he kici wowaonxida kin akidecece xni. Wicaxta wanjidan wartani qon he on wicota ʔapi hecinhan, he sam iyeya Wakantanka towaonxida qa waonxida wicaqu kin he wicaxta wanjidan Jesus Mesiya kin hee on wicota en wicakiciyuota kta.

16. Qa wicaxta wanjidan wartani qon eciyatanhan kin waonxida wicaqu kin he iyecece xni. Wanjidan on etanhan wiconʔe iwicayaeopi, tuka waonxida wicaqu kin he woartani ota etanhan wicayuwotanna kta.

17. Wicaxta wanjidan wartani kin on etanhan wanjidan eciyatanhan wiconʔe ounyan hecinhan, he sam iyeya tona wowaonxida untkana wicoowotanna ko wicaqu qa icupi kin hena wanjidan, Jesus Mesiya kin hee

eciyatanhan wiconi kin en oun-
yanpi kta.

18. Heon etanhan woartani
wanjidan eciyatanhan wicaxta
owasin en wiconte iwicayacopi
kin aupi, he iyecen wicoran
owotanna wanjidan on etanhan
wiconi iwicayuowotanna kin he
wicaxta owasin en aupi.

19. Wicaxta wanjidan waa-
nagoptan xni un qon he etanhan
wicota woartani ikicagapi kin he
iyecen wanji waanagoptan un
kin eciyatanhan wicota owotan-
na ikicagapi kta.

20. Woartani ihduota kte cin
heon woope kin hi, tuka tukten
woartani yuota ikicage ciqon
hen wowaonxida nina sam iyeya
ihduota.

21. Wiconte en woartani
ounye ciqon he iyecen wiconi
owihanke wanica en wowaon-
xida ounye kta, Jesus Mesiya
Itancan unkiyapi kin eciyatan-
han.

WICOWOYAKE 6.

1. Hecen token unkeyapi kta
he. Wowaonxida yuotapi kte
cin heon woartani ehna unya-
konpi kta he.

2. Hiya hecetu kte xni. Tona
woartani ekta untpi kin token
he en nakun unnipi kta he.

3. Tona Jesus Mesiya en
baptem wicauppi kin hena iye
te cin en baptem wicauppi kin
he sdonyayapi xni he.

4. Heon etanhan baptem eci-
yatanhan he kici unhnakapi wi-
conte kin en, hecen iye Atkuku
towitan kin Mesiya wicate cin
etanhan ekicetu ye ciqon he iye-

cen unkix eya wiconi teca kin
en maunnipi kta.

5. He te cin iyacinpi kin en
kici ojupi kin een unyakonpi
hecinhan nakun he piya ikicage
cin en iyecen unyakonpi kta.

6. Qa wicaxta tanina unhapi
kin he iye kici icipawer okatan-
pi kin he sdonunkiyapi, hecen
woartani tancan kin he ihang
yapi kta, qa hetanhan woartani
wowidag unyanpi kte xni.

7. Tuwe te cinhan he woa-
rtani etanhan yuxpapi.

8. Hecen Mesiya kici untpi
hecinhan kici unnipi kta e wa-
cinunyanpi.

9. Qa Mesiya wicate cin
etanhan ekicetu yapi qon he ici-
mana te xni un kta, sdonunyan-
pi, wanna wiconte tohini yuhe
kte xni.

10. He te ciqon wancadan
woartani on ta; qa he kini kin
Wakantanka ekta ni un.

11. Qa he iyecen nix eya te
nihdawapi, tuka Wakantanka
ekta ni yaunpi, Jesus Mesiya
Itancan unkiyapi kin eciyatan-
han.

12. Heon nitancanpi te kte
cin en woartani ounye xni nun-
we, hecen wocantiheye xice cin
anayagoptanpi kte xni.

13. Qa nihuhapi kin hena
wicoran xica en woartani wo-
winyunye kta e qupi xni po,
tuka wicate cin etanhan ni un
kin iyecen Wakantanka icicu
po, qa nihuhapi kin wicoowo-
tanna en Wakantanka wowin-
yunye kiya po.

14. Woartani icimana inida-
kapi kte xni. Woope kin ihu-

kuya yaunpi xni tuka wowaonxida kin ihukuya.

15. Hecen tokeca kta; woope kin ihukuya unyakonpi xni tuka wowaonxida ihukuya unyakonpi kin heon etanhan waunrtanipi kta he. Hiya hecetu kte xni.

16. Tuwe anayagoptanpi kta inidake niçiyapi kin he anayagoptanpi kin on wowidake niyanpi kin sdonyayapi xni he; he woartani wiconçe aiyahdeye cin hee, qa ix wicoowotanna en anagoptanpi kin *uman tukte kaxta*.

17. Tuka Wakantanka wopida kiciun nunwe, woartani inidakapi tuka woonspe ecedan en ye niyanpi qon he nicantepi kin eciyatanhan oyapapi.

18. He woartani etanhan niyuxpapi kin wicoowotanna wowidake niyan yaunpi.

19. Wicaxta akantu iyecen iwaa ce, nicerpipi waxake xni kin heon etanhan *hecamon*. Wicoxice en nihuhapi kin axapapi qa woartani wowinyunniyanpi kta e iyowinyakiyapi qon, he iyecen nakaha wicayuecedan kin en nihuhapi kin wicoowotanna inidakapi kta e iyowinkiya po.

20. Woartani wowidake niyanpi qehan wicoowotanna inidakapi xni.

21. Hehan taku nakaha on inixtecapi kin hena en taku waskuyeca duhapi qon he tukte e he; hena e ihanke kin he wiconçe ee.

22. Tuka nakaha woartani etanhan niyuxpapi qa Wakantanka wowidake niyanpi, heon wicayuecedan eciyatanhan wa-

skuyeca duhapi qa he ihanke kin owihanke wanin wiconi kin hee.

23. Woartani iyunwin kin he wiconçe ee, tuka Wakantanka ionxiwicada kin he Jesus Mesiya Itancan unkiyapi kin eciyatanhan owihanke wanin wiconi kin hee.

WICOWOYAKE 7.

1. Mihunkawanji, (tona woope sdonyapi kin hena owicawakiya) woope kin wicaxta kin wowidag ya, tohanyan ni un kin hehanyan, he sdonyayapi xni he.

2. Winorinca kin tuwe hihnaton kinhan hihnaku ni un kin hehanyan toope kin on kaxkapi; tuka hihnaku kin wanna çe cinhan hehan hihnaku toope kin etanhan kiyuxkapi.

3. Hecen hihnaku ni un kin icunhan wicaxta tokeca hihnaye cinhan wawicirarapi eciyapi kta, tuka hihnaku çe cinhan hehan woope qon etanhan kiyuxkapi qa wicaxta tokeca hihnayan exta he wawicirarapi econ xni.

4. Heon etanhan, mihunkawanji, nix eya Mesiya tancan kin eciyatanhan woope kin etanhan niçapi, hecen tuwe tokeca niyuhapi kta, wicaxçe cin etanhan ekicetu yapi qon hee, qa hecen waskuyeca Wakantanka icar yeciciyapi kta.

5. Wiracerpi kin en unyakonpi qehan woartani wocantiheye kin woope kin eciyatanhan un kin hena waskuyeca wiconçe

icar kiciciye kte cin heon unhu-
hapi kin en icar aya.

6. Tuka nakaha woope kin etanhan unkiyuxkapi, taku on unkaxkapi qon he ekta unŋapi kin; hecen oowa tanina kin en wowidag unyanpi kte xni tuka woniya teca kin en.

7. Hecece cinhan token unkeyapi kta he. Woope kin he woartani kin ee he: Hiya, hecetu xni; woope eciyatanhan xni unkanx woartani sdonwakiye kte xni tuka qon. Woope kin, Tokan tawa yacin kte xni ce, eye xni unkanx wocantiheye xice cin sdonwaye kte xni tuka.

8. Hehan woartani woahope kin wowinyunye ɕa miye mahen wocantiheye xice cin owasin micaga. Woope codan woartani ɕa wanka.

9. Ehanna woope codan ni waun; tuka woahope kin he hi qehan woartani kini qa miye maɕa.

10. Qa woahope wiconi kage kte cin he wiconɕe ee iyewa-kiya.

11. Woartani woahope kin wowinyunye ɕa mahnaye ɕa on makte.

12. Heon etanhan woope kin he wakan, qa woahope kin he nakun wakan, owotanna qa waxte.

13. Hecen taku waxte kin he wiconɕe imicicaga he. Hiya hecetu xni. Tuka woartani kin he woartani hee tanin kte cin heon taku waxte on etanhan wiconɕe icar miciciya, hecen woahope kin eciyatanhan woartani kin nina woartani icage kta.

14. Woope kin he wakan sdonunyanpi, tuka miye qe wicacerpi kin hemaca, qa woartani ihukuya wiyopemayanpi.

15. Taku ecamon ece kin he iyowinwakiye xni. Taku wacin kin he ecen ecamon xni qa taku xice wadake cin he ecen ecamon ece.

16. Taku wacin xni kin he ecen ecamon kinhan woope kin he waxte e mdaotanin.

17. Qa hecen tuwe hecon kin he miye xni tuka woartani miye mahen un kin hee.

18. Miye, (micerpi kin he waka) en taku waxte un xni sdonwakiya. Iɕiconzapi kin he iyemicihantu tuka token taku waxte ecamon kte cin iyewakiye xni.

19. Taku waxte wacin kin ecen ecamon xni, tuka taku xica wacin xni kin hee ecen ecamon ece.

20. Hecen taku wacin xni kin he ecen ecamon kinhan tuwe hecon kin he miye xni, tuka woartani miye mahen un kin he hecon.

21. Hecen woope wanji iye-wakiya, taku waxte ecamon wacin eca taku xica miye en micium ece.

22. Wicaxta mahentu kin eciyatanhan Wakantanka ɕoope kin imduxkin.

23. Tuka mihuha kin en woope tokeca wan wanmdaka, he mitawacin woope kin kici kicize ɕa woartani woope mihuha kin en un kin he en-wayaka amahda.

24. Wicaxta nina iyokixice cin he miye; tuwe wiconɕe tan-

can kin de etanhan mayuxpe kta he.

25. Jesus Mesiya Itancan unkiyapi kin heon Wakantanka wopida ewakiya ce. Hecen mitawacin kin on Wakantanka toope kin wəwidag mayan, tuka wicacerpi eciyatanhan woartani woope kin he *imadaka*.

WICOWOYAKE 8.

1. Heon etanhan nakaha tona Jesus Mesiya en un kin hena wiconṭe iwicayacopi wanin unpi, wicacerpi eciyatanhan manipi xni tuka Woniya kin eciyatanhan.

2. Wiconi Woniya toope kin Jesus Mesiya en un kin he woartani wiconṭe ko woope kin etanhan mayuxpa.

3. Woope kin wicacerpi eciyatanhan waxake xni un qa heon taku okihi xni kin, Wakantanka iye Cihintku woartani wicacerpi ouncage kin en kagapi he woartani on etanhan hiyu ye ɕa wicacerpi kin en woartani yaco.

4. Hecen tona wicacerpi kin eciyatanhan maunnipi xni tuka Woniya eciyatanhan, unkiyepi en woope wicoowotanna kin ecetu kta.

5. Tona wicacerpi eciyatanhan un kin hena wicacerpi taku tawa kin awacinpi, qa tona Woniya kin eciyatanhan un kin hena taku Woniya tawa kin *awacinpi*.

6. Wicacerpi awacinpi kin he wiconṭe kin ee, tuka Woniya awacinpi kin he wiconi qa wookiye kin hee.

7. Wicacerpi wicotawacin

kin he Wakantanka tōka ya. He Wakantanka toope kin ope xni qa okitpani.

8. Hecen tona wicacerpi kin en un kin hena Wakantanka iyokipi yapi kta okitpanipi.

9. Tuka niyepi wicacerpi kin en yaunpi xni, Woniya kin en yaunpi, Wakantanka Taniya Wakan kin niyepi kin en ounye cinhan. Qa tuwe Mesiya Taniya kin yuhē xni kinhan he tawa xni.

10. Niyepi kin en Mesiya un kinhan wicatanhan kin he woartani eciyatanhan ɕa, tuka wicacnagi kin he wiconi un, wicoowotanna kin eciyatanhan.

11. Tuwe Jesus wicacṭe cin etanhan najin kiye ciqon he Taniya kin niyepi en ounye cinhan, tuwe Mesiya wicacṭe cin etanhan najin kiye ciqon hee nitancan ɕapi kte cin ekicetu ye kta, iye Taniya Wakan niyepi en ounye cin he eciyatanhan.

12. Heon etanhan, mihunkawanji, wicacerpi kin takudan unkicazopi xni, on etanhan wicacerpi kin eciyatanhan unnipi kta.

13. Wicacerpi kin eciyatanhan yanipi kinhan niɕapi kta; tuka Woniya kin eciyatanhan wicatanhan wicoran kin ɕe yakiyapi kinhan yanipi kta.

14. Tona Wakantanka Taniya Wakan kin yus awicaye cin hena Wakantanka cinca wicaye cin eepi.

15. Ake wokokipe kta e on wowidag yapi woniya kin iya-cupi xni, tuka cihintku yapi wo-

niya kin he iyacupi, on Abba, Ate, eya hoyeunkiyapi ece.

16. Qa Wakantanka cinca kin heuncapi e unnagipi kin kici Woniya Wakan kin e unyao-taninpi.

17. Qa cincapi kinhan tawaye kte cin *heuncapi*; Wakantanka tawaye kte ça Mesiya kici tawaye kte cin; qa he kici un-kakijapi kin heon kici wowitan unhapi kta.

18. De nakaha wicokakije kin he wowitan unkiyepi en ecadan yutaninpi kte cin kici akidecen yawapi kte cin iyecetu xni wadaka.

19. Taku icage cin he ape yanka; Wakantanka cinca wicaye cin yuotaninpi kte cin he ape yanka.

20. Taku icage cin he cin xni tuka woecetu xni kin en idakapi; tuwe woape kin on he wowidag ye cin hee *hecon*.

21. Qa taku icage cin he qe wicarwin wowidag yapi kin etanhan kiyuxkapi qa Wakantanka cinca wicaye cin towitan en ihduhapi kin he en *ye yapi* kta.

22. Taku icage cin owasin dehanyan witaya comnihdazi qa hokxiksuya un.

23. Qa hecedan xni, unkix eya Woniya Wakan tokaheya icar ye cin he unhapi kin unkiyepi qe comniunhdazipi qa atayedan cinca yapi kte cin unka-pepi, unkitaneanpi ekicetu yapi kte cin hee.

24. Woape kin on niunyan-pi; tuka woape wanyakapi kin he woape kin ee xni, tuwe taku wanyake cinhan tokeca e naharin ape yanka he.

25. Tuka taku wanunyakapi xni kin he unkaepi hecinhan hehan wicowarbadan yuha un-kicupi kta ape unyakonpi.

26. Qa nakun Woniya Wakan kin he waunxakapi xni kin icunhan ounkiyapi ece. Token wocekiye unkeyapi kte cin sdonunkiyapi xni tuka Woniya Wakan e qe unkiyepi on wocekiye eya, howayapi oyagpica xni kin on.

27. Qa tuwe wicacante iyukean kin he Woniya Wakan token wacin yuze cin sdonya, he Wakantanka *tawacin kin* eciyatanhan tona owotanna un kin hena on wocekiye eya.

28. Wakantanka waxte dakapi kin hena taku owasin tanyan owicakiran ece e sdonunyanpi, tona iye tawacin kin eciyatanhan wicakico kin hena.

29. Tona otokaheya tanhan sdonwicakiye ciquon hena wicakiconza, iye Cihintku ouncage kin en icagapi kte cin heon, qa hecen he hunkawanjitku ota ehna tokapa kta.

30. Qa tona wicakiconze ciquon hena wicakico; qa tona wicakico qon hena wicayuowotanna; qa tona wicayuowotanna qon hena ix eya wicayutan.

31. Heon etanhan hena taku kin en taku unkeyapi kta he. Wakantanka unkipi un kinhan tuwe kaxeunyanpi kta he.

32. Tuwe iye Cihintku kin kpatan xni qa unkiyepi owasin on kpagan qon, hecinhan kici taku owasin ituya unqupi kte xni he.

33. Tona Wakantanka wicakarnige cin hena tuwe taku iya-

wicaonpe kta he. Wicayuo-wotanna kin he Wakantanka kin ee ce.

34. Tuwe wayaco kta he. 'Te cion he Mesiya ee, qa ake piya ikicage cin hee Wakantanka etapa kin eciyatanhan yanke ça unkiyepi on wocekiye eciya.

35. Tuwe Mesiya wowaxtedake kin etanhan unyuxpapi kta he. Wicokakije, woxitkihda, wicokicize, wicaakiran, tancowicakadan, wokokipe qa maza sagye okihi kta he.

36. (Owapi qon he hecetu, Niye kin on anpetu ohiniyan unktepi unyakonpi, tarinca ktepi kte cin iyecen unyawapi ce.)

37. Tuka hena taku kin owasin en tuwe cante unkiyapi qon he eciyatanhan tanyan ohiye unyakonpi.

38. Heon wiconțe, qa wiconi, qa marpiya ohnihde cin hena, qa wokiconze kin, qa wicowaxake kin, qa taku nakaha un kin taku u kte cin ko;

39. Qa taku wankantuya un kin, qa taku mahentuya un kin, qa taku icage cin tokeca, *hena-kiya* takudan Wakantanka wowaxtedake Jesus Mesiya Itancan unkiyapi kin en un kin etanhan unyuxpapi kte xni sdonwaya.

WICOWOYAKE 9.

1. Mesiya eciyatanhan wowicake epa, itonxni mawanica, (minagi kin hee Woniya Wakan kici mahdaotanin;)

2. Nina iyomakixice ça micate ekta ohiniyan iyokixin waun.

3. Mihunkawanji qa tona wicacerpi eciyatanhan takuwicawaye cin hena on etanhan Mesiya etanhan mayacopi kta tawatenwaye kta tuka.

4. Hena Israel wicaxta kin hecapi, qa atayedan cinkxi wicaye cin hena eepi, qa wowitan, qa wicotakuye, qa woope wicakupi kin, qa wawokiyapi kin, qa wahoyapi kin hena tawapi.

5. Qa hunkake wicayapi kin etanhanpi kin hena eepi, qa hena etanhan wicacerpi eciyatanhan Mesiya inanpa, he owasin iwankam Wakantanka kin ee, owihanke wanin wowaxte yuha nunwe.

6. Wakantanka oie kin takudan icar ye xni kin he wake xni. Tona Israel etanhanpi kin hena owasin Israel hecapi xni.

7. Qa Abereyam etanhan icagapi kin heon owasin cincapi kin hecapi xni. Tuka, Izak etanhan kin hena wicowazi nitawa kin eciyapi kta ce.

8. He kaketu, tona Wakan-tanka cinca wicaye cin hena wicacerpi eciyatanhan cinca wicayawapi qon heon etanhan xni, tuka tona cinca wahoyapi qon hena e wicowazi kin ee iyawapi.

9. Wahoyapi wicoie kin he decetu, Tohan kinhan iyacinyan wau qa Sara cihintku wan ton kta.

10. Qa heceden xni, tuka Rebeka wanjidan on, Izak ate unyanpi kin hee on, ihduxake çehan;

11. (Naharin tonpi xni kin hena taku waxte qa taku xica

umana naharin econpi xni, Wakantanka tawacin kin wicakarnigapi kin en sutaya un kte cin heon, wicoran kin eciyatanhan xni, tuka tuwe wicakico kin he eciyatanhan;)

12. Hecan heciyapi, Hakakta kin he tokapa kin wowidag ye kta.

13. Owapi qon he kaketu, Jakob waxte wadake ça Esa xice wadaka ce.

14. Hecen token unkeyapi kta he. Wakantanka owotanna xni econ he. Hiya, hecetu xni.

15. He Mowis hecen eciya, Tuwe onxiwakida kte cin he onxiwakida kta, qa tuwe wacin en mduze kte cin he wacin en mduze kta ce.

16. Heon etanhan tuwe cin kin eciyatanhan xni qa tuwe inyanke cin he nakun eciyatanhan xni, tuka Wakantanka onxiwicakida kin he eciyatanhan un.

17. Wowapi wakan kin Paro heciya, He dee on etanhan icar ciya, niye en mitowaxake kin wahdaotanin kta qa maka owancaya micaje kin oyakapi kte cin heon.

18. Heon etanhan tohan cin eca onxiwicakida qa tohan cin eca wicayuteri ece.

19. Hecen tokeca e naharin iyawicaonpa he; tuwe he tawacin kin ecetu xni ya he, emayakiye kta naceca.

20. Hiya, wicaxta kin, nix nituwe he, hecen Wakantanka i en hiyeyaya he. Taku kagapi kin he tuwe kage cin, Tokeca hecen mayakaga he, eciye kta he.

21. Maka wakxica kage cin heca kin maka kin okihi xni he, maka onxpa wanjidan etanhan wakxica wan woyuonihan qa wanji wowixtece kaga okihi xni he.

22. Hecen Wakantanka wocanniye kin hdutanin kta cin qa wowaxake kin sdonye unkiyapi kta e on wocanniye wakxica wicotakuni xni kicagapi qon hena wawacinkta yuza tanka on ecawicakicon kinhan;

23. Tona wowaonxida wakxica kin otokaheya tanhan wowitan on wiyeya ehna kapi qon hena en iye towitan woyuha kin hduotanin kta.

24. He wicakico kin hena unkiyepi, Juda oyate etanhanpi kin hecedan xni, tuka nakun Ikcewicaxta etanhanpi.

25. Hose en heye ciqon iyececa; Tona mitaoyate xni kin hena mitaoyate ewicawakiye kta, qa waxte dakapi xni qon he waxte dakapi kin ewakiye kta.

26. Qa tukten, Mitaoyate kin he niyepi xni ce, ewicakiyapi qon, hen, Wakantanka ni un cinea kin ewicakiyapi kta ce, eya.

27. Esayas ix éya Israel oyate kin eciyatanhan hotanin qa heya, Israel cincapi kin miniwanca wiyaka sukaza iyecen ota yawapi exta tona okaptapi kin hena nipi kta.

28. Wayawapi yuptecedan kta qa wicoowotanna en hduxtan kta; maka akan Itancan kin wayawapi ptecedan wan kage kta.

29. Qa he itokam Esayas

heye ciqon; Sabayot Itancan kin wicowazi wan unkokicicaptapi xni unkanx Sodom iyecen unyakonpi kta qa Gomora en unkiyoptapi kta tuka.

30. Hecen token unkeyapi kta he. Ikcewicaxta kin wicoowotanna iyeyapi, wicadapi kin eciyatanhan wicoowotanna kin hee.

31. Tuka Israel wicoowotanna woope odepi qon hena wicoowotanna woope kin iyohipi xni.

32. Tokeca he. Wacinyanpi kin eciyatanhan *odepi* xni tuka woope wicoran kin eciyatanhan he iyececa, heon etanhan. Inyan ibotopi kin de siha ibotopi.

33. Wowapi kagapi qon iyececa; Wanyaka wo, Ziyon en inyan ibotopi qa imnija on ricahanpi kin he ewahde; qa tuwe he en wicada kinhan ixtece kte xni.

WICOWOYAKE 10.

1. Mihunkawanji, micante cantiheye qa taku Wakantanka icewakiye cin Israel oyate kin wicani kte cin hee.

2. Hena wicaweciyaotanin, Wakantanka wacin en yuzapi tuka he wosdonye eciyatanhan xni.

3. Wakantanka toowotanna kin sdonyapi xni, qa iye wicoran owotanna hdusutapi kta e akitapi, Wakantanka owotanna oranye cin he wacinyanpi xni.

4. Tona wicadapi kin owasin en Mesiya kin he wicoowotanna woope woyuxtan kin hee.

5. Woope kin eciyatanhan woowotanna un kin he Mowis oyaka, Tuwe hena taku kin ecen econ kinhan he on ni kta.

6. Tuka wowicada eciyatanhan wicoowotanna un kin he kaken eya, Nicante kin mahen, Mesiya kun ahi kte cin heon tuwe marpiya ekta wankan ye kta he;

7. Qa, wicate cin etanhan Mesiya yuwankan au kte cin heon tuwe woxbe kin ekta ye kta he, eye xni wo.

8. Tuka taku eya he; Wicoie kin he nikiyedon un, nii kin ohna, qa nicante kin en un, wicoie wicadapi kte cin unkoyakapi kin hee.

9. Nii kin on Jesus Itancan kin yahdaotanin qa he wicate cin etanhan Wakantanka ekicetu ye cin he nicante kin eciyatanhan wicayada kinhan yani kta.

10. Wicoowotanna kta e wicacante on wicadapi qa wiconi kta e wicai kin on wohdakapi ece.

11. Wowapi wakan kin he heya, Tuwe he en wicada kinhan wixtece kte xni.

12. Juda qa Helenes oyate kin kici ocikpanipi wanica. Tuwe owasin en Itancan kin he tona hoyekiyapi kin hena owasin en wijinya un.

13. Tona Itancan caje kin hoyekiyapi kinhan hena otoiyohi nipi kta.

14. Tuka tuwe kin en wicadapi xni kinhan token on he hoyekiyapi kta he; qa he naharin naronpi xni kinhan token wicadapi kta he; qa tuwedon

oyake xni kinhan token naronpi kta he.

15. Qa ekta ye wicaxipi xni kinhan token oyakapi kta he. Owapi qon he hecetu; Tona wookiye wotanin waxte kin oyakapi; taku waxte en wotanin waxte oyakapi kin hena sihapi kin iyotan waxte ce.

16. Tuka owasin wotanin waxte kin anagoptanpi xni. Esayas hecen eya; Itancan, tuwe unkoyakapi kin wicada he.

17. Heon etanhan wanaronpi kin eciyatanhan wicadapi kin u, qa wanaronpi kin he Wakantanka oie kin eciyatanhan.

18. Tuka kaken epa, Hena naronpi xni he. Hiya hena oqo kin makoce owasin ekta iyaye ça wicoie kin maka ihanke kin hehanyan i.

19. Qa Israel oyate kin he sdonyapi xni he. Tokaheya Mowis heya, Tona oyate xni se un kin hena on iyocipaxtakapi kta qa oyate wacinton xni kin heon xihda ciyapi kta.

20. Tuka Esayas nina wadi-take ça heya, Tona omadepi xni kin hena iyemayanpi qa to-na madapi xni kin hena en mihdaotanin.

21. Qa Israel oyate kin hewicakiya, Anpetu osan oyate wanaron xni qa wacejunhdapi kin he nape wicawakiyugata ce.

WICOWOYAKE 11.

1. Heon hepa, Wakantanka taoyate kin erpewicakiya he. Hiya hecetu xni. Israel wicaxta kin hemaca, Abereyam cin-

ca qa Benjamin wicouñ kin hematanhan.

2. Wakantanka taoyate kin tona otokaheya tanhan sdonwicakiye ciquon hena erpewicakiye xni. Wowapi wakan Eliya on token eye cin sdonyayapi xni he; Israel oyate on etanhan Wakantanka wocekiye eciye ça heya;

3. Itancan, wicaxta wokcan nitawa kin hena wicaktepi qa wahna woxnapi nitawa kin yujupupi qa miye mixnana omakaptapi, unkan te mayanpi kta akitaipi ce.

4. Tuka Taku Wakan kin token eya ayupta he; Naharin Baal en canpexka makehde inajinpi xni kin wicaxta kektopawinge xakowin wicawahduha.

5. He iyecen nakaha wowaonxida wicakarnigapi kin eciyatanhan wanjikji *okaptapi*.

6. Qa he wowaonxida eciyatanhan kinhan hehan wicoran eciyatanhan xni; hecinhan wowaonxida kin he wowaonxida kin heca xni. Qa wicoran kin eciyatanhan kinhan wowaonxida kin eciyatanhan xni; hecinhan wicoran kin he wicoran kin heca xni.

7. Hecen toketu kta he; Israel taku akite ciquon he iyeikiye xni, tuka tona wicakarnigapi kin hena e he iyeyapi qa umanpi kin ixta gonge wicayapi.

8. Wowapi en kagapi qon he kaketu; Wicarba wicacante kin Wakantanka wicaqu, ixta on wiwanyakapi kte xni qa noge on winaronpi kte xni, anpetu kin dehanyan.

9. Qa Dawid hecen eye ci-

qon; Wahna wotapi tawapi kin he mazartakiyapi qa wihmunke qa wonahnaye qa wokajuju yuhapi kin hee kta.

10. Ixta kin aotpas wicayapi kta qa ohiniyan cankahu on patux inajinpi nunwe.

11. Heon ricahanpi qa on hinrpayapi kta he, epa. Hiya hecetu xni; tuka ricahanpi kin on etanhan Ikcewicaxta kin wiconi yuhapi kta qa hehan hena ix eya iyowicapaxtakapi kta.

12. Hena ricahanpi kin he wicoicage kin en woyuha kin hee, qa hena wicayuaoptetu kin he Ikcewicaxta kin en woyuha kin hee hecinhan, wicayuecetupi kte cin he sanpa ota hee kta.

13. Ikcewicaxta henicapi kin hena hecen eciciyapi; Ikcewicaxta kin en ohnihde mayanpi, qa heon mitortani kin wahdu-tan.

14. Hecen tona micerpi etanhanpi kin hena inarni wicawaye kta, kinhan wanjikji ni wicawaye kta.

15. Hena erpewicayapi kin he wicaxta kin en wookiye kin hee hecinhan, hena ake wicayuecetupi kinhan he taku kta he; wiconte etanhan wiconi kin hee kta.

16. Taku tokaheya suton kin he wakan kinhan, ocowasin hecece kta; qa can huta kin he wakan kinhan, can adetka kin hena nakun hecece kta.

17. Unkan can adetka kin hena wanjikji yuksapi qa nix can wihdi hu ikceka henica tuka can adetka qon ehna can kin en icar niyanpi qa can wihdi ce-

pa can hutā kin etanhan en opeya yaun kinhan,

18. Can adetka qon en ihdatan xni wo. Nihdatan kex can huta kin he duhe xni tuka can huta kin hee niyuha.

19. Hehan, Hen emahdepi kta on can adetka qon yuksapi, ehe kta naceca.

20. Han, hecetu; wicadapi xni kin heon yuksapi, qa niye wicadapi kin on ecen yaun. Waraniçida xni qa kokipa wo.

21. Can adetka tawa qon hena Wakantanka kpatan xni hecinhan nix eya nikpatan kte xni.

22. Wakantanka towaonxida tocantiyahde ko wanyakapo, tona hinrpayapi qon hena en wocantiyahde, qa niye en wowaonxida kin, wowaonxida kin he en yaun kinhan, tuka hecanon xni kinhan nix eya nicaksapi kta.

23. Qa hena cetunhdapi ecen unpi xni kinhan ix eya ake can kin en iyekiyapi kta. Ake can kin en Wakantanka icar wicaya okihi.

24. Qa niye can wihdi ikceya icage ciqon etanhan nicaksapi qa inicage cin eciyatanhan xni, can wihdi waxte kin en iyenianpi kinhan, tona can kin he aicage ciqon hena iyotan ake can wihdi tawapi kin en iyeyapi kta.

25. Mihunkawanji, wowiyukcan kin de sdonye xni dukanpi kta wacin xni; (okini ksape niçidapi kta) Israel oyate kin apa ixta gonga aya, Ikcewicaxta woyuxtan hiyohi kte cin hehanyan.

26. Qa hecen Israel oyate kin owasin nipi kta. Wowapi en kagapi qon iyecetu; Ziyon etanhan Wanikiya wan u qa woartani Jakob yutokan iyekiciye kta.

27. Qa woartani yutokan iye-wicaweciciye cinhan hehan wicotakuye wicawaqu kte cin hee ce.

28. Wotanin waxte kin ekta, hena niyepi kin on etanhan tóka wicayawapi, tuka wicakarnigapi kin ekta, hena e hunkakepi kin on etanhan waxte wicakidapi.

29. Wakantanka taku wicaqu qa wicakico kin he on iyo-peiciyapi wanin un.

30. Unkan nix niyepi kin ehanna Wakantanka anayagoptanpi xni, tuka nakaha hena wicadapi xni kin on wowaonxida niçupi.

31. He iyecen nakaha hena ix eya anagoptanpi xni, niye nitowaonxida kin on etanhan onxiwicadapi kta.

32. Hena owasin witaya wicadapi xni kin en Wakantanka onawicataka, iyurpa onxiwicada kta heon etanhan.

33. Wakantanka wowijica woksape wosdonye ko oxbe kin he tanka. He woyaco tawa kin okarnirpica xni qa tacanku kin iyeyepica xni.

34. Tuwe Itancan tawacin kin sdonya he; qa tuwe okiya un he.

35. Qa tuwe he tokaheya taku qu he; kinhan kicicajujupi kta.

36. Iye etanhan qa iye eciyatanhan qa iye ohna taku owa-

sin un; owihanke wanin wowitan kiciun nunwe.

WICOWOYAKE 12.

1. Heon mihunkawanji, Wakantanka wacantohnake cin on etankan ceciciyapi ce, nitancanpi kin woxnapi ni un wakan qa taku Wakantanka iyokipi kin hena hecen yaqupi kta, he wowedake yaunpi waxte kin hee.

2. Qa wicoicage kin de en iyecen awacanipi kte xni, tuka nitawacinpi yuecepidan kte cin on nihdutokecapi nunwe; hecen Wakantanka tawacin waxte oi-yokipi qa hduxtanpi kin he tukte e idukeanpi kta.

3. Wowaonxida maqupi kin he eeiyanhan tona niyepi ekta un kin otoiyohi hecen eciciyapi; Tuwedan token ihdukan kte cin he isanpa ihdawa kte xni, tuka wacinksamya ihdukan kta, Wakantanka otoiyohi wacinyanpi iyuta wicaqu kin he eciyatanhan.

4. Wicatan can wanjidan en wicahuha ota unhapi, qa huha kin hena owasin okonwanjidan oranye xni.

5. He iyecen unkiye unkotapi, tuka Mesiya en tancan unwanjipidan qa otoiyohi huha unkiciyapi.

6. Hecen wowaonxida otoiyohi yukinukanyan unqupi kin eciyatanhan wicookihi ociptetu unhapi; he wokcanpi kte cin hee hecinhan wowacinye okonwanjidan on *unhapi* kta.

7. Qa wowidake unpi kin hee hecinhan wowidake unpi kin en *unyakonpi* kta; qa tuwe

waonspekiye kte cinhan he waonspekiyapi kin en un kta.

8. Tuwe wahokonwicakiye kte cin he wahokonwicakiyapi kin en un kte; tuwe taku wicagu kte cin he oranpiya econ kte; tuwe oyate wicayuhe cinhan he mnihenya econ kta; qa tuwe onxiwicadake cinhan iyokipiya econ kte.

9. Wacantkiyapi kin he wohnaye wanin un nunwe. Taku xice cin he xice dakapi qa taku waxte kin he en iyaihdaxka po.

10. Hunkawanjin kiciyapi waxte kicidakapi kin he on otioyohi cante en kiciyuza po, qa woyuonihan on otioyohi iyotan kicidaka po.

11. Wicortani kin en kujapi xni, qa wicoksape kin on aiçiei-yapi, qa Itancan kin okiya po.

12. Woape en iyuxkinpi, wicokakije kin en he taku dapi xni, qa wocekiye eya yukan po.

13. Tona owotanna un kin taku icakijapi kinhan owicakiya po. Wicaxta icimanipi kin oranpiya ecawicakicon po.

14. Tona xicaya nicuwapi kin hena wicayuwaxte po; wawuwaxtepi qa waoxtehdapi xni po.

15. Tona iyuxkinyan un kin hena om iyuxkinpi, qa tona ceyapi kin hena om ceya po.

16. Otoiyohe okonwanjidan awakiciein po. Taku wankan ihdawapi kin hena ekta ewacinpi xni po, qa taku kun ihdawapi kin he ekta ewacin po. Wacin ksape icidapi xni po.

17. Tuwedan taku xica en xicaya econpi xni po. Wica-

xta owasin itokamya taku owotanna ecedan kamnan po.

18. Tohanyar oyakihipi kinhan wicaxta owasin om wookiye yakon po.

19. Waxte cicidapi kin, ihnuhan niye cinka watoyeçonpi kin, wocanniye nakicipa po. Hecen wowapi en kagapi, Tokiçonpi kin he miye mitawa, wicawecu kta ce, Itancan kin eya.

20. Tuwe toka niye cin he wotektehda kinhan wo qu wo; qa ipuza kinhan mini qu wo; hecen ecanon kinhan petaga kin, he pa kin en eju ade kta.

21. Ihnuhan taku xica on ohiniyanpi kin, tuka taku waxte e on taku xice cin ktepidan po.

WICOWOYAKE 13.

1. Wicanagi otioyohi wicowaxake itancan kin hena ihukun iyeiçiyete. Wicowaxake Wakantanka etanhan un kin hecedan yukan. Wicowaxake un kin hena Wakantanka kaga.

2. Heon etanhan tuwe wicowaxake kin kipajin kinhan he Wakantanka toope kin kipajin, qa tona wawakipajin kin hena wicayacopi kta.

3. Wicaxtayatapi kin hena wicoran waxte kin en wakokipe wicakicagapi xni tuka wicoran xice cin en. Hecen wicowaxake kin he koyakipe kte xni he. Taku waxte e econ wo, heon niyutanpi kta ce.

4. He taku waxte on niye ekta Wakantanka taokiyete kin hee. Tuka taku xica ecanon kinhan kokipa wo. He taku on etanhan maza sagye yuhe cin

he taku xni wanica. Qa he Wakantanka taokiye, tuwe taku xica econ kinhan tokiçon kta, wocanniye kin heon.

5. Heon etanhan anagoptan yaunpi kta, wocanniye kin hecedan on etanhan xni, tuka nakun wiyukcanpi kin heon.

6. Heon etanhan taku qu nixipi kin he wicayaqupi; hena e Wakantanka taokiyepi kin ohin-nyan taku kin de econ yukanpi.

7. *Wicaxta* owasin taku to-ken wicakicupi kte cin he wica-kicu po: 'Tona iye taoyate kin etanhan maza ska mnayanpi kin he *ecen wicagu po*; qa tona oya-te tokeca etanhan mnayanpi kin he *nakun ecen wicagu po*. 'To-na kinihanpi kte cin hena wica-kinihan po, qa tona yuonihanpi kte cin hena wicayunihan po.

8. Tuwedan taku iyeeazopi xni, otoiyohe waxte yecidakapi kte cin hecedan. Tuwe wica-xta tokeca waxte wicadake cin he woahope kin tanyan yuha.

9. He decetu; Wawicirarapi ecanon kte xni; Tin wicayakte kte xni; Wamayanon kte xni; Tuwedan en oitonxniyan odake kte xni; Tokan tawapi yacin kte xni; qa woahope tokeca yuke cinhan wicoie kin de en yuwi-tayapi; Wicaxta tokeca niye ini-hdacin waxte yadake kta.

10. Wowaxtedake kin he wicaxta tokeca taku xica takudan ecakicon xni, heon waxte wica-dakapi kin he woahope yuece-tupi kin hee.

11. Qa de anpetu kin sdon-nyanpi, wanna woixtima etan-han unkiktapi kta, nakaha eun-hdakupi kte cin tokaheya wica-

undapi qon he isanpa ikiyadan ihan;

12. Hanyetu kin wanna eca-dan unkihunipi kta, anpetu kin kohanna u kta, heon etanhan otpaza wicoran kin erpeunyanpi qa iyoyanpa wipe kin kounya-kapi kta.

13. Qa iyokipiya maunnipi kta, anpetu kin en iyececa. Hanyetu wacipi qa witkopi kin en *unkopapi* kte xni; wicawihomnipi qa wicinpi, wakinicapi qa winawizipi kin hena en *oun-papi* kte xni.

14. Tuka niye Jesus Mesiya Itancan kin he koyaka po, qa wicacerpi wocantiheye xice cin ecetu yapi kta e on takudan ki-camnanpi xni po.

WICOWOYAKE 14.

1. Tuwe wicada kinhan wa-xake xni exta iyowinkiya po, tuka akipam waakinicapi kin e-hta xni.

2. Wicaxta wanjidan taku o-wasin yuta okihi awacin, qa wicaxta tokeca waxake xni kin he peji ece yuta.

3. Tuwe wote cinhan he tu-we wote xni kin irara kte xni; qa tuwe wote xni kinhan he tu-we wote cin yaco kte xni; Wa-kantanka he iyowinkiya.

4. Nituwe he wicaxta tokeca taokiye kin daco he; he iye yu-he cin en najin kta qa ix hin-rpaye kta. Qa he ecen najin kiyapi kta, Wakantanka najin kiyie kta okihi.

5. Wicaxta wanjidan anpetu wanji wakan da, qa wicaxta to-keca wan anpetu owasin akide-

een yawa ece. Otoiyohe iye tawacin ekta sutaya awacin nunwe.

6. Tuwe anpetu wan iyotan dake cinhan he Itancan kin on iyotan daka; qa tuwe anpetu kin he iyotan dake xni kinhan he Itancan kin ekta iyotan dake xni. Tuke wote cinhan he Itancan kin kiciyute qa Wakantanka wopida eciya; qa tuwe wote xni kinhan he Itancan kin kiciyute xni qa Wakantanka wopida eciya.

7. Unkiyepi kin tuwedan iye cinka ni xni qa tuwedan iye cinka te xni.

8. Unnipi kinhan Itancan kin unkicinipi qa unṭapi kinhan Itancan kin unkiciṭapi kta. Hecen unnipi qa unṭapi *uman tukte* hecinhan Itancan kin tawa unyanpi.

9. Hecen on Mesiya te qa ake kini, wicaye qa wicani kin heniyoza en Itancan kta e heon *hecon*.

10. Tokeca nihunkawanji daco he; qa tokeca nihunkawanji iyakirara he. Owasin Mesiya tawoyaco oiyotanke kin itokam inaunjinpi kta.

11. Hecen wowapi en kagapi; Miye wani kin heon hupahu otoiyohe miye en canpexka makehde irajin kta qa wicaceji otoiyohe Wakantanka en wohdake kta, Itancan kin eya.

12. Heon etanhan unkiyepi owasin unkiciṭapi qa Wakantanka en wounhdakapi kta.

13. Hecen on, detanhan otoiyohe unkiciyacopi kte xni, tuka kaken e iyotan wayaco po, tuwedan taku en siha ibotopi qa on hinrpaye kte cin he hunka-

wanjitku kin itokam ehde kte xni.

14. Mix sdonwaye qa Jesus Itancan kin en awacami, takudan atayedan axape xni, tuka tuwe taku axapa kecin kinhan he taku kin iye ekta axapa.

15. Qa woyute kin on etanhan nihunkawanji iyokixin yaye cinhan wowaxtedake eciyatanhan mayani xni. Tuwe Mesiya on te ciquon he woyute nita-wa kin on ihang ye xni wo.

16. Ihnuhan taku waxte duhapi kin waoxtehdapi kin.

17. Woyute qa woyatke kin Wakantanka wokiconze kin hee xni, tuka wicoowotanna wookiye qa Woniya Wakan kin en wowiyuxkin kin hena ee.

18. Tuwe hena taku kin en Mesiya wowidag ye cinhan he Wakantanka iyokipi ye qa wicaxta kin on waxte dakapi.

19. Heon etanhan taku tona wookiye kage cin hena unkakitapi kta qa nakun taku on otoiyohe ounkiciyapi kta.

20. Woyute kin on etanhan Wakantanka taku kage cin he ihang ye xni wo. Awicakehan taku owasin waxte; tuka tuwe taku yute qa on wartani wicaye cin he xica.

21. Waconica yutapi xni qa mini xa yatkanpi xni, qa taku tokeca on etanhan nihunkawanji ricahē qa wartani qa waxake xni aye cin hena *econpi* xni kinhan he waxte.

22. Wowacinye duha he; Nix niye Wakantanka itokamya hduha wo. Tuwe taku iyo-winkiye cin en ihdaco xni kinhan hee wowaxte yuha.

23. Qa tuwe wicada xni kinhan he yute cinhan wanna yacopi, wacinyanpi kin on hecon xni, heon etanhan. Taku owasin wacinyanpi kin eciyatanhan xni he waortani kin hee.

WICOWOYAKE 15.

1. Unkiye waunxakapi kin tona waxake xni un kin teriya wacin yuzapi kin he ekta ewauncinpi kte xni, qa unkiye qe iyokipi unkiçiyapi kte xni.

2. Otoiyo hi wicaxta tokeca iyokipi unyanpi kta, wowaxte en icar yapi kte cin heon.

3. Mesiya iye kaex iyokipi içiye xni, tuka wowapi en kagapi qon iyecen, Tona aniiapi kin waaiapi kin he miye airpema-yanpi qon.

4. Taku tona tokaheya wowapi en kagapi kin hena onspe unkiyapi kte cin heon kagapi, hecen wicowarbadan qa wowapi wakan kin en wicakicanpte cin eciyatanhan woape unhapi kta.

5. Wakantanka wicowarbadan wicakicanpte ko yuhe cin he Jesus Mesiya eciyatanhan otoiyo hi okonwanjidan wacin en kiciyus niyanpi nunwe.

6. Qa hecen wicotawacin wanjidan qa wicai wanjidan on Wakantanka Jesus Mesiya Itancan unkiyapi he Atkuku kin dutanpi kta.

7. Heon etanhan otoiyo hi iyowinkiciyiya po, Wakantanka yutanpi kte cin heon Mesiya iyowinunkiyapi qon iyececa.

8. Mix kaken epa; Jesus Mesiya ohomni baxpapi kin en oo-kiye ikicaga, Wakantanka wo-

wicake kin heon qa hunkakepi kin wahowicayapi qon he hdu-ecetu kte cin heon etanhan.

9. Qa hecen Ikcewicaxta kin wowaonxida kin on Wakantanka yutanpi kta; wowapi en kagapi qon iyececa, Heon etanhan Ikcewicaxta ehna ociyake ça nicaje kin iwadowan kta.

10. Qa ake hecen eya, Ikcewicaxta kin iyuxkin po, iye taoyate kin kici.

11. Qa ake, Ikcewicaxta kin owasin Itancan kin idowanpi qa oyate kin owasin he yatan po.

12. Ake Esayas hecen eya, Jesse hutkan wanjidan qa tuwe Ikcewicaxta en wicaxtayatapi un kte cin he icage kta; he en Ikcewicaxta kin wacinyanpi kta.

13. Woape Wakantanka kin wicayadapi kin en wowaonxida owasin wookiye ko on imna niyanpi nunwe, Woniya Wakan towaxake kin eciyatanhan woape en nina inicagapi kte cin heon.

14. Mihunkawanji niyepi on awacin manka, wowaxte onijupidan qa wosdonye owasin on oju niyanpi, hecen otoiyo hi wahokonyeciciyapi kta oyakihipi.

15. Tuka mihunkawanji, hececa exta waditagya wowapi cicagapi, hecen wicoie wanjikji kiksuye ciyapi kta, Wakantanka towaonxida maqupi kin he eciyatanhan;

16. Ikcewicaxta ehna Jesus Mesiya taokiye kin wanji he miye kta, Wakantanka tawootanin waxte kin on rtawani qa hecen Ikcewicaxta woxnapi kin he woiyokipi kta, Woniya Wa-

kan kin on yuwakanpi kin heon.

17. Heon etanhan Jesus Mesiya en taku Wakantanka tawa kin on wowinkta mduha.

18. Wicoie wicoran ko en Ikcewicaxta anagoptanpi kta e taku Mesiya miye eciyatanhan econ xni qon hena cajemdate kte xni;

19. Wapetogya econpi qa woyuxinyaye wowaxake qa Wakantanka Taniya Wakan towaxake kin eciyatanhan, hecen Jerusalem etanhan qa ohomniyan Ilurikon ekta Mesiya tawootanin waxte kin omdaka.

20. Qa hecen wotanin waxte kin aiciciya oyag uwata, tukten Mesiya cajeyatapi kin hetu xni, okini wicaxta tokeca taku ahde kin akan ti wakage kta naceca.

21. Tuka hecen wowapi en kagapi qon; Tona en cajeyatapi xni kin hena wanyakapi kta, qa tona naronpi xni qon hena iyukanpi kta.

22. Qa hecen on otakiya ekta ciupi kte cin okitpani mayanpi.

23. Tuka nakaha makoce kin dena en tuktedan omakan xni qa wanna waniyetu ota ekta ciupi kta nina wacin;

24. Heon tohan Spaniya ekta mde cinhan hehan ekta ciupi kta. Heciya icimani mde cinhan tahapi wanciyakapi qa ekta ye mayayapi kta awacin manka, tokaheya niyepi kin on cistiyedan imamdeze cinhan.

25. Tuka nakaha Jerusalem ekta mda, tona owotanna un kin hena owicawakiye kte cin heon mda.

26. Tona Makedoniya qa A-

kaya en yukanpi kin hena Jerusalem ekta tona owotanna un warpanica kin taku wicaqupi kta e iyokipipi.

27. Hecon iyokipipi; taku iwicakicazopi kin iyecen unpi nakaex. Hena taku wakan yuhapi qon en Ikcewicaxta opapi hecinhan taku wicacerpi ekta un kin hena on itkom owicakiyapi kta.

28. Heon etanhan tohan he mduxtan qa waskuyeca kin de hena en awicawecipuspe cinhan hehan niyepi iyoopteya Spaniya ekta waimdamde kta.

29. Qa ekta ciupi kinhan Mesiya tawootanin waxte woyuwaxte wojudan kin yuha wau kta sdonwakiya.

30. Hehan nakaha mihunkawanji ceciciyapi ce, Jesus Mesiya Itancan kin caje on, qa Woniya Wakan towaxtedake kin on, miye kici Wakantanka nina cemiyeciciyapi kte cin be.

31. Tona Judeya makoce kin ekta anagoptanpi xni kin hena etanhan emahdakupi kta, qa Jerusalem ekta wicortani mitawa kin tona owotanna un kin iyokipi wicaye kte cin heon.

32. Qa hecen Wakantanka tawacin kin eciyatanhan wowiyuxkin yuha ekta ciupi qa niyepi on imagaga miçiye kta.

33. Wookiye Wakantanka kin niyepi owasin en nicipi un nunwe.

WICOWOYAKE 16.

1. Pebe tawinortin unyanpi Kengreya ekta okodakiciye kin en ookiye wanji hee cantohnake cixipi.

2. He Itancan kin on iyowin-yakiyapi kta, tona owotanna un *wicoran yuhapi* kin iyececa, qa taku on i kin he en token ecaye-conpi cin kinhan ecen okiya po. *Winorinca* kin he wicota owicakiye ça miye nakun omakiya ece.

3. Piskila Akula kici Jesus Mesiya en mitawaxipi kin hena nape wicayuzo po.

4. Hena e minagi kin on iye tahupi kin ehnapapi, qa hena miye mixnana pida makiyapi xni tuka Ikcewicaxta ekta okodakiciye kin owasin pida wicayapi.

5. Qa hena tipi kin ohna okodakiciye kin *nape wicayuzo po*. Epinetos waxte wadake cin he nape yuzo po; Akaya ekta Mesiya en *wicadapi* qon tokaheya kin hee.

6. Mariyam nina ounkiyapi qon he nape yuzo po.

7. Andronikos Juniyas kici mitakuye qa om makaxkapi qon hena nape wicayuzo po; hena ohnihde unpi kin kici yuonihanpi qa mitokapa tanhan Mesiya en un qon hena.

8. Ampliyas Itancan kin en waxte wadake cin he nape yuzo po.

9. Urbanos Mesiya en unkitawaxipi kin qa Stacus waxte wakidake cin hena nape wicayuzo po.

10. Apelos Mesiya en yuecepidan kin he nape yuzo po. Aristobulos takuwicaye cin hena nape wicayuzo po.

11. Herodiyon mitakuye kin nape yuzo po. Narkisos taku-

wicaye cin Itancan kin en un kin hena nape wicayuzo po.

12. Trupena Truposa kici Itancan kin on rtanipi kin hena nape wicayuzo po. Persis waxte dakapi kin Itancan kin on nina rtani kin he nape yuzo po.

13. Rupos Itancan kin on karnigapi kin qa iye hunku, nakun mitawa kin hena nape wicayuzo po.

14. Asunkritos, Plegon, Ermas, Patrobas, Ermes, hena qa tona om unpi hunkawanjin kiciyapi kin hena ko nape wicayuzo po.

15. Pilogos, Juliya, Nereyus iye tawinortin kici, Olumpas, qa hena om tona owotanna un kin hena owasin nape wicayuzo po.

16. Otoiyo hi iiputakapi wakan kin on nape kiciyuzo po. Mesiya taokodakiciye kin nape niyuzapi.

17. Mihunkawanji ceciciyapi ce, tona woonspe onspe niçiciyapi qon eciyatanhan xni yuomdecapi qa wartani wicayapi kin hena iwanwicayakapi qa nawicakicipa po.

18. Tona hececapi kin Jesus Mesiya Itancan unkiyapi kin wowidag wicaye xni tuka iye tezipi kin hena eepi, qa wicoie waxte iapi iyokipi se ececa ko on wicaxta wacin ksape xni kin wicahnayanpi.

19. Niye anayagoptanpi kin he wicaxta owasin sonyapi. Heon niyepi en imduxkin. Tuka taku waxte e en yaksapapi kta qa taku xica en wadupipi kte xni wacin.

20. Unkan kohanna Wookiye Wakantanka kin niye nishapi kin ihukuya Satan napan kta. Jesus Mesiya Itancan unkiyapi towaonxida kin niyepi en nicipi un nunwe.

21. Timoteyos mitawaxi, qa Lukiyos, Jason qa Sosipater mitakuye kin hena nape niyuzapi.

22. Tertiyos wowapi kin de owa kin he miye, Itancan kin en nape ciyuzapi.

23. Gayos won makiye qa okodakiciye owasin *hecawicakicon* kin he nape niyuzapi. Erastos otowwe kin en wicaxta itancan wan qa Kuartos hunkawanjin kiciyapi wan hena nape niyuzapi.

24. Jesus Mesiya Itancan un-

kiyapi towaonxida kin niyepi owasin en nicipi un nunwe.

25. Tuwe wootanin waxte mitawa qa Jesus Mesiya woyake cin he eciyatanhan niyusutapi kta okihi, wowiyukean nakaha yuotaninpi kin eciyatanhan, he maka icage cin ehan-tanhan wicoicage kin en anarmanpi qon ;

26. Tuka nakaha yuotaninpi, wicaxta wokcan tawowapi wakan kin heon, Wakantanka owihanke wanin un, tawoahope kin eciyatanhan, qa oyate owasin wacinyan anagoptanpi kte cin heon *oyakapi*;

27. Jesus Mesiya on etanhan, Wakantanka ecedan ksape cin hee wowitan owihanke wanin kicihan nunwe.

FIRST CORINTHIANS.

PALOS OHNIHDE UNPI KIN HECA KORINTOS OYATE KIN WOWAPI WICAKICAGE CIN TOKAHEYA KIN HE DEE.

WICOWOYAKE 1.

1. Palos Wakantanka tawacin kin eciyatanhan Jesus Mesiya ohnihde wicaye cin heca karnigapi, qa Sostenes hunkawanjin unyanpi kici,

2. Wakantankataokodakiciye Korintos ekta un qa Jesus Mesiya on ecepidan kta, wakan wicakarnigapi kin hena eepi, qa tona makoce otoiyo hi en Jesus Mesiya ixiyepi kin Itancan ki-

yapi qa unkix eya Itancan unkiyapi caje kin hoyeyakiyapi kin *wowapi unnicagapi*.

3. Woweonxida wookiye ko Wakantanka Ate unyanpi qa Jesus Mesiya Itancan kin etanhan niyepi en nicipi un nunwe.

4. Ohiniyan niyepi kin on Wakantanka mitawa wopida ewakiya, Wakantanka towaonxida Jesus Mesiya eciyatanhan niçupi kin heon ;

5. Taku henana owasin on, iye en, wijica nicagapi, wicoie owasin qa wosdonye owasin on.

6. Hecen niyepi kin en Mesiya tawoyaatanin kin yusutapi.

7. Qa hecen wowaxte wanjidan aokpaniyan yaunpi xni, qa Jesus Mesiya Itancan unkiyapi ihdutanin kte cin he ape dukanpi.

8. He owihanketa hehanyan iyanionpepica xni niyusutapi kta, Jesus Mesiya Itancan unkiyapi taanpetu kin etu.

9. Wakantanka wacinyepica, he Cihintku Jesus Mesiya Itancan unkiyapi kin takodakiciyapi tawa kin en nicopi.

10. Mihunkawanji, Jesus Mesiya Itancan unkiyapi cajeyan ceciciyapi ce; owasin okonwanjidan oie yetonpi qa yuomdecapi wanin yaunpi kta qa wicota-wacin eca wanjidan wiyukeanpi ko wanjidan tanyan onspe yaunpi kte.

11. Mihunkawanjin iyepi kin en Kloe etanhanpi kin omakiyakapi qa, Waakinin yaunpi, keya oyakapi.

12. Unkan mix decen epa, Niyepi otoiyo, Palos opeya waun, qa, Apolos opeya waun, qa, Inyan opeya waun, qa Mesiya opeya waun, ehapi ce.

13. Mesiya yukinukan ehna-kapi he; niyepi kin on Palos can susbeca kin en okatanpi he; qa ix Palos caje on baptem niçupi he.

14. Wakantanka wopida ewakiya, enitanhanpi tuwedan baptem waqu xni, Krispos qa Gayos henios nana *baptem wicawaqu*.

15. Tuwedan, Miye micaje on baptem wicawaqu, keye kte xni heon.

16. Qa nakun Stepanos tiyohnaka kin baptem wicawaqu, qa tuwe tokeca baptem waqu kinhan sdonwaye xni.

17. Baptem wicawaqu kta e on Mesiya ye maxi xni, tuka wotanin waxte omdake kte cin heon; wicoksape iapi kin *ohna iwae* xni, okini Mesiya can susbeca tawa kin taku xni yapi kta.

18. Can susbeca oyakapi kin he tona ihdutakunipi xni kin en witkotkoya iapi kin hee, tuka unkiyepi tona ni unyanpi kin en Wakantanka towaxake kin hee.

19. Kaken wowapi en kagapi; Tona wacin ksapa woksape kin taku xni waye kta, qa tona okarnigapi kin hena wookarnige kin ecetu xni waye kta.

20. Wacin ksape cin tokiya yanka he; wowapi kage cin heca tokiya yanka he; wiconi kin de en waakinica kin heca tokiya yanka he, Wakantanka wicoicage kin de wicoksape kin yuwitkotko xni he.

21. Hecen Wakantanka toksape kin en wicoicage kin de wicoksape eciyatanhan Wakantanka sdonyapi xni qehan wooyake wowitkotkopike cin on tona wicadapi kinhan hena ni wicaye kta Wakantanka iyo-kihi.

22. Juda oyate kin wowape-tokeca dapi qa Helenes oyate kin wicoksape akitapi.

23. Tuka unkiye Mesiya can susbeca en okatanpi kin he un-koyakapi; he Juda wicaxta kin

ekta wonahnaye qa Helenes wicaxta kin ekta witkotkoya iapi kin hee.

24. Tuka tona wicakarnigapi, Juda qa Helenes wicaxta kin hena, Mesiya Wakantanka towaxake qa Wakantanka toksape kin hee *kecinpi*.

25. Wakantanka taku iyotan wowitko tawa kin hee kaex wicaxta taku tawa kin iwankam un, qa Wakantanka wowaxake xni tawa kin hee kaex wicaxta kin isanpa wowaxake.

26. Mihunkawanji, nicopi kin he wandakapi, wicacerpi eciyatanhan *wicaxta* wacin ksapa-ota xni, waxaka ota xni, qa wicaxta okinihan ota xni.

27. Tuka wicoicage kin en taku witkotkoke cin he Wakantanka karniga, on taku ksape cin wixten ye kta; qa wicoicage kin en taku waxake xni kin hena Wakantanka karniga, on taku waxake cin wixten ye kta.

28. Qa taku wicoicage kin en okinihan xni un kin he Wakantanka karniga, qa taku un xni kin hena ko, on taku un kin yutakuni kte xni.

29. Hecen iye itokam wicacerpi owasin ihdatan kte xni.

30. Iye eciyatanhan Jesus Mesiya en unyakonpi; he unkiyepi on Wakantanka eciyatanhan woksape qa woowotanna qa woyuecedan qa wokajuju ikicaga.

31. Hecen wowapi en kagapi kin iyecetu kta; Tuwe iwinkta kinhan Itancen kin on iwinkta kta.

WICOWOYAKE 2.

1. Unkan mihunkawanji, ekta ciipi qehan wicoie qa wicoksape oiyokipi kin yuha wai xni *tuka* Wakantanka tawoyaatanin kin ociciyakapi.

2. Niyepi ekta takudan sdonwaye kte xni miçiconza, Jesus Mesiya hecedan, qa he can subeca kin en okatanpi.

3. Unkan waxake xni wokokipeya nina cancan içiya cicipi waun.

4. Qa mioie qa taku omdake cin hena wicaxta wicoksape wicoie oiyokipi kin en un xni, tuka Woniya Wakantanka yaotanin qa wowaxake kin en un.

5. Hecen wicayadapi kin he wicaxta wicoksape kin en ahe kte xni tuka Wakantanka towaxake kin en.

6. Tona owotanna un kin hena ekta woksape unkoyakapi, tuka wicoicage kin de wicoksape kin hee xni, qa wicoicage kin de en wicaxtayatapi toksape kin hee xni, hena atakuni xni aya.

7. Tuka wowiyukcan en Wakantanka toksape kin ecen unkiapi, he narmanpi, Wakantanka, woicage xni kin itokam, niyepi nitowitanpi kte cin on konze cigon.

8. He wicoicage kin de en wicaxta itancenpi kin tuwedan sdonye xni; sdonyapi unkanx Wowitan Itancen kin can subeca en okatanpi kte xni tuka.

9. Tuka wowapi en kagapi kin he kaketu; Tona Wakantanka waxte dakapi kin taku wicakiciyuxtan kin he wicixta kin tohini wanyake xni qa wi-

canoge on naronpi xni qa wicaxta cante kin mahen iyorpaye xni.

10. Tuka hena Wakantanka iye Taniya *Wakan* kin eciyatanhan unkokiyakapi Woniya *Wakan* kin he taku owasin iyukean, Wakantanka woxbe tawa kin sdonya.

11. Wicaxta kin ekta tuwe taku wicaxta tawa kin sdonya he, wicaxta toksape iye mahen un kin hee sdonkiya. He iyeecen taku Wakantanka tawa kin tuwedan sdonye xni tuka Wakantanka Taniya *Wakan* kin hecedan *sdonkiya*.

12. Unkan unkiye wicoicage kin de en wicoksape kin he unkiupi xni; tuka Wakantanka eciyatanhan Woniya *Wakan* kin he *unkicupi*, hecen taku Wakantanka iyunwin codan unqupi kin hena sdonunyanpi kta.

13. Qa hena unkoyakapi, wicaxta wicoksape woonspe wicoie kin eciyatanhan xni, tuka Woniya *Wakan* woonspe tawa kin eciyatanhan, hecen taku wakan taku wakan kici iciun-yukeanpi.

14. Tuka wicacerpi wicaxta kin he taku Wakantanka Taniya *Wakan* tawa kin yuhe xni, hena taku witkotkoke dake ça okarniga okihi xni, hena wakanyan iyukeanpi nakaex.

15. Tuka tuwe wakanyan un kin he taku owasin iyukean qa iye yukeanpica xni.

16. Itancan tawacin kin tuwe iyukean he, hecen onspe kiye kta he. Tuka unkix Mesiya tawacin kin he unhapi.

WICOWOYAKE 3.

1. Unkan mihunkawanji, mix wicaxta wakanpi kin iyeecen eciyapi owakitpani, tuka wicacerpi wicaxta kin hecapi qa Mesiya en hokxiyoqopa kin iyececa.

2. Pte asanpi yatke ciciyapi qa waconica kin he ciçupi xni, he ehan naharin he oyakihipi xni qa dehan naharin nakun oyakihipi xni.

3. Naharin wicacerpi wicaxta kin henicapi. Niyepi ekta winawizipi qa wakinicapi qa yuomdecapi yukan hecinhan wicacerpi kin henicapi qa wicaxta akantu iyeecen mayanipi xni he.

4. *Wicaxta* wanji, Palos opeya waun, eye ça, *wicaxta* tokeca, Apolos opeya waun, eye cinhan, wicacerpi wicaxta kin henicapi xni he.

5. Palos he tuwe, qa Apolos he tuwe he; wowidake unpi kin hecapi, on wicayadapi, otoiyohti Itancan kin wicaqu kin iyececa.

6. Miye owaju, Apolos mini akaxtan qa Wakantanka icar ya.

7. Tuwe woju kin he taku xni qa tuwe mini akaxtan kin kin he nakun *taku xni*, tuka Wakantanka waicarye cin hee tanka.

8. Tuwe woju qa tuwe mini akaxtan kin hena okonwanjipidan; otoiyohti iye tortani kin iyacinyan iyunwin icupi kta.

9. Wakantanka kici rtanipi kin hena unkiyepi; Wakantanka tamaga qa Wakantanka ticage cin he niyepi.

10. Wakantanka towaonxida maqupi kin eciyatanhan wicaxta

ticaga ksape cin iyecen taku ahehde kin ewahde qa he akan wicaxta tokeca ticaga; otoiyohti token ticage cin he en wakta un nunwe.

11. Taku ahehde kin tokeca tuwedan ehde okihi xni, taku ehdepi kin hecedan, Jesus Mesiya hee.

12. Unkan tuwe ahehde kin de akan maza ska zi, qa maza ska, qa inyan okitanin, qa can, qa peji, qa cedi en kage cinhan,

13. Otoiyohti oran kin atanin kta; anpetu kin he yuatanin kta, peta on yuataninyan aupi kta, qa peta kin otoiyohti oran kin he taku kin iyukean kta.

14. Tuwe ticage cin en oran kin sutaya un kinhan he woyuha icu kta.

15. Qa tuwe oran kin rurnage cinhan he iwarpanice kta, tuka iye qe peta kin etanhan iyecen ni yanpi kta.

16. Wakantanka tipi kin he niyepi, qa Wakantanka Taniya Wakan kin onitipi kin he sdon-yakiyapi xni he.

17. Tuwe Wakantanka ti kin axamyecinhan he Wakantanka ihang ye kta. Wakantanka ti kin he wakan, qa he niyepi.

18. Ihnuhan tuwe ichnaye cinhan. Tuwe niyepi ekta wicoicage kin de en ksape icida kin he witkotkoke icicaga nunwe; hecen ksape kta.

19. Wicoicage kin de en taku woksape kin he Wakantanka witkotkoke daka. Kaken wowapi en kagapi; Wicaxta ksape cin hena iye wohneye tawapi kin on wicayuzapi ece.

20. Qa ake, Wicaxta ksape

cin tawacinpi kin hena witkotkoya un kin, Itancan kin sdonya.

21. Hecen tuwedan wicaxta kin on iwinkta kte xni. Taku owasin nitawapi.

22. Palos, qa Apolos, qa Inyan, qa wicoicage kin, qa wiconi, qa wiconte, qa taku nakaha un kin, qa taku u kte cin hena owasin nitawapi;

23. Qa Mesiya tawa niyanpi qa Wakantanka Mesiya tawa ya.

WICOWOYAKE 4.

1. Wicaxta kin kaken ecan-unkinpi kta, Mesiya iwicadake cin qa Wakantanka tawowiyukean awanyakapi kin heuncapi.

2. Unkan nakun tona tiyohnaka en awanyakapi un kin hena wacinyepica unpi kta keyapi.

3. Tuka mayadacopi qa wicaxta akantu mayacopi exta he taku xni wadaka qa nakun mihdaco xni.

4. Miye ekta takudan sdonwakiye xni, tuka heon owotan-na miçidake xni, tuwe mayaco kin he Itancan kin hee.

5. Hecen iyehantu xni kin itokam takudan yacopi xni po, Itancan kin he hi xni kin hehanyan. He iye taku otpaza en narmanpi kin aiyoyam ye kta qa wicocante awacinpi kin yuatanin kta; unkan hehan otoiyohti Wakantanka eciyatanhan idowanpi kta.

6. Mihunkawanji, niyepi on etanhan, hecen Apolos kici miye imihdacin, hecen unkiyepi on

wowapi en kagapi kin isanpa kecanwicayakinpi kte xni on-nispepi kta, qa hecen otoiyohe en waranniçidapi kte xni.

7. Tuwe hecen iyotan nicaga he; qa taku niçupi xni kin tukte e duha he. Qa niçupi kinhan tokeca niçupi xni kin iyecen on iniwinkta he.

8. Nakaha winipipi; nakaha winijicapi; unkiyepi unkiçunonpa tanhan wicaxtayatapi yaunpi: Unkan wicaxtayatapi yaunpi wacin, hecen niyepi kici wicaxtayatapi unyakonpi kta tuka.

9. Mix kaken wacin mduza; ohnihde unyanpi kin ehake Wakantanka taninyan eunhdepi, wiconçe iyacopi kin iyececa; hecen wicoicage qa marpiya ohnihde cin qa wicaxta kin en woiwanyake kin he unkiyepi kta.

10. Mesiya on wiuntkotkopika, tuka niye Mesiya en yaksapapi. Unkiye waunxakapi xni, tuka niye wanixakapi. Unkiye unyuonihanpi xni, tuka niye nicinihanpi.

11. Qa nakun anpe dehan wotekteunhdapi qa iunpuzapi qa tancounkapidan qa unkaxtakapi qa tuktedan tinsadan unyakonpi xni.

12. Qa rununkitapi, unnapepi kin on rtaunnipi. Unkaiapi kex wicunyawaxtepi; xicaya unkuwapi kex wacin untan-kapi;

13. Oxteunhdapi kex cewicunkiyapi ece. Unkiyepi kin maka watuxekxeca qa taku owasin en taku kahin erpeyapi kin he unkiçagapi.

14. Wixten ciyapi kta heon

hena hecen wowapi wakage xni, tuka micinca waxte wicawakidake cin iyecen wahokon-ciciyapi.

15. Mesiya en waonspekiyapi kektopawinge wikcemna duhapi exta, ate yapi ota duhapi xni; Jesus Mesiya en wotanin waxte on cinca cicagapi.

16. Ceciciyapi ce, een omicipa po.

17. Heon etanhan niyepi ekta Timoteyos ye waxi, he nakun micinca hokxincantkiyapi, qa Itancan kin en wacinyepica, he mitacanku Mesiya en un kin kiksuye niyanpi kta, ohiniyan okodakiciye otoiyohe en waonspewakiye cin iyececa.

18. Miye ekta ciunpi kte xni heon wanjikji waranniçidapi.

19. Tuka ecadan ekta ciupi kta, Itancan iyokipi kinhan, qa tona waranniçidapi token eyapi kin hee xni, tuka taku okihipi kin hee sdonwaye kta.

20. Wakantanka tokiconze kin he wicoie en ahe xni, tuka wowaxake en han.

21. Cansakadan yuha ekta ciupi, qa ix wowaxtedake wicocante warbayedan ko yuha wau kta, uman tukte yacinpi he.

WICOWOYAKE 5.

1. Niyepi ekta wawicirarapi yukan keyapi; qa wawicirarapi kin he iyececa Ikcewicaxta kin ekta cajeyatapi xni, wicaxta wan he iye atkuku tawicu yuze cin hee.

2. Unkan niye waranniçidapi; on iyoniceixicapi kta tuka; hecen

tuwe hecon kin niyepi etanhan iyaye yapi kta.

3. Miye mitancan on ekta opeya ciunpi xni tuka micante on en waun seca, heon en waun kin iyecen nakaha wakonza; tuwe hecon kin,

4. Mniniciyapi qa mitoksape duhapi kinhan, Jesus Mesiya Itancan unkiyapi caje kin on, qa Jesus Mesiya Itancan unkiyapi towaxake kin yuha,

5. Wicaxta kin he Satan yaqupi kta, cerpi yutakuni kte xni, hecen Jesus Itancan kin taanpetu kin en nagi kin ni kta.

6. Iniwinktapi kin he waxte xni. Taku on naporyapi kin waniqadan aguyapi ocowasin naporya ece e sdonyayapi xni he.

7. On naporyapi tannike cin erpeya po, hecen aguyapi teca qa naporyapi xni yaunpi kta. Mesiya wohduze unkitawapi kin he iye kaex unkiyepi on woxnapi.

8. Heon etanhan wohduze kin en unkopapi kta, on naporyapi wanakaja qa wocanniye wicoxice ko on naporyapi kin he *unhapi* kte xni, tuka wicowotanna wowicake ko on naporyapi kin hee unkunpi kta.

9. Wowapi en kaken cicagapi; Wawicirarapi econpi kin om mayanipi kte xni.

10. Tuka wicoicage kin de en wawicirarapi econpi qa tona wahduhahapikteca qa wawicaki sa qa tona wakagapi ohodapi kin henana wicawake xni; *henana wicawaka* unkanx wicoicage kin de etanhan tankan dapi kta tuka.

11. Tuka nakaha kaken wuwapi cicagapi, tuwe hunkawanjin kiciyapi ecipyapi kin he ix wawicirarapi econ qa wahduhahakteca, qa wakagapi ohoda, qa waaie sa, qa witko sa, qa wawicaki sa heca kinhan kici yaunpi kte xni, ihnuhan kici wayatapi kin.

12. Tona itankan un kin hena token ecin wicamdaco kta he; tona timahen un kin hena wicadacopi xni he.

13. Tuka tona tankan un kin hena Wakantanka wicayaco ece. Hecen wawicirarapi econ qon he niyepi kin etanhan tankan iyeya po.

WICOWŌYAKE 6.

1. Wicaxta wan taku icanxin niyanpi kinhan token ecin wicada xni unpi kin en yacopi kta ayaipi qa wicaxta owotanna unpi kin en ayaipi xni he.

2. Tona owotanna un kin hena wicoicage kin yacopi kta e sdonyayapi xni he. Unkan niyepi wicoicage kin dacopi kta hecinhan taku iyotan cistina kin hena yaco iyenichantupi xni he.

3. Marpiya ohnihde hena eepi kaex wicunyacopi kta sdonyayapi xni he. Hecen wiconi kin de en taku hiyeye cin sam iyeya *unkokihipi*.

4. Heon etanhan taku wiconi kin de en yacopi kte cin duhapi kinhan tona okodakiciye kin en yuonihanpi xni kin hena yaco wicaxi po.

5. Inixtecapi kte cin heon hepa. Niyepi ekta wicaxta ksape

ça tuwe hunkawanjitektupi kin en yaco okihi kte cin wanica he.

6. Tuka hunkawanjin kiciyapi kiciyacopi, tona wicadapi xni kin hena itokam.

7. Hecen taku ecinxniyan e-canonpi, otoiyohe yecidacopi kin hee. Tokeca e xicaya ecani-conpi kin ayatpaspapi xni he. Tokeca taku icantexin niyanpi kinhan wacin tanka yeçunpi xni he.

8. Tuka niye xicaya ecanonpi qa wacanxinyayapi qa he nihunkawanjipi kin.

9. Tona owotanna xni un kin hena Wakantanka tokiconze kin tawapi kte xni e sdonyayapi xni he. İçihnayanpi xni po. Wawixtenyapi sa, qa wakagapi ohodapi sa, qa wawicirarapi econpi sa, qa winyan içidapi kin, qa iwicahu sa,

10. Qa wamanonpi sa, qa waterindapi sa, qa witkopi sa, qa wahduhahapikteca henakiya Wakantanka tokiconze kin tawapi kte xni.

11. Qa nix niyepi kin hunr henicecapi qon, tuka niyujajapi; tuka niyuwakanpi; tuka niyuowotanpidan, Jesus Itancan kin cajeyan qa Wakantanka unkita-wapi Taniya Wakan kin on.

12. Taku owasin iyemicihantu, tuka taku owasin wawokihhi xni; taku owasin iyemicihantu, tuka takudan imadake kte xni wacin.

13. Woyute kin he wicatezi kin *kicagapi*, qa wicatezi kin ix woyute *kicagapi*, tuka henioza Wakantanka ihang ye kta. Unkan wicatancan kin he wawicirarapi *kicagapi* xni, tuka he

Itancan kin *kicagapi*, qa Itancan kin he ix wicatancan kin tawa kta.

14. Unkan Wakantanka wana Itancan kin najin kiye ça nakun iye towaxake kin on najin unkiyapi kta.

15. Nitancanpi kin hena Mesiya huha kin ee sdonyayapi xni he. Hecen Mesiya huha kin iwacu qa wawicirarapi econ sa kin he huha wecage kta he. Hiya, hecetu xni.

16. Tuwe wawicirarapi econ sa kin en kici iyaihdaxke cin he kici tanean warjidan, sdonyayapi xni he. Henioza cerpi wanjidan kta ce, eya.

17. Tuka tuwe Itancan kin en kici iyaihdaxke cinhan he iye kici woniya wanjidan.

18. Wawicirarapi econpi kin nakicipa po. Woartani wicaxta econ kin owasin wicatancan kin itankan un, tuka tuwe wawicirarapi econ kin he iye tancan kin en waiçirtani.

19. Tokeca, nitancanpi kin hena Woniya Wakan Wakan-tanka niçupi qa niyepi en un kin he tipi kin hee, qa hecen tawa nihdawapi xni esdonyayapi xni he.

20. Taku tanka iyopeniyanpi, heon nitancanpi ninagipi ko on Wakantanka yatan po, hena Wakantanka tawa.

WICOWOYAKE 7.

1. Wowapi en miyecagapi kin he icartagya, wicaxta kin winorinea yutan xni kin he waxte.

2. Tuka wawicirarapi econpi

kin heon etanhan wicaxta otoi-yohi winorinca tawa hduhe kta, qa winorinca kin ix otoi-yohi wicaxta hduha nunwe.

3. Unkan wicaxta kin iye tawicu kin wowaxte ecakicon kta, qa winorinca kin ix iye hih-naku kin nakun ecen *ecakicon* nunwe.

4. Winorinca kin ix iye tancan kin hduhe xni tuka hihnaku kin he *yuha*, qa nakun wicaxta kin ix iye tancan kin hduhe xni tuka tawicu kin he *yuha*.

5. Otoi-yohi tancan ipikicida-pi xni po, ptecedan hehanyan, napin wicayadapi kinhan hece-dan *hta*, takudan yute xni qa wocekiye eyapi kin en ocowa-sin yeniçiyapi kte cin heon, kinhan ake napin yahdapi kta, umana kinhan oiçihipi xni kin on Satan iyutan niyanpi kta naceca.

6. Wicoope kin eciyatanhan xni tuka wahokonciçiyapi qa heon hena hecen epa ce.

7. Wicaxta owasin miye waun kin iyecen unpi kta wacin tuka otoi-yohi Wakantanka etanhan wicowaxake hduha un, wanji decetu qa wanji ix kake-tu.

8. Tuka tona tanxna un qa tona wiwazicapi kin hena, Mix waun kin iyecen unpi kte cin he waxte kta, kewicawakiya.

9. Tuka oiçihipi xni kinhan kiciyuzapi kta; wakan kiciyuzapi kin he waxte qa wacin itkon kin he xica.

10. Tona kiciyuzapi kin hena kaken wahokonwicawakiya, qa he miye cinka epe xni, Itancan kin he *heya*; Winorinca iye

hihnaku kin ayuxtan kte xni.

11. Tuka ayuxtan kinhan tanxna un kta qa ix ake hihna-ku qon okiciye kta; qa wicaxta kin iye tawicu kin ihnuhan erpeye cinhan.

12. Unkan ehake, Itancan kin *heye* xni, miye cinka hecen epe kta; Hunkawanjin kiciyapi wan winorinca wicada xni kin heca yuhe qa he kici un iyokipi kinhan he ihnuhan erpeye cin.

13. Qa winorinca wan wicaxta wicada xni kin heca yuhe qa he kici un iyokipi kinhan he ix nakun erpeye kte xni.

14. Wicaxta wicada xni kin he iye tawicu kin on yuwakanpi qa winorinca wicada xni un kin he nakun iye hihnaku on yuwa-kan kagapi. Hecece xni un-kanx nicincapi kin axapapi kta, tuka nakaha hena e wakan.

15. Tuka wicada xni un kin he uman kpagan kinhan hecen kpagan kta. Hena hecece cin en hunkawanjin kiciyapi qa ta-winortin kiciyapi kin idakapi xni. Wakantanka woociye en unkiçipi.

16. Winorinca, nix taku sdon-yaya he, okini nihihna ni yaye kta. Qa wicaxta, nix taku sdon-yaya he, okini nitawin ni yaye kta.

17. Tuka otoi-yohi token Wakantanka wicaqu qa Itancan kin otoi-yohi wicakico kin he iyecen mani nunwe. Hecen okodaki-ciye owasin en econ wicawaxi.

18. Tuwe ohomni baxpapi ecen kicopi he; ohomni baxpa-pi xni içicage kte xni. Qa tu-we ohomni baxpapi xni ecen

kicopi he; he ohomni baxpapi kte xni.

19. Ohomni baxpapi kin he taku xni qa ohomni baxpapi xni kin he nakun taku xni, tuka Wakantanka tawoahope opapi kin he *waxte*.

20. Otoiyohe wicortani en kicopi kin he en un kta.

21. Wowidake un kin henica ecen nicopi kinhan he ekta ewacin xni wo; tuka tawa içiyapi kin he oyakihi kinhan he en oyanan de kta.

22. Tuwe wowidake un kin he Itancan kico kinhan hee Itancan kin ekta tawa içiya; qa nakun tuwe tawa içiye cin hecen kicopi kinhan he Mesiya wowidake tawa kin hee.

23. Teriya openitonpi, heon wicaxta akantu wowidag niyanpi xni nunwe.

24. Mihunkawanji, otoiyohe taku en un hecen kicopi kin he en Wakantanka kici un nunwe.

25. Unkan hokxiwinpidan icartagya, Itancan kin eciyatanhan woope takudan mduhe xni. Tuka miye owotanna waun kta Itancan kin ionximakida, hecen token wacin mduze cin owahdake kta.

26. Nakaha wicokakije kin on etanhan de waxte kepee, wicaxta kin ecen un kte cin he waxte.

27. Winorinca en iyanihdaxka he. Etanhan nihduxka ayakite kte xni. Winorinca etanhan niyuxkapi he. Winorinca ayakite kte xni.

28. Tuka winorinca duza exta wayartani xni, qa hokxiwinna wan hihnaton exta wartani xni;

tuka hena e wicacerpi ekta wicokakije yuhapi kta; hececa exta ito itoncipapi.

29. Tuka mihunkawanji kaken epe kta; Wanna ptenyedani. Tokata tona winorinca yuhapi kin hena *winorinca* tonpi xni iyecen unpi kte.

30. Tona ceyapi kin hena ceyapi xni kin iyececapi kte; tona iyuxkinpi kin hena iyuxkinpi xni kin iyececapi kta; qa tona wopetonpi taku yuhapi xni kin iyececapi kta.

31. Qa tona maka kin de woinyunyanpi kin xicaya yuhapi kin iyececapi kte xni; wicoicage kin de ouncage kin atakuni xni aya.

32. Takudan icante xice xni yaunpi kta wacin. Tuwe tawicu ton xni kin he Itancan taku tawa kin awacin yanka, token Itancan iyokipi ye kta.

33. Tuka tuwe tawicu ton kin he wicoicage kin en taku awacin yanka, token tawicu kin iyokipi ye kta.

34. Qa nakun winorinca hihna ton qa witanxna un kin hena kici akidecece xni. Hihna ton xni kin he Itancan taku tawa kin awacin yanka, tancan nagi ko wakan un kta heon. Tuka hihna ton kin he wicoicage en taku un kin awacin yanka, token hihnaku kin iyokipi ye kta.

35. Tanyan yaunpi kta heon hena hepa. Taku on hmunkapi kin nitokam ewahnake kte xni, tuka taku iyokipi kin heon, qa wacin ktonja wanin Itancan kin awacanipi kte cin heon.

36. Tuka tuwe tanxna unpi kin en xicaya ecaicon kecin,

wanna koxka sam iyaye ça hecon kta iyehantu kinhan, token cin kin hecen econ kta. Wakan kiciyuzapi nunwe.

37. Tuka tuwe iye cante kin en sutaya un qa token tanhan hecon kiyapi xni qa iye tawacin kin oiçihi qa tanxna un kta cante mahen tanhan içiconze cinhan he tanyan econ.

38. Hecen tuwe kiciyuzapi kin en wicaqu kinhan he tanyan econ qa tuwe kiciyuzapi kin en wicaqu xni kinkan he sanpa tanyan econ.

39. Winorinca kin tohanyan hihnaku ni un kin hehanyan wicoope kin on kaxkapi; tuka hihnaku kin te cinhan hehan tawa içiya, tuwe tokeca cin kinhan he hihna ye kta okihi, Itancan kin en un kin hecedan.

40. Tuka ecen yanke cinhan he iyotan waxteya un kta, imdukecan, qa Wakantanka Taniya Wakan kin mduha kepee.

WICOWOYAKE 8.

1. Unkan wakagapi wakiyuxnapi kin icartagya, owasin wookarnige unhapi sdonunyanpi. Wookarnige kin he tanka içidapi kaga, tuka wacantkiyapi kin he tanka icar ya.

2. Tuwe taku sdonya kecin kinhan he naharin sdonye kte cin iyecen takudan sdonye xni.

3. Tuka tuwe Wakantanka waxte dake cinhan Wakantanka he iye sdonya.

4. Taku wakagapi wakiyuxnapi kin yutapi kin he icartagya, wakagapi maka akan un kin he taku xni sdonunyanpi qa

Taku Wakan wanjidan, hecedan yukan.

5. Taku wakan eciyapi kin marpiya êkta qa maka akan yukan exta, (taku wakan ota qa itancan kiyapi kin ota.)

6. Tuka unkiye, Taku Wakan wanjidan Ate yapi kin hee unhapi, he etanhan taku owasin u, qa he en unkiye *unyakonpi*; qa Jesus Mesiya Itancan kin wanjidan, he on taku owasin un qa he eciyatanhan unkiyepi.

7. Tuka *wicaxta* owasin hecen okarnigapi xni. Wanjikji anpetu dehanyan wakagapi sdon-yapi *qa* taku wakagapi wakiyuxnapi kin iyacinyan yutapi ece; hecen tona nagi suta xni kin hena axamyapi.

8. Taku untapi kin eciyatanhan Wakantanka iyokipi unyanpi xni; wauntapi kinhan heon etanhan sanpa unwaxtepi xni, qa wauntapi xni kinhan heon sanpa unxicapi xni.

9. Tuka ihnuhan wawoyakhipi kin de tona waxake xni un kin hena en wonahnaye kte cin.

10. Niye osdonya yaun kin, wakagapi tipi kin en wota idotanke cin tuwe wanniyake cinhan, wicaxta nagi waxake xni un kin he taku wakagapi wakiyuxnapi kin yuta okihi yaye kte xni he.

11. Hecen nihunkawanji waxake xni un kin, on Mesiya te cin he ihang yapi kta, niye wasdonyaye cin heon etanhan.

12. Tuka hunkawanjin kiciyapi kin en hecen wayartanpi qa *tiye* nagipi kin waxake xni kin nagiyeayapi eca Mesiya en wayartanpi ece.

13. Heon etanhan woyute kin mihunkawanji wartani ye cinhan ohiniyan tado wate xni waun kta, okini mihunkawanji wartani waye kta.

WICOWOYAKE 9.

1. Ohnihde unpi kin hemaca xni he; tawa miçiye xni he; Jesus Mesiya Itancan unkiyapi he wanmdake xni he; Itancan kin en mioran kin he niyepi xni he.

2. Wicaxta tokeca ekta ohnihde unpi kin hemaca xni exta niyepi kin ekta hemaca. Ohnihde unpi en opeya waun kin ipuspe kin he niyepi, Itancan kin en.

3. Tona wimawangapi kin hena kaken awicamdupta ece.

4. Unkiye wauntapi qa wanyatkanpi unkokihihi xni he.

5. Unkitawinortinpi kin etanhan wanji hdus un kayapi unkokihihi xni he, ohnihde unpi kin tokeca, qa Itancan kin hunkawanjiiku qa Inyan iyeececa.

6. Qa ix mix miye Barnabas kicixnana oranyanpi ayuxtan owakihi xni he.

7. Tohantu kaxta tuwe iyunwin codan zuya iyaya he; tuwe hastanhanka iyuwi kin hu hde qa etanhan waskuyeca yute xni he; qa tuwe tarinca optaye wan hduhe ça optaye kin etanhan asanpi yute xni he.

8. Wicaxta akantu eciyatanhan hena hecen epa he; qa wope kin he hena hecen eye xni he.

9. Mowis toope kin en kaken kagapi, Tatanka aguyapi natpan

kin he iohmus icu yaye kte xni ce. Wakantanka tatanka iha-wicakta he;

10. Qa ix unkiyepi kin on hena hecen eya he. Unkiyepi kin on he wowapi en kagapi; hecen tuwe maryumdu kinhan woape en maryumdu kta, qa tuwe woape yuha aguyapi kapan kinhan he kici woape en okicipe kta.

11. Unkiye taku wakan kin hena unkonicijupi hecinhan taku wicacerpi kin nitawapi kin he mnaunyanpi kte cin he taku tanka he.

12. Wicaxta tokeca niyepi ekta wookihi kin de en okicipapi kinhan unkiye unkiyotanpi xni he. Tuka wookihi kin he unkunpi xni; taku owasin unkapaspapi, Mesiya tawootanin waxte kin anaunptapi kte xni kin heon.

13. Tona taku wakan kicanyanpi kin hena tipi wakan kin etanhan wotapi ece sdonyayapi xni he; qa tona wahna woxnapi kin ekta oranyanpi kin hena wahna woxnapi kin en okicipapi ece.

14. Hecen nakun Itancan kin woope kaga; tona wotanin waxte oyakapi kin hena wotanin waxte kin on nipi kta.

15. Tuka hena taku kin takudan iwacu xni qa hecen ecami-conpi kte cin heon hena hecen wowapi wakage xni; miye.mate kte cin hee waxte qa tuwe imawinkta kin de ecetu xni miciciye kte cin he xica.

16. Wotanin waxte kin omdaka kex he wowinkta wahdawa xni; waecon makiyapi qa wo-

tanin waxte omdake xni ehan-
tanhan wokakije micihan.

17. Qa he iyokipiya ecamon
kinhan on taku mduhe kta, tuka
iyomakipi xni kinhan taku we-
ciyuhe kta wan maqupi.

18. Hecen taku mduhe kta
he. Wotanin waxte omdake
cinhan Mesiya tawootanin waxte
kin iyunwin codan ewahde, qa
hecen wotanin waxte kin en
wowakihi kin tanyan mduhe
kta.

19. Wicaxta owasin ekta wo-
widake xni waun tuka owasin
wowidake mayuhe wicawakiya,
wanjikji owicawakihi kte cin
heon hecamon.

20. Juda wicaxta kin ehna
Juda hemeca, Juda oyate kin o-
wicawakihi kte cin heon. Tona
woope kin ihukuya un kin hena
ekta woose yuha unpi kin he-
maca, tona woose yuhapi kin
hena owicawakihi kta.

21. Qa tona woose nicapi kin
hena ekta woose codan unpi kin
hemaca;—Wakantanka ekta wo-
ope codan waun xni tuka Mesi-
ya on woose yuha waun; tona
woope nicapi kin hena owicaw-
akihi kta.

22. Tona waxake xni kin he-
na en waxake xni se emaceca,
tona waxake xni kin hena owi-
cawakihi kta. Wicaxta owasin
en taku owasin un kin hemace-
ca, wanjikji ni wicawaye kte
cin heon *hecamon*.

23. Wotanin waxte kin heon
hecamon ece, hecen iye kici en
owape kta.

24. He de sdonayayapi xni he;
Tona oinyanke kin en inyanka-
pi kin hena owasin inyankapi

tuka wicaxta wanjidan oqipe kin
yekiya; iyacupi kta e inyanka
po.

25. Tuwe kaxta kici econ kte
cinhan taku owasin iyatahde içi-
ye xni un. Hena watexdake
atakuni kte xni kin yekiyapi kta,
heon heconpi, tuka unkiye wate-
xdake ohinniyan un kte cin he
unkakitapi.

26. Heon etanhan mix hecen
waimnanka, toketu tanin xni kin
he iyecece xni; hecen nape on
econ waun, tuwe okaduzza ape
cin iyecece xni;

27. Tuka mitancan kin suta
miçicage ça şins miçiya; okini
wicaxta tokeca wotanin waxte
kin owicawakiyaka exta miye
qe reyata iyemayanpi kte cin he
kowakipa.

WICOWOYAKE 10.

1. Mihunkawanji he de sdon-
ye xni yaunpi kta wacin xni,
hunkake wicunyanpi kin owa-
sin marpiya xapa kin ihukuya
yukanpi qa owasin miniwanca
kin opta hiyupi.

2. Qa owasin marpiya xapa
qa miniwanca kin en Mowis ba-
ptem wicaqu.

3. Qa owasin woyute wakan
wanjidan etanhan yutapi.

4. Qa owasin woyatke wakan
wanjidan etanhan yatkanpi. I-
mnija wakan kin wicihakam iya-
ye ciquon he etanhan yatkanpi.
Imnija kin he Mesiya hee.

5. Tuka hena wicota Wakan-
tanka iwicayuxkin xni, hecen
makoskan irpayapi.

6. Unkan hena e waonspeki-
ya unkitawapi kin eepi, hecen

taku xica cantiheunyanpi kte xni, ix iye cantiheyapi qon iyececa.

7. Qa wakagapi ohoyadapi kte xni, ix iyepi wanjikji heconpi qon iyececa. Kaken wowapi en kagapi, Oyate kin wota qayatke iyotankapi qa xkan najin hiyeya.

8. Qa wawicirarapi econkupi kte xni, ix iyepi wanjikji econpi qon iyececa; qa anpetu wanjidan en kektopawinge wikcemna nonpa sanpa kektopawinge yamni irpayapi.

9. Qa Mesiya iyutan unyanpi kte xni, hena wanjikji iyutan yanpi qon iyececa, qa wamdu-xka on ihang wicayapi.

10. Qa wawiyahnupi kte xni, ix iyepi wanjikji wawihnupi qon iyececa, qa waihangye cin on yutakunipi xni.

11. Hena taku kin owasin waonspekiyapi on en wicahiya-hde, unkiyepi wicoicage owihanketa unyakonpi kin wahokonunkiyapi kte cin heon wowapi en kagapi.

12. Hecen tuwe tinsa najin kecin kinhan he wakta un nunwe, okini irpaye kta.

13. Wowiyutanyan wan wicaxta sdonyapi xni ece kin en aniupi xni. Wakantanka wacinyepica, hecen wawoyakhipi kin isanpa iyutan niyanpi kta iyowinye kte xni, tuka wowiyutanyan kin he enakiye kta, hecen oyakhipi kta.

14. Heon etanhan waxte cidapi kin, wakagapi ohodapi kin nakicipa po.

15. Wicaxta wacin ksape cin

hena hecen ewicawakiya, token epe cin nix iyukean po.

16. Woyuwaxte wiyatke unyawaxtepi kin he Mesiya we kin en kodakiciyapi kin hee xni he. Aguyapi unkiyuxpapi kin he Mesiya tancan kin en kodakiciyapi kin hee xni he.

17. Unkiye unkotapi tuka aguyapi unwanjipidan qa tancan unwanjipidan, unkiye owasin aguyapi wanjidan en akiptan unkopapi.

18. Wicacerpi eciyatanhan Israel oyate kin ekta ewicatonwan po. Tona woxnapi kin etanhan yutapi kin hena wahna woxnapi kin en opapi xni he.

19. Heon token epe kta he: Wakagapi kin he taku, qa ix taku wakagapi wakiyuxnapi kin he taku tanka he.

20. Tuka taku Ikcewicaxta kin wayuxnapi ece kin hena Wakan xica wakiyuxnapi qa Wakantanka wakiyuxnapi xni. Unkan taku wakan xicapi kin en oyecipapi kta wacin xni.

21. Itancan tawoyatke qa nakun taku wakan xicapi tawoyatke kin yatkan oyakhipi xni. Itancan kin wahna wotapi tawa kin en oyapapi qa nakun taku wakan xicapi wahna wotapi tawapi kin en oyapapi kta oyakhipi xni.

22. Itancan kin xihda unyanpi kta he. Iye sam iyeya wunxakapi he.

23. Taku owasin iyemicihan-tu tuka owasin taku waxte icar ye xni. Taku owasin iyemicihantu tuka owasin waonspekiye xni.

24. Tuwedan ixnana taku

amnaiçiye kte xni, tuka otoiyohi taku token tawa kte cin he akicicite kta.

25. Taku owasin tipi hocoka kin ekta wiyopeyapi kin he yuta po, qa wiyukean kin on takudan iwicawangapi xni po.

26. Maka kin de taku ohnaka ko Itancan kin tawa.

27. Wicaxta wicadapi xni kin wanji nicopi qa ekta dapi tawa-tenyayapi kinhan taku nitokam ehdepi kin he yuta po, qa wiyukean kin on takudan iwicawangapi xni po.

28. Tuka tuwe, De wakagapi wakiyuxnapi ee, eniciyapi kinhan, yutapi xni po, tuwe oniciyakapi qa wiyukean kin hena on. Maka kin de taku ohnaka ko Itancan kin tawa.

29. Wiyukean kin cajemdata, niye nitawa xni tuka token tawa kin he waka. Tokeca tawa miçiye cin he wicaxta tokeca tawiyukean kin on mayacopi kta he.

30. Wowaxte on en owape cinhan tokeca e taku on wopida epe cin he on oxtemahdapi he.

31. Heon wayatapi qa wadatkanpi qa taku kaxta ecanonpi kin owasin Wakantanka wowitan kin on econ po.

32. Juda oyate qa Helenes oyate qa Wakantanka taokodakiciye tuwedan icanxinyayapi kte xni.

33. Qa miye taku owasin on owasin iyokipi wicawaye cin he iyececa, taku mduhe kte cin he awakite xni tuka taku wicota yuhapi kte cin, hecen nipi kta heon *hecamon*.

WICOWOYAKE 11.

1. Miye omicipa po, Mesiya opeya waun kin iyececa.

2. Mihunkawanji, ciyatanpi ee, taku owasin on miyekseyapi qa woope ciçupi qon ecerin duhapi kin heon etanhan.

3. Tuka he de sdonyayapi kta wacin; Wicaxta otoiyohi en pa kin he Mesiya ee; qa winorinca pa kin he wicaxta kin ee, qa Mesiya pa kin he Wakantanka ee.

4. Wicaxta otoiyohi pa akarpe ton cekiye ça wiyukean kinhan he iye pa kin wowixten ya.

5. Tuka winorinca otoiyohi pa akarpe ton xni cekiye ça wiyukean kinhan he iye pa kin wowixten ya; he paha yuxdapi kin kici akidececa.

6. Winorinca ix pa akarpe ton xni kinhan paha yuxdapi kta. Tuka winorinca paha yuxdapi qa ix hdasarpi kin he wowixtece kinhan pa akarpe ton un kte.

7. Wicaxta kin ix pa akarpe ton un kin he hecetu xni, he Wakantanka touncage qa towitan kin hee, qa winorinca kin wicaxta towitan kin hee.

8. Wicaxta kin he winorinca kin etanhan xni, tuka winorinca kin he wicaxta kin etanhan un.

9. Qa wicaxta kin he winorinca kicagapi xni, tuka winorinca kin ix wicaxta kin *kicagapi*.

10. Heon winorinca kin pa kin akan wowaxake hduhe kta, marpiya ohnihde cin hena on etanhan.

11. Tuka nakun wicaxta kin winorinea codan un xni, qa winorinea kin ix wicaxta codan un xni, Itancan kin en.

12. Unkan winorinea kin he wicaxta kin etanhan un kin he iyecen wicaxta kin ix winorinea kin eciyatanhan u, qa taku owasin Wakantanka etanhan un.

13. Nix niyepi kin he iyukecan po, winorinea pa akarpeton xni Wakantanka cekiye cinhan he hecetu he.

14. Taku oiyokipi kin hee kaex he onspeniciyapi xni he; Wicaxta kin paha hanskaska hecinhan he wowixtece.

15. Tuka winorinea kin ix paha hanskaska koyake cinhan he wowitan kin ee, paha kin he woarkarpe qupi.

16. Tuka tuwe waakinin un kinhan, wicoran kin de iyececa takudan unhapi xni qa nakun Wakantanka taokodakiciye kin.

17. Unkan he de omdake ça ciyatanpi xni; taku sanpa waxte kin on mniniciyapi xni; tuka taku aoptetu kin heon etanhan.

18. Tokaheya okodakiciye mniniciyapi eca yuomdecapi dukampi keyapi nawaron, qa apa wicawada.

19. Waakinicapi niyepi en un kta, hecen tona owotanna iniyukeanpi kin tanin kta.

20. Heon witaya mniniciyapi eca, he rtayetu wotapi Itancan tawa kin yutapi kte cin hee xni;

21. Wotapi kin en otioyohi taku yute kte cin tokaheya icu ece; unkan wanji wotektelha qa wanji ix witko ece.

22. Tipi ohna wayatapi qa wadatkanpi kte cin yahduhapi xni he. Wakantanka taokodakiciye kin ayaktapi xni qa tona taku yuhapi xni hena wixten wicayayapi he. Token eciciyapi kta he. Heon ciyatanpi kta he. Hiya ciyatanpi xni.

23. Miye taku Itancan maqu qon he ciçupi, Jesus Itancan kin hanyetu wan iyoheyapi qon he en aguyapi icu,

24. Qa yuwakan qa kiyuxpe ça heya; Icupi qa yuta po, mitancan kin niyepi on kiyuxpapi kin he dee, decen miksuya econ po.

25. Wotapi enakiyapi unkan iyecen wiyatke kin icu qa heya; Wiyatke kin de mawe kin en wicotakuye teca kin hee, tohanyan datkanpi kinhan miksuya econ po.

26. Hecen tohan aguyapi kin de yatapi qa wiyatke kin de datkanpi kinhan henakiya Itancan te cin he odakapi, tohanyan hi xni kin hehanyan.

27. Tuwe aguyapi kin de iyacin xni yute ça Itancan tawiyatke kin de yatke cinhan he Itancan kin tancan we ko on yacopi.

28. Tuka wicaxta kin wihdukecan kta, hecen aguyapi kin de yute ça wiyatke kin de etanhan yatke kta.

29. Tuwe iyacin xni yute ça yatke cinhan he woyaco hdute ça hdatkan, Itancan tancan kin iyukecan xni kin heon.

30. Heon etanhan niyepi eka wicota waxakapi xni qa wayazanpi sa qa hunr ixtimapi.

31. Unkiye unkihdukecanpi

kinhan token tanhan unkiyu-
keanpi kte xni.

32. Qa unkiyukeanpi kinhan
Itancan kin wahokonunkiyapi,
hecen wicoicage kin om unya-
copi kte xni.

33. Hecen mihunkawanji to-
han wota mniniciyapi kinhan o-
toiyohi akicipo po.

34. Qa tuwe wotektehda kin-
han he tiyata wote kta, hecen
woyaco en witaya yaipi kte xni.
Qa taku naharin ihe cin hena
tohan wau kinhan wiyeya ewa-
hnake kta.

WICOWOYAKE 12.

1. Mihunkawanji taku wa-
kanyan yuhapi kin iyukean xni
yaunpi kta wacin xni.

2. *Ehanna* Ikcewicaxta kin
henicapi, wakagapi iapi okitpani
kin en aniyampi, ye niyanpi qon
iyececa, he sdonyakiyapi.

3. Heon he sdonye ciciyapi;
Tuwedan Wakantanka Taniya
Wakan kin eciyatanhan ie ça
Jesus, woxice eciye xni; qa tu-
wedan iye cinka Jesus Itancan
eciye kta okihi xni, tuka Woni-
ya Wakan ecedan eciyatanhan
okihi.

4. Wicaqupi kin hena taku
toktokeca tuka Woniya Wakan
kin okonwanjidan.

5. Qa waokiyapi kin toktoke-
ca tuka Itancan kin e okonwan-
jidan.

6. Qa wicoran toktokeca tuka
Wakantanka kin e okonwanji-
dan, iye owasin en taku owasin
owicakiciran.

7. Tuka Woniya Wakan yu-
otaninpi kin he otoiyohi wica-

qupi, on iyoptapi kte cin he-
on.

8. Woniya Wakan eciyatan-
han *wicaxta* wanji woksape wic-
oie qupi qa *wicaxta* tokeca wo-
sdonye wicoie kin *qupi*, he
Woniya Wakan wanjidan etan-
han.

9. Qa *wicaxta* tokeca wowa-
cinye qupi, Woniya Wakan o-
konwanjidan kin etanhan; qa
wicaxta tokeca wawokizi yapi
qupi, Woniya Wakan okonwan-
jidan kin on.

10. Qa *wicaxta* tokeca wo-
wapetokeca econpi, qa wanji to-
keca wiyukeanpi, qa wanji toke-
ca taku wakan iyukeanpi, qa
wanji tokeca iapi ocaje ota, qa
wanji tokeca iapi ieska oyakapi
kin hecekcen wicaqupi.

11. Hena owasin Woniya
Wakan wanjidan qa okonwanji-
dan un kin he oranye ça token
cin kin hecen *wicaxta* otoiyohi
kipamni wicaqu ece.

12. Wicatancan kin he wan-
jidan tuka wicahuha ota yukan;
qa tancan kin en huha kin hena
ota qeyax tancan wanjidan, he
iyecece Mesiya un.

13. Unkan Woniya Wakan
eciyanhan unkiye owasin tan-
can wanjidan en baptem unqupi,
Juda qa Helenes oyate, wowi-
dake un kin, tona tawa iciyapi
kin hena koya; qa owasin Wo-
niya Wakan wanjidan kin he en
wayatke unkiyapi.

14. Wicatancan kin he huha
wanjidan xni, tuka ota.

15. Hehan wicasiha kin he,
Wicanape kin he miye xni heon
wicatancan kin en opeya waun
xni ce, eye cinhan heon etan-

han wicatančan kin en ope xni he.

16. Qa wicanoge kin he, Wicaxta kin he miye xni qa heon wicatančan kin en opeya waun xni ce, eye cinhan ehantanhan wicatančan kin en ope xni he.

17. Wicatančan kin ocowasin ixta kin ee unkanx winaronpi kin tokiya un kta he; qa ocowasin winaronpi kin ee unkanx waomnapi kin tokiya un kta he.

18. Tuka nakaha Wakantanka token iyokipi kin hecen wicahuha kin otoiyohi wicatančan kin en ehde.

19. Qa hena iyurpa wicahuha wanjidan unkanx tancan kin tokiya un kta he.

20. Tuka nakaha wicahuha ota exta tancan wanjidan.

21. Unkan ixta kin he, Cicin xni ce, nape kin eciya okihi xni; qa nakun pa kin he, Cicin xni ce, siha kin eciye kte xni.

22. Qa wicatančan en wicahuha kin tona waxake xni se un kin hena iyotan.

23. Qa wicatančan ekta tona yuonihan xni undakapi kin hena iyotan unyuonihanpi ece, qa tona xixica unhapi kin hena iyotan woiyokipi.

24. Tona waxte unyukanpi kin hena takudan sanpa cinpi xni, tuka Wakantanka wicatančan kin icikoyagya kage ça tukten iyokpaniyan un kin he en yuonihanpi tanka kaga.

25. Hecen wicatančan kin en yuomdecapi wanice kta, qa wicahuha kin hena otoiyohi awakici-cinpi kta.

26. Qa huha wanjidan iyotan

iyekiye cinhan he kici huha iyurpa iyotan iyekiyapi kta; qa huha wanjidan yuonihanpi kinhan he kici huha kin iyurpa iyuxkinpi kta.

27. Mesiya tancan kin he niyepi qa otoiyohi huha yeeidukanpi.

28. Unkan okodakiciye kin en Wakantanka kakenken ewicahde, tokaheya ohnihde unpi kin hena, qa iyokihe wokcanpi, qa iciyamni waonspekiyapi; hehan wicowaxake, hehan waasniyanpi, waokiyapi, itancanpi, qa ceji toktokeca.

29. Owasin ohnihde unpi kin hecapi he; owasin wokcanpi he; owasin waonspekiyapi he; owasin wicowaxake kin heca he.

30. Owasin waasniyanpi okihi he; owasin ceji tokeca on iapi he; owasin ieskapi he.

31. Wookihi iyotan waxte kin hena nina akita po. Tuka hena isanpa canku waxte wan-yag ciciyapi.

WICOWŌYAKE 13.

1. Wicaxta akantu qa marpiya ohnihde ceji pi kin on iwaa exta wacanwakiye xni ehantanhan maza xa snasna qa taku ituya sna kin he iyemaceca.

2. Qa wowiyukean mduhe ça taku anarbeya un kin owasin wookarnige owasin ko sdonwaye ça wowacinye owasin mduha, on re kin yutokan iyewaye kta owakihi exta wacanwakiye xni ehantanhan matakun xni.

3. Qa taku mitawa kin owasin won wicayapi kin en wahidusote ça mitancan kin hee kaex

rurnage kta e waqu exta wacan-wakiye xni ehantanhan takudan iciyopteya waun xni.

4. Wacantkiyapi kin he wicotawacin tanka qa wowaxte oco-wasin. Wacantkiyapi kin he wawinawizi xni. Wacantkiyapi kin he wawakipajin xni qa waraniçidapi kin on iwicapo xni,

5. Wawixtenya econ xni, qa ixnana takudan amnaiçiye xni, wacinko xni, qa taku xica iya-wicaonpe xni;

6. Woartani en iyuxkin xni tuka wowicake kin en iyuxkin;

7. Taku owasin kajuju; taku owasin wicada; taku owasin ape; qa taku owasin iyowinyan.

8. Wacantkiyapi kin he tohini owihanke xni. Wokecanpi kin hena enakiyapi kta; ceji tokeca kin hena ayuxtan aye kta; qa wookarnige kin hee kaex atakuni kte xni.

9. Apadan sdonunyanpi qa apadan unkiyucanpi.

10. Tuka tohan woyuxtan kin he hi kinhan tona woyuxtan xni kin hena ihanke kta.

11. Homakxiyoqopa qehan hokxiyoqopa iyecen iwae ça hokxiyoqopa iyecen wimdukecan qa hokxiyoqopa iyecen awacin waun, tuka wicaxta imacaga hehan taku hokxiyoqopa tawa kin amduxtan.

12. Dehan takudan mdesahan wanunyakapi xni, ihdiyomdasin wawanunyakapi kin he iyecen, tuka e qe anog itohnake icitkokim wanunkiciyakapi kta. Nakaha taku kin tanyan sdonwaye xni tuka e qe tokata sdonmayan-

pi kin iyecen tanyan sdonwaye kta e imicihan.

13. Unkan nakaha hena yamni en ounyan, wacinyanpi qa apepi qa wacantkiyapi; tuka wacantkiyapi kin he iyotan tanka.

WICOWOYAKE 14.

1. Wicantkiyapi ode po qa wicoran wakan kin nina cin po. Tuka widukecanpi kte cin he iyotan.

2. Tuwe ceji tokeca on ie cin he wicaxta kin takudan owicakiyake xni tuka Wakantanka taku eciya; tuwedan naron xni nakaex. Woksape kin ekta taku anarbeya un kin ohdaka tuka ce.

3. Tuka tuwe wiyukecan oyake cin he wicaxta kin wowicakiyaka, on icar yapi qa wahokonkiyapi qa kicanptapi.

4. Tuwe ceji tokeca on ie cin he iye ksam içiya; tuka tuwe wiyukecan oyake cinhan he okodakiciye kin ksam wicaya.

5. Niyepi kin owasin ceji toktokeca on iyaapi kta wacin, tuka widukecanpi kte cin he iyotan wacin. Tuwe wiyukecan kin he tanka qa tuwe ceji tokeca on ie cin he ihukuya, ieska oyake xni kinhan, hecen okodakiciye kin icar yapi kta tuka.

6. Unkan nakaha mihunkawanji, ceji tokeca on iwaa en ciupi kinhan he token oniciyapi kta he; yaotaninpi qa wookarnige qa wiyukecanpi qa woonspe kin umana eciyatanhan eciciyapi xni kinhan.

7. Unkan taku ni un xni kin hena, cotanka qa ix candowan-

kiyapi kin hotanin kinhan ho toktokeca xni kinhan he taku on etanhan tukte e yajopi qa tukte e dowankiyapi kin sdonyapi kta he.

8. Maza yahotonpi tanka kin ho okonwanjidan xni yahotonpi kinhan tuwe zuyapi kta e wiye-ya ekihnake kta he.

9. He iyecen nix niyepi ceji on wicoie okarnir waxtexte iyapi xni kinhan token on etanhan oyakapi kin he taku ee sdonyapi kta he; okaduza kin en iyapi kta.

10. Maka kin akan ho ocaje tokeca kanakiya naceca, qa tukte wanjidan takudan kapi xni wanica.

11. Heon etanhan ho kin he taku kapi sdonwaye xni kinhan tuwe ie cin he Ikcewicaxta kin kecanmakin kta, qa mix eya tuwe ie cin he Ikcewicaxta kin heca wadake kta.

12. Hecen wicoran wakan nina yacinpi kinhan okodakiciye kin icar yapi kta e wadupipike kte cin he akita po.

13. Heon tuwe ceji tokeca on ie cinhan, he ieska oyake kte e icekiye kta.

14. Miye xaia cewakiye cinhan minagi kin he cekiya tuka mitawacin e qe takudan icar ye xni.

15. Hecen toketu he. Miye minagi kin eciyatanhan cewakiye kta qa nakun mitawacin kin eciyatanhan cewakiye kta; minagi kin on wadowan kta qa nakun mitawacin kin on wadowan kta.

16. Ninagi kin on wopida ehe cinhan tuwe yukean xni un kin

en hiyotanke cin he token, wopida ehe cin en, Amen eye kta he, taku ehe cin sdonye xni nakaex.

17. Wopida tanyan eha tuka uman ix takudan okarnige xni.

18. Wakantanka mitawa wopida ewakiya ce, niyepi kin owasin sam iyeya ceji tokeca on iwaa ce.

19. Tuka okodakiciye kin en mitawacin kin eciyatanhan wicoie zaptanna iwae kta, on wicaxta tokeca onpse wicawakiye kte cin he iyotan waxte, qa ceji tokeca on wicoie kektopawinge wikcemna iwae kte cin he aoptetu.

20. Mihunkawanji wookarnige en hokxiyoqopa unpi xni po, tuka wicotawacin xice cin en hokxiyoqopa po, qa wookarnige kin en wicaxta tanka un po.

21. Wooke kin en kaken kagapi; Ceji tokeca iha tokeca ko on oyate kin de owicaweciye kta, tuka hececa exta namaronpi kte xni, Itancan kin eya.

22. Hecen ceji tokeca kin hena wowakta kin hee, tona wicadapi xni kin hena eepi xni, tuka tona wicadapi kin hena on wwapetokeca kin hee.

23. Okodakiciye kin ocowasin witaya mniciyapi qa owasin ceji tokeca on iapi kinhan qa tona wacinton xni wicada xni ko en hipi kinhan, winitkotkopika kecanicinpi kte xni he.

24. Tuka owasin wiyukeanpi qa tuwe wicada xni wacinton xni un kin tin hiyu kinhan he owasin on onspekiyapi qa owasin on iyukeanpi.

25. Qa hecen iye cante kin

ekta taku anarbe cin yutaninpi kta; hehan makipusdiya erpeiciye ça Wakantanka ohoda kta qa Wakantanka niyepi en nicipi un kin oyake kta.

26. Heon mihunkawanji toketu he: Mniniciyapi eca niyepi otoiyohi odowan duhapi qa wonspe duhapi qa ceji tokeca qa yaotaninpi wan qa ieska oyakapi wan duhapi ce. Taku owasin waonspekiyapi kin on econpi nunwe.

27. Tuwe ceji tokeca on ie cinhan wancadan wicaxta nomnom yamnimni, qa hena wanji itokto econpi kta, qa wanji ieska kiyapi kta.

28. Tuka tuwe ieska kiyapi kte cin wanice cinhan okodakiciye kin en inina yanke kta; ix iye oiçiciye ça Wakantanka okiye kta.

29. Qa wicaxta wokcan kin hena nomnom qa yamnini oya-kapi kta qa umanpi kin wiyukcan unpi kta.

30. Qa tuwe ikiyedan iyotan-ke cin he taku wakanyan okiyakapi kinhan tokaheya kin he inina yanke kta.

31. Owasin wanji itokto wi-dukcanpi kin odakapi kta oya-kihipi, hecen owasin onspekiya-pi qa owasin iwicakiyapi kta.

32. Qa wicaxta wokcanpi toksapepi kin wicaxta wokcanpi kin anawicakigoptanpi ece.

33. Wakantanka kin he oqoyapi kin kage xni tuka wookiye kin he tawa, oyate wakan okodakiciye kin owasin en un kin iyececa.

34. Unkan winorinca nitawa-pi kin okodakiciye kin ekta ini-

na yankapi kta. Hena ie kta e iyowinyanpi xni, tuka anagoptan yukanpi kta, woope heye cin iyecen.

35. Qa taku onspepi kta cinpi kinhan iye tipi ekta hihnaku-pi kin iwicawangapi kta. Okodakiciye kin en winorinca ie cin he wowixtece.

36. Niyepi kin etanhan Wakantanka oie kin hinanpa he; qa niyepi nixnanpidan ekta nihipi he.

37. Tuwe wicaxta wokcan qa ix wicaxta wakan kin heca kecaniçin kinhan he taku wowapi en cicagapi kin hena Itancan tawoahope kin hee e yaotanin kta.

38. Qa tuwe iyukcan xni un kinhan he iyukcan xni un nunwe.

39. Hecen mihunkawanji wi-dukcanpi kte cin he akita po, qa ceji tokeca on iapi kte cin terindapi xni po.

40. Qa taku owasin iyokipiya owotanna econpi nunwe.

WICOWOYAKE 15.

1. Unkan mihunkawanji wotanin waxte unkoniciyakapi qa iyacupi qon en ayahanpi kin he sdonye ciciyapi.

2. He eciyatanhan nakun yanipi kta, wicoie unkoniciyakapi kin on, he çinsa duhapi kinhan qa ecinxniyan awacanipi xni kinhan.

3. Otokaheya ekta taku iwa-cu qon he ciçupi; Waunrtanipi kin on Mesiya te cin, wowapi wakan eye cin ecetu;

4. Qa hnakapi qa anpetu ici-

yamni kin piya ikicage cin, w-wapi wakan *eye cin ecētu*.

5. *Qa Inyan wanhdake ça hehan ake nonpapi kin wanhdakapi.*

6. *Hehan he iyohakam wancadan hunkawanjin kiciyapi opawinge zaptan wanyakapi, hena wicota naharin ni unpi tuka wanjikji ixtimapi.*

7. *Qa he iyohakam Jakob wanhdaka; hehan ohnihde unpi kin owasin wanyakapi.*

8. *Qa ehake mix miye wanmdaka okaxkan tonpi kin iyemaceca.*

9. *Ohnihde unpi kin miye iyotan macistina, qa ohnihde emakiyapi kte cin iyemicihantu xni, Wakantanka taokodakiciye kin xicaya wicawakuwa kin heon etanhan.*

10. *Tuka tomakece cin Wakantanka towaonxida kin on hemaceca. Qa iye towaonxida mici un kin he taku xni wanica, tuka hena owasin iyakapeya nina rtawani; qa he miye xni, Wakantanka towaonxida mici un kin hee.*

11. *Heon he mix miye qa ix iyepi *uman tukte kakex*, hecen unkoyakapi qa hecen wicayadapi.*

12. *Mesiya wiconțe kin etanhan piya ikicage cin he oyakapi hecinhan token on niyepi wanjikji, Wiconțe etanhan piya wicoicage wanica ce, ehapi he.*

13. *Wicațe cin piya wicoicage wanica hecinhan, Mesiya piya ikicage xni.*

14. *Qa Mesiya piya ikicage xni hecinhan hehan unkoyakapi kin he taku xni qa wacinyayapi kin he nakun taku xni.*

15. *Qa Wakantanka en unkitonpi xni kin; Wakantanka Mesiya piya najin kiye cin he unkoyakapi; tuka he najin kiye xni, wicațe cin ake najinpi xni kinhan.*

16. *Wicațe cin piya najin ki-yapi kte xni kinhan hehan Mesiya nakun piya najin kiyapi xni.*

17. *Qa Mesiya piya ikicage xni hecinhan wacinyayapi kin he takudan okihi xni qa naharin wayartanipi kin ehna yaunpi.*

18. *Qa nakun tona Mesiya on ixtima iyayapi qon hena takunipi xni.*

19. *Wiconi kin de en ecedan Mesiya on ape unyakonpi hecinhan wicaxta owasin unkiye iyotan iyotan iyeunkiyapi.*

20. *Tuka wanna Mesiya wiconțe etanhan piya ikicage ça tona ixtimapi qon en tokaheya icage cin hee.*

21. *Wicaxta kin eciyatanhan wiconțe u kin he iyecen wicaxta kin eciyatanhan wiconțe etanhan piya wicoicage kin u ce.*

22. *Adam en owasin tapi kin he iyecen Mesiya en owasin piya ni yanpi kta.*

23. *Otoiyo hi tohan kinhan; Mesiya he tokaheya qa tohan Mesiya hi kinhan hehan tona tawa kin hena.*

24. *Qa hehan owihanke kta, tohan wokiconze kin Wakantanka Ate yapi kin kieu kta, woki-conze owasin qa wicowaxake owasin qa wookihi kin ihang ye cinhan.*

25. *Tona toka yapi kin hena owasin iye siha kin ihukun iye-*

wicaye kte cin hehanyan ito wicaxtayatapi yanke kta.

26. Qa tōka ehake ihang ye kte cin he wiconṭe kin ee.

27. He siha kin ihukuya taku owasin ekihnaka. Tuka tohan he ihukuya taku owasin ehna-kapi kin eye çehan, tuwe he ihukuya taku owasin ehna-ke cin he okaptapi e sdonunyanpi.

28. Qa tohan taku owasin he ihukun iyeyapi kinhan hehan Cihintku kin ege tuwe taku owasin iye ihukun iyeye cin he ihukun un kta; hecen Wakan-tanka owasin en ocowasin un kta.

29. Wicaṭe cin ecaca piya ikicagapi kte xni hecinhan tona wicaṭe cin on baptem wica-qupi kin hena taku tokonpi kta he; qa tokeca e wicaṭe cin on baptem wicaqupi he.

30. Qa tokeca anpetu iyohi ṭa ikopeya unyakonpi he.

31. Jesus Mesiya Itancan un-kiyapi kin en widuxkinpi kin en owape cin he cajemdate ça, Anpetu iyohi maṭa ce, epa.

32. Epesos ekta wicaxta akantu iyecen wamanica kici weciza exta on taku iyomapte kta he, wicaṭe cin piya wicoi-cage xni kinhan. Wauntapi qa waunyatkanpi kta, heyakecinhan unṭapi kta ce.

33. Içihnayanpi xni po; wicoie xice cin hena wicoran waxte xicaya kaga.

34. Wicoran owotanna on ihduricapi qa wartanipi xni po. Wanjikji Wakantanka sdonyapi xni. Winixtecapi kte cin heon hena hecen epe.

35. Tuka okini tuwe heye

kte; Wicaṭe cin token piya icar yapi qa taku tancan kin yuha upi kta he.

36. Winitkotkoka, taku oyaju kin he ṭe xni kinhan piya icage xni ce.

37. Qa taku oyaju kin he tancan icage kte cin he oyaju xni, tuka su ecedan, aguyapi qa ix taku toktokeca naceca.

38. Tuka Wakantanka token iyokipi kin hecen tancan qu qa su ocaja otoiyohi tancan tawa kin kicu ece.

39. Cerpi owasin cerpi okon-wanjidat xni, tuka wicacerpi kin he wanji ee, qa woteka cerpi kin wanji hee, qa hogan cerpi kin wanji hee, qa zitkadan cerpi kin wanji hee.

40. Unkan marpiyata tancan qa makata tancan kin heca yukan. Tuka marpiyata un kin he towitan kin wanjidat qa makata un kin he towitan kin tokeca.

41. Anpetu wi towitan kin wanjidat qa hanyetu wi towitan kin he tokeca qa wicanrpi towitan kin he nakun tokeca, qa wicanrpi wanji wicanrpi tokeca kici wowitan en akidecece xni.

42. He iyecen wicaṭe cin piya wicoicage. Tancan rwin ojupi tuka rwin kte xni ekicetu yapi.

43. Wowiraraya ojupi, tuka wowitan ekicetu yapi. Wowaxake xni yan ojupi, tuka wowaxaga ekicetu yapi.

44. Wicacerpi tancan ojupi tuka wowakan tancan ekicetu yapi. Wicacerpi tancan yukan qa wowakan tancan kin yukan.

45. Kaken wowapi en kagapi

qon, Adam wicaxta tokaheya kin he wicanagi ni un kin heca kagapi, qa Adam ehake un kin he Woniya Wanikiye cin hee.

46. Tuka taku wakan un kin he tokaheya xni, tuka taku cerpi kin hee, qa iyohakam taku wakan kin

47. Wicaxta tokaheya kin he maka etanhan un qa maka kin heca; Wicaxta iyokihe kin he Itancan marpiya eciyatanhan un kin hee.

48. Maka kin heca un qon tona maka hecapi kin hena hececapi; qa marpiya tanhan un qon, tona marpiya tanhan un kin hena hececapi.

49. Unkan makata un kin touncage kin unhapi kin he iyeccen marpiya tanhan un kin touncage kin unhapi kta.

50. Mihunkawanji kaken epa; Wicacerpi qa wicawe kin Wakantanka tokiconze kin tawapi kta okihipi xni, qa nakun wicarwin wicarwin kte xni kin tawa kte xni.

51. Wanyaka po, wowiyukean wan ociciyakapi; owasin unkixtimapi kte xni tuka owasin unyutokecapi kta.

52. Ihnuhanna, ixta karpapi se en maza yahotonpi tanka ehake kin *tanin* kinhan; maza yahotonpi tanka kin he yahotonpi kta qa wicape cin rwin xni yan najin wicakiyapi kta qa unkiye unyutokecapi kta.

53. Rwin kte cin de wicarwin xni koyake kta qa te kte cin de tepica xni koyake kta.

54. Qa tohan taku rwin kte cin de wicarwin xni koyake qa tancan wiconte kin de wiconi

kin ogeton kinhan hehan wicoie kin wowapi en kagapi qon ecetu kta; Wiconte kin he woohiye kin e ocowasin iocokaya.

55. Wiconte wicape nitawa kin tokiya un he. Wicahnakapi woohiye nitawa kin tokiya un he.

56. Wiconte wicape kin he woartani ee, qa woartani wowaxake kin he woahope kin ee.

57. Tuka Wakantanka woohiye unqupi, Jesus Mesiya Itancan unkiyapi kin eciyatanhan, he wopida yuha nunwe.

58. Hecen mihunkawanji waxte ciciapi kin, sutaya yahanpi qa pahoho xni yaunpi nunwe; qa ohinniyan Itancan oran kin en aiciciya po, Itancan kin on rtayanipi kin he taku xni wance kta sdonyayapi.

WICOWOYAKE 16.

1. Wicaxta owotanna un kin hena taku wicakicamnapi kte cin token Galatiya ekta okodakiciye kin econ wicawaxi qon he ecen econ po.

2. Anpetu tokaheya kin en niyepi otoiyo hi token oyakihipi kin iyacinyan eyahnakapi kta, hecen wau kinhan wamnayanpi wanice kta.

3. Qa wau kinhan tona wowapi on wicayakarnigapi kin hena wicakupi nitawapi kin he Jerusalem ekta aye wicawaxi kta.

4. Qa miye ekta mde kte cin he waxte kta naceca hecinhan hena kici mde kta.

5. Makedoniya opta mde cinhan ekta ciupi kta. (Qa Makedoniya opta mde kta.)

6. Qa ekta nicipi waun qa waniyetu ihuni waye kta naceca, hecen hetanhan tokiya mde cinhan niye amayadapi kta.

7. Nakaha tahepi wanciya-kapi kte xni, tuka Itancan kin iyokipi kinhan cicipi owanji manke kta wacami.

8. Anpetu iwikcemna zaptan u kte/cin hehanyan Epesos en owanji manke kta.

9. Tiyopa tanka wawokihi kin makiyurdokapi, qa tona wakinicapi kin hena ota.

10. Timoteyos ekta niupi kinhan kokipe xni yan nicipi un kte. He nakun miye *ecamon* kin iyecen. Itancan tortani kin econ ece.

11. Heon tuwedan irara kte xni, tuka wookiye yuha au po, ekta mahiyu kta ce; he hunkawanjin kiciyapi kin om u kta ape manka.

12. Apolos mihunkawanji he hunkawanjin kiciyapi kin om niyepi ekta niipi kta, nina cewakiya, tuka ix iye dehan ekta ye kta ecaca cin xni, tuka tohan cin kinhan ekta i kta.

13. Kiktahan un po, wowacinye en sutaya han po, wicaxta tanka po, waxaka po.

14. Wacantkiyapi on taku owasin econpi nunwe.

15. Mihunkawanji ceciciyapi ce, (Stepanas tiyohnaka kin sdon-

yayapi, he Akaya en waskuyeca tokaheya icage cin hee qa wicaxta owotanna owicakiyapi kin en ye iciyapi.)

16. Tona hececapi qa tona wawokiyapi qa rtanipi kin hena owasin wicihukuya ye niçiyapi kta.

17. Stephanas qa Fortunatos qa Acakos hipi kin heon imduxkin, hena taku ecamiyeconpi xni kin he ecetu miciciyapi.

18. Qa minagi kin ekta magaga mayanpi, qa nitawapi nakun. Heon etanhan tona hececapi kin hena wicayuonihan po.

19. Asiya ekta okodakiciye kin hena nape niyuzapi. Akula qa Priskila Itancan kin on sutaya nape niyuzapi, qa okodakiciye iye tipi ohna un kin hena koya.

20. Hunkawanjin kiciyapi kin owasin nape niyuzapi. Iiputakapi wakan kin on otoiyohi i ikiciputaka po.

21. Palos he miye nape kiciyuzapi kin de miye minape kin on *wakaga*.

22. Tuwe Jesus Mesiya Itancan kin waxte dake xni kinhan he anatema maranata un nunwe.

23. Jesus Mesiya Itancan towaonxida kin nicipi un nunwe.

24. Jesus Mesiya en wacanwakiye cin he niyepi en nicipi un nunwe. Amen.

SECOND CORINTHIANS.

PALOS OHNIHDE UNPI KIN HECA KORINTOS OYATE KIN WOWAPI
WICAKICAGE CIN INONPA KIN HE DEE.

WICOWOYAKE 1.

1. Palos Wakantanka tawacin kin eciyatanhan Jesus Mesiya ohnihde ye cin Timoteyos hunkawanjin kiciyapi wan kici Korintos ekta Wakantanka taokodakiciye kin, qa Akaya *ma-koce* kin owancaya tona owotanna un kin hena owasin koya, *wowapi cicagapi*.

2. Wowaonxida wookiye ko Wakantanka Ate unyanpi qa Jesus Mesiya Itancan kin etanhan nicipi un nunwe.

3. Wakantanka Jesus Mesiya Itancan unkiyapi he Atkuku, qa waonxidapi en ate yapi, qa Wakantanka owasin wacintonhnag wicaye cin he wowaxte yuha nunwe.

4. He unkakijapi owasin en wacintonhnag unyanpi, hecen tona wokakije owasin ehna un kin hena iwicunkiyapi unkokihipi kta, wacintonhnagyapi on Wakantanka unkikiyapi kin he eciyatanhan.

5. Hecen Mesiya tokakije kin unkiyepi en unkiciyuotapi kin he iyecen Mesiya eciyatanhan wacintonhnag unyanpi kin he nakun unkiciyuotapi kta.

6. Kakix unyanpi eca he wa-

cintonhnag niyanpi qa ni niyanpi kte cin heon; he wokakije on kakix unyanpi kin hena yuha okihi wicaye kta e oranye qa wacintonhnag unyanpi hecinhan he wacintonhnake niyanpi qa ni niyanpi kte cin heon.

7. Unkan niyepi kin on suta-ya wacinunyanpi, wokakije kin en opeya yaunpi kin he iyecen wacintonhnake yapi kin en oyapapi kta, sdonunyanpi.

8. Mihunkawanji, Asiya en token wokakije unhiyahdepi qon he sdonye xni yaunpi kta uncinpi xni, iyotan nina unkakijapi, unkokihipi kin isanpa, hecen unnipi kta unkecinpi xni.

9. Qa unkiyepi kin mahen wiconṭe woyaco kin unhapi, hecen takudan wacinunkiṣiyapi kte xni, tuka Wakantanka wicate cin ekicetu wicaye cin he wacinunyanpi kta.

10. Iye wiconṭe hinsko tanka etanhan eunhdakupi, qa nakaha ehdaku ece; qa eex nakun eunhdakupi kta wacinunyanpi.

11. Qa nix eya wocekiye on oyakiyapi, hecen wicaxta ota etanhan taku unqupi qon he on unkiyepi on etanhan wicota wopida eyapi kta.

12. Unkiyuxkinpi kin he un-nagipi hdaotanin kin hee, w-wicake wowakan ko en okon-wanjidān, wicacerpi woksape yuhe xni tuka Wakantanka to-waonxida yuha wicoicage kin ehna unnipi, qa niyepi kin ekta iyotan hececa.

13. Taku dawapi qa sdonyayapi kin hecedan wowapi en unnicagapi; qa owihanke kin hehanyan wicayadapi kta ke-pee.

14. Onxpa sdonunyayapi, un-kiyuxkinpi kin he niyepi, he iyecen wowiyukin nitawapi kin he unkiyepi, Jesus Itancan kin taanpetu kin hehantu kinhan.

15. Tanni hecen iyukcan ekta ciupi kta, wowaonxida inonpa kin duhapi kte cin heon.

16. Qa niyepi kin etanhan iyoopta Makedoniya ekta mde ça ake Makedoniya etanhan niyepi kin ekta icicawin wahdi kta qa Judeya makoce kin ekta ye mayayapi kta wacin.

17. Hecen wacin mduze çe-han hehan iyowiradan wacin mduza he; qa token miçiconze cin he wicacerpi eciyatanhan miçiconze ça hecen, han, han, hiya, hiya, eya iyomapte kta he.

18. Wakantanka wacinyepi-ca, wicoie unkeniciyapi qon he han, hiya, hee xni.

19. Jesus Mesiya Wakantan-ka Cihintku kin, miye qa Silua-nos qa Timoteyos *hena yamni*, unkoniciyakapi qon he han, hiya, hee xni, tuka iye en han ecedan.

20. Wakantanka iwahounyan-pi kin hena owasin iye en, Han

hee, qa iye en Amen, unkiyepi kin etanhan Wakantanka yatan-pi kte cin heon.

21. Tuwe niyepi kici Mesiya en unyusutapi qa sda unyanpi kin he Wakantanka kin ee.

22. Qa he unkapuspapi qa uncantepi kin ekta Woniya Wa-kan tokaheya icupi ece kin he unqupi.

23. Unkan nakaha minagi kin ekta Wakantanka mayaotanin kta e cewakiya; Itoncipapi kta e on naharin Korintos ekta wai xni.

24. Wicayadapi kin en itan-canpi kin heca unkihdawapi xni tuka wowiyuxkin nitawapi kin en ounniciyapi kta. Wicadapi kin on owotanna nayajinpi.

WICOWOYAKE 2.

1. Miye qe hecen mihdukan, ake iyokixin ya ekta ciupi kte xni.

2. Miye iyokixin ciyapi kin-han tuwe iyuxkin maye kta he; iyokixin waye cin hee kta.

3. Hecen on he wowapi cica-gapi, ekta wau kinhan tona on imduxkin kte cin hena on etan-han iyokixin waun kte xni. Qa niyepi owasin wacinciyapi, mitowiyuxkin kin he en niyepi owasin *oyapapi kta*.

4. Wicokakije tanka qa wi-cocantexica qa ixtamnihanpe ota ehna wowapi cicagapi qon, iyo-kixin niyanpi kte cin heon *heca-mon* xni tuka nina canteciçiyapi kin he sdonyayapi kte cin he-on.

5. Tuwe iyokixicapi kage ci-qon he cistiyedan iyokixin ma-

yan, owasin waxagya iyacion-papi kte xni *wacin*.

6. He tuwe kin en wiyaon-papi kin he wicota aupi qon he henana kta.

7. Unkan nakaha wicaxta kin he iyuxkin yayapi qa yecan-ptapi kta, okini nina iyokixice cin on ktepidan kta.

8. Heon ceciciyapi ce, he can-te en duzapi kin hduotanin po.

9. Heon etanhan wowapi cicagapi, taku owasin en anagoptan yaunpi kta e iciyukcankpi kte cin heon.

10. Tuwe taku yecicajujupi kinhan mix eya *hecamon*, qa tuwe taku wecicajuju kin he niyepi kin on wecicajuju, Mesiya tancan kin on.

11. Hecen Satan ohiunyanpi kte xni; iye token içiconze cin sdonunyanpi.

12. Troas ekta Mesiya tawo-tanin waxte yuha wahi qa Itan-can kin tiyopa wan makiyuzamni;

13. Hehan minagi ekta cante waxteya waun xni, Titos mi-hunkawanji *en un* kin iyewakiye xni kin heon etanhan; qa hena nape wicamduze ça hetanhan Makedoniya ekta imdamda.

14. Wakantanka ohinniyan Mesiya on ohiye unyanpi qa ohinniyan unkiyepi kin on tawosdoney woomna yaotanin kin hee wopida yuha nunwe.

15. Wakantanka ekta Mesiya woomna waxte tawa kin he unkiyepi, tona wiconi yuhapi qa tona yutakunipi xni kin hena en.

16. Dena ix wiconțe wiconțe

aiyahdeya woomna kin he unkiyepi, qa hena ege wiconi wiconi aiyahdeya woomna kin he unkiyepi; qa tuwe hena taku kin okihi he.

17. Wicota Wakantanka oie kin ecetu xni yapi kin hena iyeuncecapi xni, tuka wowicake eciyatanhan qa Wakantanka eciyatanhan Wakantanka itokam Mesiya unkoyakapi ece.

WICOWOYAKE 3.

1. Ake unkihdatanpi unkayapi he; qa wicaxta wanjikji iye-cen waayatanin wowapi nicagapi kte cin heca uncinpi he; qa ix waayatanin wowapi unyecagapi kta *uncinpi* he.

2. Wowapi unkitawapi unki-cantepi kin ekta owapi kin he niyepi, wicaxta owasin sdonyapi qa yawapi.

3. Mesiya tawowapi taninyan oyakapi unkiye unkagapi kin he niyepi; mini sapa on kagapi xni tuka Wakantanka ni un kin Taniya Wakan kin on; inyan mdaska kin en *pagopi* xni tuka wicacerpi cante kin he ekta.

4. Qa Wakantanka ekta Mesiya eciyatanhan woape kin de unhapi.

5. Unkiye cinka taku unkiyukcanpi kta unkokitpanipi, unkiyepi atayedan, tuka unkokihipi kin he Wakantanka eciyatanhan.

6. Iye wicotakuye teca kin en ookiye wawokihika unkagapi, oowa kin he en un xni, woniya kin hee en; oowa kin he

wataya tuka woniya kin he waniya ece.

7. Wiconte wawokiyapi kin he owapi qa inyan akan pagopi qon he wowitan kinhan, on Israel cincapi kin Mowis itohnake wiyatpa kin oparta yukanpi kta okitpanipi, he *wowitan* kin enakiyapi tuka qon.

8. Hecen Woniya wawokiyapi kin he sam iyeya nina wowitan kta.

9. Woyaco wawokiyapi kin he wowitan hecinhan, wicoowotanna wawokiyapi kin he sanpa nina wowitan kta.

10. Qa taku yuwitanpi qon he taku wanji on wowitan xni, taku iyakapeya wowitan kin hee on etanhan.

11. Qa taku enakiyapi qon he wowitan kin hee hecinhan taku ecen he cin he iyotan wowitan kin ee.

12. Woape hececa unhapi kin heon nina wadiuntapika.

13. Mowis ite akarpe wan itohnake kin akarpe kiton kin he iyecece xni, taku enakiyapi kin owihanke kin hehanyan Israel cincapi kin wanyakapi okitpanipi kin heon etanhan *hecon*.

14. Hena tawacinpi kin tata-pika. Anpetu kin dehanyan wicotakuye tannike cin yawapi eca ite akarpe kin he eyakupi xni ecen un, he Mesiya eciyatanhan eyakupi tuka.

15. Qa anpetu kin dehanyan Mowis yawapi eca ite akarpe kin he iye cantepi kin en akarpe.

16. Tuka tohan Itancan kin ekta yuhomnipi kinhan hehan

ite akarpe kin he yuzamnipi kta.

17. Woniya kin he Itancan kin ee qa tukten Itancan taniya kin un kin hen tawa icyapi yukan.

18. Tuka unkiye owasin itohnake kin en takudan unkarpapi xni, ihdiyomdasin en wawanyakapi kin iyecen Itancan towitan kin wanunyakapi qa iye ouncege kin iyecen unkagapi, wowitan sanpa wowitan kin en, Itancan Taniya *Wakan* kin on etanhan iyececa.

WICOWOYAKE 4.

1. Wawokiyapi kin de unhapi kin heon onxiundapi kin iyecen takudan wacin ibounxakapi xni.

2. Tuka wowixtece taku narmana un kin hena erpeunyanpi qa wicahnayanpi kin en maun-nipi xni qa wohna ye yuha Wakantanka oie kin unkiciyuhapi xni, tuka wowicake yaotaninpi kin on wicaxta owasin wiyukeanpi kin ekta unhdaotaninpi, Wakantanka itokam.

3. Wootanin waxte unkita-wapi kin he anarmanpi hecinhan, tona takunipi xni kin hena anawacakirmanpi.

4. Hena ekta wicoicage kin de taku wakan tawa kin tona wicadapi xni wicotawacin kin wacinton xni wicakaga; Mesiya Wakantanka ouncege kin hee tawootanin waxte wowitan ioyanpa kin he iyoyam wicaye kte xni heon etanhan.

5. Unkiye unkohdakapi xni, tuka Mesiya Jesus Itancan kin

he *unkoyakapi* qa Jesus on oo-kiye wicayayapi kin hena unkiyepi.

6. Wakantanka iyoyanpa kin otpaza etanhan yege xi qon he uncantepi kin iyoyam unyanpi, Jesus Mesiya itohnake kin eciyatanhan Wakantanka towitan wosdonye iyoyanpa kin unqupi kte cin heon.

7. Tuka woyuha kin de maka wakxica ohna unhapi, hecen wowaxake tanka kin Wakantanka etanhan un kta qa unketanhanpi kte xni.

8. Ohinniyan nagieunyanpi tuka iyounkixicapi xni: Wacin hnuni unyanpi tuka takudan wacinye xni kin heuncecapi xni.

9. Xicaya unkuwapi tuka erpeunyanpi unyakonpi xni: Paha iyeunyanpi tuka ihang unyanpi xni.

10. Ohinniyan untancanpi kin en Jesus Itancan te cin he yuha unkanpi, hecen Jesus wiconi tawa kin untancanpi kin en taninyan un kta.

11. Unkiye unnipi kin Jesus on ohinniyan wiconte en iyaye unyanpi, Jesus wiconi tawa kin uncerpipi te kte cin en atanin kte cin heon.

12. Hecen unkiyepi kin en wiconte oranyan un, tuka niyepi kin en wiconi.

13. Wowicada woksape kin de unhapi, wowapi en kagapi qon iyececa; Wicawada kin heon iwaa ce; unkix eya wicaundapi kin heon unkiapi ece.

14. Qa tuwe Jesus Itancan kin piya ekicetu ye cigon he Jesus eciyatanhan ake ekicetu unyanpi kta qa niyepi kici suta-

ya he unkiyapi kta e sdonunyanpi.

15. Niyepi kin on etanhan taku owasin ecen un, hecen wo-waonxida tanka kin, wicota wopida eyapi kin on sanpa ota aye kta, Wakantanka towitan kin on.

16. Heon wacin ibounxakapi xni, tuka wicaxta akantanhan unkitawapi kin he takuni xni aya exta wicaxta mahen tanhan un kin he anpetu iyohi yute-capi.

17. Unkakijapi cistina qa ptecedan rince cin hena ota rinca, ota rinca wowitan owihanke wanin tke rinca unkiagapi kta.

18. Ieunhan taku wanyakapi kin hena ekta unketonwanpi xni tuka taku tona wanyakapi xni kin hena ekta *ewauncinpi*. Taku tona wanyakapi kin hena ihanke kta qa taku tona wanyakapi xni un kin hena owihanke wanica.

WICOWOYAKE 5.

1. Makata wakeya unkitawapi kin de yujupupi kinhan Wakantanka ticage cin tipi nape codan kagapi kin, marpiya ekta owihanke wanin yanke cin he unhapi kta e sdonunyanpi.

2. Qa de ohna comniunhdazipi qa tipi unkitawapi marpiya eciyatanhan un kin he kounyakapi kta e cantounkanpi.

3. He kounyakapi kinhan tancodan *unkanpi ecen* wanunyakapi kte xni.

4. Wakeya kin de ohna unkanpi kin hehanyan comniunhdazipi, unxakapi kin heon. Wokoyake unhduxdokapi kin

he uncinpi xni tuka kounyakapi kta. Hecen wiconŧe kin he wiconi kin e ocowasin napca iyeya.

5. Tuwe he en icar unyanpi kin he Wakantanka kin ee; qa he Woniya Wakan tokaheya kin unqupi.

6. Heon ohinniyan unkapepi, qa tohanyan wicatančan kin ohna unkanpi kin hehanyan Itancan kin itehanyan unyakonpi kin he sdonunyanpi.

7. Wicadapi kin eciyatanhan maunnipi qa wawanyakapi kin eciyatanhan xni.

8. He unkapepi, qa tancan kin de ohna unkanpi xni qa Itancan kin kici unyakonpi kte cin he uncinpi.

9. He de aiŧiciya unkakitapi, ekta om unyakonpi qa ix den unkanpi, uman tukte kaxta, he iyokipi unyanpi kta.

10. Owasin Mesiya tawoyaco oiyotanke kin itokam taninyan inaunjinpi kta, otoiyoŧi taku iye tancan kin ohna *oranye* cin hena icu kta, token econ qon eciyatanhan, he waxte qa xica uman tukte kaxta.

11. Heon Itancan wokokipe kin sdonunyanpi qa wicaxta kin cin wicunkiyapi; Wakantanka en unkihdaotaninpi qa nakun widukcanpi kin en unyaotaninpi wacanmi.

12. Ake niyepi en unkihdaŧanpi xni, tuka unkiyepi on iniwinkŧapi kta e okiŧi unniyanpi; hecen tona cante kin eciyatanhan xni tuka itohnake kin on iŧwinkŧapi kin hena ekta taku on iniwinkŧapi kte cin duhapi kta.

13. Wacin unhnunipi hecinhan he Wakantanka on etanhan;

wacin unksapapi hecinhan niyepi on etanhan *heuncecapi*.

14. Mesiya waxte wicadake cin he iyounpaxtakapi.

15. Qa he de unkiyucanpi, wanji owasin on ŧe cinhan hehan owasin ŧapi qon; qa owasin on ŧe cin heon tona nipi kin hena iye cinka nipi kte xni, tuka tuwe *owasin* on ŧe a ake kini kin hee on nipi kta.

16. Heon etanhan detanhan wicacerpi eciyatanhan tuwedan sdonunyanpi kte xni. Mesiya wicacerpi eciyatanhan sdonunyanpi exta nakaha detanhan sdonunyanpi kte xni.

17. Hecen tuwe Mesiya en un kin he wanna wicaxta teca, taku tannike cin hena enakiyapi, iho taku owasin teca icaga.

18. Qa taku owasin Wakantanka etanhan un, he iye kici okiciciye unkiyapi, Jesus Mesiya eciyatanhan, qa wookiye wawokiyapi kin he unqupi.

19. Hecen Wakantanka Mesiya on wicoicage kin iye kici okiciciye wicaye a wartanipi kin wicakiciyawa xni, qa wookiye wicoie kin he yuhe unkiyapi.

20. Heon Mesiya on wawikiyapi kin hena unkiyepi, Wakantanka ceniciyapi kin iyecen Mesiya cajeyan ceunniciyapi, Wakantanka kici okiciciya po.

21. Tuwe woartani sdonkiye xni un qon he woartani ikicaga, hecen iye en Wakantanka too-wotanna kin unkiagapi kta.

WICOWOYAKE 6.

1. Heon unkiyepi iye qe kici

rtaunnipi kin hecen ceunniciyapi, taku xni on Wakantanka towaonxida kin iyacupi kte xni.

2. He iye kaken eya, Omaka oiyokipi kin en naciron qa wiconi anpetu kin en ociciya: Iho nakaha omaka oiyokipi kin hee; nakaha wiconi anpetu kin he dee.

3. Tuwedan takudan xihda unyanpi xni, hecen wawokiyapi kin he en takudan iyaonpapi kte xni.

4. Tuka taku owasin on Wakantanka taokiye kin en ounpapi unkihdaotaninpi, wacin tankapi kin en, wokakije en, wakixagya unpi kin en, woiyokixice en;

5. Apapi kin en, kaxka hnakapi kin en, yuomdecapi kin en, wicortani kin en, kiktahan unpi kin en, wotektehapi kin en,

6. Ecedan unpi kin en, wosdonye kin en, tehan aepi kin en, waonxidapi kin en, Woniya Wakan kin en, awicakehan wacantkiyapi kin en,

7. Wowicake wicoie kin en, Wakantanka towaxake kin en, wicoowotanna wipe kin etapa tanhan catka tanhan kici en ikoyake cin he on;

8. Wowitan qa wowixtee kin hena on; waaipi qa yaonihanpi kin hena on; wicahnayanpi kin iyececa tuka wicakapi;

9. Wicaxta sdonyapi xni un kin iyeunceecapi tuka tankaya sdonunyanpi; tapi se iyecen unyakonpi tuka ito unnipi; wicakaxtakapi kin iyeunceecapi, tuka naharin unktepi xni;

10. Iyounkixicapi kin iyececa tuka ohinniyan unkiyuxkinpi;

warpanicapi kin iyeunceecapi tuka wicota watonka wicunkagapi; takudan yuhapi xni kin iyeunceecapi tuka taku owasin untonpi.

11. Korintos oyate kin niyepi on unkipi kin unhdukawapi, uncantepi kin tanka aya.

12. Unkiyepi en takudan aotins niyanpi xni tuka niye nicantepi kin en otins niçiyapi.

13. Heon taku niçupi kta; (micinea kin iyecen ociciyapi) nix eya tankaya niçicagapi nunwe.

14. Ihnuhan tona wicada xni un kin hena kici aokpaniyan iyakaxka yaunpi kin. Token on wicoowotanna woartani kici akidecen un he; qa token iyoyanpa kin otpaza kici un kta he.

15. Qa Mesiya Beliyani kici okiciciye kta he; qa tuwe wicada kin he wicada xni un kin kici taku akipitan tawapi kta he;

16. Qa tipi wakan Wakantanka tawa kin he wakagapi kin kici token un kta he. Wakantanka ni un tipi wakan tawa kin he niyepi. Wakantanka heye ciqon he iyececa; Hena kici wati kta qa om mawani kta. Hena Wakantanka mayanpi kta qa mitaoyate kin hena eepi kta ce.

17. Heon etanhan hena cokayatanhan tankan upi qa ixhana yukan po, Itancan kin eya, qa taku axape cin oyutanpi xni po, kinhan mix tawa ciyapi kta;

18. Niye ate mayayapi kta, qa miye cinkxi ciyapi qa cunkxi ciyapi kta ce, Itancan Iyotan Waxake cin he hena hecen eya.

WICOWOYAKE 7.

1. Heon waxte ciciđapi kin, wahoyapi kin dena unĥapi kin heon wicacerpi wicanagi ko taku axape cin etanĥan unĥduecepi-dan, qa Wakantanka kokipeyaĥan wicoowotanna kin tanyan unĥduxtanpi kta.

2. Anaungoptan po; unkiye tuwedan xicaya ecawicunkiconpi xni, tuwedan wicunyuxicapi xni, tuwedan taku icakix wicunyanpi xni.

3. He wayaco hepe xni; cante en unniyuzapi, ptaya unĥapi qa ix unnipi kta ce, epe cigon.

4. Niyepi on wadimatake rinca, niyepi on nina imawinkta, wocantohnake oju mayanpi, unĥakijapi owasin en nina imduxkin.

5. Makedoniya en unĥipi qeĥan uncerpipi kin takudan oziiĥiye xni, tuka taku owasin on iyounkixicapi, tankan tanĥan wicokicize qa mahen tanĥan wokokipe.

6. Tuka Wakantanka tona iyokixicapi iwicakiye cin he cantohnag mayan, Titosĥen hdi kin heon.

7. Qa he hdi kin hecedan xni tuka nakun niye cantohnag yayapi kin heon; nina wacin en ye yayapi, qa iyonixicapi qa token cante en unyakiduzapi kin hena unĥokiyakapi qeĥan nina iyuxkin mayan.

8. Wowapi wan on iyokixin ciyapi exta heon nakaha iyope-miĥiye xni, iyopemiĥiya tuka qon. He wowapi kin ptenyedan iyokixin niyanpi wanmda-ka.

9. Nakaha imduxkin, iyokixin niyanpi kin heon etanĥan xni, tuka nihduecetupi kta e on iyonixicapi kin heon. Wakantanka eciyatanĥan iyokixin niĥiyapi, hecen takudan icakix unniyanpi kte xni.

10. Wakantanka eciyatanĥan iyowicakixice cin he ihduecetupi on wiconi kta, on tohini iyopeiĥiyapi xni kin he kaga; tuka wicoicage kin de en iyowicakixice cin he wiconĥe icar ya.

11. Wanyaka po, Wakantanka eciyatanĥan iyonixicapi kin he itonpeya nicagapi, waayuptapi qa woxihda qa wokokipe, qa cante en hiyeyapi, qa winawizipi qa hdajujupi kin hena niyepi en icar niĥiyapi, taku owasin en he econpi qon en takudan iyani-onpapi xni yaunpi e nihduotan-inpi.

12. Heon wowapi cicagapi, tuwe xicaya econ qon he on etanĥan xni qa tuwe xicaya eca-kiconpi qon he on etanĥan xni, tuka Wakantanka itokamya token wacin en unniyuzapi kin he niyepi en yutaninpi kta.

13. Heon etanĥan inixiyapi kin on unĥikiyapi, qa Titos iyuxkin kin heon mix eya nina imduxkin, iye nagi kin niyepi owasin eciyatanĥan magaga yapi kin heon etanĥan.

14. Heon niyepi ciyatanpi exta on imaxtece xni, tuka taku owasin wowicake eciyatanĥan ecixiyapi qon he iyecen Titos *unĥokiyakapi*, qa unniyatanpi kin he nakun wowicake kta.

15. Unkan niye owasin token anayagoptanpi qa wokokipeya canĥanyan iyowinyakiyapi qon

he kiksuya eca iye iyotan cante en niyuzapi.

16. Heon etanhan taku owasin on wicacidapi kin heon mix eya imduxkin.

WICOWOYAKE 8.

1. Mihunkawanji, Makedoniya ekta okodakiciye kin Wakan-tanka towaonxida wicaqu kin he sdonye unniciyapi.

2. Hena wokakije iyutanpi tanka kin en nina iyuxkinpi, qa iyotan warpanica unpi kin he woyuha ecedan yuhapi kin yuota aya.

3. Okihihi kin iyacinyan (mix mdaotanin,) qa okihihi kin kapeya iye cinka wicaqu wacinpi.

4. Qa wocekiye ota on ceunkiyapi, taku wicaqupi kin he icu *unxipi* qa tona owotanna un kin wicakipamnipi kin he econ unxipi.

5. Qa unkecinpi qon iyecece xni, tuka tokaheya iye tancanpi kin Itancan kin içicupi, qa nakun Wakantanka tawacin kin eciyatanhan unkiyepi kin en içicupi.

6. Hecen Titos ceunkiyapi, wanna tokaheya hecaniconpi kin iyecen niyepi en wowaonxida kin de niciyuxtanpi kta.

7. Taku owasin en, wicadapi qa wicoie qa wosdonye qa wicamniheca owasin qa waxte unyakidapi ko on winijicapi kin he iyecen, wowaonxida kin de en winijicapi nunwe.

8. Wicoope eciyatanhan hena hepe xni, tuka wicaxta tokeca aiciciyapi kin heon; qa wacan-

yakiyapi kin he wowicake kinhan imdute kta.

9. Jesus Mesiya Itancan unkiyapi towaonxida kin he sdon-yayapi, watonka tuka niyepi on warpani içiya hecen iye warpaniya un kin he on winijicapi kta.

10. Unkan he de on wahokonciciyapi, tona toka ecanonpi qon he de iyenichantupi; hecanonpi qa hecedan xni, wanihan tanhan wicada yaunpi tuka.

11. Nakaha woecon kin he hduxtan po, kohanna wicayadapi qon he iyecen taku duhapi kin etanhan ecen ecanonpi kta.

12. Tokaheya wicadapi kinhan taku wicaxta yuhe cin he eciyatanhan iyokipiya icupi ece qa taku yuhe xni kin eciyatanhan xni.

13. Wicaxta tokeca oziiçiyapi kta qa nix niyepi duxakapi kte cin he *wacin* xni, tuka akidecen wapamni kte cin, heon nakaha wijinya yaunpi kin he *etanhan* hena iwicakakije cin en *owicayakiyapi* kta.

14. Qa ix iyepi kin wijinya unpi kinhan wicakixya yaunpi kin en oniciyapi kta, hecen akideceapi kta.

15. Kaken wowapi en kagapi; Tuwe ota pahi kin he takudan ohdapte xni, qa tuwe waniqadan pahi kin he takudan icakix un xni.

16. Tuka Wakantanka wopida yuha nunwe, he niyepi on Titos hecen cante yus kiya.

17. He wowahokonkiye anagoptan qa iye cinka koyaranna hduxtan qa niyepi ekta niipi.

18. Qa he kici hunkawanjin

kiciyapi wan wotanin waxte on okodakiciye owasin en yatanpi kin hee ekta ye unxipi.

19. Qa hecedan xni, tuka he kici ohnihde unyakonpi kta e okodakiciye kin karnigapi, wo-waonxida kin de en ounkiyapi kta, Itancan kin yatanpi kte cin qa niye wacin duzapi kin heon.

20. Qa taku ota kin de unpa-mnipi kin on tuwe taku iyaunkonpapi kte cin he naunkiciyapi;

21. Qa taku owotanna ece kin unkamnanpi, Itancan kin itokamya qa nakun wicaxta kin en.

22. Qa hena om hunkawanjin unyanpi kin en *ye unxipi*, he wanna ota unkiyukeanpi, owotanna oranye ça nakaha iyotan aiciciya, tanyan wacinniyanpi nakaex.

23. Tuwe Titos on *imawan-ge cinhan*, he mitawaxi qa niyepi on omakiye cin hee, qa hunkawanjin wicunyanpi kin hena wicakapi kinhan, okodakiciye ohnihde wicayapi qa Mesiya towitan kin hena eepi ce, *epe kta*.

24. Heon hena itokamya qa okodakiciye kin itokamya wacanyakiyapi kin hdutanin po, qa unniyatanpi qon he nakun *ecetu ya po*.

WICOWOYAKE 9.

1. Tona owotanna unpi kin owicakiyapi kin he icartagya taku wowapi en cicagapi kta wanna yacinpi xni.

2. Token wacin duzapi kin he sdonwaya, heon Makedoniya

etanhanpi kin hena en yaonihan-yan cajeciyatapi, wanna waniyetu wanjidan hehanyan Akaya wiyeya yanka ce, qa inayarnipi kin he wicaxta ota iyowicapaxtaka.

3. Tuka hunkawanjin wicawaye cin hena *niyepi* ekta ye wicawaxi, he en unniyatanpi qon taku xni wanice kta, qa epe ci-qon iyecen wiyeya nankapi kta e heon *hecamon*.

4. Okini Makedoniya etanhan upi kinhan hena om ekta wai qa piniçiyapi xni ecen wanunniyakapi kinhan unkiye (*niyepi* cajeeunniyatapi xni) sutaya wacin yus unniyatanpi kin heon unki-xteecapi kta.

5. Heon hunkawanjin kiciyapi kin cewicawakiye kta wacami qon, tokaheya niyepi ekta ipi qa wowaonxida nitawapi ehanna iwahoniyapi qon he wiyeya ehnakapi kta, hecen awicakehan wowaonxida kta qa waterindapi kin eciyatanhan kte xni.

6. Tuka de *awacin po*; Tuwe waniqadan oju kin he waniqadan mnayan ece; qa tuwe iyakiçuya oju kin he iyakiçuya mnaye kta.

7. Otoiyohe iye cante kin ekta içiconze cin eciyatanhan *qu kta*, woiyokixice on qa econ xipi kin on etanhan xni; iyuxkinyan wicaqu kin he Wakantanka waxte daka.

8. Wakantanka wowaonxida owasin niyepi en niciyuotapi kta okihi, hecen ohinniyan taku owasin ota duhapi kinhan wico-ran waxte kin wadupipike kta.

9. Wowapi en kagapi qon iyecetu; Taku erpeya, warpani-

ca kin wicaqu ece kin he toowo-
tanna kin ohinniyan un kta.

10. Tuwe woju kir wojupi
yuhe kiye cin he aguyapi wo-
yute yayapi kte cin niçupi, qa
taku oyajupi kin icar niciyapi qa
nitoowotanna waskuyeca kin ni-
ciyuotapi nunwe.

11. Qa taku owasin en wijin-
ya yaunpi kta on iyotan oranni-
pipi kta, heon unkiye Wakan-
tanka wopida unkekiciyapi.

12. Wapamnipi wawokiyapi
kin de tona owotanna un kin ta-
ku icakijapi kin enakiye kte ça
nakun Wakantanka wopida nina
eciyaapi kta e kaga.

13. Mesiya tawootanin waxte
kin en oyapapi e daotaninpi qa
hena taku ota wicayaqupi, qa o-
wasin wicayaqupi kin he on wa-
wokiyapi utapi kin de on etan-
han Wakantanka yaonihanpi.

14. Qa niyepi on ix iye wo-
cekiye eyapi kin heon *hececa*,
nina cantonikpanipi, Wakantan-
ka towaonxida tanka nicipi un
kin heon etanhan.

15. Wakantanka taku yawa-
pica xni-unqupi kin he on wo-
pida kiciun nunwe.

WICOWOYAKE 10.

1. Palos he miye, Mesiya
warbayedan onxiran kin heon
ceciyapi, niyepi ekta akan tan-
han warpaniya waun tuka en
waun xni ehan tanhan niyepi on
wadimataka.

2. En waun kinhan wanjikji
wicacerpi kin eciyatanhan ma-
unnipi kecanunkinpi kin hena
en waditagya waun kta wacan-
mi kin he iyecen *niyepi en wa-*

ditagya waun kte xni ceciciya-
pi ce.

3. Wicacerpi kin en maunni-
pi exta wicacerpi eciyatanhan
unkizapi xni.

4. Wipe unkunpi kin hena
wicacerpi kin heca xni, tuka
waxaka Wakantanka on inatake
suta kin yujujupi *okihi*.

5. Wacin yuzapi kin kun
iyeunyanpi qa taku tehan wan-
kantuya un Wakantanka sdon-
yapi kin en wankan iyeiçiye cin
hena owasin, qa wicotawacin
iyurpa Mesiya anagoptanpi kin
en wayaka unkahipi.

6. Qa wanaronpi xni kin to-
unkonpi kta e wiyeya unkan-
pi; tohan anayagoptanpi kin
hduxtanpi kinhan.

7. Wicaxta itohnake kin he-
cedan iwandakapi he. Tuwe
Mesiya taokiyeye kin wanji iye
kecin kinhan he ake kaken awa-
cin kta, ix iye Mesiya tawa kin
heca he iyecen unkix unkiyepi
Mesiya tawa unyanpi.

8. Wookihi Itancan unqupi
kin, on icar unniyanpi kta
qa on ihang unniyanpi kte xni
heon sanpa mihdatan exta ima-
xtece kte xni.

9. Wowapi on wakokipe ci-
cagapi kta wacanmi xni.

10. He wowapi kage cin hena
suta qa waxaka, tuka tancan en
un kin he waxake xni qa ie cin
he wowira ce, eyapi.

11. Tuwe hecece cin he ka-
ken awacin kta, en unkanpi xni
wowapi wicoie kin on tounkeca-
pi kin he tohan en unkanpi
kinhan wicoran kin on heunce-
capi kta.

12. Tona ihdatanpi kin hena

iunkihdacinpi qa opeya unkihdawapi kta tawatenunyanpi xni, hena e ix iye on wiuhdutapi qa iyepi on ihdukecanpi qa hecen okarnigapi xni.

13. Unkiye wiunhdutapi kin isanpa unkihdatanpi kte xni, tuka wicoran iyutapi Wakantanka unqupi kin he eciyatanhan, iyutapi kin niyepi kin iyahde niyanpi.

14. Ekta iyahde unniyanpi kta e *wiunhdutapi* kin sanpa unkihdutitanpi xni. Tuka Mesiya tawootanin waxte kin en niyepi kaex ekta unniupi.

15. Wiunhdutapi kin isanpa unkihdatanpi xni, wicaxta tokeca wicortani kin en; tuka wicayadapi kin he sanpa icage cinhan niyepi on iyutapi unhapi kin eciyatanhan nina unyuonihanpi kta unkapepi.

16. Hecen niye dukanpi kin ako wapa wotanin waxte kin unkoyakapi kta, qa tuwe tokeca iyutapi taku wiyeya yanke cin en unkiwinktapi kte xni.

17. Tuka tuwe iwinkta kinhan Itancan kin on iwinkta nunwe.

18. Tuwe ihdatan kin he ecetu dakapi kin hee xni, tuka Itancan yuonihan kin hee kta.

WICOWOYAKE 11.

1. Witkotkoya iwae cin ci-stiyedan iyowinmayakiyapi kta wacin. He iyowinmayakiyapi nakaex.

2. Wakantanka winawazi kin iyecen inaciwizipi, wicaxta wanjidan kiciyus ciyapi, hokxiwin-

na ecedan un kin Mesiya ekta aciipi kta heon.

3. Tuka he kowakipa, wamduxka wohneye on Ewe hnaye ciqon he iyecen nitawacinpi woyuecedan Mesiya en un kin etanhan xicaya iyeyapi kta naceca.

4. Tuwe en niupi kin he Jesus tokeca wan unkiye unkoyakapi xni kin he oyaka, qa Woniya Wakan tokeca, iyacupi xni qon, he nakaha iyacupi, qa wotanin waxte tokeca, iyacupi xni qon he iyacupi hecinhan de iyo-winyayapi kta.

5. Ohnihde unpi iyotan tanka kin takudan ihukuya waun xni, imdukecan.

6. Ho magahan exta wosdonye kin en waksapa, qa niyepi ekta taku owasin on tanyan unkihdaotaninpi.

7. Wakantanka tawootanin waxte kin iyunwin codan ociciyakapi qa wankantuya iyenianpi kta e on mihduhukuya kin he en wawartani he.

8. Okodakiciye tokeca kin wicawaki qa opemicatonpi kin iwacu, ociciyapi kte cin heon *hecamon*, qa cicipi waun qehan taku imakakije cin tuwedan iwecazo xni.

9. Taku iyokpaniyan waun qon he hunkawanjin kiciyapi Makedoniya etanhan hipi kin maqupi, qa ohinniyan takudan inagiye ciyapi xni waun qa eex nakun hecen waun kta.

10. Mesiya wowicake tawa miciun kin heon Akaya makoce kin en imawinkta kin de ecetu xni makiyapi kte xni.

11. Tokeca he; waxte cici-

dapi xni kin heon etanhan he. Wakantanka sdonya.

12. Tuka taku ecamon kin he nakun ecamon kta, hecen tona wiyaonpapi akitapi kin hena etanhan wiyaonpapi kin emdaku kta, qa en iwinktapi kin he unkiyepi kin iyecen unpi kta.

13. Hena ohnihde itonpi xni kin hecapi, wohneye oranyanpi, qa Mesiya ohnihde wicaye cin hena iyecen ihduzapi.

14. Qa he taku wowinihan xni, Satan ix iye kaex iyoyanpa ohnihde kin iyecen içicaga.

15. Heon etanhan iye taokiye wicaye cin wicoowotanna ookiye kin heca içicagapi kte cin he taku tanka xni, hena iye wicoran kin eciyatanhan ihang yapi kta.

16. Ake hecen epa; Tuwedan witkotkoke madake kte xni. Tuka hecon kinhan witkotkoke cin iyecen iyowinmakiye kta, cistiyedan mihdatan kta.

17. Taku epe cin hena Itancan kin eciyatanhan epe xni, tuka nina ihdatanpi kin he on witkoya ie cin iyemaceca.

18. Wicota wicacerpi kin on ihdatanpi kin he iyecen mix eya mihdatan kta.

19. Witkotkopike cin hena iyuxkinyan iyowinwicayakiyapi, niye yaksapapi nakaex.

20. Iyowinwicayakiyapi, tuwe wowidag niyanpi, tuwe temniyanpi, tuwe wanicipi, tuwe waraniçida, tuwe ite ohna anipapi hecinhan.

21. Waoxtehdapi kin he waka, waunxakapi xni kin iyececa. Tuka taku en tuwe waditake

ciuhan (witkotkoya iwaa) he en mix eya waditagya waun.

22. Hena Heberi kin hecapi he: Mix eya hemaca. Hena Israel etanhanpi he: Mix eya *hematanhan*. Hena Abereyam cinca he: Mix eya *hemaca*.

23. Mesiya taokiye wicaye cin en opapi he; (witkotkopi kin iyecen iwaa ce) mix eya imayotan. Wicortani kin en imayotan; apapi kin en wopteca xni waun; kaxka hnakapi kin en imayotan qa wiconçe kin en otakiya waun.

24. Juda oyate zaptan akihde *oape* wikcema topa wanjidan iyokpani maqupi.

25. Yamni akihde cansakadan on amapapi; wancadan inyan on makininpi; yamni akihde wita wata micamdecapi; anpetu wanjidan hanyetu iyahna oxbe kin mahen waun;

26. Nina icimawani, mini okokipe kin en, wakipi sa okokipe kin en, mitaoyate on wokokipe kin en, Ikcewicaxta on wokokipe en, otonwe ekta wokokipe en, rewoskantuya wokokipe en, miniwanca ekta wokokipe en, hunkawanjin kiciyapi itonpi xni kin hena ekta wokokipe en;

27. Mdokitapi kin en, qa wawicayazan en, kiktahan unpi ota en, wotektehdapi qa ipuzapi kin en, nina hanmdapi kin en, osni kin en tancodan waun.

28. Qa tankan tanhan anpetu iyohi taku amaupi kin, okodakiye kin owasin awanhdakapi kin hee.

29. Tuwe waxake xni un qa miye wamaxaka he; tuwe aiapi

un kinhan miye xinwahda xni he.

30. Imawinkta kinhan makakije cin on imawinkta kta.

31. Jesus Mesiya Itancan unkiyapi he Wakantanka tawa qa Atkuku kin owihanke wanin wowaxte yuhe cin he sdonmayan, itonxni mawanica.

32. Damaskos en Aretas wicaxtayatapi yanke cin ihukuya wicaxta itancan kin akicita ota wicayuha Damaskos oyate otonwe tawapi kin awanhdake ça maktepi kta akita.

33. Hehan wahakahmonpi wan on conkaxke owanyeye kin eciyatanhan kun iyemayanpi, unkan iye nape kin etanhan nawajica.

WICOWOYAKE 12.

1. Imawinkta kte cin he iye-micihantu xni, wowihanmde qa Itancan woyakapi kin ekta wau kta.

2. Ehanna waniyetu ake topa sam iyeya, wicaxta wan Mesiya en un kin he sdonwaya; (wicatancan kin ohna un kin sdonwaye xni, qa tanton xni un kinhan nakun sdonwaye xni, Wakantanka he sdonya;) wicaxta kin he marpiya iciyamni kin ekta eyakupi;

3. Wicaxta kin he sdonwaya, (wicatancan kin ohna un sdonwaye xni, qa tanton xni un kinhan nakun sdonwaye xni, Wakantanka he sdonya;)

4. He Wakantanka ti kin ekta eyakupi, unkan wicoie oyagpica xni kin naron, hena wicaxta oyake kta exta okitpani kta.

5. Wicaxta kin hecece cin on imawinkta kta qa miye qe on imawinkta kte xni, makakije cin hecedan on *imawinkta kta*.

6. Tuka imawinkta wacanmi kex wimatkotkoke kte xni, wowicake epe kta; tuka nakaha hecamon kte xni, tuwe wanmayake ça token waun naron kin he isanpa tanka kecanmakin kta he kowakipa.

7. Unkan woyakapi tanka kin on etanhan waranmicida kte xni heon taku pepe wan micerpi kin en maqupi, Satan taokiye wanji hee, xicaya makuwa kta heon, waranmicida kte xni heon etanhan.

8. Qa heon Itancan kin yamni wocekiye ewakiya, he amayuxtan kte cin heon.

9. Hehan, Mitowaonxida kin iyonihi kta qa mitowaxake kin he wowaxake xni kin en hduxtanpi *cta ce*, emakiya. Hecen Mesiya towaxake kin miye en micium kte cin heon makakije cin on iyuxkinyan imawinkta kta.

10. Heon etanhan wowayazan kin en imduxkin kta, qa waaiaapi, qa iwicakakije, ça xicaya wicakuwapi, qa Mesiya on wicokakije kin henakiya en *imduxkin kta*, tohan wamaxake xni eca taku owakihi ece.

11. Iwinktapi kin on witkotkoka imacaga, niye hecon mayakiyapi, mayadaotaninpi kta tuka qon; ohnihde unpi iyotan tanka kin takudan en wicihukuya waun xni, matakun xni exta.

12. Awicakehan niyepi ekta ohnihde unpi tawowapetogtonpi kin econkupi, wacintankapi o-

wasin en, wapetogtokeca, taku wowinihan qa waxagya wicoran kin hena on.

13. Taku e on okodakiciye tokeca kin ihukuya yaunpi he; takudan icantexin ciyapi xni kin hee naceca. Heon wawartani kin he micicajuju po.

14. Wanyaka po, iciyamni ekta ciupi kta wiyeya manka, qa nakun taku tkeya qin ciciyapi kte xni. Taku yatonpi kin he awakite xni tuka niyepi atayedan *acicitapi*. Cinca yapi kin hunkakepi kin taku wicakihnakapi kin he hecetu xni, tuka hunkake yapi kin hena hokxiyoqopa kin on taku ekicihnakapi kta.

15. Ninagipi kin on mihdu-takuni kte xni qa mayutakunipi kte xni kin he iyomakipi, tuka iyotan canteciciyapi kin heon aoptetuya waxte madakapi.

16. Hececa exta takudan icantexin ciyapi xni tuka wamdupike cin heon wohnaye on ciyuzapi.

17. Tona niyepi ekta ye wicawaxi qon hena eciyatanhan en taku mihdamna he.

18. Titos cewakiye qa kici hunkawanjitku wan ekta ye waxi. Niyepi etanhan Titos taku kamna he. Wicoksape okonwanjidan en maunnipi xni he; oye okonwanjidan ohna *maunnipi* xni he.

19. Ake niyepi en unkihduwicakapi kecannipi he. Wakan-tanka itokamya Mesiya kin en unkiapi ece. Waxte ciciidapi kin tanyan icar niyanpi kte cin heon taku owasin econkupi.

20. Ekta ciupi kinhan niyepi

token wacin kin hececa iyeciya-pi kte xni, qe miye nakun token yacinpi xni kin hecen iyemaya-yapi kta kowakipa. Wakini-capi kin, winawizipi, canniyekiciyapi, wicokicize, waaiapi, waa-jijipi, waraniçidapi qa owoduta-ton kin henakiya en un kta kowakipa.

21. Qa okini ekta wau kinhan niyepi kin en Wakantanka mitawa kin iyokixin maye kta, qa tona wanna woartani econpi qa taku axape cin, wawicirarapi qa wicawihomnipi econpi kin on iypeiçiyapi xni kin hena awicawakiceye kta naceca, he kowakipa.

WICOWOYAKE 13.

1. De iciyamni ekta ciupi kta, waayatanin nonpa qa yamni ipi kin on wicoie owasin yasutapi kta.

2. Ociciyakapi qon he ake nakaha ociciyakapi, icinonpa ekta waun kin he ehan qa nakaha en waun xni, tona toka wartinipi wicaxta tokeca ko owasin wowapi wicawecaga, ake ekta wau kinhan itonwicawape kte xni.

3. Miye mahen tanhan Mesiya ie cin on wowapetokeca ayakitapi kin heon etanhan; he niyepi ekta waxake xni wanica, niyepi en wowaxake kin hee.

4. He iye wowaxake xni on can susbeca kin en okatanpi exta Wakantanka towaxake kin on ni un. Heon unkix eya waunxakapi xni tuka niyepi kin ekta Wakantanka towaxake kin on kici unnipi kta,

5. Wihduta po, wicadapi kin en yaunpi kin ihdukean po. Erpeniyanpi xni kinhan Jesus Mesiya niyepi kin mahen un, he sdonyakiyapi xni he.

6. Tuka erpewicayapi kin heuncapi xni e sdonyayapi kta imdukean.

7. Taku xica takudan ecanonpi kte xni he Wakantanka ice-wakiya ; unkiye unwaxtepi e unyaotaninpi kte cin hee xni, tuka wartepi xni kin iyeuncecapi kta exta niye taku waxte ecanonpi kte cin hee *wacin*.

8. Taku wowicake kaxeye cin takudan unkokihipi xni tuka wowicake kin on etanhan.

9. Unkiye waunxakapi xni qa niye wanixakapi eca unkiyuxkinpi ece. Qa tanyan onihduxtanpi kte cin he uncinpi.

10. Heon etanhan en waun

xni icunhan hena wowapi en wakaga, okini ekta waun kinhan yaxinya iapi kin ohna iwae kta naceca: wowaxake Itancan maqu kin eciyatanhan, he waicar-yapi kin on *maqupi*, qa waihangyapi kin on etanhan xni.

11. Ehake, hunkawanjin ciyapi kin iyuxkin po, oihduxtan un po, pida un po, okonwanjidan awacin po, wokiyapi en un po ; qa wowaxtedake wookiye ko Wakantanka kin nicipi un nunwe.

12. Otoiyohi iiputakapi wakan kin on i ikiciputaka po. Wicaxta owotanna un kin owasin i iniputakapi.

13. Jesus Mesiya Itancan towaonxida kin, Wakantanka to-waxtedake kin, qa Woniya Wakan iwicakiye cin niyepi owasin en nicipi unpi nunwe. Amen.

GALATIANS.

PALOS OHNIHDE UNPI KIN/HECA GALATIYA OYATE KIN WOWAPI
WICAKICAGE CIN HE DEE.

WICOWOYAKE 1.

1. Palos ohnihde un kin heca, wicaxta akantu kin etanhan xni qa wicaxta on *kagapi* xni, tuka Jesus Mesiya etanhan, Wakan-tanka Ate yapi kin, he wiconŋe etanhan najin kiye cin he nakun etanhan ;

2. Qa hunkawanjin kiciyapi mici unpi kin owasin ko Gala-tiya ekta okodakiciye kin *wowapi unnicagapi*.

3. Wowaonxida wookiye ko Wakantanka Ate yapi kin, qa Jesus Mesiya Itancan unkiyapi kin etanhan nicipi un nunwe.

4. He iye waunrtanipi kin on içiçu, wicoicage xice cin de etanhan eunhdakupi kta, Wakan-tanka Ate unyanpi tawacin kin eciyatanhan.

5. He ohinniyan owihanke wanin wowitan kicihan nunwe. Amen.

6. Tuwe Mesiya towaonxida kin inicopi kin kohanna adu-xtanpi qa wotanin waxte tokeca en *oyapapi* kin heon imanihan manka.

7. Hee tokeca xni, tuka wicaxta wanjikji nagiyenianpi qa Mesiya tawootanin waxte kin ayuxtan niyanpi kta tuka.

8. Tuka he unkix unkiyepi qa ix ohnihde wan marpiya kin eciyatanhan kin, wotanin waxte unkoniciyakapi qon he ohna xni, tuka tokeca oniciyakapi kinhan woxnapi un nunwe.

9. Unkeyapi qon hecen ake nakaha epe *kta*, tuwe wotanin waxte iyacupi qon kici okonwanjidan xni kin oniciyakapi kinhan he woxnapi un kta ce.

10. Wicaxta kin Wankantanka uman tukte cin wakiya he; qa wicaxta kin iyokipi wicawaya awakita he. Wicaxta kin iyokipi wicawaya unkanx Mesiya wowidag maye kte xni tuka.

11. Mihunkawanji he de oci-ci-yakapi, wotanin waxte omdake ciqon he wicaxta akantu kagapi xni;

12. Qa wicaxta kin etanhan iwacu xni, qa iye omakiyakapi xni, tuka Jesus Mesiya oyake cin eciyatanhan *onmaspe*.

13. Juda wicoran en opeya waun qehan token owaranmde cin nayaranpi; Wakantanka ta-okodakiciye kin nina xicaya wakuwa qa mdujuu.

14. Qa mitaoyate kin en tona om akinimaskokeca kin hena ota Juda wicoran kin en kawicawape ça mihunkakepi wohdakapi qon iyotan nina tewarinda.

15. Tuka Wakantanka ina tezi kin etanhan imacu qa iye towaonxida kin on mico kin he,

16. Iye Cihintku kin sdonye mayan iyokipi qehan, Ikcewicaxta wotanin waxte kin owicawakiyake kte cin heon, kohanna wicacerpi wicawe ko kici wowahdake xni.

17. Qa Jerusalem ekta tona mitokapa tanhan ohnihde unpi hena ekta wicawai xni, tuka Arabiya ekta imdamde ça ake Damaskos ekta icicawin wahdi.

18. Hehan waniyetu yamni iyohakam Inyan kici wowahdake kta e Jerusalem ekta wai, qa anpetu ake zaptan kici manka.

19. Tuka ohnihde unpi kin tokeca tuwedan wanmdake xni, Jakob Itancan kin sunkaku kin hecedan *wanmdaka*.

20. Wicoie wowapi en cicagapi kin de Wakantanka itokam itonxni mawanja.

21. He iyohakam Suriya qa Kilikiya makoce kin en wahi.

22. Qa Juda makoce kin en okodakiciye kin Mesiya en un kin hena ekta ite kin sdonmayanpi xni waun.

23. Tuwe xicaya unkuwapi qon he nakaha wowacinye ehan-na yujuu qon he oyaka ce, hecedan naronpi.

24. Unkan miye on Wakantanka yatanpi.

WICOWOYAKE 2.

1. He iyohakam waniyetu ake topa hehan ake Titos yuha Barnabas kici Jerusalem ekta itawankannde mda.

2. Woyakapi on ekta mde ça Ikcewicaxta ekta wotanin waxte

omdake ciqon he hena owica-wakiyaka, q̄a tona okinihanpi kin hena ixnaxnana *owicawakiyaka*, ituya waimnanke xni q̄a taku xni on waimnanke kte xni heon.

3. Titos mici un kin he Helenes heca tuka ohomni baxpapi kta konzapi xni.

4. Itonpi xni hunkawanjin kiciyapi kin heca, hena unkiye token Jesus Mesiya on tawa unkiyapi kin he iwanyakapi kta e en hipi, wowidag unyanpi kte cin heon.

5. Tuka hena wihiyayedan oape wanjidan hehanyan wicuhukuya unyakonpi xni, wotanin waxte wowicake kin nicipi un kte cin heon.

6. Unkan tona wicaxta wicakinihanpi seca, q̄a takupi kaxta he etanhan tokeca, Wakantanka wicaxta itohnake kin iwanyake xni, hena wicakinihanpi seca, tuka wicoie kin en takudan omakiyapi xni.

7. Tuka hececa exta tohan ohomni baxpapi xni wotanin waxte kin maqupi, ohomni baxpapi wotanin waxte Inyan qupi qon he iyececa e wanyakapi;

8. (Tuwe ohomni baxpapi kin on ohnihde unpi kin en Inyan okihi ye cin hee Ikcewicaxta ekta okihi mayan.)

9. Qa Jakob, Inyan, Jan kici *hena yamni* ipatanhdepi kin hecapi-seca, wowaonxida maqupi kin he wanyakapi hehan takodakiciyapi on Barnabas kici nape mayuzapi, unkix Ikcewicaxta ekta unyanpi kta q̄a iyepi kin ohomni baxpapi kin ekta *yapi* kta.

10. Tuka decedan, tona warpanicapi kin wicunkiksuyapi kta, *keyapi*, unkan mix nakun hecamon tawatenwaya.

11. Tuka Inyan Antiyoka ekta hi qehan kici taninyan awakinica, iye iyaonpepica nakaex.

12. Jakob etanhan wanjikji hipi xni kin he itokam Ikcewicaxta kin om wota ece, tuka wanna en hipi hehan ohomni baxpapi opapi kin *hena* kowicakipe q̄a tokan iyaye q̄a ihdonica.

13. Qa he opeya Juda wicaxta tokeca kin iyecen anarbeya econpi, hecen hena wohmaye kin on Barnabas nakun opeya ye yapi.

14. Tuka wotanin waxte wowicake kin eciyatanhan owotan-na manipi xni, he wanmdaka hehan owasin wicitokam Inyan hewakiya; Juda wicaxta henica tuka Ikcewicaxta kin iyecen yani kinhan q̄a Juda wicaxta kin iyecece xni tokeca e Ikcewicaxta kin Juda wicoran kin en ope wicayaxi he.

15. Unkiye wicoicage kin ekta Juda wicaxta heuncapi q̄a Ikcewicaxta wartanipi sa kin *heuncapi* xni;

16. Wicaxta kin woope wicoran kin eciyatanhan yuowotanpi xni, tuka Jesus Mesiya wacinyanpi kin on, he sdonunyanpi, heon unkix eya Jesus Mesiya wacinunyanpi, Mesiya wicadapi kin on unyuowotanpi kta q̄a woope opapi kin on etanhan xni; woope wicoran kin eciyatanhan wicacerpi owasin tuwedan yuowotanpi kte xni.

17. Tuka Mesiya on unyuow-

wotanpi kta unkakitapi kin he icunhan wartanipi sa heuncapi hecinhan, heon Mesiya woartanini wowidake kin heca he. Hiya hecetu xni.

18. Taku mdujuju qon he ake piya wakage cinhan woartanini miçicaga.

19. Woepe kin eciyatanhan woepe kin ekta maça tuka Wakantanka ekta wani.

20. Mesiya kici icipawer omakatanpi; tuka naharin wani, he miye xni tuka miye mahen Mesiya ni un kin hee; qa wicacerpi kin en wani kin he Wakan-tanka Cihintku wacinyanpi kin eciyatanhan wani, he iye cante-makiye ça miye on iye içiçu.

21. Wakantanka towaonxida kin mdujuju xni; woepe kin eciyatanhan wicoowotanna u kinhan hehan Mesiya ituya ça.

WICOWOYAKE 3.

1. Galatiya wicaxta wacin tonpi xni kin, tuwe niyuhnaxkinyanpi, qa hecen wowicake kin anayagoptanpi kte xni he; niyepi kin en Jesus Mesiya icipawer okatanpi kin he niixtapi kin itokam yuotaninpi.

2. Decedan omayakidakapi kta wacin, woepe wicoran kin on qa wacinyan anagoptanpi kin uman tukte eciyatanhan Woniya Wakan iyacupi he.

3. Tokaheya Woniya kin on ecanonpi qa ehake wicacerpi kin on nihduxtanpi kta *kecanipi* qa wacin yatonpi xni he.

4. Kana owasin taku xni on iyotan iyeyakiyapi he; he taku xni on etanhan hecinhan.

5. Tuwe Woniya Wakan yü-he niciyapi qa niyepi en tanka-ya oranye cin he woepe wicoran kin on, qa waciny ananagoptanpi kin uman tukte eciyatanhan *hecon* he.

6. Hecen Abereyam Wakan-tanka wicada qa he wicoowotan-na kiciyawapi.

7. Heon etanhan tona wicadapi eciyatanhanpi kin hena Abereyam cinca wicaye cin he-epi kin sdonya po.

8. Wicadapi kin on Wakan-tanka Ikcewicaxta kin wicayuwotanna kte cin he Wowapi wakan otokaheya tanhan wanyake ça hecen tokaheya Abereyam wotanin waxte kin okiyaka; Niye en oyate kin owasin wicayuwaxtepi kta ce.

9. Hecen tona wicadapi opapi kin hena Abereyam wacinye ci-qon kici wowaxte yuhapi.

10. Tona woepe wicoran kin etanhanpi kin hena woyaco kin en unpi. Hecen wowapi en kagapi; Tona taku woepe wowapi kin en kagapi kin owasin opeya unpi xni qa ecen econpi xni kin hena otoiyohi wanna wicayacopi ce.

11. Unkan woepe kin eciyatanhan tuwedan Wakantanka itokam yuwotanpi xni e sdon-nyanpi; Tuwe owotanna un kin he wicadapi kin eciyatanhan ni kta.

12. Woepe kin he wicadapi kin eciyatanhan xni, tuka, Wicaxta kin tuwe hena econ kinhan, hena on ni kta.

13. Woepe woyaco kin etanhan Mesiya eunhdakupi, unkiyepi on iye woyaco ikicaga.

Wowapi en hecen kagapi, Tona can en otkeyapi kin hena owasin yacopi ce.

14. Hecen Jesus Mesiya eciyatanhan Abereyam wowaxte tawa kin he Ikcewicaxta kin en awicau kta; hecen wicadapi kin eciyatanhan Woniya Wakan iwahounyanpi kin he unkiecupi kta.

15. Mihunkawanji, wicaxta akantu iyecen iwaa. Wicaxta wicotakuye tawapi hee kaex wanna hduxtanpi kinhan tuwedan ecetu xni ye ça tuwedan taku en akage xni.

16. Abereyam iye cinca kici wahoyapi; Cincapi kin eye xni, hehan ota kapi kta, tuka wanji-dan, qa, Nicinkxi kin he Mesiya kin ee.

17. Unkan mix kaken epe kta; Otokahe ekta wicotakuye Mesiya en Wakantanka hdusuta kin he iyohakam waniyetu opawinge topa sanpa wikcemna yamni hehan woope u kin he tokaheya kin yujuju qa hecen wahoyapi qon ecetu xni ye kta okitpani.

18. Taku tawapi kte cin he woope eciyatanhan un unkanx wahoyapi kin eciyatanhan xni; tuka he Wakantanka Abereyam iwahoya.

19. Hehan tokeca e woope kin yukan he. He woartani on kagapi, cinca iwahoyapi qon u xni kin hehanyan, qa *marpiya* ohnihde cin on yusutapi, iyotahedan un wan nape kin ohna.

20. Iyotahedan un kin he wanji-dan eciyatanhan xni tuka Wakantanka ege wanji-dan.

21. Heon woope kin he Wakantanka token iwahowicaye cin hena kaxeya he. Hiya hecetu xni. Woope wiconi kaga okihi unkanx awicakehan woope kin eciyatanhan wicoo-wotanna u kta tuka.

22. Tuka Wowapi Wakan kin he *wicaxta* owasin woartani ordateya un wicayawa, qa hecen Jesus Mesiya wacinyanpi wahoyapi kin he tona wicadapi kin hena wicaqupi kta.

23. Wowicada kin hi xni itokam woope kin on unkaxkapi qa wowicada ecadan yuotaninpi kte cin en onauntakapi.

24. Hecen woope kin he waonspekiya unkitawapi kin hee, Mesiya en unkahipi qa hecen wowicada on unyuowotanpi kta heon.

25. Tuka wowicada kin wanna hi qa hecen waonspekiya ihukuya unkanpi xni.

26. Jesus Mesiya en wowicada kin eciyatanhan owasin Wakantanka cinca kin heun-capi.

27. Tona Mesiya caje on baptem niçupi kin hena Mesiya kodakapi.

28. Hen, Juda Helenes wicaxta ko wanica; wowidake un tawa içiya ko wanica; wica winyan ko wanica; tuka Jesus Mesiya ekta owasin okonniwanji-pidan.

29. Mesiya tawa niyanpi hecinhan Abereyam cinca kin he-nicapi qa wahoyapi kin eciyatanhan tawa ye kte cin he *niye-pi*.

WICOWOYAKE 4.

1. Unkan kaken epa; Tawa ye kte cin tohanyan hokxiyopa un kin hehanyan wowidake kin takudan ocitpani xni, taku owasin on itancan un exta.

2. Tuka tohan Atkuku ke cin hehanyan waonspekiye ça tipi awanyag wicakiyapi kin hena he yuhapi.

3. He iyecen unkix eya hounkxiyopapi qehan wicoicage ekta taku tokaheya kin en wowidag unyanpi.

4. Tuka wanna anpetu iye hantu qehan Wakantanka iye Cihintku kin u xi, winorinca wan etanhan icage ça woope kin ordateya kagapi.

5. Hecen tona woope kin ihukuya un kin hena opewicakiton kta, atayedan cihintku yapi kin unhapi kte cin heon etanhan.

6. Unkan cinkxi niyanpi kin heon Wakantanka iye Cihintku Taniya Wakan kin nicantepi kin ekta niu xipi, he Aba, Ate, eya yanka.

7. Hecen wowidake kin henica xni, tuka cihintku kin henica. Qa cihintku kin *henica* hecinhan Mesiya eciyatanhan Wakantanka ekta tawa ye kte cin *henica*.

8. Tuka Wakantanka sdonayayapi xni qehan taku wakan heca xni kin hena wowidag niyanpi.

9. Unkan nakaha Wakantanka sdonayayapi qa ix Wakantanka sdonniyanpi yaunpi *epe kta tuka*, hecen token ake taku tokaheya hunkexni qa warpaniya un kin ekta nihdohdapi qa hena

ake wowidag niyanpi kta yacinpi he.

10. Anpetu qa wi kin, omaka waniyetu ko awacanipi.

11. Kocicipapi, taku xni on niyepi ekta rtawani naceca heon.

12. Mihunkawanji ceciciyapi ce; Mix waun kin iyecen un po; niye yaunpi kin iyecen waun, taku xica takudan eeamiyeconpi xni.

13. Tokaheya ekta wicacerpi waxake xni yuha wotanin waxte kin ociciyakapi kin he sdonayayapi.

14. Qa micerpi ekta taku wawiyutanyan un kin en mau kin he xice yadapi xni qa paha iye-yayapi xni, tuka Wakantanka ohnihde ye cin iyecen qa Jesus Mesiya iyecen tin ye mayaxipi.

15. Hecen wowaxte duhapi qon tukte e he. Kaken ciyao-taninpi, okihipiea unkanx niixtapipi kin yahduxdokapi qa mayaqupi kta wicayadapi kta tuka.

16. Wowicake ociciyakapi kin heon toka mayayapi he.

17. Hena e waxte xni iyo-paxtag niyanpi, qa iyoniciipi xni cinpi heon inawicayakiwizipi kta.

18. Tuka ohinniyan taku waxte on inayarnipi kin he waxte, qa niyepi ekta waun kin hecdan xni.

19. Micinca, niyepi kin mahen Mesiya icaryapi kte cin heon ake hokxiksuya waun.

20. Nakaha ekta cicipi waun qa miho kin wahdatokeca kta wacin; niyepi kin on token wacin mduza tanin xni.

21. Tona woope ihukuya

yaunpi yacinpi kin woope kin nayaranpi xni hecin omakiyaka po.

22. Wowapi en hecen kagapi; Abereyam cihintku nom yu-he cin, uman wowidake winorinca etanhan qa uman ix winorinca tawa içiye cin etanhan.

23. Tuka wowidake winorinca etanhan un kin he wicacerpi eciyatanhan tonpi, qa tawa içiye cin etanhan un kin wahoyapi kin on tonpi.

24. Hena e wiyacinpi wan ee; qa wicotakuye nonpa kin heepi. Uman Sina re kin etanhan u, he wowidag yapi kaga, Hagar hee.

25. Qa Hagar he Arabiya e-hta Sina re kin hee, qa Jerusalem wanna he cin kici akidecen un qa cinca kici wowidake un.

26. Tuka Jerusalem wankan tanhan u kin he tawa içiya, he owasin ina unyanpi kin ee.

27. Hecen wowapi en kagapi; Cinca oyakitpani qa cinca ton xni yaun kin iyuxkin wo; tohini hokxinyaksuye xni kin panpan qa dowan wo; tuwe ixnana un kin he cinca ota qa hihna ton kin he cinca tonana.

28. Mihunkawanji, Izak iye-ecen wahoyapi cinca kin heuncapi.

29. Tuka he ehan tuwe wicacerpi eciyatanhan tonpi kin he Woniya Wakan eciyatanhan un kin xicaya kuwa, qa nakun nakaha hececa.

30. Tuka Wowapi wakan kin token eya he; Winorinca wowidake un kin cinca kici tankan iyeya wo; wowidake un cinca

kin he tawa içiya cinca kin kici akidecen tawa ye kte xni.

31. Hecen mihunkawanji, wowidake un cinca kin heuncapi xni, tuka tawa içiya *cinca kin heuncapi*.

WICOWOYAKE 5.

1. Hecen tawa içiyapi kin on Mesiya tawa içiye unyanpi kin he en tinsadan un po, qa ake wowidake yapi wanapin kin iya-ihdaxkapi xni po.

2. Wanyaka po, Palos he miye kaken eciciyapi; Ohomni banixpapi kinhan Mesiya takudan oniciyapi kte xni.

3. Wicaxta ohomni baxpapi kin otoiyohi kaken ewicawakiya; Woope kin ocowasin econpi kta tuka ce.

4. Tona woope kin on niyuwototanpidan keniciyapi kin Mesiya nirdayapi qa wowaonxida etanhan nihinrpayapi.

5. Unkix Woniya Wakan kin eciyatanhan wicoowotanna woa-ape kin wacinyan unkapepi.

6. Jesus Mesiya ekta ohomni baxpapi kin he takudan okihi xni, qa nakun ohomni baxpapi xni kin; tuka wicadapi wowa-xtedake on oranye cin hee *taku okihi*.

7. Tanyan yainankapi; tuwe iyoniciپی xni kin, hecen wowicake kin wicayadapi kte xni he.

8. Woawacin kin de tuwe nicopi kin eciyatanhan u xni.

9. On naporyapi cistina kin he aguyapi ocowasin naporya.

10. Itancan kin eciyatanhan wacinciyapi, takudan tokeca a-

wacanipi kte xni; qa tuwe kaxta nagiyenyanpi kinhan he wo-yaco hduhe kta.

11. Mihunkawanji, mix miye ohomni baxpapi kin omdake cinhan tokeca e xicaya makuwapi he; kinhan can susbeca iwoxi-hda kin he enakiyapi.

12. Tona cante okiçunin niyanpi kin hena yuxpa iyewicayapi kta wacin.

13. Mihunkawanji, tawa içiyapi kin en nicopi, tuka tawa içiyapi kin he wicacerpi ekta wowinyunyanpi xni po, qa woxtedake on otoiyohi okiciciya po.

14. Woahope kin ocowasin wicoie wanjidan en ecetu, he dee, Nix niye inihdacinyan wicaxta aiyog yaun kin canteyakiye kta.

15. Tuka yecidartakapi qa yeciutapi kinhan en wakta po, okini ihang yeci-yapi kta naceca.

16. Mix kaken epa, Woniya Wakan yuha mani po, hecen wicacerpi on cantiheyey cin yahduxtampi kte xni.

17. Wicacerpi kin he Woniya Wakan inakiwizi, qa Woniya Wakan kin ix wicacerpi kin inakiwizi, qa hena ozakiya anokatanhan kicizapi, hecen taku token yacinpi xni kin hena ecanonpi ece.

18. Tuka Woniya Wakan yus aniyampi hecinhan woope kin ihukuya yaunpi xni.

19. Wicacerpi wicoran kin taninyan un; Wawicirarapi, wicawihomnipi, waaxapapi, wicaxtapi xni;

20. Wakagapi kin ohodapi,

wacokonpi, xice kicidapi, wakinicapi, wawihnupi, wacantahdepi, wicokicize, wawakipajinpi, yuomdecapi,

21. Winawizipi, tin wicaktepi, witkopi, qa witkoya wacipi, qa taku tona hecece cin hena ee; wanakaja ociciyakapi kin he iyecen nakaha eciciyapi, Tona taku heceea econpi kin hena Wakantanka tokiconze kin tawapi kte xni.

22. Tuka Woniya Wakan waskuyeca tawa kin he, wowaxtedake, wowiyuxkin, wookiye, wacin tankapi, wicowarbayedan, wowaxte, wowicada,

23. Wicotawacin waxte, qa iyatahde içiyapi xni hena ee; qa taku hecece cin woope kin tuktedan iyamya un xni.

24. Unkan tona Mesiya tawa wicaye cin hena wicacerpi kin icipawer okatanpi, qa wicacerpi wacinyuzapi cantiheyapi koya.

25. Woniya Wakan unkicinipi kinhan Woniya Wakan kin unkopapi kta.

26. Otoiyohi xihdakiciyapi, qa winakiciwizipi, qa ecinxniyan iwinkta içiyapi wanin unyakonpi nunwe.

WICOWOYAKE 6.

1. Mihunkawanji, wicaxta wan ihnuhanna taku xica en iyorpaye cinhan, niye tona owotan-na yaunpi kin woksape wowarbayedan yuha wicaxta kin he ake piya opeya mani ya po; qa awanihdaka wo, okini taku wawiyutanyan un kin en niu nunce.

2. Otoiyoſhi waqinpi kin kici-
cin po, hecen Meſiya toope kin
tanyan ecetu yayapi kta.

3. Tuwe taku xni un exta ta-
ku içida kinhan he içihnayan.

4. Tuka otoiyohi iye oran
kin awakicin kta, hecen iye qe
eciyanhan, qa tokan tanhan
xni, iyuxkin kta.

5. Otoiyoſhi waqinpi tawa kin
kiçin kta.

6. Tuwe wicoie kin onspeki-
yapi kin he waonspekiye cin
taku waxte owasin etanhan qu
kta.

7. Ihnuhan nihnayanpi kin;
Wakantanka uncapi kte xni ce.
Wicaxta kin taku oju kinhan he
yukse kta ce.

8. Tuwe iye cerpi kin woki-
ciju kinhan he wicacerpi kin e-
tanhan wicotakuni xni mnaye
kta; qa tuwe Woniya Wakan
wokiciju kinhan he Woniya
Wakan eciyanhan wiconi owi-
hanke wanica mnaye kta.

9. Taku waxte econ unka-
pinpi xni nunwe; hu unſtakapi
xni kinhan tohantu kte cin mna-
unyanpi kta.

10. Heon tohanyan unkoki-
hipi kinhan, wicaxta owasin ta-
ku waxte ecawicunkiconpi nun-
we, qa wicadapi tiyohnaka kin
hena iyotan.

11. Wowapi hinsko tanka mi-
ye minape on cicagapi e wanda-
kapi.

12. Tona wicacerpi ekta wi-
coiyokipi cinpi kin hena ohomni
banixpapi kta cin niciyapi, Me-
siya can ſusbeca tawa hin on
xicaya kuwapi xni unpi kta heon
hecenpi.

13. Tona ohomni baxpapi o-
papi kin hena e qe nakun woope
kin tanyan kiciyuhapi xni, tuka
ohomni banixpapi kta cinpi, ni-
cerpipi kin on iwinktapi kta he-
on.

14. Tuka takudan on imawin-
kta xni nunwe, Jeſus Meſiya
Itancan unkiyapi can ſusbeca
tawa kin hecedan on, he on miye
ekta wicoicage kin icipawer oka-
tanpi qa wicoicage kin ekta ici-
pawer omakatanpi.

15. Jeſus Meſiya ekta oho-
mni baxpapi kin takudañ okihi
xni qa ohomni baxpapi xni kin
he nakun, tuka wicaxta teca kin
he *wawokihika*.

16. Tona woope kin de eci-
yanhan manipi, Iſrael Wakan-
tanka tawa wicaye cin hena ko
wookiye wowaonxida ko wica-
kiei unpi nunwe.

17. Detanhan tuwedan nagi-
yemaye xni nunwe; Jeſus Me-
siya towapetogton kin mitancan
kin en yuha waun.

18. Mihunkawanji, Jeſus Me-
siya Itancan unkiyapi towaon-
xida kin ninagipi kin kiei un
nunwe. Amen,

EPHESIANS.

PALOS OHNIHDE UNPI KIN HECA EPESOS OYATE KIN WOWAPI WICAKICAGE
CIN HE DEE.

WICOWOYAKE 1.

1. Palos Wakantanka tawacin kin eciyatanhan Jesus Mesiya ohnihde ye cin *he miye*, tona Epesos ekta owotanna un kin Jesus Mesiya wacinyanpi kin hena *wowapi cicagapi*.

2. Wowaonxida wookiye ko Wakantanka Ate unyanpi kin etanhan qa Jesus Mesiya Itancan unkiyapi kin etanhan niyepi en nicipi un nunwe.

3. Jesus Mesiya Itancan unkiyapi Wakantanka tawa qa Atkuku kin yawaxtepi nunwe; he iye Mesiya en taku marpiya tanhan un kin wowaxte wakan ocaje owasin on unyuwaxtepi.

4. He en maka kagapi kin itokapa tanhan unkarnigapi kin iyecen, unwakanpi qa iye itokam wowaxtedake en iyaonpica xni unyakonpi kte cin heon.

5. Qa iye en Jesus Mesiya eciyatanhan cinca unyanpi, iye tawacin oyokipi kin eciyatanhan.

6. Iye towaonxida wowitan woyatan kin on, qa heon Waxtekidake cin en waxte undakapi.

7. He on wopekitonpi kin unhapi, iye we kin on, woartani kajujupi kin hee, iye towaonxida tanka kin eciyatanhan.

8. He iye wicoksape owasin wookarnige ko unkiciyuotapi.

9. Qa token iyokipi kin eciyatanhan iye tawacin wowiyukean kin sdonye unkiyapi, he iye tokaheya iciconze cin he iyecen;

10. Hecen tohan iyehantu kinhan wokonze kin eciyatanhan taku owasin Mesiya en witayamnaye kta, taku marpiya ekta un qa taku maka akan un kin hena, iye en.

11. Qa tuwe iye tawacin wokonze kin eciyatanhan taku owasin kage cin he otokaheya tanhan unkarnigapi kin he iye en woairpeye kin unhapi.

12. Hecen tona tokaheya Mesiya wacinunyanpi kin iye towitan kin unyatanpi kte cin leon hecon.

13. He nix niyepi nakun *wacinyayapi*, wowieake oie kin nayaranpi qehan, wotanin waxte on ni niyanpi kte cin hee, he iye wacinyayapi unkan Woniya Wakan wahoyapi qon he on wapetog nitonpi.

14. He taku unhapi kte cin tokaheya wicaqu ece kin hee, taku opetonpi hdamnanpi kin *u kte* cin hehanyan, iye towitan yatanpi kte cin heon.

15. Hecen mix eya Jesus Mesiya wacinyayapi qa tona

owotanna un kin owasin waxte wicayadakapi kin nawaron,

16. Ehantanhan niyepi on wopida eya amdaxtan xni, qa wocekiye epa eca ciksuyapi ece.

17. Jesus Mesiya Itancan unkiyapi Wakantanka tawa qa wowitan atkuku kin hee woksape wowyukean ko woniya kin niçupi kta, he iye sdonyayapi kta heon.

18. Nitawacimpi ixtapi kin ekta iyoyam niyanpi kta, hecen nicopi wowacinye kin he taku kin e sdonyayapi kta qa tona owotanna un kin ekta taku tawapi kte cin wowitan wijica kin he taku kin *sdonyayapi kta*.

19. Qa tona wicaundapi kin en iye towaxake tanka taku wopteca xni kin he taku kin *sdonyayapi kta*, iye towaxake waxagya oranye cin eciyatanhan.

20. He Mesiya okiciran, wiconte etanhan najin kiye çehan, qa marpiya ekta iye etapa kin en ekihde.

21. Wokiconze owasin, qa wowaxake, qa owokihi qa itancankiyapi, qa wicacaje caje yatapi kin owasin, wiconi kin de en hecedan xni, wiconi u kte cin he nakun, hena iwankam tehan wankantuya *ekihde*.

22. Qa he iye siha kin ihukuya taku owasin ehnaka, qa taku henana kin owasin en pa un kte cin heon ehde, okodakiciye kin ekta;

23. He iye tancan kin hee, tuwe taku owasin on owasin oju ye cin wojudan kin hee.

WICOWOYAKE 2.

1. Unkan nix niyepi kin wotartani wicoran xica ko en niçapi.

2. Hena ehna ehanna mayanipi, wicoicage kin de wiconi kin eciyatanhan, qa okotonyan wowaxake kin itancan kin eciyatanhan, he taku wakan woa-
kta xni cinca kin en oranye cin hee.

3. Hena om unkiyepi owasin ehanna unnipi, uncerpipi wacin yuze cin en, wicacerpi wicota-
wacin ko wacinpi kin ecetu unyanpi qa umanpi kin iyecen wocantiyahde cinca kin heuncapi.

4. Tuka Wakantanka wowaonxida kin on wijica kin he towaxtedake tanka kin on waxte undakapi kin heon;

5. Unkiye wicoran xica ehna unçapi tuka Mesiya on ni unyanpi, (wowaonxida on wiconi duhapi;)

6. Qa Jesus Mesiya en wita-
ya najin unkiyapi qa marpiya kin ekta kiei kiyotang unkiyapi;

7. Hecen wiconi u kte cin en Jesus Mesiya on cantounhna-
kapi kin on towaonxida woyuha wopteca xni kin hdaotanin kta.

8. Wowaonxida kin on yanipi, wicadapi kin eciyatanhan, qa he niyepi kin etanhan xni, Wakantanka taku niçupi kin hee.

9. Wicoran kin eciyatanhan xni, he *eciyanhan unkanx* tuwe ihdatan kta tuka.

10. Tuwe icar unyanpi kin he iye, Jesus Mesiya en wico-

ran waxte aicar unyanpi, hena ohna maunnipi kte cin heon oto-kaheya tanhan Wakantanka wi-yeya ehnaka.

11. Hecen ehanna wicacerpi ekta Ikcewicaxta kin henicipi, qa wicacerpi ekta ohomni baxpapi nape on econpi eciyapi kin he ohomni baxpapi xni eni-ciyapi, he kiksuya po.

12. He ehan Mesiya yuhe xni yaunpi; Israel wokiconze kin iyenichantupi xni qa wahoyapi wicotakuye kin sdonyaya-pi xni, wowacinye ninicipi qa wicoicage kin en Wakantanka codan yaunpi.

13. Tuka nakaha Jesus Mesiya en nix niyepi ehanna itehanyan yaunpi qon wanna Mesiya we kin on kiyadan anihipi.

14. Unkan iye wookiye unki-tawapi kin hee, iye qe napin yuwanjidanyan kage ça coka-hnagya ehnakapi qon he yuju;

15. Qa iye cerpi kin en tókakiciyapi kin woahope woope kin wicoope en un kin he yutakuni xni, ix iye en nonpa etanhan wicaxta wanjidan teca icar ye kta, hecen wookiye kage kte cin heon etanhan.

16. Qa tancan wanjidan on ean susbeca kin eciyatanhan, hena napin Wakantanka kici oki-ciciye wicakiye ça heon tókakiciyapi kin kte.

17. Qa tona tehan dukanpi qon kiyadan un kin hena ko wookiye oniciyakapi hi.

18. He eciyatanhan Woniya Wakan wanjidan on unkiye Ate unyanpi kin kiyadan ipi unhapi.

19. Heon etanhan, detanhan togkicihdapi oyate tokeca kin heuncapi xni, tuka tona owotanna un kin om untipi qa Wakan-tanka tiyohnaka tawa kin he unkiyepi.

20. Qa ohnihde unpi wicaxta wokcan ko taku ahehde tawapi kin akan tinicagapi, Jesus Mesiya he oise en otancanke kin hee.

21. Iye ohna tipi kin ocowasin ayucoco ehnakapi qa Itancan kin en tipi wakan icaga.

22. He ohna niyepi nakun ptaya tinicagapi, Woniya Wakan eciyatanhan Wakantanka tipi ye kte cin heon.

WICOWOYAKE 3.

1. Heon Ikcewicaxta kin niyepi on etanhan Palos Jesus Mesiya *caje* kin on kaxka hnakapi kin he miye.

2. Niyepi on Wakantanka towaonxida woope maqupi kin he nayaranpi hecinhan;

3. Token woyakapi kin on wowiyukcan kin he sdonye makiya; he wanna wicoie tonana on wakaga.

4. He dawapi kin ehantanhan Mesiya tawowiyukcan kin token imdukecan kin sdonyayapi kta.

5. He wicoicage tokeca kin en wicaxta cinca kin owicakiyakapi xni tuka nakaha Woniya Wakan kin eciyatanhan ohnihde wicaye cin owotanna qa wicaxta wokcan tawa wicaye cin hena owicakiyaka.

6. Hecen Ikcewicaxta kin nakun kici tawa yapi kte ça kici

tancan wanjipidan kta qa Mesiya en wahoyapi qon wotanin waxte kin eciyatanhan en opapi kta.

7. He on ookiye makagapi, Wakantanka towaonxida maqupi kin he eciyatanhan, iye towa-xake oranye cin on.

8. Miye tona owotanna un kin owasin en iyotan macistina, *tuka* wowaonxida kin de maqupi, Ikcewicaxta kin ekta Mesiya tawoyuha okarnirpica xni kin he omdake kte cin hee.

9. Qa wowiyukcan kin otokahe wanin ehantanhan Wakantanka taku owasin Jesus Mesiya on kage cin he en narmanpi qon hee takodakiciyapi kin he taku kin *wicaxta* owasin sdonye wicawakiye kta.

10. Hecen nakaha okodakiciye kin eciyatanhan wokiconze wowaxake ko marpiya ekta un kin en Wakantanka toksape wopteca xni kin atanin kta.

11. Wokonze otokahe wanin ehantanhan kage cion he eciyatanhan Jesus Mesiya Itancan unkiyapi kin en;

12. Iye wacinunyanpi kin eciyatanhan kokipexniyan ekta unkipi qa waditagya unkiapi ece.

13. Heon etanhan niyepi kin on kakix mayanpi kin heon canwannikapi kte xni wacin.

14. Qa heon Jesus Mesiya Itancan unkiyapi he Atkuku kin en anpetu iyohi canpexka makehde inawajin.

15. He eciyatanhan wicowazi marpiya ekta un qa maka akan un kin ocowasin caxtonpi.

16. Hecen iye towitan woyu-

ha kin eciyatanhan taku niçupi kta, iye Taniya Wakan kin eciyatanhan wowaxake on wicaxta mahen tánhan waxag niyanpi kta.

17. Hecen wacinyanpi on nicantepi kin mahen Mesiya ounye kta;

18. Hecen wowaxtedake on hutkan niyusutapi qa sutaya hu nihdepi kta; qa tona owotanna un kin owasin om, ohdakinyan qa ohanske cin, omahentuya qa obosdatu kin he taku kin iyukcan oyakihipi kta;

19. Qa Mesiya towaxtedake okarnirpica xni kin he sdonya-yapi kte, hecen Wakantanka tojudan kin ocowasin oju niyanpi kte.

20. Tuwe nina waxagya econ okihi, unkix unkidapi qa awauncinpi kin isanpa wowaxake kin on oniciranyanpi kin he eciyatanhan;

21. He iye okodakiciye kin en Jesus Mesiya on ohinniyan owihanke wanin wowitan kicihan nunwe.

WICOWOYAKE 4.

1. Heon etanhan mix miye Itancan *caje* on makaxkapi, ceciciyapi ce, Wicakicopi on nicopi kin he iyacinyan mayanpi kte.

2. Wicotawacin waxte ocowasin qa wicowarbadan, wacin tankapi ko yuha wowaxtedake en otioyohi iyowinyeciciyapi,

3. Qa woksape okonwanjidan wookiye icaxke on lduha ayakitapi kta.

4. Tancan wanjidan qa wo-

ksape wanjidan, nicopi kin en wowacinye wanjidan inicopi kin he iyececa;

5. Itancan wanjidan, wicadapi wanjidan, baptem wanjidan,

6. Taku Wakan wanjidan, he owasin, ate yapi kin, owasin iwankam un qa owasin opta un qa niyepi owasin en un.

7. Tuka Mesiya iyunwin codan wicaqu iyutapi kin eciyatanhan unkiyepi otoiyohi wo-waonxida unqupi.

8. Heon kaken eye cigon; Wankantkiya kihdecehan wayaka woahde kin he ocowasin ahde ça wicaxta kin taku wicaqu ce.

9. Wankan kihde cin he taku he; tokaheya maka mahentuya kin iyaye cin hee.

10. Tuwe kun hi qon he mapiya kin ako sanpa tehan wankantuya kihde cin, taku owasin oju ye kte cin hee.

11. Unkan apa ohnihde unpi kin heca wicaqu, qa wicaxta wokean wanjikji, qa wotanin waxte oyakapi kte cin wanjikji, qa waawanhdakapi waonspekiyapi ko wanjikji;

12. Tona owotanna un kin hena wicayuecedankta, wawokiyapi wicoran kin on qa Mesiya tancan icar yapi kte cin heon.

13. Tohan owasin okonwanjidan wicadapi qa Wakantanka Cihintku sdonyapi kin ekta iyounhipi qa wicaxta tanka Mesiya toojudan kin iyehankeca iyutapi kin *iyounhipi kte* cin hehan-yan.

14. Hecen detanhan hokxiyogopa aptanptan iyeyapi qa woonspe tate owasin on kaha iye-

yapi kin heuncecapi kte xni, wicaxta oxkixkeya oranyanpi qa wohneye on wicahnayanpi wicoran kin eciyatanhan;

15. Tuka wowaxtedake en iewicaunkapi kta, hecen tuwe itancan yanke cin Mesiya hee en taku owasin on unkiagapi kta.

16. Iye eciyatanhan tancan kin ocowasin wayupiya iciyakaxkapi qa okihe kin owasin wawokiyapi on icicazontapi, hucha kin otoiyohi iyacinyan icage cin he iyecen tancan kin icar yapi, wowaxtedake en icage kte cin heon.

17. Heon kaken epe ça Itancan kin on mdaotanin; Ikcewicaxta tokeca wicotawacin witkotkopi kin en manipi kin he iyecen mayanipi kte xni.

18. Hena wicotawacin aotpas yapi qa Wakantanka wiconi tawa kin kiksuye xni yukanpi, wosdonye xni iye tan mahen unpi kin eciyatanhan, wicocante terika yuhapi kin heon;

19. Hena iyasaka icar ayapi qa wicaxtapi xni kin en iyorpeiciyapi, taku axapapi kin owasin wohitiya econpi kte cin heon.

20. Tuka niyepi qe hecen Mesiya kin onspe niçiciyapi xni.

21. He nayaranpi qa he onspe niciyapi hecinhan, Jesus en wowicake kin iyececa.

22. Wicoran tokaheya kin en wicaxta tannike cin, wohneye wocantiheye kin on rwin kin he yahduxdokapi kta;

23. Qa nitawacinpi woksape kin en niyutecapi kta;

24. Qa wicaxta teca woowo-

tanna wowicake wowakan ko en Wakantanka eciyatanhan icar yapi kin he kodakapi kta.

25. Heon etanhan itonpi xni kin ayaxtanpi qa otoiyohi wicaxta tokeca kici wowicake ece ohdaka po; otoiyohi huha yeciciyapi kin heon.

26. Xinyahdapi exta wartanipi xni po. Canniniyanpi ecen wi iyaye xni nunwe.

27. Qa Wakanxica kiyukanpi xni po.

28. Tuwe wamanon kin he ake manon kte xni, tuka rtani kta, nape on taku waxte econ kta, hecen warpanica kin he taku wicaqu kte cin yuhe kta.

29. Wicoie xice cin owasin takudan niipi kin etanhan hinanpe xni nunwe, tuka taku waxte, on icar yapi kta, tona naronpi kinhan wowaonxida wicaqu kte cin he ecedan.

30. Qa Wakantanka Taniya Wakan kin iyokixin yapi xni po; he on wopekitonpi anpetu kin aiyahdeya askam niyanpi.

31. Wicokige owasin, qa woeantiyahde, qa woxihda, qa iwa-xicunpi, qa waaiapi canniyekiciyapi ko owasin erpeyayapi nunwe.

32. Qa otoiyohi okiciciyapi qa cantekiciyapi qa otoiyohi kicicajuju po, Wakantanka Mesiya on nicicajujupi kin he iye-
een.

WICOWOYAKE 5.

1. Heon hokxiyoqopa waxte-
xte kin iyecen Wakantanka ope-
ya un po.

2. Qa wowaxtedake en mani

po; Mesiya canteunkiyapi qa unkiyepi on Wakantanka en içi-
çu qa waihduxna, woomna iyo-
kipi kin he iyececa.

3. Tuka wawicirarapi qa wa-
axapapi qa waterindapi kin ni-
yepi ekta caje yatapi xni nunwe,
tuka tona owotanna un taku iyo-
kipi wicaye cin hena.

4. Qa wawixtenyapi, qa wic-
oie ecinxniyan kin, qa iapi xica
hena hecetu xni, tuka wopida
eyapi kin he waxte.

5. He de sdonyayapi, tuwe
wawicirarapi econ qa tuwe wa-
axape cin, qa tuwe waterinda
kin he wakagapi ohodapi kin
hee, hena Mesiya Wakantanka
kici tokiconze kin en takudan
tawapi kte xni.

6. Iapi ecinxniyan on ihnuhan
tuwe nihnayanpi kin; wicoran
kin hena on Wakantanka tocan-
niye kin woakta xni eincapi kin
en awicau kta.

7. Heon etanhan hena en o-
peya unpi xni po.

8. Ehanna otpaze cin henica-
pi tuka wanna Itancan kin en
iyoyanpa kin *henicapi*, iyoyanpa
cinca kin iyecen mani po.

9. Woniya Wakan waskuye-
ca tawa kin he wowaxte owasin
qa wicoowotanna qa wowicake
kin en un.

10. Qa Itancan kin taku iyo-
kipi ye kte cin he akita po.

11. Qa otpaza wicoran on ta-
ku waxte icage xni kin hena en
okicipapi xni po, tuka hena te-
rinda po.

12. Hena taku narmana econ-
pi kin caje yatapi kin he wowi-
xtece.

13. Tuka taku tona terindapi

kin hena owasin iyoyanpa kin yuotanin; qa taku owasin yuotanin kin he iyoyanpa kin ee.

14. Heon etanhan kaken eya; Tuwe ixtinbe cin kikta qa wiconte etanhan najin wo, Mesiya iyoyam niye kta ce.

15. Hecen on wakta po, itonpeya mayanipi kta, witkotkoke cin iyecece xni tuka wicaxta wacin ksape cin iyececa.

16. Qa omaka kin tanyan hduha po, anpetu kin xice cin heon etanhan.

17. Heon etanhan wacin ksapa po, qa Itancan token tawacin kin sdonya po.

18. Qa mini xa on witkopi xni po, he on xica iyatahdepi; tuka Woniya Wakan ojudan un po.

19. Qa Psam, qa odowan, qa wakan dowanpi kin on waho-konkiciciya po; ahiyayapi qa nicantepi kin ekta Itancan kin idowan po.

20. Qa ohinniyan taku owasin on Wakantanka Ate yapi kin wopida eciya po, Jesus Mesiya Itancan unkiyapi caje kin on.

21. Qa Wakantanka kokipeyahan otoiyo hi token ihukun iyeiciya po.

22. Winorinca, nihihnapi kin wicihukun iyeiciya po; Itancan kin en iyececa.

23. Wicaxta kin he iye tawicu pa kin hee, Mesiya okodakiciye kin en pa kin hee he iyececa; qa he iye wicatanca kin wanikiye cin hee.

24. Heon okodakiciye kin Mesiya ihukuya yanke cin he iyecen winorinca kin iye hihna-

kupi kin taku owasin en *ihukun iyeiciyapi* kta.

25. Wicaxta, winorinca nita-wapi kin cantewicakiya po, Mesiya okodakiciye kin waxte kidake qa on iye iciçu kin he iyecen;

26. Hecen iye oie kin eciyatanhan mini on *okodakiciye* kin hducedan qa hduska kta;

27. Qa hecen iye ekta ehda-ku kta, wowitan okodakiciye kin heca, woaxape qa yuxkipi qa taku hececa wanica; hecen wakan qa waaxape xni un kta.

28. He iyecen wicaxta kin iye tancanpi kin iyecen tawicupi kin waxte wicakidakapi kta; tuwe tawicu kin waxte kidake cinhan he waxte icidaka.

29. Qa tohini tuwedan iye cerpi kin xice kidake xni, tuka icar kiye qa tanyan hduha, Mesiya okodakiciye hduhe cin iyececa.

30. He tancan qa cerpi qa huhu kin en huha kin he unkiyepi.

31. Heon etanhan wicaxta kin atkuku hunku ko erpekiye qa tawicu kin en iyaihdaxke kta, qa heniyo s wicacerpi wan-jidan kta.

32. He wowiyukcan wan tanka, tuka Mesiya qa okodakiciye kin hena wicawaka.

33. Heon nix niyepi otoiyo hi niye inihdacin nitawin waxte yakidake kta, qa winorinca kin ix iye hihnaku kin kinihan kte.

WICOWOYAKE 6.

1. Hokxiyoqopa, nihunkakepi kin anawicakigoptan po, Itancan kin en, he owotanna ce.

2. Niyate nihun kici wica-hduonihan wo; (wahoyapi kin en woahope tokaheya kin hee;)

3. Hecen tanyan yaun qa maka akan tehan yani kta.

4. Qa ate niyanpi kin nicin-capi kin wacinko wicakiyapi xni po, tuka Itancan waicarye ça woonspe tawa kin en icar wicakiya po.

5. Qa wowidake yaunpi kin tona wicacerpi ekta niyuhapi kin wokokipeya cancaniçiya ana-wicakigoptan po, Mesiya kin iyececa, nicantepi okonwanjidan on.

6. Wicaxta iyokipi wicayapi kin iyecen wanwicayakapi eee-dan wawokiyapi kin eciyatanhan xni, tuka Mesiya taokiye kin iyececa nagi kin eciyatanhan Wakantanka tawacin kin ecen ecanonpi kta.

7. Iyokipiya wawokiya po, Itancan kin ekta hecetu, qa wicaxta kin en iyecece xni.

8. Qa tuwe taku waxte econ kinhan he on Itancan kin eciya-tanhan *taku* yuhe kta, wowidake un qa ix tawaiçiya un kin uman tukte hecetu kinhan, he sdonya po.

9. Qa hena itancanpi kin okon-wanjidan ecawicakicon po qa kszapike cin he ayuxtan po. Marpiya kin ekta ix iyepi qa nix niyepi nakun Itancan yakiyapi kin yanke ça he ekta wicaxta itohnake yuonihanpi wanica, he sdonya po.

10. Unkan ehake mihunka-wanji, Itancan kin en waxagya un po, iye towaxake wicookihi kin on.

11. Wakantanka tawipe kin

ocowasin un po, hecen Wakan-xica wohneye oranye cin itko-kim inajin oyakihipi kta.

12. Wicawe qa wicacerpi kin kici unkicizapi xni, tuka woki-conze qa wicowaxake qa wiconi kin de en otpaza itancanpi kin qa taku wakan xicapi wankan-tuya yukanpi kin hena kici *unkicizapi*.

13. Heon etanhan Wakantan-ka tawipe kin ocowasin icu po, hecen anpetu xice cin en najin oyakihipi kta, qa taku owasin hduxtan nayajinpi kta.

14. Heon wowicake ipiyag kiconpi ecen najin po, qa wico-owotanna maza maku akarpe kin koyaka po.

15. Qa nisihapi kin en woo-kiye wotanin waxte ohduxtan kin okihan po.

16. Qa owasin akapa tanhan wowacinye wahacanka kin icu po, he on wicaxta xica tiwan-hinkpe ide kin owasin yusni oyakihipi kta.

17. Qa wiconi ocowasin maza wapaha kin icu po, qa nakun Woniya Wakan tamaza sagye kin he, Wakantanka oie kin hee.

18. Wocekiye qa wokidapi owasin on Woniya Wakan en cekiyapi qa heon woape owasin wokidapi ko yuha owotanna un kin owasin on, kiktahan un po;

19. Qa nakun miye on, iapi owakihi kte cin heon, hecen waditagya i wahdukawa qa wotanin waxte wowiyukean kin omdake kta.

20. Heon wahoxi ipi kaxka hnakapi kin hemaca, hecen on

token iwae kte cin he iyecen kin wacintonhnag niyanpi kte waditagya iwae kta. cin heon.

21. Tuka miye ekta taku kin en wookiye un nunwe, qa wowa- xtedake wowacinye ko Wakan- kta heon Tucikos hunkawanjin tanka Ate yapi qa Jesus Mesiya kiciyapi wan waxte dakapi qa Itancan kin en ookiye owotanna Itancan kin eciyatanhan.

22. Heon etanhan niyepi ekta Mesiya Itancan unkiyapi waxte ye waxi, unkiyepi ekta taku kin dakapi kin hena owasin en wo- sdonyayapi kta, qa. he nicantepi waonxida wicakici un nunwe. Amen.

PHILIPPIANS.

PALOS OHNIHDE UNPI KIN HECA PILIPI OYATE KIN WOWAPI WICAKICAGE
CIN HE DEE.

WICOWOYAKE 1.

1. Palos qa Timoteyos Jesus gapi kin he niciyuxtanpi kta, Mesiya taokiye kin, tona Pilipi Jesus Mesiya anpetu tawa kin ekta Jesus Mesiya en owotanna hehanyan.

un kin hena, qa waawanhake 7. Hecen niyepi owasin wa- cin en ciyuzapi kte cin he hece- cin hunka wicayapi ko *wowapi* tu, cante en mayaduzapi kin *nicagapi*. heon; makaxkapi kin qa wotan- in waxte omdake qa mdasuta kin he en mitowiyuxkin kin en niyepi owasin oyecipapi.

2. Wakantanka Ate unyanpi 8. Wakantanka sdonmayan, qa Jesus Mesiya Itancan unki- Jesus Mesiya cante kin on owa- yapi kin etanhan wowaonxida sin cantocikpanipi. wookiye ko niyepi kin en nicipi un nunwe.

3. Ciksuyapi eca Wakantanka mitawa wopida ewakiya ece.

4. Ohinniyan mitawocekiye yadakapi kin he wosdonye wi- otoiyohi en niyepi owasin on yukcanpi ko owasin en sanpa iyuxkinyan cewakiya ce; qa sanpa tankaya aye kta.

5. Anpetu tokaheya kin ehan- 10. Kinhan taku waxte kin hana idukcanpi kta, hecen okon- tanhan qa dehanyan wotanin wanjidan ricahe xni yaunpi kta, waxte kin en koda yeciyapi kin Mesiya anpetu tawa kin en; heon.

6. Unkan he sdonwaya; tu- 11. Qa wicoowotanna wa- we tokaheya oran waxte nicica- skuyeca kin on ojudan yaunpi

nunwe, hena Jesus Mesiya on Wakantanka woyatan qa wowitan kin hee.

12. Mihunkawanji, taku token ecamiconpi kin he on wotanin waxte kin sanpa otanin aye cin he sdonyayapi kta wacin.

13. Hecen wicaxtayatapi tahocoka kin qa *makoce* kin owancaya Mesiya on makaxkapi kin he otanin.

14. Qa Itarcan kin en hunkawanjin kiciyapi kin ota miye makaxkapi kin on suta içiyapi qa sanpa kokipexniyan wicoie kin taninyan oyakapi.

15. Hunr waakinicapi qa winawizipi kin on, qa hunr ix wowaxtedake on Mesiya oya-

kapi. 16. Hena e waakinicapi kin on, wowicake eciyatanhan xni Mesiya kin oyakapi, qa makaxkapi kin en wokakije kokijuya aupi kta kecinpi;

17. Qa umanpi kin ix wowaxte kin on etanhan, wotanin waxte mdusuta kta e on emahdepi kin sdonyapi.

18. Ecin to; toketu kaxta, wohnaye on etanhan, qa ix awicakehan, uman tukte kakex, oyakapi kin he on imduxkin qa eex nakun imduxkin kta.

19. Nitawocekiyepi qa Jesus Mesiya Taniya wawokiye cin on he wiconi emicicetu kta sdonwaya.

20. Qa nina awacami qa ape manka, hecen takudan on imaxtece kte xni, tuka ohinniyan waditagya waun kin he iyecen nakaha mitancan kin on Mesiya yuonihanpi kte, wani qa ma-

kte cin uman tukte kaxta on etanhan.

21. Wani kin he wawokihi qa maçe kte cin he sanpa waxte kin ee.

22. Wicacerpi kin en opeya wani kinhan mioran waskuyeca kin hee, tuka uman tukte wacin nun tanin xni.

23. Taku nom aotins mayanpi; ekta mde ça Mesiya kici waun kte rinca, he iyotan waxte.

24. Tuka wicacerpi kin en opeya waun kin he niyepi on wawokiyapi kin hee.

25. Hecen wahdukcan qa heon wani qa niyepi owasin om waun kta sdonwakiya, sanpa inicagapi qa wacinyan iduxkinpi kte cin heon.

26. Qa hecen akex ekta ciupi kinhan miye on Jesus Mesiya en sanpa nina iduxkinpi kta.

27. Tuka Mesiya tawootanin waxte kin eciyatanhan iyaa dukanpi nunwe, hecen wanciya-kapi wau kinhan qa ix wau xni, uman tukte kaxta nioranpi kin nawaron kta, wicotawacin wanjidan en sutaya yaunpi qa wicanagi wanjidan yuha wotanin waxte kin wacinyan oyecipapi kin.

28. Qa tona tóka niyanpi kin hena on ihnuhan taku ininihanpi kin, hee hena en wicotakuni xni au kta yuotanin, tuka heon niyepi kin en wiconi Wakan-tanka etanhan au kta otanin.

29. Mesiya he ayuco niçupi, iye wacinyayapi kte ça nakun iye *caje* kin on kakix niyanpi kte cin.

30. Qa makakije cin wanma-

yadakapi qon qa nakaha en mau nayaranpi kin he iyecen woka-kije duhapi kta.

WICOWOYAKE 2.

1. Heon Mesiya on iwicaki-yapi yuke cinhan qa wowaxtedake en imagaga içiyapi qa Woniya Wakan kin en kodaki-ciyapi yuke cinhan, qa wacantkiyapi wowaonxida ko yuke cinhan,

2. Mitowiyuxkin kin micuyu-xtan po, akiceden awacannipi, qa wowaxtedake kin okonwan-jidan duhapi qa wicotawacin wanjidan yaunpi kta.

3. Waakinicapi qa ihdatanpi kin on takudan *ecanonpi* kte xni, tuka warbayedan yaunpi *qa* otoiyohi niye isanpa tokan waxe yecidakapi kta.

4. Otoiyohi wicitawa kin ecedan ekta etonwanpi xni po, tuka nakun otoiyohi tokan tawa kin ekta *eyatonwanpi* kta.

5. Jesus Mesiya token *wacin yuze* ciqon he iyecen wacin duzapi kta.

6. He Wakantanka ouncage kin en un qa Wakantanka kici akidecen yanka keçiye cin he wawicakipi xni kecin.

7. Qa ihduxdoke ça wowi-dake un kin ouncage kin icu, qa wicaxta kin iyecen ihdus icaga;

8. Qa wicaxta ouncage kin en iyeyapi qehan ihduhukuya qa wiconçe ekta aiyahdeya wananon yanka, can susbeca en çe cin he ehan.

9. Heon etanhan Wakantan-ka he tehan wankantuya hdu-

wankan icu, qa caje wan wica- caje owasin isanpa waxte kin he qu;

10. Hecen Jesus cajeyatapi kin en hupahu kin owasin can-pexka makehde enajin kta, marpiya ekta un qa maka akan un, qa maka kin ihukuya un kin henakiya.

11. Qa Wakantanka Ate yapi kin yatanpi kte cin on Jesus Mesiya he Itancan kin ee ce; wicaceji owasin eya oyakapi kta.

12. Heon waxte cicidadapi kin, ohinniyan nayaranpi kin he iyecen, en cicipi waun kin hecedan xni, tuka nakaha en waun xni exta sanpa wokokipeya cancan- içiya yanipi kte cin hduxt看 po.

13. Tuwe cin niciyapi qa econ niciyapi kin he Wakantan-ka ee, iye toiyokipi kin eciya-tanhan niyepi kin en oranyan.

14. Wihnupi qa waakinicapi wanin taku owasin econ po.

15. Hecen iyaonpepica xni owotanna yaunpi kte, wicoicage wan pemni qa yukxankxanyan un kin ehna Wakantanka cinca ecedan *yaunpi kta*; hena en maka akan petijanjan iyecen iyoyanpa yaunpi.

16. Qa wiconi wicoie kin su-taya duzapi. Hecen Mesiya anpetu tawa kin en taku on imawinkta kin he dee, taku xni on waimnanke xni qa taku xni on rtawani xni kin hee.

17. Unkan wacinyayapi wo-xnapi wawokiyapi kin en amihdapson exta nakun imduxkin qa niyepi owasin om imduxkin kta.

18. Heon nix niyepi nakun

iduxkinpi qa miye kici iniwin-
ktapi ce.

19. Tuka Jesus Mesiya Itan-
can on niyepi kin ekta Timote-
yos kohanna ye waxi kta wa-
canmi, hecen tohan token yaun-
pi kin sdonwaye cinhan hehan
mix nakun iyokipi waun kta.

20. Tuwe iyecen wacin yuze
qa iye cinka taku nitawapi kin
ihakta kte cin mduhe xni.

21. Owasin wicitawa kin a-
kitapi qa taku Jesus Mesiya ta-
wa kin akitapi xni.

22. Tuka he iyutapi kin sdon-
yayapi, hokxidan wan atkuku
kici un kin he iyecen wotanin
waxte kin en micica.

23. Iye kohanna ye waxi kta,
tohan token waun kte cin sdon-
wakiya.

24. Qa mix eya ecadan wau
kta, on Itancan kin ape manka.

25. Qa Epaproditos misunka
qa mitawaxi qa kici akicita
waun, tuwe u yaxipi qa tuwe
taku imakakije cin omakiye cin
he niyepi ekta hde waxi kta wa-
canmi.

26. He niyepi owasin canto-
nikpanipi qa iyokixica un, wa-
yazanke cin nayakironpi kin
heon.

27. He qex wayazanke qa
wanna te kta ikiyedana, tuka
Wakantanka onxikida, qa he
ixnana xni tuka miye nakun
onximakida, oiyoixice cin oi-
yokixica ahna mduhe kte xni
heon.

28. Qa heon itonpeyahan hde
waxi, ake wandakapi kinhan
iduxkinpi kta qa mix aopten
iyokixica amaye kta.

29. He Itancan kin on etan-

han wopida' owasin yuha tin u
xi po, qa tona hececapi kin wi-
cayunihan po.

30. Mesiya oran kin on wan-
na axkadan te kta tuka, wiconi
tawa kin itonkipe xni, miye en
wawokiyapi aokpaniyan eca-
nonpi kin he niciyuxtanpi kte
cin heon *hecon*.

WICOWOYAKE 3.

1. Ehake mihunkawanji, I-
tancan kin en iyuxkin po. He-
na wicoie kin akta wowapi cica-
gapi kin he iyoyag maye xni qa
niyepi on waxte.

2. Xung waboticapi kin he
en wakta un po; tona xicaya
econpi kin en wakta po; yuo-
mdecapi kin en wakta un po.

3. Tona ohomni baxpapi qa
wicocante on Wakantanka oho-
dapi qa Jesus Mesiya en iwin-
ktapi qa wicacerpi wacinyanpi
xni kin heuncapi.

4. Mix nakun wicacerpi kin
wacinwaye kta tuka. Tuwe wi-
cacerpi wacinyan okihi kecin
kinhan he isanpa owakihi.

5. Anpetu icixahdogan oho-
mni bamaxpapi, Israel oyate qa
Benjamin tawicoun kin etanhan,
Heberi etanhan Heberi, qa woo-
pe kin eciyatanhan Parisiyan
hemaca.

6. Ohodapi kin eciyatanhan
okodakiciye kin xicaya wakuwa,
qa woope kin on wicoowotanna
kin he eciyatanhan takudan iya-
onpepica xni *waun*.

7. Tuka taku tona mihdamna
kepce cigon hena Mesiya on ta-
ku xni wadaka.

8. Awicakehan taku owasin

taku xni wadake, Jesus Mesiya Itancan mitawa kin wosdonye oiyokipi kin on, qa he on taku owasin makitanin xni, qa hena tacesdi ece mdawa, Mesiya iyo-wahi kte cin heon.

9. Qa he en iyemayanpi kta, mitooowotanna wicoope kin eci-yatanhan un kin he wahduhe xni, tuka Mesiya wacinyanpi eciyatanhan u kin he mduhe kta.

10. Hecen he iye sdonwaye kta qa piya ikicage cin wowaxa-ke kin qa iye kakije cin okicipa-pi kin hena ko, iye te cin ounca-ge kin en imacage kta.

11. Heon tokexta wiconte etanhan woekicetu kin en iyo-wahi kte rinca.

12. Wanna dehan iyowahi qa wanna omaowotanna kepce xni; tuka ihakam wau, okini taku on Jesus Mesiya kin ima-yukean kin he imdukean kte.

13. Mihunkawanji naharin wiyukean mihdawa xni;

14. Tuka taku wanji *ecamon*, taku hekta un kin hena akiktonx waun qa taku tokata un kin he-na ekta nape yewakiya ce; he-cen oinajinta awaimnanka, Jesus Mesiya on Wakantanka wan-kantuya wicakico kin en oqipe kin yewakiye kte cin heon.

15. Unkan hecen tona owo-tanna unyakonpi kin hecen a-wauncinpi kta, qa taku on togye wacin duzapi hecinhan he nakun Wakantanka oniciyakapi kta.

16. Tuka tohan iyounhipi kin he en woopé wanjidan eciyatan-han maunnipi qa okonwanjidan awauncinpi kte.

17. Hunkawanjin ciyapi kin,

omicipa po, qa tona hecen ma-nipi kin hena iwanwicayaka po, waonspekiya unyaduhapi kin he iyececa.

18. Otakiya ociciyakapi qa nakaha ake ceya omdaka, wica-xta ota hecen manipi, Mesiya can susbeca tawa kin tóka kin hena eepi.

19. Hena owihanke kin he wicotakunixni; iye tezipi kin Wakantanka yapi, wowixtece kin en iwinktapi, qa taku makata un kin awacinpi.

20. Tuka okodakiciye unki-tawapi kin he marpiya kin ekta un qa hetanhan Wanikiya Jesus Mesiya Itancan kin *hi kta* un-kapepi.

21. Iye wowarpanica tancan unkitawapi kin yutokeca qa iye tancan wakan kin ouncage kin en icar ye kta, towaxake on taku owasin ohiye kta okihi kin heon etanhan.

WICOWOYAKE 4.

1. Heon etanhan mihunka-wanji waxte cicidadapi qa canto-cikpanipi kin wowiyuxkin mitawa qa watexdake mitawa kin, Itancan kin en sutaya najin po, waxte cicidadapi.

2. Yuodiyas cewakiye qa Suntuce cewakiya, Itancan kin en okonwanjidan awacinpi kta.

3. Qa mitawaxi wicake cin eeciciya ce, winorinca tona wotanin waxte kin en mici oranye cin hena owicakiya wo, qa Klementos qa mitawaxi umanpi kin tona cajepi kin wiconi wowapi kin en un kin hena koya.

4. Ohinniyan Itancan kin en

iyuxkin po; qa ake, Iyuxkin po, epe.

5. Wanirbapidan kin he wicaxta owasin sonyapi kta. Itancan kin kiyadan un.

6. Takudan iyokixinya awacinpi xni po, tuka taku owasin on wocekiye wokidapi ko on wopida yuha taku yacinpi kin Wakantanka oyakidakapi kta.

7. Qa Wakantanka tawookiye wookarnige kin owasin isanpa kin he nicantepi qa nitawacinpi kin Jesus Mesiya en niyuhapi kte.

8. Unkan ehake mihunkawanji, taku wicake cin, taku yuonihanpi kin, taku owotanna kin, taku wakan kin, taku waxte dapica kin, taku waxte eyapi kin, wowaxte qa wowitan yuke cinhan hena awacin po.

9. Taku tona onnisepi qa iyacupi qa nayaranpi qa miye en wandakapi kin hena econ po, qa Wookiye Wakantanka kin niyepi kin en nicipi un nunwe.

10. Itancan kin en nina imduxkin, nakaha unhanketa awamayacinpi kin he piya rca aya heon. He de en ihamayaktapi tuka token on ecamiyeconpi nun tanin xni.

11. Taku imakakije cin he wake xni; taku en micihe cin hena on iyokipiya waun kta onspe miciciya.

12. Warpaniya waun kte cin he sdonwakiya qa wijinya waun kte cin he nakun sdonwakiya; ohinniyan qa taku owasin on, wimapi qa wotektewahda kta, wimajica qa mawarpanica kte cin onspe makiyapi.

13. Mesiya waxag maye cin he eciyatanhan taku owasin owakihi.

14. Tuka makakije cin en omayakiyapi kin he tanyan eanonpi.

15. Pilipi wicaxta kin he de sdonya po, wotanin waxte otokake ekta, Makedoniya etanhan imdamde chehan, waqupi qa icupi kin icartagya okodakiciye kin niye nixnana omayakiyapi.

16. Tesalonike ekta waun qon he icunhan taku imakakije cin on wancadan qa nonpa akihde ekta aye yaxipi.

17. Taku maqupi kta wacin kin hee xni, tuka waskuyeca niyepi on sanpa niciyuotapi kte cin he wacin.

18. Tuka owasin mduhe ca wijica waun; niyepi etanhan taku Epaproditos maqu kin hena iwacu, taku waxtemna woxna waxte qa Wakantanka iyokipi kin heca he iwamaxeca.

19. Taku inicakijapi kin owasin Wakantanka mitawa nicupi kta, iye woyuha wowitan kin en un kin hetanhan, Jesus Mesiya eciyatanhan.

20. Wakantanka Ate unyanpi kin wowitan owihanke wanin kicihan nunwe. Amen.

21. Tona Mesiya en owotanna un kin hena nape wicayuza po. Hunkawanjin kiciyapi om waun kin hena nape niyuzapi.

22. Tona owotanna un kin hena owasin nape niyuzapi, Kesar tiyohnaka kin hena iyotan.

23. Jesus Mesiya Itancan unkiyapi towaonxida kin niyepi owasin en nicipi un nunwe. Amen.

COLOSSIANS.

PALOS OHNIHDE UNPI KIN HECA KOLOSE OYATE KIN WOWAPI
WICAKICAGE CIN HE DEE.

WICOWOYAKE 1.

1. Palos Wakantanka tawacin kin eciyatanhan Jesus Mesiya ohnihde ye cin Timoteyos hun-kawanjin unyanpi kin kici,

2. Kolose ekta tona owotanna un qa hunkawanjin kiciyapi Mesiya wacinyanpi kin hena *wowapi cicagapi*. Wowaonxida wookiye ko Wakantanka Ate unyanpi kin etanhan, qa Jesus Mesiya Itancan kin *etanhan*, nici unpi nunwe.

3. Ohinniyan niyepi on ceun-kiyapi qa on Wakantanka Jesus Mesiya Itancan unkiyapi Atku-ku kin wopida unkekiciyapi.

4. Jesus Mesiya wacinyayapi qa tona owotanna un kin owasin waxte wicayadakapi kin he na-unronpi;

5. Woape marpiya kin ekta enicihnakapi kin he ehanna wotanin waxte wicoie wicake cin en nayaranpi kin;

6. He en nihipi, maka kin owancaya iyaye cin he iyececa, qa waskuyeca aicaga, niyepi kin en nakun, anpetu kin en nayaranpi qa awicakehan Wakan-tanka towaonxida iyacupi qon ehantanhan.

7. Epapras unkitawaxipi wa-xte qa niyepi on Mesiya taokiye wicake cin he hena hecen onspe niciyapi;

8. Qa iye nitowaxtedake Woniya Wakan kin en un kin he unkokiyakapi.

9. Heon anpetu kin he naunronpi kin ehantanhan niyepi on cekiya unkayaxtanpi xni, qa woksape owasin wookarnige ko en iye tawacin sdonyapi kin on onijupidan kte cin he unkidapi ece.

10. Hecen taku iyokipi kin owasin on Itancan kin en tanyan mayanipi kta, wicoran waxte owasin en waskuyeca icar yayapi qa Wakantanka sdonyapi kin en sanpa inicagapi kta.

11. Qa iye towitan waxake cin on wowaxake owasin en waxag niyanpi kta, wadiwica-take cin owasin on etanhan qa wacin tankapi wiyuxkinpi ko.

12. Qa Ate yapi kin wopida eyakiyapi kta, he iyoyanpa ekta tona owotanna un kin woairpeye tawapi kte cin en ounpapi kta e iyehantu unyanpi.

13. He otpaza wowaxake kin etanhan unkiyuxpapi qa iye Ci-hintku waxte kidake cin toki-conze kin en ounye unkiyapi.

14. He en iye we kin eciya-tanhan wokajuju uahapi, woar-tani kajuju kin hee.

15. Wakantanka wanyagpica xni un kin ouncage kin hee qa

taku kagapi kin owasin en toka-pa kin hee.

16. Iye eciyatanhan taku owasin kagapi, marpiya ekta un qa maka akan un kin hena, taku wanyakapi qa taku wanyagpica xni, oiyotanke kin, wokiconze kin, wicoxkanxkan kin, qa wicowaxake kin, taku owasin iye on icar yapi kin hena iye içicaga.

17. Qa taku owasin itokatam un kin he iye, qa he on taku owasin ecen han.

18. Qa iye tancan kin okodakiciye kin hee qa pa kin he iye, qa otokahe kin, wiconțe etanhan tokaheya tonpi kin hee, hecen iye taku owasin en tokapa un kta.

19. Iye ohna taku ocowasin ounye kte cin he *Atkuku* kin iyokipi.

20. Qa iye can susbeca we kin eciyatanhan wookiye kage qa heon etanhan taku owasin iye kici okiciciye wicaye kta, taku maka akan un qa taku marpiya ekta un kin hena, iye on.

21. Qa nix niyepi ehanna oyate nitokecapi qa nitawacinpi kin en tōka kin henicapi, wicoran xice cin on, tuka nakaha he kici wokiye niyan nicagapi,

22. Iye cerpi tancan kin en te cin eciyatanhan, hecen iye itokam owotanna, qa takudan iyaonpepica xni, qa yacopica xni inajin niyanpi kta.

23. Wacinyanpi kin en naya-jinpi kinhan, sutaya yaunpi qa tinsa naya-jinpi qa wotanin waxte woape nayaranpi kin etanhan nihinrpayapi xni kinhan; he marpiya kin ihukuya wicaxta

hiyeye cin owasin owicakiyakapi, qa he en Palos he miye ookiye makagapi.

24. Nakaha niyepi kin on etanhan makakije cin heon imduxkin, qa Mesiya wokakije kin taku micerpi kin en yuxtanpi xni kin hena iye tancan kin okodakiciye kin hee on weciyuxtan kta.

25. He en ookiye makagapi, Wakantanka wokonze kin eciyatanhan, he niyepi on maqupi, Wakantanka oie kin mduecetu kte cin heon.

26. Taku oyakapi xni kin wicoicage qa wicoun ota kin ehantanhan anarmanpi kin he nakaka tona owotanna iye tawa wicaye cin hena owicakiyaka.

27. Ikcewicaxta kin ekta taku otanin xni kin de wowitan woyuha kin tinskokeca kin he Wakantanka hena sdonye wicakiye kta, he niyepi kin en Mesiya wowitan woape kin hee.

28. He unkiye unyaotaninpi, wicaxta kin owasin wahokonwicunkiyapi qa wicaxta owasin onspe wicunkiyapi ce, woksape owasin on; hecen Jesus Mesiya en wicaxta otaiyohi owotanna inajin wicunkiyapi kta.

29. Heon mix rtawani, iye oran kin miye en wowaxake on omakiran kin he eciyatanhan inawarni.

WICOWOYAKE 2.

1. Niyepi qa Laodikiya ekta un kin hena qa tona wicacerpi on miite kin wanmayakapi xni kin on token rtawani kin he sdonyayapi kta-wacin.

2. Hecen iye cantepi kin içi-
canptapi kta, wowaxtedake kin
en icicazontapi qa wookarnige
sduyapi woyuha owasin en,
qa Wakantanka wowiyukcan
oyakapi kin en, Ate yapi qa
Mesiya tawa kin hee.

3. He mahen woksape qa
wookarnige woyuha kin owasin
narmanpi.

4. Tuwedan wicoie skuya kin
on nihnayanpi kte xni heon
hena hepa.

5. Wicacerpi on ekta waun
xni exta woksape kin on cicipi
waun, imduxkin nioranpi owo-
tanna kin qa Mesiya sutaya
wacinyayapi kin he wanyag
waun.

6. Token Jesus Mesiya Itan-
can kin iyacupi qon he iyecen
ohna mani po.

7. Iye en sutaya hu nihdepi
qa inicagapi qa wicadapi kin
tinsa ayahanpi, onspeniciyapi
qon he iyeececa, qa en wopida
eyapi kin sanpa ota ecanonpi
kta.

8. Ihnuhan wicoie waxte xice
ça ikce wicahnayanpi kin on
tuwe nihnayanpi kin, wicaxta
wicowohdake oyakapi kin qa
maka akan taku tokaheya sduy-
yapi kin eciyatanhan, qa Mesiya
eciyanhan xni.

9. Iye ohna Taku Wakan
tancan kin ocowasin ounyan.

10. Qa iye en nix niyepi kin
yuecetu yaunpi, qa he woki-
conze wowaxake ko owasin
Itancan kin hee.

11. Qa he en ohomni bani-
xpapi, ohomni baxpapi nape co-
dan kagapi kin he on, Mesiya
ohomni baxpapi tawa kin eciya-

tanhan, wicacerpi woartani tan-
can kin erpeyapi kte cin heon.

12. Baptem on iye kici ni-
hnakapi qa nakun kici ekicetu
niyanpi, Wakantanka wicate cin
etanhan najin kiye cin he wo-
waxake kin wicayadapi kin
heon etanhan.

13. Qa niyepi ehanna waya-
rtanipi qa nicerpi ohomni baxpa-
pi xni kin en niṭapi, tuka iye
kici ni niyanpi qa woartani
owasin nicicajupui.

14. Qa wicoope kin en taku
nape on kagapi kin unkiyuxepi
qa kaxenyanpi kin he pajuju
qa can susbeca tawa kin en oka-
tan qa hecen yutokan iyeya.

15. Qa wokiconze wicowa-
xake ko yutakuni xni iyeye çe-
han ataninyan yuzamni qa he
en iwakte hdi.

16. Heon etanhan woyute qa
woyatke qa omnicieye wakan qa
wi teca qa anpetu okirpapi kin
hena on ihnuhan tuwe niyacopi
kin.

17. Hena e taku u kte eiqon
ohanzi nagi kin hee tuka tancan
kin he Mesiya etanhan.

18. Tuwe warpani içiye ça
marpiya ohnihde kin ohowicada
kin ihnuhan he nihnayanpi kin,
he taku wanyake xni kin en ye-
içiyeye ça iye cerpi tawacin kin
on ecinxniyan ihdatan;

19. Qa Pa kin he yuze xni;
he on tancan kin ocowasin ökihe
en iyakaxkapi kin on woyute
oiyahdeyapi qa iciyakaxkapi qa
hecen Wakantanka oicage kin
on icaga ece.

20. Heon etanhan maka kin
den taku tokaheya sduyapi kin
etanhan Mesiya kici niṭapi he-

cinhan tokeca e maka akan ya-nipi iyecen wicoope kin oya-papi he;

21. (Oyutanpi xni, utapi xni qa nape on icupi xni po,

22. Hena owasin unpi kin on atakuni xni iyaya ece;) wicaxta akantu wicoope qa woonspe kin eciyatanhan.

23. Wicoran kin he wicota-wacin ohodapi kin en taku woksape iyecen yuhe ça wicowarbadan qa wicatanacan itonkipapi xni kin hena en, qa wicacerpi taku iyokipi yuonihan xni.

WICOWOYAKE 3.

1. Heon etanhan Mesiya kici piya inicagapi hecinhan taku wankantuya Wakantanka etapa kin eciyatanhan Mesiya kiyotanke cin hen un kin hena akita po.

2. Taku wankan un kin hena awacin po, qa taku makata un kin hena *awacinpi* xni po.

3. Niṭapi qa nitowiconi kin he Mesiya kici Wakantanka en narmanpi.

4. Tohan Mesiya wiconi unkitawapi kin taninyan hiyu kinhan hehan wowitan kin ekta kici taninyan hidupi kta.

5. Nihuhapi makata un kin hena kikte po, wawicirarapi, waaxapapi, wawihnupi, tawacin xicapi, wahduhapikteca, he wakagapi okodapi kin hee.

6. Hena on etanhan Wakan-tanka tocanniye kin woakta xni cincapi kin en awicau ece.

7. Ehanna heña ehna yanipi qehan opeya mayanipi.

8. Tuka nakaha hena owasin

ayuxtan po, wocanniye, woxihda, wocantiyahdepi, waakagapi qa iapi xice cin niipi kin etanhan.

9. Ihnuhan oiycitonpi xni kin; wicaxta tannike cin iye wicoran ko yahduxdokapi;

10. Qa wicaxta teca kin he wosdoneye kin on yutecapi, wai-carya ouncage kin eciyatanhan, he kodakapi.

11. He en Helenes qa Juda *wicaxta* wanica; ohomni baxpapi qa ohomni baxpapi xni kin wanica; Ikcewicaxta qa Skutes wanica; wowidake un kin heca qa tawa içiyapi kin wanica, tuka Mesiya he ocowasin qa owasin en un.

12. Heon tona owotanna qa waxte dakapi kin, tona Wakan-tanka wicakarnige cin iyecen, wocantekiye koyaka po, qa wowaonxida, waraniçidapi xni, wicowarbadan, qa wacin tankapi kin hena ko.

13. Otoiyohei iyowinyeciciyapi qa otoiyohei yecicajujupi kta, tuwe wicaxta tokeca on taku xihda kinhan, Mesiya kin nicicajujupi kin he iyecen nix *econ* po.

14. Qa taku owasin akantanhan wowaxtedake *kiçun po*, wicoowotanna iyakaxkapi kin hee.

15. Qa Wakantanka tawookiye kin nicantepi kin en waniconzapi nunwe, he en wicatanacan wanjidan en nicopi kin pida un po.

16. Mesiya oie kin woksape owasin en, niyepi kin en iyatahdeya niunpi nunwe, psam qa odowan qa wakan dowanpi kin en otoiyohei wahokonyeciciyapi

qa onspeyeciciyapi kta, qa nicantepi kin en wowaonxida yuha Itancan kin iyadowanpi kta.

17. Qa taku ecanonpi kinhan wicoie qa wicoran kin uman tukte kaxta, Jesus Itancan kin caje on owasin econ po, qa on Wakantanka Ate yapi kin wopida eciya po.

18. Qa winorinea kin nihihnapi kin wicihukuya un po, Itancan kin en hecetu kin he iyececa.

19. Wicaxta kin nitawinpi kin waxte wicakida po, qa wicakigepi xni po.

20. Xiceca kin nihunkakepi kin taku owasin anawicakigoptan po, he Itancan kin iyokipi.

21. Qa ate yapi kin nicincepi kin xihda wicayapi xni po, hecen wacin iboxakapi kte xni.

22. Wowidake yaunpi kin tona wicacerpi eciyatanhan niyuhapi kin anawicakigoptan po; wicaxta iyokipi wicayapi kin iyecen ixta on *wawanyakapi* wawokiyapi kin hee xni, tuka cante okonwanjidan yuha Wakantanka kokipa po.

23. Qa taku ecanonpi kin owasin nicantepi kin eciyatanhan econ po, Itancan kin on etanhan qa wicaxta kin on etanhan xni.

24. Itancan kin etanhan taku ehnakapi woicu kin iyacupi kta he sdonyayapi; Mesiya Itancan kin wowidake niyanpi nakalex.

25. Tuka tuwe xicaya econ kinhan he eciyatanhan icu kta, qa wicaxta itohnake iwanyakapi kin wanica.

WICOWOYAKE 4.

1. Unkan Itancanpi kin tona wowidake wicaduhapi kin hena token owotanna kin ecen akidecen wicaqu po; marpiya ekta wanji Itancan yayapi yanke cin he sdonyayapi.

2. Wocekiye en yukanpi qa he en wopida eya wakta po.

3. Qa unkiye on wocekiye unkeyeciyapi kta, Wakantanka iapi tiyopa kin unkiyurdokapi kta qa Mesiya tawowiyukean kin unkoyakapi kta, on makaxkapi kin hee.

4. Qa hecen on taku token epe kte cin ecen mdaotanin kta.

5. Tona tankan unpi kin hena on ksamyahan mani po, qa anpetu kin opekiron po.

6. Ohinniyan iyaapi kin wowaonxida en un qa miniskuya on skuye yapi kta, hecen wicaxta otioyohi token awicaduptapi kte cin sdonyayapi kta.

7. Tucikos hunkawanjin kiciyapi waxte dakapi qa waawandake owotanna, Itancan kin en mitawaxi kin he taku miye ekta owasin oniciyakapi kta.

8. Heon etanhan niyepi kin ekta ye waxi, token yaunpi kin he sdonye qa nicantepi kin iyuxkin niyanpi kta;

9. Qa he kici Onesimos *ye waxi*, he hunkawanjin kiciyapi owotanna qa waxte enitanhanpi kin. Heniyoza taku owasin denun kin oniciyakapi kta.

10. Aristarkos kici makaxkapi kin he nape niyuzapi, qa Markos Barnabas tonxkaku nakun. He iwahoniyampi, niyepi ekta niipi kinhan ti mahen u xi po.

11. Qa Jesus, he nakun Justos eciyapi, hena ohomni baxpapi kin etanhanpi. Henana Wakantanka tokiconze kin en tawaxi wicawaye ça hena iyuxkin mayanpi.

12. Epapras enitanhanpi Mesiya taokiye kin hee nape niyuzapi; he ohinniyan wocekiye en niyepi on nina cekiya, Wakantanka tawacin kin owasin en owotanna qa ecedan nayajinpi kte cin heon.

13. Qa he omdaka, niyepi on, tona Laodikiya ekta un qa tona Hierapolis ekta un kin hena koya on nina rtani içiya.

14. Lukas pejihuta wicaxta waxte kin Demas kici nape niyuzapi.

15. Hunkawanjin kiciyapi Laodikiya ekta yukanpi kin hena nape wicayuza po, qa Numpas okodakiciye iye ti kin ohna un kin hena koya.

16. Wowapi kin de niyepi ekta yawapi kinhan okodakiciye Laodikiya ekta un kin hena nakun yawa wicakiya qo pa nix niyepi kin wowapi Laodikiya etanhan kin he nakun yawa po.

17. Qa Arcipos kaken eciyapo, Nitortani Itancan kin etanhan iyacu qon he awakicin wo, yahduxtan kta ce.

18. Palos he miye, nape kiciyuzapi kin de minape kin on wakaga. Makaxkapi kin kiksuya po. Wowaonxida niyepi en nicipi un nunwe. Amen.

FIRST THESSALONIANS.

PALOS OHNIHDE UNPI KIN HECA TESALONIKE OYATE KIN WOWAPI WICAKICAGE CIN TOKAHEYA KIN HE DEE.

WICOWOYAKE 1.

1. Palos qa Siluanos qa Timoteyos, Tesalonike ekta okodakiciye kin Wakantanka Ateyapi qa Jesus Mesiya Itancan kin en un kin *wowapi wicakicagapi*: Wowaonxida wookiye ko Wakantanka Ate unyanpi etanhan qa Jesus Mesiya Itancan kin nakun, niyepi en nicipi un nunwe.

2. Niyepi owasin on Wakantanka ohinniyan wopida unkekiyapi qa wocekiye unkeyapi kin en caje unniyatapi ece.

3. Qa wowaxinye wicoran nitawapi kin, qa wowaxtedake on rtayanipi kin, qa Wakantanka Ate unyanpi kin itokam Jesus Mesiya Itancan unkiyapi kin en ape dukanpi kin hena ohinniyan uniksuyapi.

4. Mihunkawanji waxte, Wakantanka nicarnigapi kin he sdonunyanpi.

5. Wotanin waxte unkitawapi kin wicoie kin ecedan ekta niipi xni, tuka wowaxake nakun, qa Woniya Wakan qa tanyan sdoniyapi kin en; niyepi ekta,

niyepi ōn etanhan wicaxta toun-kecapi kin sdonyayapi.

6. Wicokakije ota ehna qa Woniya Wakan wowiyuxkin kin yuha wicoie kin iyacupi, hecen Itancan kin oyapapi, qa nakun unkiyepi.

7. Hecen tona Makedoniya qa Akaya en wicadapi kin owasin waonspekiye niciyapi:

8. Qa niyepi kin etanhan Itancan oie kin oyakapi, Makedoniya qa Akaya ekta, qa hecedan xni, tuka owancaya Wakantanka wacinyayapi kin he ieyanpahapi qa hecen taku unkeyapi kta e iyehantu xni.

9. Hena e qe niye nicapi qa niyepi ekta tukten canku kin ohna unkiyorpapayapi kin he oyakapi, qa token wakagapi kin etanhan Wakantanka ekta nihduhonnipi, Wakantanka ni un qa wicake cin ohoyadapi kte cin heon.

10. Qa Cihintku kin marpiya eciyatanhan u ayapepi kta, he wiconṭe etanhan najin kiya, Jesus wocanniye u kte cin etanhan eunhdakupi kin hee.

WICOWOYAKE 2.

1. Mihunkawanji, niyepi ekta token unkiṭi kin niye e sdonyayapi, taku xni on unkiṭi xni.

2. Tuka Pilipi ekta kakix unyanpi qa unkirarapike cin niye sdonyayapi, qa he iyohakam Wakantanka unkitawapi kin on wadiuntakapi qa waakinicapi ota ehna wotanin waxte kin unkoniciyakapi.

3. Qa wowahokonkiye unkitawapi kin he wohuni qa wo-

axape eciyatanhan xni qa wohnae en un xni;

4. Tuka token wotanin waxte kin unhapi kta e Wakantanka iyowinunkiyapi kin he iyecen unkiapi ce; wicaxta kin iyokipi wicayapi iyecece xni, tuka Wakantanka uncantepi unkiyukcanpi kin he *iyokipi unyanpi kta*.

5. Tohini wicayatanpi wicoie kin unkeyapi xni, niye sdonyayapi, qa wahduhahapikteca xina kin unkinpi xni e Wakantanka sdonya.

6. Qa wicaxta kin etanhan wowitan unkakitapi xni, niyepi qa wicaxta tokeca umana etanhan xni, Mesiya ohnihde wicaye cin heuncapi kin heon unyuhonhanpi kta tuka.

7. Tuka niyepi cokaya warbadan unkanpi, azinkiya wan cinca icar wicakiye cin he iyecen.

8. Hecen nina cante en unniyuzapi qa waxte unnicidapi kin heon Wakantanka tawootanin waxte kin hee qa unnagipi kin hena ko unnicupi kte cin wicandapi kta tuka.

9. Mihunkawanji unkoranyanpi qa rtaunnipi kin yeksuyapi, hanyetu anpetu ko rtaunnipi, wotanin waxte Wakantanka tawa unkoniciyakapi kin he icunhan tuwedan tkeya qin unniciyapi kte xni uncinpi kin heon etanhan.

10. Niye sdonyayapi qa Wakantanka nakun, tona wicayadapi kin en wakanyan owotanna qa iyaonpepica xni unyakonpi.

11. Qa wicaxta cinca wahokonkiye cin he iyecen niyepi otoiyoḥi wahokonunniciyapi qa unnicihnanpi e sdonyayapi;

12. Qa Wakantanka iye to-
kiconze qa towitan kin en nico-
pi kin he iyokipiya mayanipi
kte cin he unkoniciyakapi.

13. Qa heon ohinniyan Wa-
kantanka wopida unkekiciyapi;
Wakantanka oie kin unkiyepi e-
tanhan nayaronpi qa iyacupi qe-
han wicaxta oie kin iyecen iya-
cupi xni tuka Wakantanka oie
wowicake kin he iyecen iyacupi,
he ix iye tona wicayadapi kin en
oranyan ece.

14. Mihunkawanji, nix niye-
pi kin Wakantanka taokodakici-
ye Juda makoce kin ekta Jesus
Mesiya en un kin hena owicaye-
cipapi, nix niye takuwicayayapi
kin eciyatanhan kakix niyanpi
kin, ix iye Juda oyate kin eci-
yatanhan kakix wicayapi qon
iyececa.

15. Hena e qe Jesus Itancan
kin ktepi qa wicaxta wokcan
wicayuhapi qon hena nakun, qa
xicaya unkuwapi, Wakantanka
iyokipi yapi xni qa wicaxta o-
wasin kaxe wicayapi.

16. Qa Ikcewicaxta nipi kte
cin iwahokonwicunkiyapi kta he
terindapi, qa hecen ohinniyan
wartanipi kin hduxtanpi kta.
Wocantiyahde owihanke aiya-
hdeya wanna awicau.

17. Tuka mihunkawanji, un-
kix niyepi kin etanhan ptecedan
eunyakupi, itohnake kin on,
cante kin he *wake* xni, heon ni-
tohnake wanunniyakapi kta nina
cantokpaniyan unakaitapi.

18. Heon etanhan ekta unni-
upi kta (Palos mix miye) wan-
cadan qa nonpa, tuka Satan iyo-
unkipi xni.

19. Woape qa wowiyuxkin

qa wowinkta watexdake unkita-
wapi kin he taku he; he nix ni-
yepi xni he; Jesus Mesiya Itan-
can unkiyapi hi kinhan he ito-
kam.

20. Wowitan qa wowiyuxkin
unkitawapi kin he niyepi.

WICOWOYAKE 3.

1. Unkan tins içiyapi unkoki-
hipi xni hehan Atenas ekta un-
kixnana unyakonpi kta he wa-
xte undakapi.

2. Qa Timoteyos hunkawan-
jin unyanpi, Wakantanka taoki-
ye qa Mesiya tawootanin waxte
kin en unkitawaxipi kin hee ye
unxipi, sutaya icar niyanpi qa
wacinyayapi kin eciyatanhan
wahokonnicciyapi kte cin heon
hecamon.

3. Qa hecen wicokakije kin
dena on tuwedan pahohopi kte
xni, hena ehna eunhdapi kin ni-
ye sdonyayapi.

4. Unkan niyepi kin opeya
unyakonpi qehan, wokakije un-
hapi kta, unkoniciyakapi, qa he
ecetu kin sdonyayapi.

5. Heon etanhan tins miçiye
kta owakitpani hehan token wa-
cinyayapi kin sdonwaye kta e
on he iyaye waxi, okini taku
wawiyutanyan un kin iniyutan-
pi naceca, qa hecen rtaunnipi
kin taku xni ye kta.

6. Tuka nakaha Timoteyos
niyepi kin etanhan en unhdipi
qa wacinyayapi wowaxtedake
nitawapi ko on wotanin waxte
unkokiyakapi, qa nakun ohinni-
yan waxte unyadakapi kin heon
wanunnyadakapi kte rinca, unkix
wanunniyakapi kte cin iyececa.

7. Heon etanhan mihunkawanji, wokakije wicocante xica ko unhapi kin owasin ehna niyepi on unkiçicanptapi, wacinyayapi kin heon.

8. Nakaha unnipi, nix niyepi kin Itancan en sutaya yaunpi kinhan.

9. Unkan tokiya tanhan niyepi on ake Wakantanka wopida unkekiciyapi kta unkokihipi he; niyepi on etanhan Wakantanka unkitawapi kin itokam wowyuxkin kin owasin on unkiyuxkinpi,

10. Hanyetu anpetu ko nina ceunkiyapi, nitohnake kin wanunniyakapi kta qa wacinyayapi kin en taku naharin ocowasin xni un kin he tanyan unniciyuxtanpi kta.

11. Wakantanka ix iye, Ate unyanpi kin, qa Jesus Mesiya Itancan unkiyapi kin niyepi ektacanku kin *ohna* tanyan ye unyanpi nunwe.

12. Qa otoiyohi waxte yecidakapi qa owasin waxte wicayadakapi kin he en Itancan kin icar niyanpi qa niciyuotapi nunwe, unkix waxte unnicidakapi kin he iyececa.

13. Qa heon wicoowotanna en nicantepi kin iyaonpepica xni niciyusutapi kta, Wakantanka Ate unyanpi kin itokam, tohan Jesus Mesiya Itancan unkiyapi kin tona owotanna un tawa wicaye cin owasin om hi kinhan.

WICOWOYAKE 4.

1. Unkan mihunkawanji, Jesus Itancan kin on etanhan cin unniciyapi qa ceunniciyapi, to-

ken mayanipi qa Wakantanka iyokipi yayapi kte cin unkiyepi etanhan iyacupi qon he iyecen sanpa iyoniptapi kte.

2. Jesus Itancan kin etanhan woahope kin tona unniçupi kin sdonyayapi.

3. Wakantanka niyuecepidan kin he tawacin kin he dee, wawicirarapi kin en nihdoyapi kte xni.

4. Hecen otoiyohi token nitancanpi kin yuecepidan qa yuonihanpi kin en yahduhapi kte cin sdonyakiyapi kta.

5. Qa wicotawacin xica cantihayapi kin he en unpi kte xni; Ikcewicaxta Wakantanka sdonyapi xni kin hena heconpi ce.

6. Taku en tuwedan hunkawanjilku kin kape ça hnaye kte xni, tona heconpi kin owasin Itancan kin tokiçon ce, unkoniciyakapi qa sdonye unniciyapi qon iyececa.

7. Woartani kin en Wakantanka unkcipi xni, tuka unyuecepidan kte cin heon.

8. Hecen he tuwe akta xni kinhan he wicaxta kin paha iye-wicaye xni, tuka Wakantanka, he nakun Taniya Wakan unqupi kin hee *paha iyeya*.

9. Hunkawanjin kiciyapi waxte kicidakapi kin icartagya wuwapi cicagapi kte cin he hecetu xni. Otoiyohi waxte yecidakapi kta he nix niye Wakantanka etanhan onnispepi.

10. Qa Makedoniya owanca-ya hunkawanjin kiciyapi kin owasin hecawicayeconpi ece. Tuka mihunkawanji, ceunnici-

yapi ce, nakun sanpa nina ini-cagapi kte.

11. Ito aiçiciya owanji yukan po, qa taku tin nicihe cin hduxtan po, qa niye ninapepi kin on rtayanipi kta, econ unnixipi qon iyecen.

12. Qa hecen tona tankan unpi kin hena on owotanna mayanipi kta qa takudan icakije xni yaunpi kta.

13. Unkan mihunkawanji, tona ixtimapi kin hena on sdone xni dukanpi kta wacin xni, hena on iyonieixicapi kte xni, umanpi kin woape nicapi kin hececapi.

14. Jesus te ça ake piya ikicage cin he wicaundapi kinhan he iyecen tona Jesus en ixtimapi kin hena iye kici u wicakiye kta.

15. Qa Itancan oie kin eciyatanhan he de unkoniciyakapi, unkiye tona unnipi qa Itancan hi kte cin iyounhipi kinhan tona ixtimapi kin hena kawicunpapi kte xni.

16. Itancan kin ahotaninpi qa marpiya ohnihde itancan wan ho kin qa Wakantanka maza yahotonpi tanka tawa ko yuha marpiya kin eciyatanhan kun u kta, qa tona Mesiya en tapi qon hena tokaheya najinpi kta.

17. Hehan unkiye tona unnipi qa he iyounhipi kinhan hena om marpiya xapa ekta eunhdakupi kta, okotonyan kin ehna Itancan kin itkounkipapi kta, qa hecen ohinniyan Itancan kin kici unyakonpi kta.

18. Wicoie kin hena on otoiyohi wahokonkiciciya po.

WICOWOYAKE 5.

1. Mihunkawanji, omaka qa makoncage kin on wowapi cica-gapi kta yacinpi xni;

2. Wamanon sa hanyetu icunhan hi kin he iyecen Itancan taanpetu kin u, nix niyepi kin tanyan sdonyayapi.

3. Tohan, Wokiyapi qa tanyan yukanpi ce, eyapi kinhan hehan ihnuhanna wicotakuni xni awicau kta, winorinca cinca ton kte cin yazan hinhde cin he iyececa, qa najicapi kte xni.

4. Tuka mihunkawanji, nix niyepi kin otpaza ehna yaunpi xni qa hecen anpetu kin he wamanon sa iyecen aniupi kte xni.

5. Niyepi owasin iyoyanpa cinca kin henicapi qa anpetu cincapi kin. Unkiyepi hanyetu otpaza kici unketanhanpi xni.

6. Heon etanhan wicaxta tokeca iyecen unkixtimapi kte xni, tuka kiktahan witko xni unyakonpi kta.

7. Tona ixtimapi kinhan hena hanyetu icunhan ixtimapi, qa tona witkopi kinhan hena hanyetu en witko unpi ece.

8. Tuka unkiye anpetu kin unketanhanpi qa heon witko xni unyakonpi kta, wowacinye woxatedake ko maku akarpe kin unkiçunpi kta, qa wiconi apepi kin he maza wapaha unyanpi kta.

9. Wakantanka wocanteptanye en eunhdepi xni, tuka Jesus Mesiya Itancan unkiyapi kin eciyatanhan wiconi unkicupi kte cin.

10. He iye unkiyepi on ta, hecen kiktahan unyakonpi qa ix

unkixtimapi uman tukte *ecetu* kinhan kici unnipi kta.

11. Heon etanhan otoiyo hi wahokonkiciciyapi qa onspekiciciya po, ecanonpi kin hececa.

12. Hunkawanjin unniyanpi kin ceunniciyapi ce; tona niyepi en rtanipi qa Itancan kin on awanniyakapi qa wahokonniciyapi kin hena sdonwicaya po.

13. Qa wicoran yuhapi kin on etanhan wowaxtedake on sutaya cante en wicayuza po. Okiciciya yakon po.

14. Hunkawanjin unniyanpi kin ceunniciyapi ce; tona yuxkixkeya unpi kin hena iyopewicaya po, tona wacin cistina hin hena wicakihnan po, tona waxake xni un kin hena owicakiya po, qa wicaxta owasin on wacin tanka po.

15. Ihnuhan tuwe taku xica on itkom taku xica econ kinhan, tuka ohinniyan nix niyepi kin otoiyo hi on qa wicaxta owasin on taku waxte ecedan akita po.

16. Ohinniyan iyuxkin po.

17. Ayaxtan xni cekiya po.

18. Taku owasin on wopida eya po. He niyepi on Jesus

Mesiya en Wakantanka tawacin kin hee.

19. Woniya wakan kin sni kiyapi xni po.

20. Wiyukeanpi kin irarapi xni po.

21. Taku owasin iyukeanpi qa waxte kin he tinsa yuha po.

22. Taku xica ocaje owasin nakicipa po.

23. Qa wookiye Wakantanka kin niyepi ocowasin niyuecepi-dan nunwe; hecen ninagipi kin ocowasin, qa nitawacinpi qa nitancanpi kin iyaonpepica xni niyuhapi kta, Jesus Mesiya Itancan unkiyapi kin hi kte cin hehanyan.

24. Tuwe nicopi kin he wacinyepica qa ecen econ kta.

25. Mihunkawanji, unkiyepi kin on cekiya po.

26. Iiputakapi wakan kin on hunkawanjin kiciyapi kin owasin i iwicaputaka po.

27. Itancan kin on hecon cixipi, hunkawanjin kiciyapi wakan kin owasin ekta wowapi kin de yawapi kta.

28. Jesus Mesiya Itancan unkiyapi kin towaonxida kin nicipi un nunwe. Amen.

SECOND THESSALONIANS.

PALOS OHNIHDE UNPI KIN HECA TESALONIKE OYATE KIN WOWAPI
WICAKICAGE CIN HE DEE.

WICOWOYAKE 1.

1. Palos qa Siluanos qa Timoteyos Tesalonike ekta okodakiciye Wakantanka Ate unyanpi qa Jesus Mesiya Itancan kin en un kin hena *wowapi wicakicagapi*,

2. Wowaonxida wookiye ko Wakantanka Ate unyanpi kin qa Jesus Mesiya Itancan kin etanhan nicipi un nunwe.

3. Mihunkawanji, wacinyayapi kin he nina icage qa wowaxtedake nitawapi kin otoiyohe en nina niciyuotapi kin heon ohinniyan niyepi on Wakantanka wopida unkekiciyapi kte cin he hecetu.

4. Hecen niyepi on unkiye Wakantanka okodakiciye tawa kin en unkiwinktapi ce, xicaya nicuwapi kin owasin qa wokakije duhapi kin en wacinyan wakixagya yaunpi kin heon.

5. Wakantanka tawoyaco owotanna wowapetokeca kin he dee, hecen Wakantanka tokiconze kin iyehantu niyawapi kta, heon etanhan kakix niyanpi ce.

6. Tona kakix niyanpi kin hena itkom Wakantanka wokakije wicaqu kta, he owotanna.

7. Qa tona kakixya yaunpi kin nix niyepi kin oziiçiya un-kici yaunpi kta; tohan Jesus Itancan kin towaxake ohnihde

wicaye cin om marpiya kin eciyatanhan ihdutaninyan u kinhan.

8. Peta ide en *ihdutanin kta* qa tona Wakantanka sdonyapi xni qa Jesus Mesiya Itancan unkiyapi kin aktapi xni kin hena woxitkihda wicaqu kta;

9. Hena e Itancan itohnake kin etanhan wicotakuni xni owihanke wanin on kakijapi kta.

10. Tohan tona owotanna un tawa wicaye cin en yuotaninpi kta e hi kinhan, qa tona iye wacinyanpi kin hena owasin on yatanpi kta, anpetu kin hehantu kinhan; (unyaotaninpi qon wicayadapi kin heon.)

11. Qa heon etanhan ohinniyan niyepi on ceunkiyapi, Wakantanka wicakico kin de iye-hantu niyawapi kta qa towaxte iyokipi kin ocowasin hduxtankta, qa wowaxake en wacinyanpi wicoran kin he koya.

12. Hecen on Jesus Mesiya Itancan unkiyapi caje kin niyepi on yuonihanpi kta qa niye yecicapi kta, Wakantanka unkitawapi qa Jesus Mesiya Itancan kin eciyatanhan.

WICOWOYAKE 2.

1. Mihunkawanji Jesus Mesiya Itancan unkiyapi u kte cin

hee qa en mniunkiciyapi kte cin heniyoza on ceunniciyapi ce;

2. Ihnuhan wicanagi qa wic-oie qa wowapi unnicagapi kin on ihnuhanna nitawacinpi ekta nihuhuzapi qa ininihanpi kin, Mesiya taanpetu kin kiyadan u kin hececa.

3. Ihnuhan tuwe taku on nihnyanpi kin; woayuxtan wan tokaheya u kta qa woartani wicaxta kin wicotakuni xni eihintku kin hee e yutaninpi kta.

4. He iye taku Wakan eyapi kin taku ohodapi ko owasin iwankam yeiçiye ça kici kiciza, hecen iye Wakantanka iyecen tipi wakan Wakantanka tawa kin en iyotanke ça Wakantanka keiçiya oihdaka.

5. Cicipi waun qehan hena ociciyakapi yeksuyapi xni he.

6. Unkan nakaha taku iyo-wicakí xni ece kin he sdonyayapi; hecen tohantu kinhan taninyan hiyu kta.

7. Woartani wowiyukean kin wanna ecen econ, tuka tuwe he iyokí xni kin he tohanyan tokan iyeyapi xni kin hehanyan iyo-wicakí kte xni.

8. Hehan taku ocin xice cin he tanin kta, he Itancan kin Taniya iye i kin etanhan u kin on, qa itohnake wiyatpa kin on ihang ye kta.

9. Tuwe Satan oran kin eciyatanhan wicokihi owasin qa wowapetokeca qa wowinihan wicoran itonxni kin yuha u,

10. Qa tona awihnuni kin hena en woartani wohnaye owasin koya; hena wowicake waxte dakapi kin on nipi kte cin he aktapi xni, heon etanhan.

11. Qa heon etanhan hena en Wakantanka wohnaye wawokihhi kin awicau kta, hecen woi-tonxni kin wicadapi kta.

12. Qa hecen tona wowicake wicadapi xni qa woartani en iyuxkinpi kin hena owasin wicayaco pi kta.

13. Tuka mihunkawanji, Itancan waxte nidakapi kin niyepi on unkiye ohinniyan Wakantanka wopida unkekiciyapi kta, otokaheya tanhan Woniya Wakan wicayuecedan wicadapi kin he on Wakantanka wiconi on nicarnigapi kin heon etanhan.

14. Qa he inicopi, wotanin waxte unkitawapi kin on, hecen Jesus Mesiya Itancan unkiyapi towitan kin iyacupi kta.

15. Heon etanhan hunkawanjin ciyapi kin sutaya najin po, qa woope oyakapi wicoie qa wowapi unkitawapi kin eciyatanhan onspenicoyapi kin hena katinyan opa po.

16. Qa Jesus Mesiya Itancan unkiyapi kin hee qa Wakantanka Ate unyanpi kin iye waxte undakapi qa wicimdeza owihanke wanice cin wowaonxida eciyatanhan woape waxte ko unqupi kin,

17. He nicantepi kin mdes niyanpi qa wicoie wicoran ko waxte kin owasin en niyusutapi nunwe.

WICOWOYAKE 3.

1. Unkan ehake mihunkawanji, unkiyepi on cekiya po, Itancan oie kin inyanke ça wo-

witan kta, niyepi kin ehna iyececa.

2. Qa wicaxta xice ça wicaxtapi xni kin etanhan eunhdakupi kta; wicaxta owasin wacin-yanpi xni kin heon.

3. Tuka Itancan kin wicakecin he niyusutapi qa taku xica etanhan enihdakupi kta.

4. Itancan kin en niyepi on kaken awauncinpi, token econ unnixipi qon ecen ecanonpi qa eex-nakun ecanonpi kta.

5. Qa Itancan kin nicantepi kin Wakantanka towaxte qa Mesiya wacinyan aepi kin ekta ye niyanpi nunwe.

6. Unkan mihunkawanji, Jesus Mesiya Itancan unkiyapi caje kin on ceunniciyapi ce, hunkawanjin kiciyapi wan ecinxniyan mani qa wicoope unnicupipi qon eciyatanhan xni kinhan he nakicipa po.

7. Token unkoyecipapi kte cin niye sdoniyayapi; niyepi en oxkixkeya maunnipi xni.

8. Qa tuwedan aguyapi tawa iyunwin codan untapi xni, tuka wicortani wicokakije ko ehna hanyetu anpetu ko rtaunnipi, tuwedan takudan unkinicazopi kte xni, heon.

9. Unkokihipi xni kin heon etanhan xni, tuka unkiye waonspekiya yuhe unniciyapi qa unkoyapapi kte cin heon.

10. Nicipi unyakonpi qehan

he de unkoniciyakapi, Tuwe rtanipi tawaŋenye xni kinhan he takudan yute kte xni ce.

11. Enitanhanpi wanjikji ecinxniyan manipi qa takudan tokonpi xni tuka waaie sa hecapi kin he naunronpi.

12. Tona hececapi kin hena Jesus Mesiya Itancan unkiyapi kin etanhan wahokonwicunki-yapi qa econ wicunxipi, inina rtanipi qa aguyapi tawapi kin hdutapi kta.

13. Unkan mihunkawanji, nix niyepi kin taku waxte econpi kin econ kapinpi xni po.

14. Qa tuwe wowapi kin de en unkoiepi kin anaungoptanpi xni kinhan he iwanyakapi qa kici okiciciyapi xni po, hecen ixtece kta ce.

15. Tóka yapi xni po, tuka hunkawanjin kiciyapi kin iyecen wahokonkiya po.

16. Qa ohinniyan taku owasin on etanhan wookiye Itancan wookiye nicupipi nunwe. Itancan kin niyepi owasin en nicipipi un nunwe.

17. Palos he miye, napekiciyuzapi kin de minape on *wakaga*, he wowapi otoiyohe en wowapetokeca kin hee, hecen wakaga ce.

18. Jesus Mesiya Itancan unkiyapi kin towaonxida kin niyepi owasin en nicipipi un nunwe.

FIRST TIMOTHY.

PALOS OHNIHDE UN KIN TIMOTEYOS WOWAPI KICAGE CIN TOKAHEYA
KIN HE DEE.

WICOWOYAKE 1.

1. Palos Jesus Mesiya ohni-
hde tawa kin Wakantanka Wa-
nikiya unkitawapi Jesus Mesiya
Itancan wacinunyanpi kin hee
tawoope kin eciyatanhan,

2. Timoteyos wacinyanpi kin
eciyanhan micinkxi kin hee,
wowaxte, wowaonxida, wooki-
ye ko Wakantanka Ate unyanpi
qa Jesus Mesiya Itancan unki-
yapi kin hena etanhan kiciun
nunwe.

3. Makedoniya ekta mde kte
çehan Epesos en owanji yanke
cixi, wanjikji woonspe tokeca
oyakapi kte xni e iwahokonwi-
cayakiye kte cin heon.

4. Qa hitunkakanpi wicoicage
owihanke xni oyakapi ko awa-
cimpi kte xni, hena taku kin wi-
wangapi eceedan okihi qa on
Wakantanka wacinyanpi kin en
icar yapi xni.

5. Wicacante eceedan, wica-
nagi waxte qa wacinyanpi ana-
rmanpi xni kin etanhan wacan-
tkiyapi kin he woahope ecetu
yapi kin hee.

6. Tona he icunonpa yapi kin
hena takuxnixni akinicapi kin
en ye içiyapi.

7. Woope waonspekiyapi cin-
pi tuka taku tona eyapi qa wica-
keyahan kitanpi tuka he taku-
dan sdonyapi xni.

8. Woope kin he waxte sdon-
unyanpi, tuwe woope kin iye-
cen yuhe cinhan.

9. Qa he de sdonunyanpi,
woope kin he wicaxta owotanna
kicagapi xni, tuka tona woope
opapi xni qa anagoptanpi xni
kin hena wicakicagapi, waakta-
pi xni qa wartanipi sa, waonxi-
dapi xni qa wayaxicapi, atkuku
hunku kici wicakaxtakapi qa
wicaxta wicakapapi kin hena,

10. Wawicirarapi econpi, wa-
ihuhupi sa, wicaxta mawica-
nonpi, itonpixni, wokonze kica-
ksapi kin hena *woope wicakica-
gapi*, qa taku tokeca woonspe
okonwanjidan kaxeye cinhan
hee rakun.

11. Wowaxte Wakantanka
wowitan en wotanin waxte yu-
he maxi kin he eciyatanhan.

12. Jesus Mesiya Itancan un-
kiyapi he okihi maye ça wacin-
yepica madake ça wicortani kin
de en ye maye ciqon he wopida
ewakiya.

13. Toka qehan wauxtewahda
qa xicaya wicawakuwa qa wa-
ranmicida, hena wicawada xni
icunhan iyukean xni ecamon, tu-
ka onximakidapi.

14. Qa Itancan unkiyapi to-
waonxida kin he wacinyanpi qa
waxte kicidapi Jesus Mesiya en
nina yuota aya.

15. Wicoie kin de wacinye-pica qa owancaya icupi kta oki-hi, Jesus Mesiya wartanipi sa ni wicaye kta e on makata hi; hena en miye imayotan.

16. Tuka heon etanhan on-ximadapi, hecen miye en toka-heya Jesus Mesiya wawacinkta yuza tanka owasin yutanin kta, tona mihakam owihanke wanin wiconi *icupi* kta e wicadapi kte cin hena en waonspekiya waun kta heon *hecon*.

17. Wicaxtayatapi owihanke wanica, *tepica* xni qa wanyake-pica xni un kin Wakantanka ecedan ksape cin hee woyuoni-han wowitan ko owihanke wa-nin kicihan nunwe.

18. Timoteyos micinkxi wo-pe kin de ciçu, niye on wokcan-pi tokaheya ekta un qon hena eciyatanhan, hecen hena on ozu-ye waxte en akicita oyape kta;

19. Wacinyanpi qa nagi wa-xte sutaya duhe kte cin heon. He wanjikji erpeyapi qa on wa-cinyanpi ekta kamden iyeiciya-pi.

20. Yumenayos Aleksandros kici, hena hececap, hena Satan waqu, waoxtehdapi kte xni kin onspe içiciyapi kte cin heon.

WICOWOYAKE 2.

1. Heon taku owasin tokahe-ya wicaxta kin owasin on woki-dapi wocekiye waiciyapi wicoie wopida ko eyapi kta wacin.

2. Wicaxtayatapi kin hena on, qa tona itancan unpi kin o-wasin, hecen woockiye wiconi kin on wikope xni unnipi kta,

wowaxte qa wicoran owotanna kin en.

3. He waxte qa Wakantanka Wanikiya unkitawapi kin itokam woiyokipi kin hee.

4. He iye wicaxta owasin ni-pi qa wowicake sdonyapi kin en hipi kte cin he cin.

5. Taku Wakan wanjidan qa Wakantanka wicaxta ko hena kici wiciyotahedan un kin wan-ji, Jesus Mesiya wicaxta kin hee.

6. He iye atayedan *wicaxta* owasin on wopekton wicaqupi kin hecen içiçu, anpetu tawa kin en waayatanin kte cin heon.

7. He taku kin en womdake ça ohnihdeya un kin makagapi; (Mesiya en wowicake epe cin, itonxni mawanica;) wowacinye wowicake ko on Ikcewicaxta kin ekta waonspekiye cin he-maca.

8. Heon wicaxta kin owan-caya, wocanniye waakinicapi ko wanin nape axape xni kiyu-gan cekiyapi kta wacin.

9. Qa winorinea kin ix eya iyecen wokoyake oiyokipi kin kiçunpi kta, qa tawacin waxte wacin tankapi koya; qa paha sonpi, maza ska zi, inyan oki-tanin kin qa wokoyake taku ota iyoheyapi kin hena ko *unpi* kte xni.

10. Tuka wicoran waxte kin hena, taku winorinea tona Wa-kantanka awacinpi kin iyokipi-pi kin hee.

11. Qa winorinea kin inina yanke ça owasin anagoptanpi kin on onspe içiciye kta.

12. Tuka winorinea kin ix waonspekiye ça wicaxta kin

iwicadake kta e iyowinwakiye xni, he inina yanke kta.

13. Adam he tokaheya kagapi, qa hehan Ewe.

14. Qa Adam hnayanpi xni tuka winorinea kin iye hnayanpi qa hecen woartani hiyahdeya.

15. Tuka ix eya cinca tonpi kin en ni yanpi kta, wacinyanpi, wacantkiyapi, wicoran waxte qa wacin tankapi kin hduha yukanpi kinhan.

WICOWOYAKE 3.

1. Iapi kin he wowicake; tuwe waawanhdake unpi cin kinhan hee wicoran waxte cin.

2. Tuka waawanhdake cin he iyaonpepica xni un kta, winorinea wanjidan yuze kta, waktaya un kta, wacin ksapa, warbayedan, oranpi, wowicakiyaka;

3. Mini xa en iyeiçiye kte xni, wacinko xni; tuka wihdukeanyan un kta, taku xihda xni, qa maza ska e iyotan dake kte xni.

4. Wicowazi tawa kin tanyan hduhe kta, qa owasin warbayedan cinca kin anagoptan wicakiye kta.

5. Tuwe wicowazi tawa kin tanyan hduha okihi xni kinhan ecin token Wakantanka taokodakiciye kin tanyan yuhe kta he.

6. Axkatudan en opapi kin hecece kte xni, he hecetu xni kinhan waraniçida un Wakanxica tawoyaco kin ekta iyaye kta.

7. Qa tona itankan yakonpi kin hena tanyan oyakapi un kta,

he hecetu xni kinhan wowirara ya un kta qa Wakanxica wihinunke tawa kin en iyorpaye kta.

8. Hecen on hunka yapi un kin hena nakun okonwanjidan kta, oie nonpa xni, mini xa en iyopte xni qa wahduhahaktece xni.

9. Qa nagi ecedan ohna wowacinye wowiyukcan kin hduhe kta.

10. Hena tokaheya iyukcanpi kta, qa hehan takudan iyaonpepica xni kinhan hunka yapi un kin en iyeyapi kta.

11. Nakun ix tawicupi kin warbapidan kta, waaie xni unpi kta, waktaya unpi kta, taku owasin on owotanpidan.

12. Hunka yapi un kin ix tawicu wanjidan kta, cinca wicayapi qa wicowazi tawapi kin tanyan hduhapi kta.

13. Tona hunka yapi un wicoran kin tanyan yuhapi kin hena wowitan waxte qa Jesus Mesiya wacinyanpi kin en waditaka içicagapi.

14. Dena hecen wowapi cicağa, kohanna niye en ciu kta wacin.

15. Tuka tehan wai xni kinhan deeiya tanhan on taku sdonyaye kta qa hecen on opiniçiye kta, Wakantanka ti kin ohna, he okodakiciye Wakantanka ni un tawa kin ee, wowicake ihupa qa taku ahe cin hee.

16. Unkan he taku aiepica xni, Wakantanka awacinpi kin he wowiyukcan tanka; Wakantanka wicacerpi en ihdutanin qon, Woniya kin on yuwotan-na kagapi, marpiya ohnihde kin

hee wanyakapi, Ikcewicaxta kin ekta oyakapi, wicoicage kin en wicadapi, qa wowitan kin ekta wankan ehdakupi.

WICOWOYAKE 4.

1. Woniya Wakan atayedan heye ciqon, Anpetu ihankeya kin hehan wanjikji wacinyanpi kin ayuxtanpi kta, qa taku wakan wohndaye taku wakan xicapi tawoonspepi ko anagoptanpi kta.

2. Wohndaye woitonxni iapi kta, nagi kin maza kata on guguyapi kin heon.

3. Winorinea yuzapi kin he terindapi qa woyute, tona wowicake wicadapi qa sdoniyapi kin hena wopida eya icupi kta e Wakantanka kaga, hee yute xni wicaxipi.

4. Taku Wakantanka kage cin he owasin waxte qa wopida yuha icupi kinhan takudan orinyanpi kte xni.

5. He Wakantanka oie wocekiye ko on yuwakanpi.

6. Hena taku kin hunkawanjin kiciyapi kin kiksuye wicayaye cinhan Jesus Mesiya taokiye waxte yaun kta, wacinyanpi wicoie qa woonspe waxte ekta iyohiyaye cin hena en tanyan icar niyanpi kta.

7. Tuka takuxnixni kin wakanka hitunkakanpi yuhapi ko nakicipe qa Wakantanka awacinpi kin he amniheiciya wo.

8. Wicatancan ye iciyapi kin he axkayedan taku okihi, tuka Wakantanka awacinpi kin he taku owasin okihi, wiconi kin

de qa wanji u kte cin hena wahoyapi kin yuha.

9. He iapi kin wowicake qa owancaya anagoptanpi kta okihi;

10. Wakantanka ni un wicaxta owasin Wanikiya tawapi, qa iyotan tona wicadapi kin he *tawapi*, he wacinunyanpi kin heon rtaunnipi qa oxtedapi unyakonpi.

11. Hena taku kin iwahokonwicakiye qa onspewicakiya wo.

12. Konixka yaun kin heon tuwedan iwarte nida kte xni, tuka tona wicadapi kin ekta wonspekiya wo, wicoie kin en, wicoran kin en, wacantkiyapi kin en, woksape kin en, wacinyanpi kin en, woyuecedan kin en.

13. Wowapi yawapi, oyakapi qa onspekiyapi kin hena awacin un wo, wau xni kin hehanyan.

14. Taku wawokihi en niun kin wokcanpi qa waawanhdakeunpi napepi kin aniputakapi kin en niçupi qon he akiktonje xni wo.

15. Hena taku kin awacin qa ocowasin en ye iciya wo, hecen onspe niçiciye cin owasin sdoniyapi kta.

16. Atayedan awaiçicin qa woonspe nitawa kin awakicin wo, he hduha wo. Hecanon kinhan ni niçiyaye qa tona nani ronpi kin hena nakun ni wicayaye kta.

WICOWOYAKE 5.

1. Wicaxta tanka kin iyopeyexni wo, ate yapi un kin iyecen wahokonkiya wo, qa tona koxka

unpi kin hena hunkawanjin kiciyapi kin iyecen;

2. Winorinca tankapi kin hena ix ina wicayapi un kin iyecen *wahokonwicakiya wo*, woyuecedan owasin en.

3. Wiwazicapi kin, tona awicakehan wiwazicapi un kin hena wicayuonihan wo.

4. Tuka wiwazica wan cinca wicaye cin qa takojakpaku yuke cinhan hena tokaheya wicowazi tawapi kin en wowaxte econ onspe içiciyapi kta qa hunkake wicayapi kin taku wicakicupi kta, he taku waxte qa Wakan-tanka itokam woiyokipi kin hee.

5. Tuwe awicakehan wiwazica un kin he ixnana erpeyapi un, Wakantanka wacinye ça ohinniyan hanyetu anpetu ko wocekiye eyapi qa hoyekiyapi kin en un.

6. Tuka tuwe iyokipi içiya un kinhan he ni un *exta* wana ta.

7. Hena hecen iwahokonwicakiya wo, hecen iyaonpepica xni un kta.

8. Qa tuwe tona wicayuhe cin qa iyotan tiyohnaka tawa kin taku wieakicamna xni kinhan he wacinyanpi kin wanna ayuxtan qa waawacin xni kin sam iyeya wicaxta xica.

9. Wiwazica waniyetu wikcemna xakpe ihukuya un kin he karnigapi kte xni. He wicaxta wanjidan hihnaye cigon,

10. Wicoran waxte on tanyan oyakapi, cinca icar wicakiye cin, oicimani kin won wicaye cin, tona owotanna un siha kin wieakiyujaja kin, tona kakijapi kin owicakiye cin, wicoran

waxte owasin amniheiciya ope cin.

11. Tuka wiwazica tona axkatudan wotapi kin hena wickarnige xni wo, tohan Mesiya en xkehanhan aye cinhan ake hihna tonpi kta.

12. Qa tokaheya ekta wacinyanpi qon he ayuxtanpi kin heon woyaco aihduhapi.

13. Qa nakun takudan eon xni içicagapi, ti iyaza yakonpi qa kujapi hecedan xni, nakun taku oyakapi sa qa waaiapi sa, taku token eyapi kte xni hena ecen eyapi.

14. Heon tona naharin wixokapi kin hena hihna tonpi kta, cinca tonpi kta, qa tiyohnaka hduhapi kta wacin, hecen toka kin taku iyawicaonpe kta okihi xni kagapi kta.

15. Wanna wanjikji icunonpa Satan ihakam iyayapi.

16. Wicaxta wanji qa ix winorinca wanji wacinyan un kin he wiwazica hduhe cinhan okiye kta, hecen okodakiciye kin tkeya qinpi kte xni, qa tona awicakehan wiwazica unpi kin hena ece owicakiyapi kta.

17. Waawandake un kin tona tanyan awandakapi kinhan hena wowitan icitakhna wickiciyawapi kta, tona wicoie waonspekiyapi ko en rtanipi kin hena iyotan.

18. Wowapi wakan kin hecen eya, Tatanka aguyapi napan kin he iohmus sutaya iyacu kte xni. Qa ake, Tuwe rtani kin he taku on opetonpi qon iyohi ece.

19. Waayatanin nonpa qa yamni duhe xni kinhan hunka

yapi un kin wanji en wiyaonpapi aupi kin anagoptan xni wo.

20. Tona wartanipi kinhan hena owasin itokam taninyan iyopewicaya wo, hecen umanpi kin kokipapi kta.

21. Wakantanka itokam qa Jesus Mesiya Itancan kin mapiya ohnihde wicakarnigapi kin hena ko *itokam* wakanyan wahokonciyiya, hena taku kin ecinxniyan yacopi wanin duhe qa wicaxta iwanyakapi kte cin on etanhan takudan ecanon kte xni.

22. Tuwe *pa kin* en ihnuhanna nape aputake xni wo, qa wicaxta tokeca wartanipi kin en ope xni wo. Ecedan ihduha wo.

23. Tokata mini ecedan yatke xni wo, nitezi kin on qa waniyazan sa kin heon mini xa waniqadan yatkan wo.

24. Wicaxta wanjikji wartanipi kin tokaheya tanin qa itokam woyaco ekta iyaya, qa hunr wicihakam iyaya ece.

25. Qa he iyecen wicoran waxte wanjikji tokaheya tanin qa tona hecece xni exta anarbecapica xni un.

WICOWOYAKE 6.

1. Wowidake un kin tona can napinpi kin ihukuya yukanpi kin hena itancan wicayawapi kin wicakinihanpi owasin okihi wicahdawapi kta, hecen Wakantanka caje qa tawoonspe kin oxtehdapi kte xni.

2. Qa tona itancanpi wacinyan unpi kin heca wicayuhapi kinhan hena xice wicakidapi kte xni, kici hunkawanjin kiciyapi

kin heon. Tuka en wowidake unpi kta, waxte qa wacinyepica qa taku en owicakicipapi kin heon etanhan. Hena hecen onspewicakiye qa wahokonwicakiya wo.

3. Tuwe togye waonspekiye qa wicoie waxte Jesus Mesiya Itancan unkiyapi oie kin, wicoran ecedan kin eciyatanhan un kin hena wicada xni kinhan,

4. He waraniçida qa takudan sdonye xni un, tuka wakinicapi wiwangapi wicoie kin en cante kin ocowasin iyeiçiya; hena etanhan winawiziapi, wakinicapi, waoxtehdapi, woawacin xica ko icaga.

5. Qa wicaxta tawacin xicapi kin oxkixkeya hdokinicapi, wovicake yuhapi xni qa taku kamnanpi kinhan he Wakantanka ohodapi kin ee kecinpi. Tona hececapi kin hena awicayuxtan wo.

6. Wakantanka ohodapi kin woiyokipi kici he woyuha tanka.

7. Maka kin de en takudan unkahipi xni, qa awicakehan hetanhan takudan unkahdapi kte xni.

8. Hecen woyute wokoyake ko unhapi kinhan hena iyounkipi kte.

9. Tona watonpika cinpi kinhan hena taku wawiyutanyan un kin mazartakiyapi qa witkotkoya cantiheyapi xica ota on kiuniyapi ece kin en iyorpayapi, hena e wawihang yapi wicotakuni xni ko mahen wicaxta kin ocowasin iyorpewicayapi ece.

10. Taku xica owasin hutkan kin he maza ska waxte dapi kin

hee; he wanjikji inarnipi qa on wacinyanpi kin etanhan iyaye yapi qa wicokakije ota on caiçipapi.

11. Tuka Wakantanka wicaxta tawa kin he niye, hena taku kin nakicipa wo; wicoowotanna, Wakantanka ohodapi, wacinyanpi, wacantkiyapi, wacin tan-kapi qa wowarbadan, hena akita wo.

12. Wowacinye okicize waxte kin he en econ wo, owihan-ke wanin wiconi kin he icu wo, he en nicopi qa waayataniinpi ota itokam wohdakapi waxte ecen oyahdake ciqon.

13. Wakantanka taku owasin ni kiye cin he itokam qa Jesus Mesiya Pontiyos Pilate en wohdakapi waxte ecen ohdake ciqon he *itokam* ceciciya ce;

14. Axape xni qa iyaonpepica xni *yaun qa* woahope kin de duhe kta, Jesus Mesiya Itancan unkiyapi taninyan u kte cin hehanyan.

15. He tohan kinhan tuwe yuwaxtepi qa ecedan Wawokihi kin he taninyan hiyu ye kta, wicaxtayatapi kin en Wicaxtayatapi qa itancanpi kin en Itancan kin hee.

16. He ixnana wiconi hduhe ça iyoyanpa en hiyohipica xni kin he en ounyan, wicaxta kin tuwedan he wanyake xni qa nakun wanyaka okihi kte xni; he wowitan qa wowaxake owihan-ke wanin kiciun nunwe.

17. Tona maka kin den watonpiké cin wahokonwicakiya wo, watanka içidapi kte xni qa woyuha atakuni xni aya ece kin wacinyanpi kte xni, tuka Wakantanka ni un taku iyounkipipi kta e iyakiçuya unqupi kin hee *wacinyanpi kta*;

18. Taku waxte ece econpi kta, wicoran waxte ijicapi kta, wapamnipi qa wawicaqupi ta-watenyapi kta.

19. Taku tokata ihe cin he ekta ahehde waxte wan içihnakapi kta, hecen wiconi owihan-ke wanica yuhapi kta.

20. Timoteyos taku yuhe ciye cin hena tanyan yuha wo, qa ikcekeceya ecinxniyan wakini-capi kin he nakicipa wo, wosdonye woitonxni akinicapi kin he nakun.

21. Wanjikji he en opapi qa wacinyanpi kin icunonpa iyayapi. Wowaonxida niciun nunwe. Amen.

SECOND TIMOTHY.

PALOS OHNIHDE UN KIN TIMOTEYOS WOWAPI KICAGA ICINONPA KIN
HE DEE.

WICOWOYAKE 1.

1. Palos Wakantanka tawacin kin on Jesus Mesiya ohnihde tawa kin, Jesus Mesiya wiconi iwahounyanpi qon he eciyatanhan.

2. Timoteyos hokxincantkiyapi mitawa kin, *wowapi cica-ga*. Wowaonxida wowaxte wokiye ko Wakantanka Ate yapi kin etanhan qa Jesus Mesiya Itancan unkiyapi kin etanhan niciun nunwe.

3. Wakantanka mihunkake kin etanhan nagi ska hduha ohowada kin he wopida ewakiya, anpetu hanyetu ko wocekiye epa eca ayaxtan xni ciksuya waun.

4. Wanciyaka nina wacin, ixtamnihanpe ota aniu qon hena weksuya, hecen wowiyuxkin omajudan kta.

5. Tohan wowacinye anarbecipica xni niye en niun kin he weksuye cinhan, he tokaheya nikunxi Lowis en un qa nakun nihun Yunike en un he niye en niun kin sdonwaya.

6. Heon etanhan kiksuye ciye kta, Wakantanka taku niçu kin, nape on aciputake cin eciyatanhan, he amniheniçiye kta.

7. Wakantanka wokokipe wo-

ksape kin unqupi xni, tuka wowaxake wacantkiyapi wacin ksa-papi ko *unqupi*.

8. Hecen Itancan unkiyapi tawootanin kin on ixtece xni wo qa nakun miye makaxkapi tawa waun kin; tuka Wakantanka towaxake kin eciyatanhan wotanin waxte en wokakije kin en okicipa wo.

9. He iye ni unyanpi qa wicunkicopi wakan kin on unkiyapi, unkoranpi kin eciyatanhan xni, tuka iye tawacin qa towaonxida maka icage cin itokam Jesus Mesiya on unqupi qon he eciyatanhan.

10. Qa wanna hdutanin, Jesus Mesiya Wanikiya unkitawapi tanin içiye cin on, he wiconte ihang ye ça wotanin waxte kin en wiconi tepica xni un kin hena iyoyanpa en au.

11. Heon Ikcewicaxta ekta womdake ça ohnihde waonspekia ko makagapi.

12. Qa he etanhan hena taku kin iyotan iyewakiya; tuka imaxtece xni. Tuwe wacinwakiye cin he sdonwakiye ça taku ehna ke waxi kin hena anpetu wan u kte cin hehanyan miciyuha okihi sdonwaya.

13. Wicoie yuhapi waxte na-

ron ciye ciqon, wacinyanpi wo-
waxte ko Jesus Mesiya en un
kin yuha tinsa yuza wo.

14. Taku waxte niçupi qon,
Woniya Wakan unkiepi un kin
eciyanhan, he tanyan yuha
wo.

15. Tona Asiya en un kin
hena owasin ayuxtan iyemayan-
pi, Pugelos qa Hermogenes hena
opapi e sdoniyaya.

16. Onesiporos tiyohnaka ta-
wa kin Wakantanka onxikida
nunwe; iye ota micante ça ma-
kaxkapi kin on ixtece xni.

17. Qa Rome ekta hi qehan
nina omade qa iyemayan.

18. He anpetu kin he en I-
tancan kin etanhan wowaonxida
iyeye kta e Itancan okihi kiya
nunwe; Epesos ekta taku tona
en omakiye ciqon he tanyan
sdonyaya.

WICOWOYAKE 2.

1. He etanhan micinkxi Jesus
Mesiya en wowaonxida kin he
en waxaka wo.

2. Qa waayatanin ota on taku
miye etanhan nayaron kin hena
wicaxta wacinyepica, tona tokan
onspewicakiyapi okihi kin, he
wicaqu wo.

3. Qa niye nakun Jesus Me-
siya taakicita waxte kin iyecen
taku terika en waditaka wo.

4. Tuwe ozuye econ kinhan
he taku wiconi kin de wicoran
kin en iyaihda xke xni, tuwe ta-
akicita ye cin he iyokipi ye kte
cin heon.

5. Qa tuwe ohiye wacin econ
kinhan, qa wakiconzapı kin ecen

econ xni kinhan he watexdag
kicatonpi kte xni.

6. Wicaxta wakicanye cin he
rtani kinhan iye tokaheya taku
icage cin etanhan yute kta.

7. Taku epe cin he awacin
wo. Qa Itancan kin taku owa-
sin okarnir niyan nunwe.

8. Wotanin waxte mitawa kin
eciyanhan Jesus Mesiya Da-
wid wicowazi kin etanhan un
qon hee wiconte etanhan ekicetu
yapi kin he kiksuya wo.

9. Qa iye on wicaxta waboti-
ce cin iyecen kakix mayanpi,
makaxkapi kin he en; tuka Wa-
kantanka oie kin he kaxkapi
xni.

10. He etanhan tona wicaka-
rnigapi qon hena on taku owa-
sin iyowinwaya, hena e wiconi
Jesus Mesiya en un kin he yu-
hapi kta qa nakun owihanke wa-
nin wowitan kin.

11. Iapi kin de wowicake;
Iye kici unıapi kinhan nakun
kici unnipi kta.

12. On kakix unyanpi kin-
han, kici wicaxtayatapi unya-
konpi kta. Qa unkiye erpeun-
yanpi kinhan ix eya erpeunyan-
pi kta.

13. Qa wacinunyanpi xni e-
xta iye wacinyepica un, ihdue-
cinxniyan kta okihi xni.

14. Hena taku kin kiksuye
wicaye ça Itancan kin itokam
wicoie wawokihı xni tona na-
ronpi kin wicahnaye cin he a-
kinicapi kte xni iwahokonwica-
kiya wo.

15. Wakantanka iyokipi ya-
ye kta e aıciıya wo, wicaxta
wakage cin ixtece kte xni ni-
hdutanin kta qa wowicake wic-

oie kin owotanna yapamni kta.

16. Tuka iapi xica ecinxniyan kin he nakicipa wo, hena iyotan wicoxice ekta icar aye kta.

17. Qa wicoie yuhapi kin hena xiyaka xica wan iyecen waihang ye kta. Hena Yumeneyos Piletos kici en opapi.

18. Wowicake kin en icunonpa iyayapi qa, Woekicetu kin wanna yuxtanpi ce, eyapi, qa heon wanjikji wacinyanpi kin wicayaptanyanpi.

19. Hececa exta Wakantanka ahehde tawa kin sutaya he ça ipuspe kin de en un; Itancan kin tona tawa wicaye cin hena sdonwicakiya. Qa ake, Tuwe Mesiya caje kin hoyekiye cinhan he woartani ayuxtan kta ce.

20. Tuka tipi tanka wanji ohna maza ska zi qa maza ska wakxica hecedan xni, nakun can maka waxica ko yukan, hunr taku waxte qa hunr taku xica on yuhapi.

21. Hecen on tuwe hena taku kin etanhan itpakinte cinhan he wakxica waxte kin heca kta, ecedan qa Itancan kin wowinyunye kta e iyokipi qa wicoran waxte owasin on yutanpi.

22. Koxka cantiheyapi xice cin he nakicipa wo; wicoowotanna, wicadapi, wacantkiyapi, wookiye ko henakiya tona cante ecedan on Itancan cekiyapi kin hena om en opa wo.

23. Tuka wiwangapi okarnirpica xni ecinxniyan kin hena en ye içiye xni wo, hena wico-kicize kaga e sdonyaya.

24. Itancan taokiye ye cin he kicize kte xni, qa owasin en warbayedan un kta, waonspekiye ça wawacinkta yuza tanka kta.

25. Qa tona ihduxirtinpi kin hena warbayedan wahokonwicakiye kta, okini Wakantanka ihduacetupi wicaqu kta, hecen wowicake kin iyukcanpi kta.

26. Qa hecen tona Wakanxica tohan cin eca wayaka awicahda ece kin hena mazartakiyapi tawa kin etanhan ihduxpapi kta.

WICOWOYAKE 3.

1. He de sdonya wo, anpetu ihankeya kin en taku terika e u kta.

2. Hehan wicaxta kin waxte içidapi kta, maza ska waxte dakapi, wamnaiçidapi, waraniçidapi, hunkake yapi kin anawicakigoptanpi xni, wapidapi xni, tawacin xicapi;

3. Cinca waxte kidapi xni, woope kicaksapi kta, waaiapi sa, iyatahde içiyapi sa, obitiçidapi, qa taku waxte xice dapi kta;

4. Wawinatanpi sa, wacin-kopi, watanka içidapi, magaga içiyapi kin he iyotan dapi qa Wakantanka iyotan dapi xni.

5. Wakantanka awacinpi kin wiyacinpi kin yuhapi tuka wo-waxake kin he wicadapi xni; tona hececapi kin hena etanhan ihdamna wo.

6. Hena hececapi kin tipi narmana tin iyayapi qa winorinea wacintonpi xni woartani hduxakapi qa xicaya wacin yuzapi on

icunom iyeyapi kin hena waya-
ka awicahdapi.

7. Ohinniyan onspe içiciyapi
kex wowicake sdonyapi kin e-
han ipi okihi pi xni.

8. Jannes Jambres kiei Mo-
wis kiei akinicapi qon he iyecen
dena ix eya wowicake kin en
ibotopi, wicaxta tawacin xicapi,
qa wacinyanpi kin ayuxtanpi.

9. Tuka dena sanpa iyoptapi
kte xni, witkotkopike cin owa-
sin en tanin kta, hena e qe econ-
pi qon iyececa.

10. Niye tanyan omayapa,
wowaonspekiye mitawa kin en,
wicoran en, token miçiconze cin
en, wacinwaye cin en, wawacin-
kta mduza tanka kin en, wacan-
wakiye cin en, warbayedan a-
wape kin en;

11. Xicaya makuwapi kin en,
makakije cin en, tona mahiya-
hde kin, Antiyoka ekta, Ikoni-
yon ekta, Lustra ekta; hena xi-
caya makuwapi kin mahiyahde,
uncan owasin etanhan Itancan
kin emahdaku.

12. Qa tona Jesus Mesiya en
owotanna oranyan cinpi kin he-
na owasin xicaya wicakuwapi
kta.

13. Tuka wicaxta xica wica-
hnayanpi sa ko hena sanpa xica
en iyoptapi kta, wicahnayanpi
qa nakun hnayanpi kta.

14. Hececa tuka niye qe taku
onnispe qa wicayada kin hena
en un wo, tokiya tanhan onnispe
kin he sdonyaya.

15. Qa honikxiyoqopa kin e-
hantanhan Wowapi wakan sdon-
yaya, hena e ni niyanpi kte cin
qn ksamniye kta okihi, Jesus

Mesiya wicadapi kin eciyatan-
han.

16. Wowapi wakan ocowasin
Wakantanka Taniya kin eciya-
tanhan u qa waonspekiyapi, wi-
yopeyapi, owotanna kagapi, qa
wicoran waxte en onspewicaki-
ye cin he okihi.

17. Hecen Wakantanka wi-
caxta tawa kin ecedan un kta,
qa wicoran waxte owasin on
hduxtanpi kta,

WICOWOYAKE 4.

1. Heon Wakantanka itokam
qa Jesus Mesiya Itancan kin,
tona nipi tapi ko wicayaco kta,
tohan wokiconze hduha hi kin-
han, he nakun itokam wahokon-
ciciya;

2. Wicoie kin oyaka wo, to-
han oiyokipi qa nakun oiyokipi
xni exta, randita içiya wo. O-
wotanna wicakage wacin, iyope-
wicaya, wahokonwicakiya wo,
woonspe qa wawacinkta yuzapi
tanka kin on.

3. Anpetu wan u kte cin he
tohan hi kinhan woonspe waxte
kin aktapi kte xni, tuka iye wi-
cotawacin xice cin eciyatanhan
waonspekiyapi kin awicakitapi
kta, noge yaxpuyapi se iyececa
heon etanhan.

4. Qa nogepi kin wowicake
kin etanhan hduhompipi qa hi-
tunkakanpi kin noge ekta ye ya-
pi kta.

5. Tuka niye qe taku owasin
en wakta yaun kta, wicokakije
en waditaka wo; wotanin waxte
oyakapi wicoran kin ecen econ
wo; wicoran duhe cin he hdu-
xtan wo,

6. Wanna wamihduxna kta iyemicihantu qa wahde kte cin he wanna kiyadan ihan.

7. Okicize waxte kin ecamon, woinyanke kin ihuni wakiya, wacinyanpi kin he hduha waun;

8. Qa tokata woowotanna wafexdaké wan mihnakapi, he Itancan wayaco owotanna kin maqu kta, anpetu kin he en; qa miye mixnana xni, tuka tona iye tandin içiye kte cin waxte dakapi kin hena owasin koya.

9. Kohanna en mayahi kta nina aigiciya wo.

10. Demas he amayuxtan, wiconi kin de waxte dake ça Tesalonike ekta kihda. Kresken Galatiya ekta, qa Titos Dalmatiya ekta iyayapi.

11. Lukas kicixnana waun; Markos icu qa kici u wo, he iye wicoran kin de en omakiya ece.

12. Tucikos Epesos ekta ye waxi.

13. Yau kinhan xina Troas ekta Karpos emicihnake waxi qon he au wo, qa nakun wowapi kin hena, tahasaka hena iyo-tan wacin.

14. Aleksandros mazi zi kage cin heca, he taku xica ota ecamicon; iye oran kin eciyatanhan Itancan kin qu nunwe.

15. He on waktá un wo, wic-oie unhapi kin he nina kipajin.

16. Tokaheya wowahdake ciqon he ehan tuwedan micica xni, qa owasin inamatanpi, he wicakiciyawapi xni nunwe.

17. Tuka hececa exta Itancan kin mici inajin qa waxag maye, ça hecen miye on woyakapi kin tanyan sdonyapi kta, qa Ikcewicaxta kin owasin naronpi kta; qa mnaja i kin etanhan mayuxpapi.

18. Unkan Itancan kin wicoran xica owasin etanhan mayuxpe kta qa wokiconze marpiya ekta un kin he en ni maye kta. He iye wowitan owihanke wandin kiciun nunwe.

19. Priskila Akula kici nape wicayuzá wo, qa nakun Onesiporos tiyohnaka kin.

20. Erastos Korintos ekta yanka. Tropimos Miletos ekta wayazanke ça erpeya wahdicu.

21. Oyakihi kinhan naharin waniyetu xni kinhan u wo. Yubulos nape niyuza, qa nakun Pudens, qa Linos, qa Klauda, qa hunkawanjin kiciyapi kin owasin.

22. Jesus Mesiya Itancan kin ninagi kici un nunwe. Wowaxonxida nicipi un nunwe. Amen.

TITUS.

PALOS OHNIHDE UN KIN HECA TITOS WOWAPI KICAGE CIN HE DEE.

WICOWOYAKE 1.

1. Palos Wakantanka taokiye qa Jesus Mesiya ohnihde ye cin, tona Wakantanka wicakarnige cigon wacinyanpi kin he eciyatanhan, qa wowicake wicoran waxte en un kin sdonyapi kte cin heon;

2. Qa owihanke wanin wiconi wacinyanpi kin en Wakantanka itonxni okitpani, maka kagapi kin itokam wahounyanpi qon;

3. Qa wanna iyehantu kin hehan oie kin en hdaotanin, hanmdohdag iapi Wakantanka Wanikiya unhapi toope kin eciyatanhan maqupi kin hee on;

4. Titos wacinyanpi witaya unhapi kin hee eciyatanhan cin-kxi waye cin, wowaxte wowaxonxida wookiye ko Wakantanka Ate yapi kin etanhan qa Jesus Mesiya Itancan Wanikiya unhapi kin eciyatanhan kiciun nunge.

5. He etanhan Krete en ecihnaka, taku tona yuxtanpi xni kin hena wiyeya eyahnake kta qa otonwe otoiyo hi en hunkayapi wicayakage kta e on ecihnaka, token econ cixi kin ecen ecanon kta.

6. Tuwe iyaonpepica xni kinhan, wicaxta tawicu wanjidan, qa cinca wacinyanpi, wawaki-

pajin xni qa wanaron xni wanin unpi kin hduhe cin hee kta.

7. Waawanhake cin takudan iyaonpepica xni un kta, he Wakantanka okiye cin ee, ixnana wacin ihduze xni, canteptanye xni, mini xa en iyeiciye xni, ohiti icida xni qa wahduhahakteee xni;

8. Tuka oicimani kin onxiwicada kta, qa taku waxte kin waxte dake kta, wacin ksapa un kta, qa owotanna, wacantohnake qa iyatahde iciye xni un kta.

9. Qa waonspekiyapi kin en iyecen wacinyanpi oie kin suta-ya hduhe kta, hecen woonspecedan kin on wahokonwicakiya okihi kta, qa tona kipajin iciyapi kin hena awacin wicaye kta.

10. Wicaxta wicaxtapi xni qa witkoya iapi qa wicahnayanpi kin heca ota, ohomni baxpapi kin etanhanpi kin hena iyotan.

11. Hena iohmus ewicahnakapi kta; hena e qe tiyohnaka kin ocowasin yuptanptan iyewicayapi, qa maza ska wart xni hdamnanpi kte cin heon taku oyakapi kte xni kin he oyate kin onspewicakiyapi ece.

12. Iyepi kin etanhan wicaxta wokcan wanji kaken eye eiqon; Krete oyate kin ohinniyan

itonpixni, wamanica ocinxice cin qa tezi kujapi kin hecapi.

13. Oyake cin he wicaka. He etanhan nina iyopewicaya wo, hecen wacinyanpi kin en ecedan unpi kta.

14. Qa hecen Juda oyate hitunkakanpi yuhapi kin, qa wicaxta akantu woope kagapi kin wowicake kaxeye cin hena awacinpi kte xni.

15. Tona ecedan unpi kin hena taku owasin ecedan yuhapi, qa tona axapapi qa wicadapi xni kin hena taku ecedan kin takudan yuhapi xni, tuka tawacinpi nagipi ko hena ee kaex axapapi.

16. Hena ix Wakantanka sdonyapi keyapi, tuka wicoran on aktapi xni, wartepi xni, wanonpi xni, qa wicoran waxte owasin en wacintonpi xni.

WICOWOYAKE 2.

1. Tuka niye qe taku woon-spe ecedan en iyokipi kin hena eecen oie ya wo.

2. Wicaxta tankapi kin hena wakta unpi kta, mdesahan wacin ksamya unpi kta, wacinyanpi, wacantkiyapi, wacin tankapi ko en ecedan unpi kta.

3. Qa winorinca tankapi kin ix eya wicoran kin en wakanyan iyokipiya unpi kta, waaiapi kagapi xni, mini xa en iyeiciyapi kte xni, qa taku waxte onspe wicakiyapi kta.

4. Hecen wikoxka kin ksam wicayapi kta, wicaxta yuhapi cinca ko waxte wicakidapi kta;

5. Wacin ksapapi kta, ecepidan, tipi hduhapi kin ohna oswanji yukanpi, qa waxteya unpi

kta, hihnakupi kin anawicakigoptanpi kta, hecen Wakantanka oie kin oxtedhapi kte xni.

6. Koxka kin ix nakun wacin ksapapi kte cin iwahokonwicakiya wo.

7. Qa taku owasin on wicoran waxte kin en waonspekiya niçice kta, qa onspewicakiyapi kin en takudan wicayuxice xni, wacin ksapapi qa yutokecapica xni hena hecen *ecanon* kta;

8. Qa iapi ecedan iyaonpepica xni kin he *duhe* kta, hecen tuwe anicinica kin he ixtece kta, taku xica takudan aniie kta okihi xni kin heon.

9. Tona wowidake un kin hena itancan wicayuhapi kin anawicakigoptanpi kta, qa taku owasin wakinicapi wanin iyokipi wicayapi kta;

10. Takudan narmana icupi xni qa wacinyanpi waxte owasin en ihdutaninpi kta. Hecen taku owasin on Wakantanka Wanikiya unhapi kin tawoon-spe kin he tanyan yuhapi kta.

11. Wakantanka towaonxida wiconi kage cin he wicaxta owasin en taninyan wicahi.

12. He wicoran xica qa makata awacinpi kin hena erpeunyanpi qa nakaha wiconi kin en wacin ksamya owotanna wakan-yan unnipi kta e onspe unkiyapi.

13. Qa wacinyanpi waxte ape unyakonpi kta, Wakantanka iyotan tanka qa Jesus Mesiya Wanikiya unhapi kin he wowitan hduha tanin içiye kte cin hee.

14. He unkiyepi on içiçu, woartani owasin etanhan opeun-

kitonpi kta qa oyate tawa wica-ye kte cin wicoran waxte nina rin akitapi kte cin hena wicahdu-ska kta e heon *hecon*.

15. Hena wicoie kin hecen oie ye ça wahokonwicakiye ça iyopewicaya wo. Tuwedan xice nidake kte xni.

WICOWOYAKE 3.

1. He kiksuye wicaya wo, taku itancanpi qa wicowaxake kin hena ihukun iyeiciyapi kta, wicaxtayatapi kin anawicagoptanpi kta, qa wicoran waxte owasin econpi kta, on wiyeya yukanpi kta.

2. Tuwedan oxtedhapi kte xni qa kicizapi kte xni, tuka warbayedan unpi qa wicaxta owasin en wacin tankapi kta.

3. Ehanna unkix eya wacin untonpi xni, qa waanaungoptanpi xni, unhnayanpi, qa wicota-wacin xica woiyokipi kin ota en wowidake unyakonpi, wocanniye winawizipi ko yuha un-nipi, warte xni unyakonpi qa otoiyohi xice unkicidakapi.

4. Tuka hehan Wakantanka Wanikiya unhapi kin towaxte qa wicaxta onxiwicakida qon wicaxta kin en yutaninpi.

5. Wicoran owotanna econkupi kin eciyatanhan xni, tuka iye towaonxida kin eciyatanhan ni unyanpi; teca tonpi kin on, woyujaja qa Woniya Wakan wicayuteca kin hena on etanhan;

6. Jesus Mesiya Wanikiya unhapi kin eciyatanhan iyakiçuya unkakaxtanpi qon hee.

7. Hecen iye towaonxida kin on etanhan unyuowotanpidan kinhan wiconi owihanke wanica

apepi kin eciyatanhan tawa kte cin heca untagapi kta.

8. Iapi kin he wowicake qa heon hena taku kin ohinniyen yasutaya iyae kta wacin; hecen tona Wakantanka wicadapi kin hena wicoran waxte wacin ksam-ya opapi kta. Hena taku waxte qa wicaxta kin en wawokihi.

9. Tuka witkoya wiwangapi, qa wicoicage oyakapi, qa wawakipajinpi, qa woope akinicapi kin hena okamnayan ya wo, hena takudan okihi xni qa ecinniyen un.

10. Wicaxta waakinica un kin he wancadan qa inonpa iyo-peyapi kin ihakamya reyata iyeya wo.

11. Tuwe hecece cinhan he ayuxtan iyeye ça woartani econ qa iye atayedan ihdao kin he sdonyaya.

12. Tohan Artemas qa Tucikos wanji tukte niye ekta ye wicawaxi kinhan hehan inarni-yan Nikopolis ekta miye en mayau kta; hen waniyetu waun kta miçiconza.

13. Zenas woope aie kiyapi kin qa Apolos icimani ipi kinhan takudan icakije xni tanyan iyoopteya ye wicakiya wo.

14. Qa tona unkicicapi kin hena wicortani owotanna opapi kta, on taku yuhapi okihihi kta, qa hecen waskuyeca icar ye xni yukanpi kte xni.

15. Tona micicapi kin hena owasin nape niyuzapi. Tona wacinyanpi kin eciyatanhan waxte undakapi kin hena nape wicayuza wo. Wowaonxida niyepi owasin en nicipi un-nunwe. Amen.

PHILEMON.

FALOS OHNIHDE UN KIN PILEMON WOWAPI KICAGE CIN HE DĒE.

WICOWOYAKE 1.

1. Palos kaxka hnakapi Jesus Mesiya on, Timoteyos sunka unyanpi kici, Pilemon waxte unkidapi qa óunkiyapi un kin,

2. Qa nakun Apiya waxte undakapi kin, Arcipos kici aki-cita unyakonpi kin he kici, qa yati ohna okodakiciye kin *witaya wowapi unnicagapi*.

3. Wowaonxida wookiye ko Wakantanka Ate unyanpi qa Jesus Mesiya Itancan kin etanhan nicipi un nunwe.

4. Wocekiye epa eca ohinniyanciksuye ça on Wakantanka wopida ewakiya ece.

5. Wacanyakiye ça wacinyan yaun kin, Jesus Itancan kin ekta, qa tona owotanna un kin owasin en *ecanon* kin he nawaron.

6. Qa wicaxta kin eciyatanhan owicayake cin waxagya aye kta, on taku waxte owasin Jesus Mesiya eciyatanhan niye en un kin he yutaninpi kta.

7. Mihunkawanji, wacanyakiye cin heon nina unkiyuxkinpi qa unkicanptapi, tona owotanna un kin hena cantepi kin iyuxkin wicayaye cin heon etanhan.

8. Qa heon taku iyokipi kin Mesiya en itancanyan econ cixi kta owakihi.

9. Tuka wacantkiyapi kin

eciyanhan ceciciya, Palos wana wicaxta tanka qa nakaha Jesus Mesiya on kaxka hnakapi waun.

10. Hecen Onesimos micinkxi, makaxkapi kin icunhan micinca wakage cin hee on ceciciya.

11. He ehanna takudan nicamna xni tuka nakaha miye omakiye ça nakun niye oniciya okihi. He nakaha hde waxi.

12. Niye he iyowinkiya wo, minagi kin hee kaex iyececa.

13. He yuha waun kta wacin, wotanin waxte kin on etanhan makaxkapi icunhan niye ee kiya omakiye kte cin heon.

14. Tuka token yacin kin sdonye xni waun takudan ecamon kte xni; taku waxte econ nixipi kin he iyecen ecanon kte xni, tuka niye cinka econ wacani kta he *wacin*.

15. He iye anpetu tonana aniyuxtan, ake ohinniyan yahduhe kta heon etanhan hecon naceca.

16. Wanna wowidake unpi kin iyecece xni, tuka wowidake kin ikapeya waxte, hunkawanjin kiciyapi waxte kidapi kin iyecen; mix hecen wacin wakiyuze cin, niye iyotan hecen wacin yakiduze kta, wicacerpi qa Itancan kin nakun eciyatanhan hunkawanjin yaye kta.

17. Koda yapi iyecen maya-
duha hecinhan he miye iyecen
ake ehdaku wo.

18. Taku icakix niye ça taku
iyohi niciciye xni hecinhan he
miciyawa wo.

19. Palos he miye, minape
kin on de wakaga, he wakajuju
kta. Qa taku miyecicajuju xni,
niye atayedan ocowasin yaun
kin he caje mdate xni.

20. Han mihunkawanji, Itan-
can kin en niye on imduxkin kta;
Itancan kin en micante kin iyu-
xkin mayan wo.

21. Waanayagoptan kta imdu-
kcan, heon wowapi cicaga; qa

epe cin sam iyeya ecanon kta
sdonwaya.

22. Tipi tukten manke kte
cin he nakun wiyeya emicihnaka
wo; wocekiye ehapi kin on etan-
han niyepi on makiyuxkapi kta
epca waun.

23. Epapras Jesus Mesiya
on kici makaxkapi kin he nape
niyuza.

24. Qa Markos, Aristarkos,
Demas, Lukas mitawaxipi kin
hena nakun *nape niyuzapi*!

25. Jesus Mesiya Itancan un-
kiyapi towaonxida kin ninagi
kin kici un nunwe. Amen.

HEBREWS.

PALOS OHNIHDE UNPI KIN HECA HEBERI OYATE KIN WOWAPI
WICAKICAGE CIN HE DEE.

WICOWOYAKE 1.

1. Ehanna Wakantanka tok-
togye otakiya wicaxta wokcan
kin eciyatanhan hunkake wicun-
yanpi kin wowicakiyake cion
he anpetu ehake kin dena icun-
han iye Cihintku kin eciyatan-
han wounkiyakapi.

2. He on woicage kin owasin
kage ça he taku owasin tawa ye
kta e ehde.

3. He *Wakantanka* towitan
okitanin qa ouncage okagapi kin
hee, iye oie wowaxake kin on
taku owasin hduha yanka, he ix
iye eciyatanhan waunrtanipi wo-
pakinte kage çehan, Taku iyotan

tanka wankan yanke cin he eta-
pa kin en kiyotanka.

4. He iye caje wan ohnihde
kin hena isanpa waxte airpeyapi
qa yuhe cin he iyecen sam iye-
ya waxte kagapi.

5. Micinkxi kin he niye, an-
petu kin de cinca cicaga ce, o-
hnihde unpi kin tukte wanji eci-
ya he. Qa ake, He ate maye
kta qa miye cinkxi waye kta ce.

6. Unkan *cihintku* tokapa kin
he wicoicage kin ekta hiyu ye
çehan hecen eya, *Wakantanka*
ohnihde wicaye cin owasin he
itokam canpexka makehde ena-
jin kta.

7. Qa ohnihde unpi kin hena on kaken eya, He tateyanpa kin ohnihde ye ça peta ide kin wowedake ya ece.

8. Tuka Cihintku kin heciya, Wakantanka oiyotanke nitawa kin he owihanke wanica; nitokiconze maza sagye kin he maza sagye owotanna;

9. Woowotanna waxte yadake cin heon Wakantanka, nita Wakantanka kin tona nitawaxi kin hena isanpa wowiyuxkin wihi on sda niyan.

10. Qa, Itancan otokahe ekta maka ahe cin eyahde, qa ninape kage cin marpiya kin hee.

11. Hena yutakuni xni aye kta, tuka niye ecen yaun; owasin onrorda wan iyecen kuke kta;

12. Qa xina wan iyecen pehan eyahnake ça hecen yutokecapi kta; tuka niye okonniwanjidan, qa waniyetu nitawa kin owihanke kte xni.

13. Ohnihde wicaye cin tukte waji e, Mietapa kin en iyotanka wo, tona toka niyanpi kin hena nisiha woahde kin en ewicawahnake kta ce, eciya he.

14. Hena owasin taku wakan wawokiya, tona wiconi airpewicayapi qa tawapi kte cin hena owicakiyapi kta e u wicaxipi qon hena eepi xni he.

WICOWOYAKE 2.

1. Heon etanhan taku naunronpi kin hena unkakiktonjapi kte xni e on sutaya awauncinpi kta.

2. Wicoie ohnihde unpi kin oyakapi qon he suta qa tona ana-

goptan xni qa he kaxeye cin hena owasin iyacinyan woyaco owotanna icupi hecinhan;

3. Unkiye wiconi hinsko tanka kin unkaktapi xni kinhan token naunpapi kta he. He tokaheya Itancan kin oyake ça tona naronpi kin hena atayedan unkokiyakapi.

4. Wakantanka ix eya, iye tawacin kin eciyatanhan, wicakiciyaotanin, wowapetokeca taku on yuxinyewicaye cin hena ko, waxagya econpi ota qa Woniya Wakan wicakipamni kin hena on etanhan.

5. Wicoicage u kte cin cajeunyatapi kin he ohnihde unpi kin yuhe wicakiye xni.

6. Tuka waji *wowapi wakan* kin en yaotanin qa heya, Wicaxta kin he taku he, on yeksuye kta he; qa wicaxta cihintku kin *hc taku*, hecen awanyahdaka he.

7. *Marpiya* ohnihde kin kitanna ihukuya yakage ça wowitan woyuonihan ko watexdake yecatn, qa taku nape on yakage cin hena yuhe yakiya.

8. Qa iye sihapi kin ihukuya taku owasin eyahnaka. Taku owasin iye ihukuya ehnahe cin, hecen taku ihukuya ehnahe kin xni kin takudan okapte xni. Tuka nakaha naharin taku owasin ihukuya ehnahe kin wanunyakapi xni.

9. Tuka Jesus wiconte kaki-japi kin on, *marpiya* ohnihde kin kitanna ihukuya kagapi kin he wowitan woyuonihan ko watexdag kiton kin he wanunyakapi, hecen iye Wakantanka towaonxida kin eciyatanhan wica-

xta kin owasin on wiconṭe sdon-ye kta.

10. Tuwe iye tan tanhan taku owasin un, qa iye on taku owasin un kin he cinca ota wowitan ekta wicahdoye kte cin on wiconi en toka wicakicihe cin hee wokakije on hduacetu kte cin he iyokipi.

11. Hecen tuwe wicayuecedan qa tona yuecepidan kin hena owasin okonwanjipidan; heon etanhan hena hunkawanjin wicakiya kewicakiye kta ixtece xni;

12. Qa hecen eya, Nicaje kin mihunkawanji owicawakiyake kta qa okodakiciye kin coka-ta icidowan kta.

13. Qa ake, He wacinwaye kta ce. Qa ake, Iho miye qa cinca Wakantanka maqu kin hena.

14. Cinca kin hena wicacerpi qa wicawe kin en opapi kin heon ix iye hena en opa, hecen tuwe wiconṭe wowaxake yuhe cin, Wakanxica hee e ihang ye kta;

15. Qa tona tohanyan ni unpi kin hehanyan wiconṭe ikopapi kin on wowidake unpi kin hena ewicahdaku kta.

16. Awicakehan *marpiya* ohnihde kin *ouncage* kin koyake xni tuka Abereyam cinca kin hecen ihduza.

17. Heon etanhan taku owasin en, iye hunkawanjin wicaye cin iyecen ikicage kte cin he hecetu; hecen taku Wakantanka tawa kin en Woxnapi kagapi itancan waonxida qa wicake kta, qa oyate wartanipi kin on woo-kiye wicakicage kta.

18. Iye iyutanyanpi hecen kakije cigon, heon etanhan tona iyutanwicayapi kin hena ewicahdaku kta ekihi.

WICOWOYAKE 3.

1. Heon mihunkawanji wakan, marpiya tanhan wicakico kin en oyapapi kin Jesus Mesiya wounhdakapi kin en ohnihde qa Woxnapi kagapi itancan kin he awacin po.

2. Mowis tipi ocowasin ohna owotanna un kin he iyecen iye qe tuwe econ xi qon owotanna ecakicon.

3. Tuwe ticage cin he tipi kin sam iyeya yuonihanpi ece kin he iyecen he qe Mowis kapeya wowitan tanka yuha.

4. Tipi owasin wicaxta kagapi, tuka tuwe taku owasin kage cin Wakantanka hee.

5. Mowis wowidake un kin heca tipi ocowasin ohna wicaka, taku oyakapi kte cin hena en waayatanin kte cin heon.

6. Tuka Mesiya iye tipi kin ocowasin ohna Cihintku kin iyececa; tipi tawa kin he unkiyepi, awauncinpi qa wowiyuxkinyan wacinunyanpi kin he owihanke-ta ṭinsa unhapi kinhan.

7. Heon Woniya Wakan kin kaken eya, Anpe dehan iye ho kin naron yacinpi kinhan,

8. Nicantepi kin ihduteripi xni po, repuza en, anpetu wawiyutanyan un kin en, wawakipajinpi qon iyecen.

9. Nihunkakepi iyutanmanpi qa mayukeanpi qa wani-

yetu wikcemna topa hehanyan mioran kin wanyakapi.

10. Heon etanhan wicoicage kin he on iyomayake ça hepa, Cantepi kin ekta ohinniyan nupipi, qa mitacanku kin sdonyapi xni ce.

11. Hecen xinwahda qa, Okirpapi mitawa kin en yapi kte xni, eya wakonza.

12. Mihunkawanji wakta po, okini cante wicada xni qa xice cin en niunpi, on Wakantanka ni un kin aduxtanpi kta.

13. Tuka anpetu otoiyohi wahokonkiciciya po, anpe dehan eyapi kin hehanyan; okini woartani wohnaye kin on wanji tukte niyuteripi kta.

14. Tokaheya wicaundapi kin he owihanketa sutaya unhapi kinhan Mesiya en ope unyanpi.

15. Anpe dehan iye ho kin naron yacinpi kinhan nicantepi kin ihduteripi xni po, wawakipajinpi qon en iyececa, eyapi kin hehanyan.

16. Tona naronpi qon hena apa kipajinpi, tuka Mowis Egupta etanhan awicau qon owasin xni.

17. Tona waniyetu wikcemna topa hehanyan iyoyake yapi qon hena tuwepi he; tona wartanipi qa repuza en tancan irpayapi qon hena eepi xni he.

18. Qa okirpapi tawa kin en yapi kte xni, konza kewicakiye ciqon hena tuwepi he; tona wicadapi xni qon hena eepi xni he.

19. Wicadapi xni kin heon timahen yapi kta okihipi xni e wanunyakapi.

WICOWOYAKE 4.

1. Hecén okirpapi kin de en unkopapi kta e iwahounyanpi kin heon niyepi kin wanji tukte iyoyahipi kte xni se ececa e konkipapi kta.

2. Wotanin waxte unkokiya-kapi, ix iyepi *owicakiyakapi* qon iyececa; tuka wicoie naronpi qon he owicakiye xni, tona naronpi kin wowacinye icicahi yapi xni kin heon etanhan.

3. Tuka tona wicaundapi kin okirpapi kin en ounpapi kta, heye ciqon iyececa; Xinwahda qa, okirpapi mitawa kin en opapi kte xni ce, epe ciqon, maka icage cin hehantanhan wicoran kin yuxtanpi tuka.

4. Anpetu ixakowin kin he ke ça hecen eya, Anpetu ixakowin kin he en Wakantanka okirpa, taku kage cin owasin etanhan.

5. Qa hen aké, Okirpapi mitawa kin en opapi kte xni.

6. Heon etanhan hunr en opapi kte cin he tokata ihan, qa tona tokaheya wotanin waxte owicakiyakapi qon hena wicadapi xni kin heon en opapi xni.

7. Ake anpetu wan ke ça Dawid en heya, Anpe dehan, iye ho naron yacinpi kinhan nicantepi kin ihduteripi xni po.

8. Joxuwa okirpe wicakiya unkanx he iyohakam anpetu tokeca caje yate kte xni tuka.

9. Heon Wakantanka taoyate kin okirpapi wan wicakicihan.

10. Tuwe okirpapi en ope cin he wanna tortani kin ayuxtan, Wakantanka iye *tortani kin ayuxtan* qon iyececa.

11. Heon etanhan okirpapi

kin he en unkopapi kta e amnihe unkiçiyapi kta, okini wicadapi xni qon he iyecen tuwe irpaye kta naceca.

12. Wakantanka oie kin he ni un, wawokihi, qa maza sagye anog ope kin he isanpa pe rinca, wicanagi wicaniya kici iyotahedan capa iyaye ça ôkihepi cupe ko kicakse ça wicotawacin wicacante wacin yuze cin hena koya iyukean ece.

13. Qa taku ni un takudan iye en anarbepica xni; tuwe oie *unqupi* kin he ixta kin en taku owasin tancodan kazamni yanka.

14. Woxnapi kagapi itancan tanka Jesus Wakantanka Cihintku marpiya kin timahen iyaye cin he unhapi kin heon wounhdakapi kin en waunxakapi kta.

15. Woxnapi kagapi itancan kin, unkiye unkakijapi kin en unkicanptapi kta okihi xni kin heca unhapi xni, tuka iye taku owasin on iyutanyanpi, *unkiyeye* iyeuncecapi, exta woartani wanica.

16. Heon etanhan wowaonxida oiyotanke kin en waditagya unkupi kta, hecen cantounhnakapi kta qa tohan uncinpi ca wowaonxida wawokihi iyeunyanpi kta ce.

WICOWOYAKE 5.

1. Woxnapi kagapi itancan otoiyo hi wicaxta etanhan icupi kin he Wakantanka taku tawa en wicaxta on etanhan ehdepi, taku kiciçupi woartani on woxnapi kin hena ko wayuxna kta e heon.

2. Tona onspepi xni qa canku icunom yapi kin hena onxiwicada kta okihi, ix iye wookihi xni aohdute yapi nakaex.

3. Qa heon oyate kin on woxna ece kin he iyecen ix iye woartani econ kin on taku wayuxna ece kta.

4. Qa tuwedan iye cinka wowitzan kin de icu xni, tuka tuwe Aharon iyecen Wakantanka kico kin hee ce.

5. He iyecen Mesiya ix eya Woxnapi kagapi itancan kta e ihdutan xni, tuka tuwe, Micinkxi kin he niye, anpe dehan cinca cicaga ce, eciye ciqon hee hecon.

6. Qa token en kaken eya, Melkizedek ouncage kin iyecen ohinniyen Woxnapi kagapi kin henica.

7. He qe wicacerpi anpetu tawa kin en wocekiye wokidapi ko eye ça ixta mnigaga nina hoyekiye ça tuwe wiconte etanhan ehdaku kta okihi kin he cekiye ça kokipeyahan un hin heon naronpi.

8. Qa he Cihintku kin hee kaex taku token kakije cin on waanagoptanpi onspe içiciya.

9. Qa iye woyuxtan kagapi kin heon tona anagoptanpi kin owasin owihanke wanin wiconi kin wicakicaga.

10. Woxnapi kagapi itancan kin Wakantanka kaga, Melkizedek ouncage kin iyecen.

11. Wicaxta kin he on taku ota unkoniciyakapi kta tuka oyakapi terika, wanaron yahunkapi xni nakaex.

12. Hinnakaha waonspekiya henicapi kta tuka naharin tuwe

Wakantanka oie taku tokaheya hunke xni kin hena akta onspeniciyapi kta e iyenihantupi, qa tona asanpi ece cinpi qa woyute taku napin okihipi xni kin hee en iyoniptapi.

13. Tuwe kaxta asanpi ece yute cinhan he wicoowotanna wicoie kin en wayupike xni, naharin kokxiyoqopa nakaex.

14. Tuka tona tankapi qa wanna taku utapi on tanyan ihduxtanpi, taku waxte taku xica ko iyukeanpi kin hena takn napin woyute yapi.

WICOWOYAKE 6.

1. Heon etanhan Mesiya woonspe tokaheya tawa kin he hekta erpeunkiyapi qa woyuxtan ekta unyanpi kta; wiconte wicoran on iyopeiciyapi qa Wakantanka wacinyanpi kin taku ahe cin akta eunhdepi kte xni.

2. Baptem eyapi woonspe kin, qa nape on awicaputakapi, qa wicate cin ekicetu wicayapi, qa woyaco owihanke wanice cin hena kaya.

3. Wakantanka iyowinunkiyapi kinhan hecen econkupi kta.

4. Tona wancadan iyoyanpapi, qa marpiya tanhan taku wicagupi kin he okinipi, qa Woniya Wakan kin en opapi,

5. Qa Wakantanka oie waxte kin iyukeanpi, wiconi u kte cin wowaxake kin nakun,

6. Hena hinrpayapi kinhan ake piya iyopeiciye wicakiyapi kte cin he okihipica xni; iye atayedan Wakantanka Cihintku can susbeca en piya okatanpi qa

taninyan wowixten yapi kin heon etanhan.

7. Maka kin ota amagaju kin he yurepe ça tona kicanyanpi kin hena on taku peji iyecetuya aicage cin he Wakantanka yuwaxte.

8. Tuka taku takanheca hu wapepeka aicage cin he erpeyapi qa yuxicapi kte cin kiyadan ihan, he owihanketa rurnage kta.

9. Tuka waxte ciciyapi kin, hena hecen unkeyapi exta, niyepi ekta taku sanpa waxte qa wiconi en ope cin hena en niunpi e sdonunyanpi.

10. Wakantanka owotanna xni wanica, qa heon wicortani wowaxte wicokicanye ko nitawapi, iye caje kin on ecanonpi, tona owotanna un owicayakiyapi qa naharin owicakiya dukanpi kin he akitonje kte xni.

11. Unkan niyepi otoiyohi owihanketa woape woyuxtan kte cin hehanyan iyecen amnihe niçiyapi kta uncinpi.

12. Qa nikujapi kte xni, tuka tona wicadapi qa apepi kin on taku iwahowicayapi qon wanna yuhapi kin hena owicayapapi kta.

13. Wakantanka Abereyam taku iwahoye çehan taku sanpa tanka caje yan konze kta wanica, heon iye atayedan caje ihdan konze,

14. 'Ca heya; Awicakehan wowaxte on ciyuwaxte kta, qa yuotapi kin on yuota ciye kta ce.

15. Unkan warbayedan ape yanke cin he iyohakam taku iwahoyapi qon ekicicetu.

16. Wicaxta akantu taku iyo-tan tanka caje yan konzapi ece, qa wokonze woyusuta kte cin he waakinicapi owasin en woanapte kin hee.

17. He en Wakantanka iyo-tan, tona taku iwahoyapi qon tawapi kte cin hena en iye tawacin yuhohopica xni kin he sdoney wicakiye kta cin qa heon wokonze on hdusuta.

18. Heon taku nom yutoke-capica xni, en Wakantanka iton-xni okihipica xni kin hena taku kin on etanhan, tona woape unkitokam ehdepi kin en onaunpapi kin wicakicanpte wan waxaka unhapi kta.

19. *Woape* kin he unhapi, wicanagi taku on aspeiçiya wicake ça suta kiu hee, taku tipi cokaya hnakapi kin mahen tanhan un kin he en aspeiçiya.

20. He en Jesus kahin tokam ye cin unkiyepi on timahen iya-ya, he Melkizedek ouncage kin iyecen Woxnapi kagapi itancan kin heca kagapi.

WICOWOYAKE 7.

1. Melkizedek *wicaxta* kin he Salem en Wicaxtayatapi yanke ça Wakantanka Iyotan wankantuya un kin woxnapi kagapi tawa kin hee Abereyam wicaxtayatapi wicakaxtake ça hdiu kin he itkokipe ça yawaxte.

2. Unkan taku owasin etanhan Abereyam iwikcemna kin he qu. *Wicaxta* kin he tokaheya caje oyakapi kin on, Woowotanna wicaxtayatapi kin hee, qa hehan, Salem wicaxtayatapi

kin, he Wookiye wicaxtayatapi kin hee.

3. Atkuku wanica, hunku wanica, qa wicoicage oyakapi kin wanica, anpetu tokakeya wanice ça wiconi owihanke wanica, Wakantanka Cihintku kin iyecen icar yapi, qa Woxnapi kagapi ohinniyen yanka.

4. Wicaxta tanka kin de wan-yaka po, Abereyam hunkake yapi un kin hee kaex taku iwa-kte ahdi kin etanhan iwikcemna kin he qu.

5. Tona Lewi cinca kin etanhanpi, woxnapi kagapi wicoran yuhapi kin hena, wicoope kin eciyatanhan iye hunkawanjitkupi oyate kin etanhan taku icupi kta e iwahowicayapi; hena Abereyam nite kin etanhan inanpapi tuka heconpi.

6. Tuka tuwe hena etanhan wicoicage hdawa xni kin he Abereyam etanhan taku iwikcemna kin icu qa wahoyapi kin yuhe ciqon he yawaxte.

7. Unkan he de akinicapi xni, tuwe ihukuya un kin he iyotan waxte kin on yawaxtepi ce.

8. Qa deciya wicaxta tãpi kte cin hena taku iwikcemna kin icupi ece, tuka heciya, he ni un e yaotaninpi,

9. Unkan he de heyepica; Lewi taku iwikcemna kin icu ece kin he ix eya Abereyam eciyatanhan taku iwikcemna kin wicaqu;

10. Melkizedek itkokipe çehan he naharin atkuku nite kin mahen un.

11. Heon etanhan Lewi woxnapi kagapi wicoran yuhe cin eciyatanhan woyuxtan en au un-

kanx, (he en oyate kin wicoope yuhapi) token Melkizedek oun-
cage kin eciyatanhan Woxnapi
kagapi wan tokeca icage kta, qa
Aharon ouncage kin eciyatanhan
cage yatapi kte xni he.

12. Woxnapi kagapi wicoran
kin yutokecapi kin heon etanhan
wicoope kin nakun yutokecapi
kta.

13. Qa tuwe on hena hecen
eyapi qon he wicoun tokeca
etanhan inanpa; *wicoun* kin he
etanhan tuwedan wahna woxna-
pi kin ekta oranye xni.

14. Itancan unkitawapi kin
he Juda wicoun kin etanhan
icage sdonunyanpi; qa wicoun
kin he woxnapi kagapi kta e
Mowis takudan eye xni.

15. Qa de iyotan atandin, Mel-
kizedek ouncage kin iyecen
Woxnapi kagapi tokeca wan
icage kta;

16. He wicacerpi wicoie wo-
ope kin eciyatanhan xni, tuka
wiconi owihanke wanica wowa-
xake kin eciyatanhan icar yapi.

17. Melkizedek ouncage kin
iyecen ohinniyan Woxnapi ka-
gapi kin heca nanka ce, eya
yaotaninpi qon.

18. Unkan nakun woahope
tokaheya ye cin he yutokan
iyeyapi, waxake xni qa taku
okihipica xni kin heon etanhan.

19. Wooke kin he takudan
yuxtan xni, tuka woape iyotan
waxte en aupi kin hee *hecon*,
qa heon Wakantanka kin en
ikiyedat unkuhi.

20. He iye wokonze wicoie
kin codan *kagapi* xni; Woxna-
pi kagapi kin hena wokonze wi-
coie wanin wicakagapi.

21. Tuka he qe wokonze
wicoie kin eciyatanhan, tuwe,
Melkizedek ouncage kin iyecen
ohinniyan Woxnapi kagapi he-
ca nanka ce, Itancan kin heye
ça iyopeiçiye kte xni ce, eciye
ciqon hee *hecon*.

22. He iyecen wicotakuye
iyotan waxte kin en Jesus ki-
yuecetu kagapi.

23. Wiconte kin he etanhan
ohinniyan en un okitpanipi kin
heon hena Woxnapi kagapi eta.

24. Tuka he qe owihanke
wanin yanke ça heon woxnapi
kagapi wicoran yutokecapica
xni kin yuha.

25. Qa hecen tona iye eciya-
tanhan Wakantanka en upi kin
hena owasin ni wicaye kta oki-
hi, hena wocekiye ewicakiciye
kta e ohinniyan ni un kin
heon.

26. Woxnapi kagapi itancan
kin hececa he iyounkipipi, wa-
kan, iyaonpepica xni, waaxape
xni qa wartanipi sa wicicunonpa
un, qa marpiya kin sanpa wan-
kantuya icar yapi.

27. He iye Woxnapi kagapi
kin hena iyecen, anpetu iyohi,
tokaheya iye woartani kin on
qa hehan oyate wartanipi kin
on etanhan woxna kte cin he
iyekicihantu xni; wancadan he-
con, iye atayedan waihduxna
qon he ehan.

28. Wicaxta woecetu xni yu-
hapi kin hena wooke kin Wo-
xnapi kagapi heca wicakaga,
tuka wokonze wicoie kin wooke
iyohakam un kin he Cihintku
yapi owihanke wanin yawaxte-
pi kin he *kaga*.

WICOWOYAKE 8.

1. Taku wanna oyakapi kin taku iyotan kin he dee, Woxnap i kagapi itancan kin hececa unhapi, marpiya ekta Otancanke oiyotanke etapa kin en kiyotanka;

2. Tipi wakan kin en ookiye kin hee, wakeya wicake cin ohna, he Itancan ticage ça wicaxta kin *econ* xni.

3. Woxnap i kagapi otoiyo hi taku kiciçupi woxnap i ko wayuxna kta e kagapi, heon wicaxta kin de ix eya taku wayuxna kte cin hduhe kta e hecetu.

4. Maka akan un unkanx Woxnap i kagapi kin heca kte xni, Woxnap i kagapi woope kin eciyatanhan taku kiciçupi kin wayuxnap i ece kin hena yukanpi kin heon.

5. Heon waonspekiyapi qa taku marpiyata un kin ohanzi kin en wowidake un; Mowis wakeya qon kage kta hehan Wakantanka okiye ça, Awacin wo, re kin ekta token wanyag niciyapi qon he iyecen owasin yakage kta ce, eciya.

6. Tuka nakaha iye wowidake unpi iyotan waxte yuha, woairpeye woope waxte rinca, wahoyapi iyotan waxte kin en ahde kin he en wiciyotahedan un kin he iye.

7. Woairpeye woope tokaheya kin he iyaonpepica xni unkanx, iyokihe kin he tuktedan kiyukanpi kte xni tuka.

8. Hena taku iyawicaonpe ça heya, Wanyaka wo, anpetu kin u kta, hena en Israel tiyohnaka qa Juda tipi kin woairpeye

woope teca wicawecage kta, Itancan kin eya.

9. Egupta makoce kin etanhan awicawau kta e hena hunlake wicayapi kin nape wicamduze ciqon anpetu kin he ehan woairpeye woope wicawecage ciqon he iyecece xni; woairpeye woope mitawa kin he miciyuhapi xni; qa heon mix ihawicawakta xni ce, Itancan kin eya.

10. Anpetu kin hena iyohakam woairpeye woope wicawecage kte cin he dee *kta*, Itancan kin eya; Hena wicotawacin kin en mitoope kin wicawaqu kta, qa cantepi kin akan owawa kta, qa miye Wakantanka mayanpi kta, qa mix hena mitaoyate wicawaye kta;

11. Qa wicaxta otoiyo hi tuwe ikiyadan ti, qa otoiyo hi hunkanwanjitku kin onspewicakiyapi, qa, Itancan kin sdonya wo, eyapi kte xni, tuka owasin sdonmayanpi kta, wohakakta tankinkinyanpi ko.

12. Taku ecinxniyan econpi kin hena onxiwicawada kta qa wartanipi wicoran xica econpi ko icimana wicaweciksuye kte xni.

13. Taku teea cajeyate cin, he tokaheya kin yutanina kin heon heya. Unkan taku tanina qa takuni xni aye cin he tanin xni iyaye kta kiyadan ihan.

WICOWOYAKE 9.

1. *Woairpeye* tokaheya qon he en wicoran on ohodapi yuke ça nakun makata tipi wakan.

2. Wakeya wan kagapi, toka-

heya kin he ohna petijanjan ihu-
pa qa wahna wotapi qa aguyapi
ehnakapi kin henakiya yukan,
he tipi wakan eciyapi.

3. Qa ti cokahnakapi icinon-
pa mahen tanhan, he wakeya
kin iyotan wakan eciyapi.

4. Hen maza ska zi oizinyapi
kin, qa wicotakuye can wohna-
kapi kin akapatanhan owancaya
maza ska zi akarpeton, hee ohna
maza ska zi cega manna ohnake
cin hee, qa can sakadan Aharon
tawa kin rea aye ciqon, qa wi-
cotakuye inyan mdaska kin he-
na.

5. Qa he iwankapa tanhan
wowitan Cerubim wowaonxida
ohe kin aohanzi kin hee, he-
na nakaha owasin omdake kte
xni.

6. Hena taku kin hecen ehna-
kapi qa Woxnapi kagapi kin
wakeya tokaheya kin en wicoran
econpi kta e timahen ipi ece.

7. Tuka icinonpa kin he en
Woxnapi kagapi itancan kin e-
cedan, waniyetu otoiyohe wan-
cadan timahen iyaya, qa we
yuha, he ix iye atayedan on qa
oyate taku ecinxniyan econpi ko
on en ai.

8. He en Woniya Wakan kin
hecen yuotanin, wakeya toka-
heya kin naharin ecen he cin
icunhan tipi iyotan wakan kin
ekta canku kin naharin yuotan-
inpi xni.

9. Hena he cin hehanyan wi-
yacinpi un, qa en taku wicaqupi
woxnapi ko aipi, tuka hena e
tuwe hecon kin nagi kin yuece-
dan kta okihi xni.

10. Hena woyute qa woyatke
qa woyujaja ota, wicacerpi wi-

coran ece kin en han, woyuece-
tu kta anpetu kin hehanyan ka-
gapi.

11. Tuka Mesiya taku waxte
u kte cin he en Woxnapi kagapi
itancan hi, wakeya iyotan waxte
qa woyuxtan kin he en, nape on
kagapi xni, woicage kin de etan-
han xni kin he kapi;

12. Tatokadan qa ptejincadan
we kin yuhē xni, tuka wopek-
tonpi owihanke wanin kage qa
iye we kin hduha wancadan tipi
iyotan wakan kin timahen iya-
ya.

13. Tatanka tatokadan ko he-
na we kin, qa pte he yuktanna
carota icage cin he koya tona
waaxape cin amninnipi kin he-
na wicacerpi yuska kta e okihi
hecinhan,

14. Sam iyeya Mesiya Wo-
niya owihanke wanice cin eci-
yatanhan Wakantanka en iyaon-
pépica xni waihduxna qon he
iye we kin wiconte wicoran kin
etanhan ninagipi kin nipakintapi
kta, Wakantanka ni un kin wo-
widag niyanpi kte cin heon.

15. Qa heon etanhan woai-
rpeye wowapi teca kin en iyota-
hedan un kin he iye, hecen wo-
airpeye wowapi tokaheya ihu-
kuya wartanipi qon hena kajuju
kta e on te cin, he eciyatanhan
tona wicakico kin owihanke wa-
nin taku tawapi kte cin iwaho-
wicayapi qon he yuhapi kta.

16. Tukten woairpeye wo-
wapi wanji yukan, hen waai-
rpeye ciqon wanna te cin iye-
cetu.

17. Wanna tapi kin hehan
woairpeye wowapi kin sutaya
un, tuka waairpeye cin naharin

ni un kinhan he takudan okihi xni.

18. Unkan he iyecen woairpeye wowapi tokaheya kin we codan yuwohduze yapi xni.

19. Wooke kin eciyatanhan Mowis woahope kin owasin oyate kin owicakiyaka yaxtan qehan ptejincadan qa tatokadan we kin icu qa mini, tarinea hin duta, peji rota ko qa wowapi kin oyate kin owasin ko awicamni-mni;

20. Qa heya, Woairpeye Wakantanka econ nixipi kin we kin he dee ce.

21. Qa nakun wakeya kin, taku wakxica wowinyunyanpi kte cin owasin ko we amni-mni.

22. Wooke kin eciyatanhan taku owasin we on pakintapi, qa we papsonpi xni ehantanhan wokajuja wanica.

23. Heon etanhan hena taku kin on taku marpiya ekta un iyacinpi kin pakintapi kta e hecetu, tuka taku marpiya ekta kin hena e qe taku sanpa waxte woxnapi kin on *pakintapi* kta.

24. Tipi iyotan wakan nape on kagapi kin he en Mesiya timahen iyaye xni, tipi wakan rinca iyacinpi kin hee; tuka marpiya kin e qe mahen, qa heciya unkiyepi on Wakantanka itokam ihdutanin kta.

25. Qa Woxnapi kagapi itancan kin he tipi iyotan wakan kin en, taku tokeca we kin yuha, waniyetu otoiyohi wancadan timahen iyaye cin he iyecen ota waihduxna kte xni.

26. (He hececa unkanx maka kagapi kin ehantanhan wanna

ota kakix içiye kta tuka;) tuka nakaha woicage ihanke kin en iye waihduxna kin eciyatanhan woartani yutokan iyeye kta e on tanin içiya.

27. Unkan wicaxta kin wancadan tapi kte cin he iwahowicayapi, qa he iyohakam woyaco kta.

28. He iyecen Mesiya wicota woartani kin yuha wayuxnapi qon, qa tona he wanyakapi kta ape yukanpi kin hena, woartani wanin, wiconi kta e on en wicahi kta.

WICOWOYAKE 10.

1. Taku waxte u kte cin ohanzi kin he wooke kin en un, qa hena atayedan taku kin oun-cage kin hee xni; heon etanhan waniyetu otoiyohi woxnapi ohinniyan aipi kin he tona en hipi kin wicayuecedan kta okitpani.

2. He okihi unkanx hena taku kin wayuxnapi ayuxtanpi kte xni he. Tona en opapi wancadan pakintapi kinhan icimana woartani sdonkiyapi xni tuka.

3. Tuka hena on waniyetu otoiyohi woartani kiksuyapi ece.

4. Tatanka tatokadan kici hena we kin woartani yutokan iyeye kta okihipica xni.

5. Heon etanhan makata hi qehan, Woxnapi taku wicaqupi ko yacin xni, qa tancan wan miyecaga ce, eya.

6. Peta woxnapi qa woartani on woxnapi kin hena iyonicipi xni;

7. Hehan, Ito wau (wowapi

wicowoyake kin en miye on hecen kagapi) Wakantanka nitawacin kin ecen ecamon kta ce, epa.

8. Wankan, Woxnapi taku wicaqupi, peta woxnapi qa woartani on *woxnapi* kin, (woope eciyatanhan ahi wayuxnapi kin,) hena yacin xni qa iyonicipi xni, eye çehan,

9. Hehan nakun, Wakantanka nitawacin kin ecen ecamon kta wau ce, eye cin. Tokaheya kin he yutokan iyeya, icinonpa kin he hdusuta kte cin heon.

10. He iye tawacin kin ee on unyuecepidan, Jesus Mesiya tancan wancadan wayuxnapi kin he eciyatanhan.

11. Woxnapi kagapi otoiyo-hi anpetu iyohi, en ohoda inajin, qa ohinniyan taku woxnapi ece kin hena ake eceken wayuxna, hena woartani kajuju kta tokadan okihi xni.

12. Tuka wicaxta kin de woartani on woxnapi wanjidan wahduxna, hehan Wakantanka etapa kin eciyatanhan owihanke wanin kiyotanka;

13. Qa hetanhan tona tóka yapi kin hena owasin iye siha kin ihukun iyewicayapi kta ape yanka.

14. Woxnapi wanjidan on etanhan tona wicayuecepidan kin hena owihanke wanin wicahduxtan.

15. Woniya Wakan kin he nakun unkiciyaotaninpi. Tokaheya eye cion he iyohakam,

16. Anpetu kin hena iyohakam wicotakuye wicawecage

kte cin he dee kta, Itancan kin eya; Mitoope kin hena iye can-tepi kin en wicawaqu kta, qa tawacinpi kin en owakiwa kta;

17. Qa iye wartanipi taku e-cinxniyan econpi ko icimana weksuye kte xni.

18. Hena owasin kajujupi kinhan woartani on woxnapi kin wanice kta.

19. Heon mihunkawanji, Jesus we kin eciyatanhan tipi iyo-tan wakan kin en waditagya unyanpi kte;

20. Canku wan teca ni un, ti cokaya hnakapi, iye cerpi kin hee ohna unkicagapi kin he eciyatanhan.

21. Qa Wakantanka tipi kin ohna Woxnapi kagapi itancan wan unhapi.

22. Heon cante okonwanjidan yuha xogya wacinunyanpi qa ikiyedan unkupi kta, wicanagi xice cin etanhan uncantepi kin unkamninnipi,

23. Qa mini ska kin on untancanpi kin unyujajapi kta. Kinhan woape unyaotaninpi qon he sutaya unhduhapi kta; (tuwe wahounyanpi kin he wacinyepica.)

24. Qa otoiyo-hi awaunkici-cinpi kte, wowaxte wicoran waxte en iyounkicipaxtakapi kte cin heon.

25. Qa wanjikji econpi kin iyecen mniunkiciyapi ece kin he unkayuxtanpi kte xni; tuka *otoiyohi* wahokonunkiciyapi kta, qa anpetu kin he kiyadan u wandakapi kinhan sanpa nina ecanonpi kta.

26. Wowicake wosdonye unkicupi kin he iyohakam iyoki-

piya waunrtanipi kinhan woartani on woxnapi kte cin wanica ihan.

27. Tuka woyaco wokokipe qa wocanniye ide kin, tona takpe upi kin hena ihang wicaye kte cin hee.

28. Tuwe Mowis toope kin akta xni kin he onxidapi xni ta ce, waayatanin nonpa qa yamni eciyatanhan.

29. Tuwe Wakantanka Cihintku we kin amani qa wicotakuye en we kin on yuecepidan qon he taku wakan xni dake qa Wowaonxida Woksape kin he taku i en hiyeye cinhan he wokakije iyotan tanka hiyahde kte xni kecanipi he.

30. Tokiçonpi kin he mitawa, towicaweciçon kta ce, Itancan kin eya ce, eye ciqon he sdon- unyanpi. Qa ake, Itancan tao- yate kin wicayaco kta ce.

31. Wakantanka ni un nape kin en ohinrpayapi kin he wokokipe.

32. Anpetu tokaheya kin kiksuya po, hena en iyoyam ni- yanpi qa hehan wicokakije oki- eize tanka wan iyahde niciya- pi.

33. He icunhan waaiapi wi- cokakije ko on iwanniyakapi kta enihdepi qa nakun tona he- cawicakiconpi kin hena tawaxi wicayayapi.

34. Miye makaxkapi kin icun- han onximayakidapi qa woyuha duhapi qon nicípi kin he on wi- duxkinpi, marpiya ekta woyuha iyotan waxte ohinniyan ye kte ein he duhapi sdonyakiyapi kin heon etanhan.

35. Wadinitakapi qon he a-

yuxtanpi xni po, he woyuha taha okihi kta.

36. Warbayedan apepi kin he yacinpi, hecen on Wakantanka tawacin kin ecen ecanonpi kin- han taku iwahounyanpi kin he iyacupi kta.

37. Wanna axkadan tuwe u kte ein he hi kta, qa yutehan kte xni.

38. Tuwe owotanna un kin he wacinyanpi kin on ni kta. Tuka tuwe namni kinhan he minagi kin iyokipi kte xni ce.

39. Tuka tona wicotakuni xni ekta icicawin hdapi kin heunca- pi xni; tona wacanagi ni kta e on wicadapi kin hena *unkiyeipi*.

WICOWOYAKE 1f.

1. Taku apepi kin ahe cin wacinyanpi kin hee, qa taku wanyakipi xni un kin yuotanin- pi kin hee.

2. Heon hunka wicayapi kin yuonihanyan ihdaotaninpi qon.

3. Wacinyanpi kin eciyatan- han, Wakantanka oie kin on wo- icage kin icar yapi kin he sdon- unyanpi, taku wanyakapi un kin hena taku tanin kin etanhan kagapi xni.

4. Wacinyanpi kin eciyatan- han Abel Qain kape qa woxnapi iyotan waxte wan Wakantanka wakiyuxna qon he on owotanna e hduotanin; Wakantanka nakun hecen yaotanin, taku qu kin he- on, qa he eciyatanhan ta kex- naharin ia ce.

5. Wacinyanpi kin eciyatan- han Henok wiconte wanyake kte xni e tokan ehdepi qa tukte- dan iyeyapi xni, Wakantanka

tokan ehde kin heon. Tokan ehdepi xni itokam Wakantanka iyokipi ye cin he oyakapi.

6. Wacinyanpi wanica hecinhan tuwedan iyokipi ye kta okihi xni. Tuwe Wakantanka en u kte cinhan he *Wakantanka* un qa tona aiçiciya akitapi kin hena iyunwin wicaqu ece kin he wicada kta.

7. Wacinyanpi kin eciyatanhan Nowa Wakantanka ihamna, taku naharin wanyakapi xni kin hena, qa itonkipa un kin heon tiyohnaka tawa ni kte cin heon wata tanka kage, ça iye oran kin on oyate kin wicayaco, qa hecen woowotanna wacinyanpi eciyatanhan un kin he tawa kta e icaga.

8. Wacinyanpi kin eciyatanhan Abereyam makoce wan yuhe kte cin he ekta ye xipi qehan anagoptan, qa tokiya ye kte cin tanyan sdotkiye xni iyaya.

9. Wacinyanpi kin eciyatanhan makoce iwahoyapi qon he en ounyan, makoce tawa xni kin en iyececa, qa Izak Jakob kici taku iwahoyapi qon om tawa ye kte cin hena om wakeya ohna ti.

10. Otonwe wan taku ahde kin ahe cin he ape yanka, ticage ça icar ye cin he Wakantanka kin ee.

11. Wacinyanpi kin eciyatanhan Sara iye qe cinca yuhe kta e wowaxake icu, qa wanna waniyetu ece kin sanpa hiyu tuka cinca ton, tuwe iwahoye ciqon he wicaka e awacin yanke cin heon.

12. Qa hecen wanjidan etanhan, he ça nun seca, tuka he

etanhan wicota icaga, marpiya wicanrpi kin iyenaka, qa minivanca kahda wiyaka sukaza kin iyecen yawapica xni.

13. Hena owasin wacinyan ecen tapi, taku iwahowicayapi qon naharin icupi xni, tuka tetanhan tanhan wanyakapi, qa wicadapi, qa adoksohan icupi, qa maka akan ihdaka unpi qa sdonyapi xni un heca ihdaotaninpi.

14. Tona hena [hecen eyapi kin hena makoce wanji akitapi e taninyan ohdakapi.

15. Qa makoce kin etanhan hiyupi qon he wacin en yuzapi unkanx heciya ake icicawin hdapi kta tuka.

16. Tuka nakaha wanji iyo-tan waxte marpiya ekta wanke cin hee akitapi. Heon etanhan Wakantanka hena Wakantanka tawapi kin eciyapi kta ixtece xni, qa otonwe wan wiyeya ewicakicihnaka.

17. Wacinyanpi kin eciyatanhan Abereyam iyutanyanpi qehan Izak wahduxna, qa tuwe iwahoyapi kin yuhe cin he cihintku ecedan kin wahduxna.

18. Izak etanhan wicoicage nitawa kin cajeyatapi kta ce, eciyapi tuka qon.

19. Wiconçe ee kaex etanhan Wakantanka ekicetu ya okihi he wicada, qa hetanhan nakun wiyacinpi on ehdaku.

20. Wacinyanpi kin eciyatanhan Izak Jakob Esa kici wicahdawaxte, taku u kte cin heon.

21. Wacinyanpi kin eciyatanhan Jakob wanna te kta hetan Josep cihintku napin wicahdawaxte qa can sagye ointpa

kin akan *Wakantanka* cekiya.

22. Wacinyanpi kin eciyatanhan Josep wanna ƙe kta hehan Israel cincapi kin hetanhan hdapi kte cin he caje yate ƙa iye hulu kin iwahowicaya.

23. Wacinyanpi kin eciyatanhan Mowis tonpi kin hehan hunkakepi kin wi yamni hehanyan anakirmanpi, hokxidan waxte e wanhdakapi qa wicaxtayatapi toope kin kokipapi xni.

24. Wacinyanpi kin eciyatanhan Mowis wanna tanka icage ƙehan Paro cunwintku cinca kin eciyapi kta wicada xni.

25. Qa *Wakantanka* taoyate kin om kakija un kte cin he iyokipi, qa woartani woiyokipi kin ptenyedan yuhe kte cin he *iyokipi* xni.

26. Mesiya on aiapi kin hee woyuha Egupta en un kin sam iyeya iyotan daka, taku airpeunyanpi kin he awacin yanka.

27. Wacinyanpi kin eciyatanhan Egupta makoce kin ayuxtan, qa wicaxtayatapi tocanniye kin kokipe xni. Tuwe wanyagpica xni kin he wanyaka se ape yanka.

28. Wacinyanpi kin eciyatanhan woxnapi wohduze qa we amnimnapi kin hena kaga, tuwe cinca tokapapi kin ihang wicaye cin he iye owicayutan kte xni heon *hecon*.

29. Wacinyanpi kin eciyatanhan Mde xa *eciyapi* he iyoota iyayapi, *maka* puze cin iye-cen. Unkan Egupton oyate kin heconpi kta, qa minin ƙapi.

30. Wacinyanpi kin eciyatanhan Jerico conkaxke kin maka-

ta irpaya, anpetu xakowin ohomni iyayapi kin hehan.

31. Wacinyanpi kin eciyatanhan witkowinna wan Rahab *eciyapi* tona anagoptanpi xni kin hena om ihang yapi xni, wicaxta wiwanyakapi kin hena wookiye iyowinwicakiye ƙehan.

32. Qa taku sanpa epe kta he; Gideon, qa Barak, qa Samson, qa Jep̄te, qa Dawid, qa Samuel, qa wicaxta wokeanpi kin owasin owicamdake kta anpetu [kin iyehankeca xni.

33. Hena wacinyanpi kin eciyatanhan wokiconze kin ohiyapi, wicoran owotanna oranyanpi, wahoyapi kin yuhapi, mnajapi kin ohmus icupi,

34. Peta wohitike cin kasnapi, maza sagye ope kin nakicipi, wowaxake xni etanhan waxag iƙiyapi, okicize en waditaka iƙicagapi, qa Ikcewicaxta ozuye kin nape wicayapi.

35. Winorinca kin tona ƙiƙapi qon ekicetu yapi ewicahdakupi. Qa wanjikji nina kakix yapi tuka etanhan ehdakupi kta cinpi xni, woekicetu iyotan waxte kin yuhapi kte cin heon etanhan.

36. Qa wanjikji waaiapi qa nina wicakaxtakapi kin on iyutanpi, qa nakun maza icicarira, kaxka wicahnakapi ko on.

37. Inyan on wicakininpi, can ibakse on bawicaksapi, iyutan wicayapi, maza sagye on wicaktepi; taha tatokadan ha ko inpi qa manin unpi; taku owasin icakijapi, kakijapi un qa xicaya wicakuwapi.

38. Hena maka kin de iyewicakicihantu xni. Rewoskan ma-

nin unpi, re kin akan, taku itu unpi otipi qa makordoka ohua *yakonpi*.

39. Hena owasin wacinyanpi kin eciyatanhan tanyerin ihduo-taninpi qa wahoyapi kin ocowasin icupi xni.

40. Wakantanka taku sam iyeya waxte unkiyepi on ehna-ka, hecen hena e unkicunonpa tanhan wicahduxtanpi kte xni.

WICOWOYAKE 12.

1. Heon etanhan waayataninpi marpiya xoka wan hinsko tanka aohdute unyanpi kin heon taku tkeya qinpi kin owasin eunhnakapi kta, woartani ohi-nyanpi ece kin he koya, qa oinyanke unkitokam wanke cin he wacin tankaya unkinyankapi kta.

2. Qa Jesus wacinunyanpi kin toka kage qa hduxtan kin hee ekta euntanwanpi kta. He iye wowiyuxkin itokam ehdepi qon he on can susbeca kin hee kaex iyowinkiyeye qa wowixtece kin he taku da xni, qa Wakantanka oiyotarke etapa kin eciyatanhan kiyotanka.

3. Tuwe wartanipi sa taku i en hiyeyapi kin he iye en warbayedan iyowinye cion he awacin po, nitawacinpi kin ekta iconimnipi kte xni qa wacin iboyaxakapi kte xni.

4. Woartani kici yecizapi kin en naharin we kin ekta aiyahdeya ecanonpi xni.

5. Qa wahokonkiyapi kin cinca iyecen oniciyapi kin he ayektonjapi he; Micinkxi Itancan wicakapsinpsinte cin he xice

dake xni wo, qa iyopeniye cinhan wacin iboxake xni wo, eye cin.

6. Itancan kin wicaxta waxte kida kinhan he iyopekiye qa cinca iyowinwicakiye cin otoi-yohi hdapsinpsinta ece.

7. Wiyopeniyanpi kinhan cinca kin iyecen Wakantanka ecaniconpi; tukte cinca kin he atkuku iyopekiye xni he.

8. Tuka owasin en opapi ece kin iyecen iyopeniyanpi xni kinhan, tuwe cinca tanin xni kin henicapi qa cihintku yapi un kin henicapi xni.

9. Unkan wicacerpi eciyatanhan ate unyanpi wicunbduhapi, hena iyopeunki-yapi qa unkiye wicunhduonihanpi; hecece cinhan sam iyeya wicanagi *owasin* Ate yapi kin he anaungoptanpi kte qa on unnipi kta.

10. Hena e anpetu tonana hehanyan token iyokipipi kin hecen iyopeunki-yapi, tuka he qe wowaxte *ecaunkiconpi* kte cin he on *iyopeunyanpi*, hecen on iye oran wakan kin en ounpapi kta.

11. Wiyopewicayapi kin owasin en icunhan woiyokipi xni, tuka woiyokixice, tuka ihakam tona hecawicakiconpi kin en wicoowotanna waskuyeca woo-kiye kin icar wicakiya ece.

12. Heon etanhan wicanape suta xni kin hena yuwankan icu po, qa hupahu waxake xni kin hena koya;

13. Qa nishapi canku mdaya kicaga po, taku huxte kin he icunonpa iyeyapi kte xni, tuka okizi yapi kte cin heon.

14. *Wicaxta* owasin en wo-

okiye akita po qa nakun wowa-
kan kin, he tuwe yuhe xni kin-
han Itancan kin wanyake kte
xni.

15. Qa tuwe Wakantanka to-
waonxida kin iyohi kte xni na-
ceca, heon aiçiciya iwanihdaka
po, okini can hute paza icage ça
nagiyenianpi kta, qa hecen
wicota axamyapi kta.

16. Okini wicawihomni wan
icage kta, wicaxta waaie sa, Esa
iyececa, he watokapa kin taku
yutapi onxpadan iyopekiya.

17. Qa iyohakam woyawaxte
kin hduhe kta tuka reyata iye-
yapi, he sdoniyayapi, qa token
ihduecetü kte cin he iyekiye
xni, ixta mnihanpe on nina aki-
ta tuka.

18. Re oyutanpica qa peta on
ide qon he ekta yahipi xni, qa
taku iyotan samya wanke cin,
qa otpaza, qa nina icamna kin
ekta *yahipi* xni.

19. Qa nakun mazayahoton-
pi tanka hoton, wicoie ho kin
hena koya; he tona naronpi qon
wicoie kin he akta owicakiya-
kapi kte xni e icekiyapi.

20. Taku econ wicaxipi qon
he okitpanipi. Woteca wan
hee kaex re kin en yutan kin-
han he inyan on kininpi kta, qa
ix wanhinkpe on katpa iyeyapi
kta ee.

21. He wanyakapi kin nina
wowinihan, qa heon Mowis,
Nina marniyanyan qa macancan
ce, eya.

22. Tuka Ziyon re kin ekta
yahipi, Wakantanka ni un oton-
we tawa kin, Jerusalem marpiya
tanhan u kin, qa ohnihde unpi

kin kektopawinge ota ekta *ya-
hipi* ;

23. Omniciye tanka tokaheya
tonpi taokodakiciyepi kin ma-
rpiya ekta caje owicawapi kin
hena, qa wicaxta owotanna yu-
xtanpi wanagipi kin hena ekta;

24. Qa Jesus wicotakuye teca
kin en iyotahedan un kin hee
ekta, qa we amnimnipi kte cin,
Abel tawa kin sam iyeya taku
waxte eye cin he en *yahipi*.

25. Hecen tuwe ie cin he
anayagoptanpi kte xni itonpa po;
tona tuwe maka akan ie ciqon
he anagoptanpi xni qon hena
najicapi xni hecinhan, sam iye-
ya unkiye naunjicapi kte xni,
tuwe marpiya tanhan ie cin iha-
unktapi xni kinhan.

26. Iye ho kin he ehan maka
kin yahuhuza, tuka nakaha wa-
hounyanpi qa heya, Ake wanca-
dan maka ecedan mdahuhuza
kte xni tuka nakun marpiya kin
mdahuhuza kta.

27. Ake wancadan, eyapi kin
he taku tona yahuhuzapi kte cin
hena taku kagapi kin iyecen yu-
token iyeyapi kta, qa taku tona
yahuhuzapica xni kin hena ecen
he kta, he kapi.

28. Heon etanhan wokiconze
yuhohopica xni kin unkiçupi,
wowaonxida unhapi kta hecen
on woyuonihan wokokipe ko
yuha Wakantanka iyokipiya o-
houndapi kta.

29. Wakantanka unkitawapi
kin he peta warurnarye cin heca.

WICOWOYAKE 13.

1. Hunkawanjin kiciyapi wa-
xte kicidapi kin he ecen un nun-
we.

2. Oicimani kin hena won wicayapi akiktonjapi xni po, heconpi kin en wanjikji ohnihde unpi kin sdonwicaye xni won wicayapi.

3. Tona kaxka wicahnakapi kin hena om nicaxkapi kin iye-
cen wicakiksuya po, qa tona ka-
kix yapi un kin hena kcyā, wi-
catancan kin ohna dukanpi kin
heon.

4. Owasin en wakan kiciyu-
zapi kin he woyuonihan qa ohe-
hdepi wawiciraraye xni kin; tu-
ka wicawihomnipi wawicirarapi
econpi ko Wakantanka wicaya-
co kta.

5. Wahduhahaktece cin wa-
nin dukanpi qa taku duhapi kin
hena on iyonicipipi nunwe. To-
hini aiyuxtān kte xni qa icima-
na erpeciye kte xni, eye ciquon
heon etanhan.

6. Heon, Itancan kin waawan-
hdake mitawa kin hee, qa he
etanhan taku wicaxta akantu
ecamiconpi kte cin kowakipe
kte xni ce, waditagya unkeyapi
kta.

7. Tona awannihdakapi, Wa-
kantanka oie kin oniciyakapi
kin hena wicakiksuya po, hena
wicoran ihanke kin he awacin
po, qa wicadapi qon he en opa
po.

8. Jesus Mesiya rtanihan,
nakaha, qa owihanke wanin o-
konwanjidan kin hee.

9. Wicowoyake tokeca qa
sdonyapi xni kin he on yutokan
iyeniyānpi xni nunwe. Wica-
cante kin he wowaonxida on
yusutapi kinhan he waxte, wo-
yute kin tona en manipi qon ta-

kudan okihi wicaye xni kin he
etanhan xni.

10. Wahna woxnapi wan un-
hapi kin he etanhan tona wake-
ya qon ohna oranyānpi kin he-
na yutapi kta okihihi xni.

11. Woteca qon, tona we kin
woartani on, Woxnapi kagapi
itancan kin tipi iyotan wakan
kin timahen ai qon, hena tancan-
pi kin tihocoka kin itankan rur-
nar yapi ece.

12. Heon Jesus, ix eya, iye
we kin on oyate kin wicayuece-
dan kta e otonwe tiyopa kin
itankan kakix yapi qon.

13. Hecen on iye aiapi qon
airpeunyanpi kin yuha ekta wic-
oti kin tankan unyanpi kta.

14. Deciya otonwe ohinni-
yan ecen he cin unhapi xni, tu-
ka wanji u kte cin he unakita-
pi.

15. Heon etanhan iye caje on
ohinniyan Wakantanka en wo-
witan woxnapi kin unkaupi kta,
unkihipi etanhan waskuyeca,
iye caje kin on wounhdakapi
kin hee.

16. Taku waxte econpi qa
wacantkiyapi kin hena akikton-
japi xni po, hena woxnapi kin
Wakantanka iyokipi ece.

17. Tona tanyan ye niyanpi
kin hena anawicakigoptanpi qa
wicihukuya ye içiya po, hena
uinagipi kin on awanniyakapi,
ohdakapi kte cin he iyecen, he-
cen wowiyuxkinyan econpi kta
qa woiyokixice wanica, he iyo-
nicipipi kte xni.

18. Unkiyepi kin on woce-
kiye eya po; wicanagi waxte
unhapi unkecinpi, taku owasin

en owotanna unkoranpi kta uncinpi.

19. Qa hecanonpi kta e iyotan ceciciyapi, kohanna niyepi ekta ye mayanpi kte cin heon.

20. Unkan Wookiye Wakan-tanka kin Jesus Itancan unkiyapi, tarinca kin en waawanhdake tanka kin hee wiconŋe etanhan ake hiyu ye cigon he wicotakuye owihanke waniea we kin eciyatanhan,

21. Wicoran waxte owasin en, iye tawacin kin ecenecanonpi kta e niyuecepidan qa taku iye ixta kin en oiyokipi kin Jesus Mesiya eciyatanhan eca-

niconpi kin he wowitan owihanke wanica kicihan nunwe.

22. Mihunkawanji ceciciyapi ce, wowahokonkiye wicoie kin iyowinkiya po, wicoie tonana on wowapi cicagapi.

23. Timoteyos hunkawanjin unyanpi kin wanna kiyuxkapi e sdonya po, he ecadan u kinhan kici wanciyakapi kta.

24. Tona niyepi en itancanpi kin hena owasin, qa tona owotanna un kin owasin nape wicayenza po. Italiya etanhanpi kin hena nape niyuzapi.

25. Wowaonxida kin niyepi owasin en nicipi un nunwe. Amen.

JAN WOYAKE CIQON.

THE APOCALYPSE OF JOHN, IN THE DAKOTA LANGUAGE;

TRANSLATED FROM THE GREEK, BY S. R. RIGGS, A. M.

WICOWOYAKE 1.

1. Jesus Mesiya wohdake cin, taku ecadan u kte cin taokiye wicaye cin sdonye wicakiye kta e Wakantanka qu qon he dee. Unkan ohnihde tawa wan u xi qa taokiye kin Jan *eciyapi* he okiyaka.

2. He Wakantanka oie kin yaotanin qa Jesus Mesiya wohdake cin token wanyake ciqon he *oyaka*.

3. Tuwe wokcan oie kin de yawa, qa tona naronpi, qa taku en kagapi kin anagoptanpi kin, hena wowaxte yuhapi. Wanna kiyadan ihan.

4. Jan Asiya ekta okodakiciye xakowinpi kin *wowapi wicakicaga*. Wowaonxida, wookiye ko, tuwe un, qa un qon, u kte cin hetanhan niyepi en nici-pi un nunwe; qa Woniya xakowinpi oiyotanke tawa kin itokam unpi kin hena *eciyatanhan*;

5. Qa Jesus Mesiya etanhan, he waayatanin wicaka, wiconte etanhan tokaheya tonpi, qa maka wicaxtayatapi kin Itancan kin hee. Tuwe waxte unkidapi qa waunrtanipi kin etanhan iye we kin en unyujajapi,

6. Qa Atkuku Wakantanka ekta wicaxtayatapi woxnapi kagapi ko unkagapi kin hee wowitan wowaxake ko owihanke wain tawa nunwe.

7. Wanyaka po, marpiya xapa kin akan u; unkan wicixta owasin wanyakapi kta, qa tona he capapi qon hena nakun, qa iye on oyate maka ohnaka kin owasin aicipapi kta. Hecetu nunwe.

8. Alpa qa Omega, otokahe qa owihanke kin he miye ce; Itancan un qa un qon u kta, iyo-tan waxake cin he hena hecen eya.

9. Jan hunkawanjin yayapi

wokakije qa wokiconze wowa-rbadan ko Jesus Mesiya tawa kin en tawaxi yayapi kin he miye; Wakantanka oie qa Jesus Mesiya wohdake cin on etanhan wita wan, Patmos eciyapi, hen waun;

10. Qa Itancan kin taanpetu kin en Woniya *Wakan* kici waun; qa mihektapa tanhan wicaho wan tanka, maza yahotonpi tanka wan iyececa, nawaron;

11. He kaken eya, Alpa qa Omega, tokaheya qa ehake kin he miye ce. Taku wandake cin wowapi ecen kage qa Asiya ekta okodakiciye kin iwahowicaya wo; Epesos qa Smurna qa Pergamos qa Tuatira qa Sardis qa Piladelpiya qa Laodikiya.

12. Unkan wicaho omakiye cin he wanmdake kta e ekta mihdamna. Unkan mihdamna qehan maza ska zi petijanjan ihupa xakowin wanmdaka.

13. Qa petijanjan ihupa xakowin kin cokaya Wanji Wicaxta kin Cihintku kin iyececa, tawokoyake kin siha kin ekta iyahdeya qa maku kin opta maza ska zi ihduskita.

14. Qa pa kin paha ko ska, tarinca wanuyanpi hin kin iyeccen ska, qa wa iyececa, qa ixta kin peta ide kin iyececa;

15. Qa siha kin ix maza zi ecedan iyececa, peta tanka en itkonyahe seca, qa ho kin he mini ota irara kin iyececa.

16. Qa nape etapa kin ohna wicanrpi xakowin hduhe qa i kin eciyatanhan maza sagye anog ope kin heca wan hiyu, qa

itohnake kin he anpetu wi nina iyoyanpa kin iyececa.

17. He wanmdaka, unkan qa wanke cin iyeccen siha hdepi kin en mahinrpaya. Hehan iye nape etapa kin on omayutan qa, Ihnuhan koyakipe cin, emakiya; Tokaheya qa ehake kin he miye;

18. Tuwe te qa ake kini, qa ito owihanke wanin ni waun; Amen; qa Wakanxica ti kin wiconce ko tiyopa iyurdoke kin hduha manka.

19. Taku wandake cin he wowapi ecen kaga wo, taku nakaha un qa dena iyohakam taku un kte cin hena.

20. Wicanrpi xakowin minape etapa kin ohna wandake cicon wowiyukan kin hee, qa maza ska zi petijanjan ihupa kin hena nakun. Wicanrpi xakowin qon okodakiciye xakowinpi waanwanhdake yuhapi kin hena eepi, qa petijanjan ihupa xakowin wandake cin okodakiciye xakowinpi kin hena eepi.

WICOWOYAKE 2.

1. Epesos ekta okodakiciye ohnihde yuhapi kin he ecen wowapi kicaga wo; Tuwe wicanrpi xakowin nape etapa kin ohna hduhe qa maza ska zi petijanjin ihupa xakowin cokaya omani kin he hecen eya;

2. Nioran qa nitortani qa wowarbadan duhe cin he sdonwaya; qa tona xicapi kin hena iyowinwicakiya oyakihi xni; qa tona ohnihde unpi keiciyapi tuka hecapi xni kin hena iwicadu-

kean qa itonpixni kin heca iye-wicayaya.

3. Wacin nitanka qa ayape qa micaje kin on rtayani qa oya-kiŕe xni.

4. Tuka taku cistina iyacionpa, tokaheya waxte yadake cin he aduxtan.

5. Heon tokiya tanhan nihin-rpaye cin he kiksuye, a ihdu-ecetu, qa nioran tokaheya kin hduxtan wo. *Hecanon* xni kinhan kohanna ekta ciu qa petijan-ŕan nitawa kin yutokan iyeciciye kta, nihduecetu xni kinhan.

6. Tuka he duha, Nikoleton wicoran kin xice yadake cin, hena mix eya xice wadaka.

7. Tuwe noge yukan hecinhan taku Woniya *Wakan* okodakiciye kin ewicakiye cin he naron kta. Tuwe ohiye cinhan he can wiconi Wakantanka tamaga cokaya he cin hetanhan yun wakiye kta.

8. Unkan Smurna ekta okodakiciye ohnihde yuhapi kin he ecen wowapi kicaga wo; Tuwe tokaheya qa ehake un kin, e a ake kini kin hee hecen eya;

9. Nioran kin sdonwaya, wokakije wowarpanica ko nitawa kin, (tuka winijica;) qa tona Juda wicaxta keiiyapi qa hecapi xni tuka Satan omniciye tawa kin etanhanpi, hena waaiapi kin *nakun sdonwaya*.

10. Token nicakije kte cin ihnuhan taku koyakipe cin. Iho Wakanxica niyepi wanjikji wicakaxka tipi kin en iyeniyampi kta, iniyukeanpi kta e heon; unkan anpetu wikcemna hehanyan wokakije duhapi kta; tuka wicaje cin hehanyan wicaka wo,

wiconi watexdake wan ciu kta.

11. Tuwe noge yukan hecinhan taku Woniya *Wakan* okodakiciye kin ewicakiye cin he naron kta. Tuwe ohiye cinhan he wicone icinonpa kin on ki-uniyampi kte xni.

12. Unkan Pergamos ekta okodakiciye ohnihde yuhapi kin he ecen wowapi kicaga wo; Tuwe maza sagye anog ope kin hduhe cin hee hecen eya;

13. Nioran kin sdonwaya, qa tukten Satan oiyotanke tawa yanke cin hen yati; qa micaje kin yuha yaun qa wicamadapi kin aduxtan xni, anpetu kin Antipas waayatanin wicaka mitawa kin niyepi kin en, tukten Satan ti kin, hen ktepi qon he ehan.

14. Tuka taku wanjikjidan iyacionpa; Balam hee Balak Israel cinca kin taku on wartani iiyapi kte cin wicitokam ehde kin he onspe kiye a taku wakagapi wakiyuxnapi kin yutapi qa wawicirarapi econpi kte cin hena hecon wicakiye cin tawo-onspe yuhapi kin hena wica-duha;

15. Qa nakun Nikoleton ta-woonspe yuhapi kin hena wica-duha, he xice wadaka tuka.

16. Ihduecetu wo; *hecanon* xni kinhan kohanna ekta ciu qa mii maza sagye kin on hena kici wecize kta.

17. Tuwe noge yukan hecinhan taku Woniya *Wakan* okodakiciye kin ewicakiye cin he naron kta. Tuwe ohiye cinhan he manna kihnakapi qon he etanhan yun wakiye a inyan ska wan waqu kta, inyan kin he en wicacaje teca wan kagapi

kin he tuwedan sdonye xni, tuka tuwe icu kte cin hecedan.

18. Unkan Tuatira ekta okodakiciye ohnihde yuhapi kin he ecen wowapi kicaga wo; Wakantanka Cihintku, ixta peta ide kin iyecen hduhe ça siha kin maza zi ecedan iyececa hee hecen eya;

19. Nioran kin sdonwaya, wacanyakiye, ça rtayani, qa wicayada, qa ayape, qa nioran kin, qa ehake kin hena tokaheya kin sam iyeya ota e sdonwaya.

20. Tuka taku tonana iyacionpa, winorinea wan Jezabel eciyapi, winorinea wokcanka keiciye cin he mitaokiye kin wicahnaye ça wawicirarapi econpi qa taku wakagapi wakiyuxnapi kin yutapi kta e onspe wicakiye cin hee iyowinyakiya.

21. Unkan winorinea kin he wawicirarapi econ qon iyopeiciye kta e anpetu waqu tuka iyopeiciye xni.

22. Ito owinja wan akan ewaonpe kta qa tona kici wawicirarapi econpi kin hena nakun wokakije tanka en iyewicawaye kta, wicoran kin iyopeiciyapi xni kinhan.

23. Qa iye cinca kin wiconte on wicawakte kta; qa okodakiciye kin owasin tuwe wicapakxin wicacante ko iyukean kin he miye e sdonyapi kta. Qa niyepi kin otoiyo hi nioranpi kin eciyatanhan ciçupi kta.

24. Tuka niyepi qa tona Tuatira ekta woonspe kin he yuhapi xni qa Satan oxbe tawa eyapi kin sdonye xni yaunpi kin kaken eciçiyapi; Waqinpi tokeça acihnakapi kte xni;

25. Tuka taku duhapi kin he çinsa hduha po, hibu kte cin hehanyan.

26. Qa tuwe ohiye ça owihanke kin iyahdeya mioran kin yuha un kinhan oyate kin en wowaxake waqu kta.

27. Qa maza icapsinte wan on wicayuhe ça maka wakxica iyecen wicakamdece kta ce; hecen Ate etanhan hduha waun.

28. Qa anpaç wicanrpi kin he waqu kta.

29. Tuwe noge yukan hecinhan taku Woniya Wakan okodakiciye kin ewicakiye cin he naron kta.

WICOWOYAKE 3.

1. Unkan Sardis ekta okodakiciye ohnihde yuhapi kin he ecen wowapi kicaga wo; Tuwe Wakantanka Taniya Wakan qa wicanrpi xakowin hduhe cin he hecen eya; Nioran kin sdonwaya, caje wan duha, yani kin hee, tuka niça.

2. Kiktahan un qa taku tona naharin en un qa çe kte cin hena hduwaxaka wo; Wakantanka itokam nioran kin owotanna e iyewaye xni.

3. Heon token iyacu qa nayaron kin kiksuye ça çinsa yuze ça ihduecetu wo. Kiktahan yaun xni kinhan wamanon sa iyecen ekta ciu kta, qa tohan ekta cihi kte cin he sdonyakiye kte xni.

4. Tuka Sardis ekta wicacaje tonana duha, hena e tawokoyake kin hduxapapi xni qa ska ihduzapi ecen mici manipi kta, he iyehantupi nakaex.

5. Tuwe ohiye cinhan he wokoyake ska koyake kta qa iye caje kin wiconi wowapi kin etanhan wapajuju kte xni, tuka he caje kin Ate itokam qa ohni-hde wicaye cin hena wicitokam omdake kta.

6. Tuwe noge yukan hecinhan taku Woniya *Wakan* okodakiciye kin ewicakiye cin he naron kta.

7. Unkan Piladelpiya ekta okodakiciye ohnihde yuhapi kin he ecen wowapi kicaga wo; Tuwe wakan qa wicaka un, qa Dawid tiyopa iyurdoke kinyuhe ça yurdoka eca tuwedan ecen iyeye xni, qa ecen icu eca tuwedan yurdoke xni ece kin hee hecen eya;

8. Nioran kin sdonwaya, tiyopa wan yurdokapi ecen he cin he nitokam ewahde, qa tuwedan ecen iyeya okihi xni; wowaxake cistina duhe ça mioie kin yuha yaun qa micaje kin erpemayaye xni.

9. Ito Satan omniciye tawa kin etanhanpi Juda wicaxta ke-iciyapi tuka hecapi xni qa itonpi xni kin hena iho upi qa nisiha kin itokam canpexka makehde inajin wicawakiye kta, qa waxte cicida e sdonyapi kta.

10. Woape oie mitawa kin he awandake cin heon tohan taku wawiyutanyan un kin tona maka owancaya unpi kin iyutan wicaye kta u kinhan hehan awanciyake kta.

11. Iho ecadan wau kta; taku duhe cin he tinsa yuza wo, hecen watexdake nitawa kin tuwedan nicí kte xni.

12. Tuwe ohiye cinhan he

tipi wakan mita Wakantanka tawa kin ohna can ihupa wan wakage kta qa icimana tankan ye kte xni; qa he akan mita Wakantanka caje kin owawa kta, qa mita Wakantanka otonwe tawa caje kin, Jerusalem teca kin hee, marpiya kin etanhan Wakantanka mitawa kin eciyatanhan u kin hee, qa nakun micaje teca kin.

13. Tuwe noge yukan hecinhan taku Woniya *Wakan* okodakiciye kin ewicakiye cin he naron kta.

14. Unkan Laodikiya ekta okodakiciye ohnihde yuhapi kin he ecen wowapi kicaga wo; Tuwe Amen *eciyapi*, waayatanin owotanna qa wicaka, Wakantanka woicage tawa otokahe kin hee hecen eya;

15. Nioran kin sdonwaya, sni qa ipiga umana ecen yaun xni, sni qa ipiga uman tukte e ecen yaun kta wacin;

16. Tuka initeca, qa sni ipiga kici umana ecen yaun xni, heon mii kin etanhan icihdepe kta.

17. Wimajica qa woyuha ota waton qa takudan imakakije xni keha ce; qa inicakije ça onnixike ça niwarpanica qa ixta nigonge ça tanconikadan e sdonyakiye xni.

18. Kaken wahokonciya ce, maza ska zi peta on yuecedan kagapi kin he opemicaton wo, winijica kta ce; qa wokoyake ska, kodake kta e heon, hecen tanconikadan on winixtece cin he tanin kte xni; qa wicixta wihdi kin, niixta iyakiun kta, hecen wawandake kta.

19. Tona cantewicawakiye cin hena wahokonwicawakiye ça iyopewicawakiya ece. Heon mnihe içiye ça ihduecetu wo.

20. Ito tiyopa kin en nawajin qa wakabubu ece; tuwe miho kin naron qa tiyopa hdurdoke cinhan he ekta tin hibu qa kici wawate kta, qa ix eya mici wote kta.

21. Tuwe ohiye cinhan he oiyotanke mitawa kin akan mici iyotanke wakiye kta, miye ohiwaye ça Ate oiyotanke tawa kin akan weci imdotanke cin he iyecen.

22. Tuwe noge yukan hecinhan taku Woniya *Wakan* okodakiciye kin ewicakiye cin he naron kta.

WICOWOYAKE 4.

1. Hena iyohakam wanmdake ça ito marpiya kin ekta tiyopa wan yurdokapi, qa wicaho tokaheya nawaron kin he maza yahotonpi tanka kin iyececa, he omakiye ça heya, Deciya u wo, dena iyohakam taku u kte cin hena wanyag ciciye kta ce.

2. Unkan kohanna Woniya kin en waun qa ito marpiya kin ekta oiyotanke wan ecen hdepi qa tuwe akan iyotankehan yanka.

3. Tuwe akan iyotanke cin he iwanyakapi kin inyan terika iyaspis qa sardinos iyececa; qa oiyotanke kin ihdukxan wi-hmunke wan hmihbeya yanka, smaragdos inyan kin iyececa.

4. Qa oiyotanke kin ihdukxan oyanke wikcemna nonpa sam topa wanka; qa oyanke kin hena en hunka wicayapi wikcemna nonpa sam topa iyotankapi

qa wokoyake ska koyakapi e wanmdaka; qa pa kin en maza ska zi texdakapi.

5. Unkan oiyotanke kin etanhan wakanhdi qa wakinyan hotonpi qa wicaho hiyu; qa oiyotanke kin itokam petijanjan xakowin peta ece ideyapi, hena Wakantanka taniya xakowin kin heepi.

6. Unkan oiyotanke kin itokam inde wan wanka janjan seça, cartowata iyecen kohdi; qa oiyotanke kin cokaya, qa oiyotanke kin ihdukxan, taku ni un topa kin yukanpi, hena e cokapa tanhan hektapa tanhan ko ixta ojupidan.

7. Unkan taku ni un tokaheya kin he mnaja ounce kin iyececa; qa taku ni un iyokihe kin he tatanka ounce kin iyececa; qa taku ni un iciyamni kin he wicaxta itohnake kin iyecen yuha; qa taku ni un icitopa kin he wanmdi kinyan un ounce kin iyececa.

8. Qa taku ni un topa kin otoiyohi rupahu xakpekpe yuhapi, qa mahen tanhan ixta ojupidan; qa anpetu hanyetu ko ayaxtan xni hecen eyapi, Wakan, Wakan, Wakan, Itancan Wakantanka Iyotan waxaka, tuwe un qa un qon u kte cin hee ce.

9. Qa tohan taku ni un topa kin, tuwe oiyotanke kin akan kiyotanke ça owihanke wanin ni un kin he wowitan qa wootanin qa wopida qupi kinhan;

10. Hehan hunka wicayapi wikcemna nonpa sam topa kin hena, tuwe oiyotanke kin akan kiyotanke cin he itokam makata

erpeiçiyapi, qa tuwe ohinniyan ni un kin ohodapi qa watexdake tawapi kin oiyotanke kin itokam erpekiyapi qa hecen eyapi;

11. Itancan wowitan qa wootanin qa wowaxake iyacu kta e iyenihantu, taku owasin yakage ça nitoyokipi kin on owasin kagapi qa ecen yanka.

WICOWOYAKE 5.

1. Unkan tuwe oiyotanke kin akan kiyotanke cin he etapa kin eciyatanhan wowapi wan mahentanhan owapi qa akan tanhan ipuspe xakowin on apuspapi kin wanmdaka.

2. Qa marpiya ohnihde waxaka wan wanmdaka, he hotankakiya hotanin qa, Wowapi kin he tuwe yumdaye ça ipuspe xakowin kin yurdoke kta okihi he, *eya*.

3. Unkan marpiya kin ekta qa maka kin akan qa maka kin ihukuya tanhan tuwedan wowapi kin he yumdaye ça en wanyaka okihi xni.

4. Hehan nina waceya, tuwe wowapi kin yumdaye ça yawa qa en wanyake kta iyekicihantu kin tuwedan iyeyapi xni kin heon etanhan.

5. Unkan hunka wicayapi kin wanji hemakiya; Ceye xni wo, ito Juda wicoun kin etanhan mnaja kin Dawid hutkan kin hee ohiye ça heon wowapi kin yumdaye ça ipuspe xakowin kin yurdoke kta okihi.

6. Hehan wanmdake ça iho oiyotanke kin cokaya qa taku ni un topa hunka wicayapi ko wicacokaya Amnos wan najin,

woxnapi iyececa, he xakowin ixta xakowin ko yukan, Wakantanka taniya xakowin maka kin owancaya ye wicayapi kin hena eepi.

7. He en hi qa tuwe oiyotanke kin akan kiyotanke cin nape etapa kin etanhan wowapi qon icu.

8. Wowapi kin he icu unkan hehan taku ni un topa kin, qa hunka wicayapi wikcemna nonpa sam topa kin hena Amnos kin itokam makata erpeiçiyapi, otoiyo hi candowankiyapi hduhapi qa nakun maza ska zi wiyatke taku waxtemna on ojudan, wicaxta waxte wocekiye tawapi kin hee.

9. Qa odowan teca wan ahiiyayapi qa heyapi, Wowapi kin iyacu qa ipuspe kin durdoke kta e iyenihantu ce, waniyuxnapi qa Wakantanka ekta niwe kin on opeunyakitonpi, wicoun otoiyo hi etanhan qa iapi kin wicaxta kin qa oyate kin otoiyo hi *etanhan*;

10. Qa Wakantanka en wicaxtayatapi woxnapi kagapi ko unyakagapi; unkan maka kin oununyanpi kta ce.

11. Unkan wanmdake ça oiyotanke kin ihdukxan qa taku ni unpi kin hunka wicayapi ko *wicihdukxan* marpiya ohnihde ota kektopawinge kektopawinge, hena hopi kin nawaron;

12. Hotankakiya heyapi, Amnos woxnapi qon he wowaxake qa woyuha qa woksape qa wicokihi qa wootanin qa wowitan qa wowaxte *henakiya* icu kta okihi ce.

13. Unkan taku marpiya ekta

un qa taku maka akan un qa taku maka ihukuya tanhan un qa taku miniwanca mahen un hena taku ohnaka ko owasin kaken eyapi nawaron; Tuwe oiyotanke kin akan kiyotanke cin Amnos kin kici wowaxte kin, wootanin kin, wowitan kin, qa wowaxake kin *henakiya* owihanke wanin tawapi nunwe.

14. Unkan taku ni un topa kin hena, Hecetu nunwe, eyapi; qa hunka wicayapi wikcemna nonpa sam topa kin hena makata erpeiçiyapi qa tuwe ohiniyan ni un kin he ohodapi.

WICOWOYAKE 6.

1. Unkan Amnos kin ipuspe tokaheya yurdoke çehan wanmdake ça taku ni un topa kin wanji, wakinyan hotonpi kin iyecen hotanin qa heya, U qa wanyaka wo.

2. Unkan wanmdake ça ito xuktanka ska wan tuwe akan iyotanke cin he itazipa wan yuha qa watexdake wan qupi, unkan ohiye ça ohiye kta e iya-ya.

3. Unkan ipuspe icinonpa yurdoke çehan taku ni un icinonpa kin he, U qa wanyaka wo, eya nawaron.

4. Unkan xuktanka wan tokeca hin xa hinanpe ça tuwe akan iyotanke cin he maka kin etanhan wookiye icu kta e qupi, hecen otoiyohi kiciktepi kta; qa nakun maza sagye wan tanka qupi.

5. Unkan ipuspe iciyamni yurdoke çehan taku ni un iciyamni kin he, U qa wanyaka wo,

eya nawaron. Unkan wanmdake ça ito xuktanka sapa wan tuwe akan iyotanke cin he nape ohna taku on tke utapi wanji yuha.

6. Unkan taku ni un topa kin cokaya tanhan wicaho wan nawaron, Aguyapi wiyutapi wanji he maza ska wanjidan qa xuktanka tawote wiyutapi nom he maza ska wanjidan kta; qa wi-hdi minixa ko ihnuhun kiuniya-ye cin, eya.

7. Unkan ipuspe icitopa kin yurdoke çehan taku ni un icitopa kin he ho kin nawaron; U qa wanyaka wo, eya.

8. Unkan wanmdake ça ito xuktanka wan hin san, tuwe akan iyotanke cin he Wiconçe ec iyapi qa Wicarapi kin he iha-kam iyaya. Unkan maka hanke icitopa kin hehanyan maza sagye qa wicaakiran qa wiconçe qa wamanica maka akan un kin hena on wicaxta wicakte kta e wowaxake qupi.

9. Unkan ipuspe icizaptan kin yurdoke çehan wahna woxnapi kin ihukuya tona Wakan-tanka oie qa iye waayataninpi kin he on wicaktepi qon hena nagipi kin wanwicamdaka.

10. Hena hotankakiya hotaninpi qa heyapi, Itancan wakan qa wicaka tohanyan tona maka kin akan yukanpi kin wicadaco xni qa we unkitawapi kin yahdajuju xni he.

11. Unkan hena otoiyohi wokoyake ska wicaqupi qa ptecedan ape yukanpi kta, tona kici taokiye unpi qon qa iye hunka-wanjitkupi kin ix iyepi iyecen

wicaktepi kte cin he yuxtanpi kta hehanyan, kewicakiyapi.

12. Unkan ipuspe icixakpe kin yurdoke çehan, wanmdake ça ito maka xkanxkan tanka, qa anpetu wi kin he hin kazontapi sape cin iyecen aye ça hanyetu wi kin ix we iyecen icaga.

13. Qa marpiya wicanrpi kin makata hinrpayapi, witanxna hu wan tateyanpa tanka kahuhuza eca waskuyeca xtunkadan kex parpa ece kin he iyececa.

14. Qa wowapi pehan ehna-kapi kin he iyecen marpiya kin tanin xni iyaye ça re otoiyohi wita otoiyohi ko yutokan iye-yapi.

15. Qa maka wicaxtayatapi, qa wicaxta tankinkinyanpi, qa wicaxta watonpika, qa wicaxta itancanpi, qa wicaxta waxakxakapi, qa wicaxta wowidake unpi kin otoiyohi, qa ihduhapi kin otoiyohi, makordoka qa re imni-ja kin ehna naiçirmanpi;

16. Qa re imniya ko hena heciyapi, Unkahinrpayapi qa tuwe oiyotanke kin akan kiyotanke cin itohnake kin etanhan, qa Amnos kin wocanniye kin etanhan anaunrman po.

17. He woxihda anpetu kin wanna hi qa tuwe ecen najin okihi kta he.

WICOWOYAKE 7.

1. Unkan hena iyohakam marpiya ohnihde topa maka oise topa kin en injinpi kin wanwicamdaka, maka tate ouye topa kin yuhapi, hecen maka qa miniwanca qa can hiyeye cin wan-jidan atateyanpa kte xni.

2. Hehan marpiya ohnihde tokeca wan wiyohiyanpa tanhan wankantkiya ye cin wanmdaka, he Wakantanka ni un ipuspe ta-wa kin yuhe ça marpiya ohni-hde topa maka miniwanca ko kiuniyanpi kta e wicaqupi qon hena hotankakiya hoyewicaki-ye,

3. 'Ca heya, Maka qa mini-wanea qa ean hiyeye cin kiuni-yanpi xni po, Wakantanka un-kitawapi taokiye wicaye cin ite-pi kin en wapetog wicatonpi xni kin hehanyan.

4. Unkan tona wapetog wica-tonpi wicayawapi kin nawaron, Israel cincapi wicoun owasin e-tanhan kektopawinge opawinge sam kektopawinge wikcemna to-pa sanpa kektopawinge topa wa-petog wicatonpi.

5. Juda wicoun kin etanhan kektopawinge ake nom wapetog wicatonpi; qa Ruben wicoun kin etanhan kektopawinge ake nom wapetog wicatonpi; qa Gad wicoun kin etanhan kektopawinge ake nom wapetog wicatonpi;

6. Aser wicoun kin etanhan kektopawinge ake nom wapetog wicatonpi; qa Neptali wicoun kin etanhan kektopawinge ake nom wapetog wicatonpi; qa Manase wicoun kin etanhan kektopawinge ake nom wapetog wicatonpi;

7. Ximeyon wicoun kin etanhan kektopawinge ake nom wapetog wicatonpi; qa Lewi wicoun kin etanhan kektopawinge ake nom wapetog wicatonpi; qa Isakar wicoun kin etanhan kektopawinge ake nom wapetog wicatonpi;

8. Zabulon wicoun kin etanhan kektopawinge ake nom wapetog wicatonpi; qa Josep wicoun kin etanhan kektopawinge ake nom wapetog wicatonpi; qa Benjamin wicoun kin etanhan kektopawinge ake nom wapetog wicatonpi.

9. Hena taku kin iyohakam wanmdake qa ito wicota rinea, wicayawa kta tuwedan okihi xni, oyate hiyeye cin, qa wicoun kin, wicowazi kin, iapi ko owasin otoiyohi etanhanpi, oiyotanke kin itokam qa Amnos kin itokam najinpi, wokoyake ska ece koyakapi qa can wapa nape ohna yuhapi;

10. Qa hotankakiya hotaninpi qa heyapi, Wakantanka unkitawapi oiyotanke kin akan kiyotanke cin hee Amnos kin kici niwicaye yuha nunwe.

11. Unkan marpiya ohnihde owasin oiyotanke kin okxan qa hunka wicayapi taku ni un topa kin hena ko wicihdukxan inajinpi qa oiyotanke kin itokam ite makipusdiya erpeiciyapi qa Wakantanka ohodapi;

12. Qa heyapi, Amen; Woxaxte, qa wowitan, qa woksape, qa wopida, qa woyuonihan, qa wowaxake, qa wicokihi *henakiya* Wakantanka unkitawapi kin owihanke wanin yuha nunwe. Amen.

13. Hehan hunka wicayapi kin etanhan wanji ayupte qa hemakiya, Wokoyake ska koyakapi kin hena tuwepi, qa tokiya tanhan upi he, *eya*.

14. Unkan, Itancan niye sdonyaya, epa. Hehan iye hema-kiya, Wicokakije tanka etanhan

upi kin dena eepi, wokoyake hdujajapi qa Amnos kin we kin on hdukapki.

15. Heon etanhan Wakantanka oiyotanke kin itokam yakonpi qa tipi wakan iye tawa kin ohna anpetu hanyetu ko ohodapi ece; qa tuwe oiyotanke kin akan kiyotanke cin he hena wicacokaya ounye kta.

16. Qa tohini wotektehdapi kte xni qa ipuzapi kte xni qa anpetu wi kin axpan wicaye kte xni qa nakun iyokatapi wanice kta.

17. Hehan Amnos kin oiyotanke kin cokaya un kin hee hena yus awicaye qa mini rdoka ni un kin icahda ye wicaye kta: Qa hena ixta kin etanhan ixtamnihhanpe owasin Wakantanka wicakipakinte kta.

WICOWOYAKE 8.

1. Unkan *Amnos* kin ipuspe ieixakowin kin yurdoke çehan marpiya ekta wihiyayedan wancadan ape cin hehanyan inina yukanpi.

2. Unkan marpiya ohnihde xakowin Wakantanka itokam najinpi kin wanwicamdaka; qa maza yahotonpi tanka xakowin wicagupi.

3. Hehan marpiya ohnihde wan tokeca u qa wahna woxnapi kin ekta hinajin; maza ska zi oizinye wan yuha. Unkan taku waxtemna ota qupi kin he, tona owotanna un kin owasin wocakiye tawapi kin ahna, maza ska zi wahna woxnapi kin oiyotanke kin itokam wanke cin he akan woxna kta e heon.

4. Unkan marpiya ohnihde cin nape kin etanhan xota izite cin tona owotanna un wocekiye tawapi kin hena ko Wakantan-ka itokam wankantkiya aya.

5. Unkan marpiya ohnihde cin he oizinye kin icu qa wahna woxnapi peta kin etanhan oju qa maka kin ekta erpeya; unkan ito wicaho qa wakinyan hotonpi qa wakanhdi qa maka xkan-xkan.

6. Unkan markiya ohnihde xakowinpi maza yahotonpi tanka yuhapi kin hena yahotonpi kta e hduwiyeyapi.

7. Unkan marpiya ohnihde tokaheya kin yahoton, qa wasu peta ko we icicahiyapi maka kin ahinhe: Qa can iyamnimni kin rurnaga qa wato kin iyurpa rurnaga.

8. Unkan marpiya ohnihde iyokihe kin he yahoton, qa taku re wan tanka iyececa peta on itkonyahe cin he miniwanca kin en iyorpeyapi: Qa miniwanca kin hanke iciyamni we icaga.

9. Qa taku miniwanca oicage ni un kin hanke iciyamni tapi, qa wita wata kin iciyamnimni kin owihanke yapi.

10. Unkan marpiya ohnihde iciyamni kin he yahoton, qa wicanrpi wan tanka ideyapi peti-
janjan iyececa, marpiya kin eci-
yatanhan hinrpaye qa wakpa ici-
yamnimni kin ahinrpaye qa mi-
ni rdoka kin en.

11. Wicanrpi kin he Yatke-
picaxni eciyapi. Unkan mini
yatkepicaxni icage qa wicaxta
ota mini kin on tapi, pa icage
cin heon.

12. Unkan marpiya ohnihde

icitopa kin he yahoton unkan
anpetu wi hanke iciyamni qa
hanyetu wi hanke iciyamni qa
wicanrpi iciyamnimni kin apapi,
qa hecen hanke iciyamni otpaza
icu qa anpetu kin hanke iciya-
mni hehanyan iyoyanpa xni un,
qa hanyetu kin nakun iyececa.

13. Hehan wanmdake qa na-
waron, marpiya ohnihde wan
marpiya cokaya tanhan kinyan
iyaye qa hotankakiya heya, Wi-
cokakije, wicokakije, wicokaki-
je, tona maka onyanpi kin hena
en, maza yahotonpi tanka ho-
tonpi kin marpiya ohnihde ya-
mni yahotonpi kte cin heon e-
tanhan.

WICOWOYAKE 9.

1. Unkan marpiya ohnihde
icizaptan kin he yahoton qa ito
wacanrpi marpiya kin eciyatan-
han maka kin ahinrpaya wan-
mdaka; unkan he makordoka
ceteta wanica tiyopa iyurdoke
kin qupi.

2. Qa makordoka ceteta wani-
ca he tiyopa kin yurdoka unkan
makordoka kin etanhan xota hi-
yu, peta wan tanka rinca etan-
han xota uye cin iyececa; qa
woxbe etanhan xota kin he on
anpetu wi kin okotonyan kici
aotpaza.

3. Unkan xota kin etanhan
psipsicadan au, maka kin ekta,
qa wicowaxake wicaqupi, wa-
mduxka maka akan un kin wi-
cowaxake yuhe cin he iyececa.

4. Qa wato maka aicage cin
taku toya un qa can kin owasin
kiuniye xni wicaxipi tuka wica-
xta kin tona itepi kin en Wa-

kantanka tawowapetogton yuhapi xni kin henana.

5. Qa hena wicaktepi kta e wicaqupi xni tuka wi zaptan hehanyan kakix wicaye kta e wicaqupi. Unkan kakix yapi kin he wamduxka wicaxta cawicape cinhan kiuniyanpi kin he iyececa.

6. Unkan anpetu kin hena en wicaxta wiconte akitapi kta tuka iyeyapi kte xni, qa tapi cinpi kta tuka wiconte e nawicakicipe kta.

7. Psipsicadan kin hena oun-eage kin xuktanka ozuye on wiyeya ehmag najinpi kin he iyececa; qa pa kin wapaha maza ska zi kin wapaha kitonpi, qa ite kin he wicaxta ite kin iyececa.

8. Qa paha kin he winorinea paha iyecen yuhapi qa hi kin hena mnaja hi kin iyececa.

9. Qa maza sapa maku akarpe iyececa maku akarpe tonpi, qa rupahu rmurmuyan he ozuye canpahmihma qa xuktanka ota ozuye ekta nawang yapi kin he iyececa.

10. Wamduxka kin iyecen sinte yuhapi qa sinte kin en icape yuke qa wi zaptan hehanyan wicaxta kin kiuniwicaye kta okihipi.

11. Unkan wicaxtayatapi wan yuhapi, woxbe ceteta wanica etanhan ohnihde cin, Heberi iapi kin eciyatanhan Abadon eciyapi qa Helenes iapi kin eciyatanhan Apoluon eciyapi kin hee.

12. Wicokakije kin wanji wanna henakeca qa ito he iyo-ham wicokakije nom u kta.

13. Unkan hehan marpiya o-

hnihde icixakpe kin yahoton qa maza ska zi wahna woxnap i Wakantanka itokam wanke cin he he topa kin etanhan wicaho wan taninyan nawaron.

14. He marpiya ohnihde icixakpe maza yahotonpi tanka yuhe cin he heciya; Marpiya ohnihde topa wakpa tanka Yuperat eciyapi ekta wicakaxkapi kin hena wicakiyuxka wo.

15. Hehan marpiya ohnihde topa kin wicakiyuxkapi; hena e wancadan ape cin qa anpetu wanji qa wi wanji qa omaka wanjidan hehanyan wiyeya ehmag unpi, wicaxta iciyamnimni kin wicaktepi kta e heon.

16. Unkan ozuye kin xuktanka akan iyotankapi kin hena kektopawinge kektopawinge opawinge nonpa, hena wicayawapi kin nawaron.

17. Qa wowanyake kin en xuktanka kin hecen wanwicamdaka, qa wicaxta akan iyotankapi kin hena maku akarpe xaxa toto qa zizi yuhapi. Unkan xuktanka pa kin he mnaja pa kin iyececa qa ipi kin etanhan peta qa xota qa cardi hiyu.

18. Unkan hena yamni, peta qa xota qa cardi, *xuktanka* ipi kin etanhan hiyu qon he on wicaxta iciyamnimni kin wicaktepi.

19. Hena ipi kin ohna wicowaxake yukan qa icape kin he wamduxka iyecen pa yuke qa hena on kiuniwicayapi ece.

20. Unkan wicaxta tona wicokakije kin hena on wicaktepi xni kin hena iye napepi wicoran kin on iyopeiciyapi xni tuka taku wakan xicapi qa wakagapi

kin, maza ska zi qa maza ska qa maza zi qa inyan qa can takudan wanyake xni qa naron xni qa mani okitpani kin hena ohodapi ece.

21. Qa wicaxta wicaktepi qa wapiyapi wawicirarapi wamanonpi ko *econpi* kin hena iopei-
ciyapi xni.

WICOWOYAKE 10.

1. Unkan hehan marpiya ohnihde wan tokeca waxake rinca marpiya kin eciyatanhan kunktiya u, marpiya xapa hdown kin he wanmdaka, wihmunke wan wapaha kiye ça ite kin he anpetu wi kin iyececa, qa siha kin peta wankantkiya ide kin iyececa.

2. Qa nape kin on wowapi wan cistina yumdayeya yuha. Qa siha etapa kin miniwanca ahe kiye ça sicata kin ix maka kin akan.

3. Qa hotankakiya hotanin, mnaja wan hoton kin iyececa. Unkan hotanin hehan wakinyan xakowin hotonpi.

4. Unkan wakinyan xakowin kin hotonpi hehan wowapi wakage kta tuka wicaho wan nawaron, marpiya kin eciyatanhan hemakiya, Taku wakinyan xakowin kin eyapi kin he sutaya apuspa wo qa wowapi en kage xni wo.

5. Unkan marpiya ohnihde cin miniwanca maka ko akan najin wanmdake cigon he nape kin marpiya kin ekta hdugate,

6. 'Ca tuwe ohiniyan ni un qa marpiya kage ça taku ohnaka ko, maka qa taku ohnaka ko,

miniwanca qa taku ohnaka ko kage cin hee on konza, Anpetu kin wanna henakeca kta;

7. Tuka marpiya ohnihde icixakowin yahoton kinhan, anpetu kin hena en Wakantanka tawowiyukean henakeca kte cin hehanyan, *Wakantanka* taokiye wicaxta wokean kin oyakapi qon he iyececu, *eya*.

8. Unkan wicaho marpiya kin eciyatanhan tanin qon he ake hoyemakiye ça heya, Marpiya ohnihde miniwanca maka ko akan najin kin he ekta ye ça wowapi yumdayapi kin nape en un kin he icu wo.

9. Hehan marpiya ohnihde cin he en wai qa hewakiya, Wowapi cistina kin he maqu wo. Unkan, Icu qa yuta wo, tezi kin pa niye kta tuka nii kin ohna turmaga canhanpi kin iyecen skuye kta ce, emakiya.

10. Unkan wowapi cistina kin marpiya ohnihde nape kin etanhan iwacu qa temwaya; qa mii kin en turmaga canhanpi kin iyecen skuya, tuka nawapca hehan tezi kin pa mayan.

11. Hehan, Oyate qa Ikcewicaxta qa iapi kin qa wicaxtaya-tapi ota en wicayakidukean kta ce, emakiya.

WICOWOYAKE 11.

1. Unkan cedi wan cansakadan iyececa he maqu qa heya; Najin qa tipi wakan Wakantanka tawa kin iyuta wo, qa wahna woxnapi qa tona en cekiyapi ece kin hena nakun.

2. Tuka hocoka kin tipi wakan cokaya kin he itankan iyeye

ça iyute xni wo; he Ikcewicaxta kin wicaqupi; qa otonwe wakan kin amanipi kta, wi wikcemna topa sam nonpa hehanyan.

3. Unkan waayataninpi nom mitawa kin wowaxake wicawaqu kta, qa taku xica oihduge wiyukeanpi kta, anpetu kektopawinge sanpa opawinge nonpa sanpa wikcemna xakpe hehanyan.

4. Hena e can wiñdi nonpa qa petijanjan nom Wakantanka maka yuhe cin itokam najinpi kin hena eepi.

5. Unkan tuwe hena kiuniwicaye kta cin kinhan ipi kin etanhan peta hiyu qa tóka wicayapi kin ihang wicaye kta: Tuwe kiuniwicaya cin kinhan he hecen ktepi kta.

6. Hena e marpiya kin onatoka okihipi, hecen magaju kte xni, wiyukeanpi anpetu kin icunhan, qa mini kin we icar yapi kta okihipi, qa tohan cinpi eca wokakije owasin on maka kin kakix yapi ece.

7. Unkan yaotaninpi kin wana henakeca hehan woxbe kin etanhan wamanica wan wankanikiya hiyu qa hena en takpe wicai qa ohiwicaye ça wicakte kta.

8. Unkan hena tancan tapi kin otonwe tanka canku kin ohna wanke kta, he iapi wakan kin eciyatanhan Sodom qa E-gupta eciyapi, tukten Itancan unkitawapi kin icipawer okatanpi qon he hetu.

9. Unkan wicaxta kin qa wicowazi kin qa iapi kin qa oyate kin hena tancan tapi kin wanwi-

cayakapi kta, anpetu yamni qa wanji hanke hehanyan, qa tancan tapi kin maka mahen wicarapi kte cin iyowinwicakiyapi kte xni.

10. Unkan hena on etanhan tona maka akan ni unpi kin imagaga iciyapi qa iyuxkinpi kta qa taku kiciçupi kta, wicaxta wokcan nom tona maka akan ni un kin kakix wicayapi qon hena on etanhan.

11. Unkan anpetu yamni qa wanji hanke iyohakam wiconi oniya kin Wakantanka eciyatanhan hena mahen iwicayaya; qa siha on najinpi unkan tona wanwicayakapi nina yuxinyayapi.

12. Unkan hena wicaho wan tanka naronpi, marpiya kin eciyatanhan hewicakiya, Deciya wankan u po, *eya*. Unkan marpiya xapa wan akan marpiya kin ekta iyayapi qa tona tóka wicayapi qon hena wanwicayakapi.

13. Unkan wihiyayedan ape cin he icunhan maka xkanxkan wan tanka qa otonwe kin hanke-dan iwikcemnamna kin hinrpaya, qa maka xkanxkan kin on tona tapi kin hena wicaxta kektopawinge xakowin. Qa u-manpi kin yuxinyayapi qa marpiya Wakantanka kin wowitan qupi.

14. Wicokakije icinonpa kin wanna henakeca qa ito wicokakije iciyamni kin kohanna u kta.

15. Hehan marpiya ohnihde icixakowin kin yahoton qa marpiya kin ekta wicaho tanka hotaninpi qa heyapi, Maka woki-conze kin Itancan unkitawapi

qa Mesiya tawa kin hena tawa ye ça ohiniyan en wicaxtayatapi un kta.

16. Hehan hunka wicayapi iyamni topa Wakantanka itokam oiyotanke kin akan kiyotankapi kin hena makata erpeiçiyapi qa Wakantanka ohodapi;

17. Qa heyapi, Itancan Wakantanka Iyotan waxake cin, tuwe un qa un qon u kte cin he niye ce, pida unyayapi, nitowaxake tanka kin iyekcu qa wicayeconza ce.

18. Qa oyate kin xihdapi qa wocantiyahde nitawa kin u; qa tohan wicate cin wicayacopi kta, qa ookiye wicayaye cin wicaxta wokean, qa owotanna, qa tona nicaje kin kokipapi, cistinpidan tankinkinyan ko, taku wicayaqu kta, qa tona maka kiuniyanpi kin hena kiuniwicayaye kte cin, *wanna hehantu*.

19. Hehan marpiya kin ekta tipi wakan Wakantanka tawa kin yurdokapi, qa tipi wakan kin en wicotakuye can wohnaka kin wanyakapi. Unkan ito wakanhdi, qa wicaho, qa wakinyan hotonpi, qa maka xkanxkan, qa wasu tanka.

WICOWOYAKE 12.

1. Unkan marpiya kin ekta wowapetokeca tanka wan tanin. Winorinca wan anpetu wi kin koyake ça hanyetu wi kin siha kin ihukuya *wanka*, qa pa kin en wicanrpi ake nonpa wapaha kiya.

2. He ihduxake ça hokxiksuye ça howaya, cinca ton kta e wayazanka.

3. Unkan hehan marpiya kin ekta wowapetokeca tokeca wan tanin; wamduxka xa tanka wan, he pa xakowin qa he wikcemna yuha, qa pa xakowin kin en watexdake xakowin texdaka.

4. Qa sinte kin on marpiya wicanrpi iyamninni kin iwicacu qa maka kin ekta erpewicaya. Unkan wamduxka kin he winorinca hokxiksuye cin itokam najin, cinca ton kinhan temye kta.

5. Hehan cinca ton, wica kin oyate hiyeye cin owasin maza icapsinte wan on wicayuhe kte cin hee. Unkan hokxiyoqopa kin he Wakantanka qa iye oiyo-tanke kin ekta eyakupi.

6. Unkan winorinca kin he rewoskan makoce kin ekta napa, heciya Wakantanka taku wiye-ya ekicihnaka qa hen anpetu kektopawinge sanpa opawinge nonpa sam wikcemna xakpe hehanyan won yapi kta.

7. Hehan marpiya kin ekta ozuye econpi, Micayel taokiye ko wamduxka kin azuyapi. Unkan wamduxka taokiye ko zuyapi.

8. Qa ohiwicayapi xni, hecen hetanhan marpiya kin ekta tuktedan wicakiyukanpi xni.

9. Unkan wamduxka tanka kin, wamduxka wanakaja tanhan un kin hee, Wakanxica qa Satan eciyapi, wicaxta hiyeye cin owasin wicahnaye cin hee, makata erpeyapi qa tona ookiye wicaye cin hena nakun kici tankan iyewicayapi.

10. Unkan marpiya kin eciyatanhan wicaho wan tanka na-

waron, hecen eya, Wanna unki-ta Wakantankapi wiconi tawa qa towaxake qa tokiconze kin u; qa Mesiya wicokihi tawa kin nakun; tuwe hunkawanjin wicun-kiyapi kin taku iyawicaonpe cin, Wakantanka unkitawapi kin itokam, anpetu hanyetu ko awicaie cin hee kun erpeyapi kin heon etanhan.

11. Hena Amnos we kin bee, qa waayataninpi oie tawapi kin heon ohiya, qa wiconte hehanyan wiconi tawapi kin waxte kidapi xni.

12. Heon etanhan marpiya kin iyuxkin po qa tona ohna tipi kin. Tuka tona maka kin miniwanca ko ekta yakonpi kin hena wicokakije yuhapi kta; niyepi kin ekta Wakanxica kun iyaye ça woxihda tanka yuha, axkayedani kta e sdonkiye cin heon etanhan.

13. Unkan wamduxka kin maka kin ekta erpeyapi kin he wanhdaka, hehan winorinea cinca ton qon he xicaya kuwa.

14. Unkan winorinea kin he wanmdi tanka rupahu nom qupi, on rewoskan makoce tukten ti kte cin heci kinyan iyaye kta, heciya waniyetu yamni qa wanjji hanke hehanyan won yapi kta, wamduxka itohnake kin itehanyan.

15. Unkan wamduxka kin iye i kin etanhan mini hiyu ya, wakpa wan iyececa, qa winorinea kin ihakam hiyaye ya, minin te ye kta e heon.

16. Unkan maka kin winorinea kin he okiye ça i hdukawa qa wakpa wamduxka i kin etanhan hiyu ye cin he yarepa.

17. Unkan wamduxka kin he winorinea kin on xihda qa winorinea cinca wicaye cin, tona Wakantanka tawoahope kin ahopapi qa Jesus Mesiya wootanin tawa yuhapi kin hena azuwicaya.

WICOWOYAKE 13.

1. Unkan hehan miniwanca kahda wiyaka kin en nawajin. Qa miniwanca kin etanhan wamanica wan hiyu wanmdaka, pa xakowin qa he wikcemna yuha, qa he kin en wacinhe wikcemna, qa pa kin akan waoxtehdapi caje kin yanka.

2. Unkan wamanica wanmdake cin he inmu tanka iyececa, qa siha kin hena waranksica nape kin iyececa qa i kin mnaja i kin heca. Unkan wamduxka qon towaxake kin he qu qa oiyotanke tawa kin, qa wicokihi tanka,

3. Unkan wanmdake ça ito pa kin wanjji kiuniyanpi, on te kta tuka; unkan kiuniyanpi kin on te kte cin he okizi qa wixata kin owasin wamanica kin yuxinyayapi qa ihakam iyayapi.

4. Qa wamduxka kin towaxake kin wamanica qu qon he ohodapi qa wamanica kin he nakun ohodapi qa heyapi, Tuwe wamanica kin iyececa he, qa tuwe he kici kicize kta okihi he.

5. Unkan i wan qupi, he on taku tanka qa waoxtehdapi kin eye kta, qa wowaxake qupi, wi wikcemna topa sanpa nonpa hehanyan, ozuye econ kte cin heon.

6. Unkan i hdukawa qa Wakantanka oxtelda, caje qa wakeya tawa kin qa tona marpiya kin ekta etipi kin hena taku awicakicaga.

7. Qa tona owotanna un kin hena azuwicaye ça wicaktedan kta e qupi qa wicowazi-qa iapi kin qa oyate kin owasin wicayu-he kta e wowaxake qupi.

8. Unkan tona maka akan unpi cajepi kin wiconi wowapi Amnos, maka icage cin hehan tanhan woxnapi qon, he tawa kin en kagapi xni kin hena owasin wamanica kin ohodapi.

9. Tuwe noge yukan hecinhan he naron kta.

10. Tuwe wayaka awicahdi kinhan he wayaka ayapi kta, qa tuwe maza sagye on wicakte kin he maza sagye on ktepi kta ce. He en wicaxta owotanna apepi qa wacinyanpi kin tanin.

11. Unkan wamanica wan tokeca maka kin etanhan hiyu kin he wanmdaka; he he nom yuha tarin wanuyanpi cincadan iyececa, qa wamduxka iyecen ia.

12. Unkan wamanica tokaheya kin he towaxake kin ocowasin yuha, qa maka kin, tona akan un kin hena ko wamanica tokaheya kin [kiuniyanpi qa on te kta tuka ohizipi kin he ohoda wicakiya.

13. Qa wowapetokeca tanka econ, wicaxta wicitokam marpiya kin eciyatanhan peta maka kin ahinrpaye ya.

14. Qa tona maka akan unpi kin wicahnayan, wowapetokeca wamanica kin itokam econ kta e qupi qon hena on. Qa tona

maka akan unpi kin wamanica maza sagye on capapi tuka kini qon he iyacinpi wan kagapi kta e iwahokonwicakiya.

15. Qa wamanica iyacinpi kin he oniya qu okihi, hecen on wamanica iyacinpi kin ie kta, qa tona iyacinpi kin ohodapi xni kin hena wicakte kta okihi.

16. Unkan owasin, cistinpi-dan tankinkinyanpi ko, wijicapi qa warpanicapi, tona ihduhapi, wowidake unpi kin hena ko, nape etapa kin en qa ix itepi kin en wowapetogton tawa kin yuhe wicakiya.

17. Unkan tuwedan wopeton kte xni, tuka tona wamanica towapetogton, caje kin, qa caje tona ihdawa kin he wanji tukte e yuhe cin henana.

18. De en woksape yukan. Tuwe ksape cin he wamanica tona ihdawa kin he yawa kta. He wicaxta iyawapi kin hee, ihdawa kin he opawinge xakpe sanpa wikcemna xakpe sanpa xakpe.

WICOWOYAKE 14.

I. Hehan wanmdake ça ito Amnos kin Ziyon paha kin akan najin, qa kektopawinge opawinge sanpa kektopawinge wikcemna topa sam kektopawinge topa om *najinpi*, Amnos kin Atku-ku caje kin itepi kin en owicawapi.

2. Unkan marpiya kin eciyatanhan wicaho wan nawaron, mini ota irara kin iyececa, qa wakinyan tanka hoton kin iyececa. Qa dowankiyapi sa can-

dowankiyapi on downpi wica-hotanin nawaron.

3. Qa oiyotanke kin itokam, qa taku ni un topa kin qa hun-ka wicayapi kin wicitokam odowan teca se ahiyayapi. Odowan kin he tuwedan onspe kta okihi xni tuka kektopawinge opawinge sam kektopawinge wicemna topa sam kektopawinge topa maka kin etanhan opewicatonpi qon hena *okihipi*.

4. Winorinca on axamwicayapi xni kin hena eepi, tanxna unpi nakaex. Tona Amnos kin tokiya ye cinhan iyahna yapi kin hena eepi. Wicaxta kin etanhan Wakantanka qa Amnos kin ekta opewicatonpi tokaheya kin hena eepi.

5. Qa hena ipi kin en wohna-ye takudan iyeyapi xni; qa Wakantanka oiyotanke kin itokam takudan iyaonpepica xni unpi.

6. Hehan marpiya ohnihde tokeca wan marpiya cokaya kinyan iyaye cin he wanmdaka, wotanin waxte owihanke wanin un kin, tona maka akan unpi kin, wicaxta kin qa wicowazi qa iapi qa oyate hiyeye cin owasin ieyanpaha owicakiyake kta yuha iyaya.

7. Qa hotankakiya heya, Wakantanka kinihanpi qa wowitan qu po; woyaco anpetu kin wana hi ce; qa tuwe marpiya maka miniwanca qa wakoniya kin wacarye cin he itokam canpexka makehde inajin po.

8. Unkan marpiya ohnih'e icinonpa kin he ihakam ye ça heya, Babulon otonwe tanka kin he hinrpaya; wawicirarapi wocantiyahde mini xa tawa kin

etanhan oyate hiyeye cin owasin yatke wicakiye cin he dee.

9. Unkan marpiya ohnihde iciyamni kin he hena wicihakam ye ça hotankakiya heya, Tuwe wamanica qa iyacinpi kin *uman tukte kuxta* ohoda qa wowapetogton tawa kin ite qa ix nape kin en yuhe cinhan;

10. He Wakantanka wocantiyahde mini xa tawa kin wocanteptanye miniyatke tawa kin en okaxtan kin hetanhan yatke kta qa marpiya ohnihde owotan-na un kin hena wicitokam qa Amnos kin itokam peta cardi ko en kakix yapi kta.

11. Qa kakix wicayapi xota kin owihanke wanin wankan iyaya ece; qa tona wamanica iye iyacinpi ko ohodapi, qa tuwe he eaje wapetogtonpi yuhe cin hena anpetu hanyetu ko oziyapi wanin unpi.

12. Wicaxta owotanna aepi kin he de en un, qa tona Wakantanka tawoahope opapi qa Jesus wacinyanpi kin hena.

13. Hehan marpiya kin eciyatanhan wicaho wan nawaron, hecen emakiya, Wowapi ecen kaga wo; Detanhan wicate cin tona Itancan kin en tapi kin hena wowaxte yuhapi. Han, Woniya *Wakan* eya, Wicortani kin ayuxtanpi kta qa wicoran kin wiciyahna iyaya ece.

14. Hehan wanmdake ça ito marpiya ska wan, waji Wicaxta kin Cihintku kin iyececa akan iyotanka, he maza ska zi wapaha wan wapaha kiye ça nape etapa kin on isan xkopa pe rinca yuha.

15. Unkan marpiya ohnihde

tokeca wan tipi wakan kin etanhan u qa tuwe marpiya ska kin akan iyotanke cin he panyanhan heciya; Isan xkopa nitawa kin en iyekiye ça *aguyapi* baksawo. Mnayanpi kte cin wanna hi; maka wojupi kin wanna suton ce.

16. Unkan marpiya ska akan iyotanke cin he isan xkopa tawa kin maka ekta yekiya, unkan maka kin *owancaya* baksapi.

17. Hehan marpiya ohnihde wan-tokeca tipi wakan marpiya kin ekta he cin hetanhan u, he nakun isan xkopa pe rinca yuha.

18. Unkan marpiya ohnihde tokeca wan wahna woxnapi kin etanhan u, he peta on wowaxake yuha. Qa he tuwe isan xkopa pe rinca yuhe cin he panyanhan hoyekiye ça heya, Isan xkopa pe rinca nitawa kin ekta yekiye ça maka hastanhanka kin mnayan wo; hastanhanka iyage kin wanna tanyan icaga ce.

19. Unkan marpiya ohnihde cin he isan xkopa tawa kin maka ekta yekiye ça maka hastanhanka iyuwi kin mnaye ça Wakantanka wocantiyahde mini xa iyux ice tawa tanka kin he en iyorpeya.

20. Unkan otonwe kin itankan mini xa iyuxkice kin napanpi qa mini xa iyuxkice kin etanhan we hiyu, xuktanka i iyuwi kin hehanyan, stadiya kektopawinge sam opawinge xakpe hehanyan.

WICOWOYAKE 15.

1. Unkan marpiya kin ekta wowapetokeca tanka qa wowi-

nihan wanmdaka; marpiya ohnihde xakowin wicokakije xakowin ehake kin yuhapi, hena en Wakantanka wocantiyahde tawa kin henakeca kta.

2. Unkan mde wan janjan peta kici icicahiyapi seca wanmdaka, qa tona ohiya, wamanica qon, iye iyacinpi kin qa wowapetogton kin qa tona caje iyawapi kin, ohiye ciquon hena janjan mde kin akan najinpi, qa Wakantanka candowankiyapi tawa kin heca yuhapi.

3. Qa Mowis Wakantanka taokiye tadowan qa Amnos kin tadowan kin ahiyayapi qa heyapi, Itancan Wakantanka Iyotan waxake cin nioran kin tanka qa wowinihan, tona owotanna un kin en Wicaxtayatapi kin *he niye ce*, nitacanku kin owotanna qa wicaka.

4. Itancan tuwe konicipe kte xni, qa nicaje kin inidowan kte xni he; nixnana oniowotanna; qa oyate hiyeye cin owasin upi qa nitokam canpexka makehde enajin kta; owotanna wadaco kin hena yaotaninpi.

5. Unkan he iyohakam wanmdake, ça ito, marpiya kin ekta waayataninpi wakeya wakan kin he yuzamni han.

6. Qa marpiya ohnihde xakowin wicokakije xakowin yuhapi kin hena tipi wakan kin etanhan inanpapi, miniruha ska wiyatpa kin heca koyakapi, qa maza ska zi on maku opta ihduskitapi.

7. Unkan taku ni un topa kin wanji marpiya ohnihde xakowin kin maza ska zi wiyatke kin heca xakowin wicaqu; hena Wakantanka ohiniyan ni un wo-

cantiyahde tawa kin on ojudan.

8. Unkan Wakantanka towitan qa towaxake kin eciyatanhan tipi wakan kin xota ojudan. Qa tipi wakan kin tuwedan timahen ye kta okihi xni, wicokakije xakowin marpiya ohnihde xakowin yuhapi kin hena keca kte xni hehanyan.

WICOWOYAKE 16.

1. Unkan tipi wakan kin etanhan wicaho wan tanka nawaron, marpiya ohnihde xakowinpi qon hewicakiya, Yapi qa wiyatke Wakantanka wocantiyahde tawa kin hena maka kin en akaxtan po, *eya*.

2. Hehan marpiya ohnihde tokaheya kin u qa wiyatke tawa kin maka kin en akaxtan. Unkan wicaxta tona wamanica wowapetogton tawa kin yuhapi qa iyacinpi kin ohodapi kin hena en xiyaka wan tanka xica icaga.

3. Unkan marpiya ohnihde icinonpa kin wiyatke tawa kin miniwanca kin en akaxtan; unkan he we icaga, wicate cin we kin iyececa, qa miniwanca kin en taku niyake un kin owasin tapi.

4. Unkan marpiya ohnihde iciyamni kin wiyatke tawa kin wakpa qa wakoniya kin hena en akaxtan; unkan hena we icaga.

5. Hehan marpiya ohnihde wan mini kin yuhe cin he kaken *eya*, nawaron; Itancan tuwe un qa un qon u kte cin he niye, oniwotanna, hecen wicadaco:

6. Wicaxta owotanna qa wo-

keanpi kin hena we kin wicakipapsonpi qa hecen we yatke wicayakiya, he iyekicihantupi nakaex.

7. Unkan wanji tokeca wahina woxnapi kin eciyatanhan kaken *eya*, nawaron; Itancan Wakantanka Iyotan waxaka, wadaco kin he ohiniyan owotanna qa wicaka.

8. Hehan marpiya ohnihde icitopa kin wiyatke tawa kin anpetu wi kin en akaxtan. Unkan he wicaxta kin peta on wicagu kta e qupi.

9. Qa iyokatapi tanka kin wicaxta wicagu, qa hecen Wakantanka wicokakije hena yuhe cin he caje kin oxtedapi qa wowitan qupi kta on ihduetapi xni.

10. Unkan marpiya ohnihde icizaptan kin wiyatke tawa kin wamanica oyanke tawa kin en akaxtan; unkan wokiconze tawa kin otpaza ojudan qa wayazanpi on cejipi kin hdartartakapi.

11. Qa wicokakije xiyaka ko on etanhan marpiya Wakantanka kin oxtedapi, qa iye wicoran kin iyopeiciyapi xni.

12. Unkan marpiya ohnihde icixakpe kin wiyatke tawa wakpa tanka kin Yuperat *eciyapi* he en akaxtan; unkan mini kin puza aya, hecen wicaxtayatapi wiyohiyanpa tanhan au kin canku kin wicakiciyumdayapi kta.

13. Unkan wamduxka i kin etanhan, qa wamanica i kin etanhan, qa woitonxni wokcan kin he i kin etanhan, taku wakan xica xakowin, hnaxka iyececa, hena hiyu wanmdaka.

14. Hena taku wakan kin

Wakanxica etanhan hiyupi qa wowapetokeca econpi kin heepi; hena maka akan wicaxtayatapi wicaxta ko ekta wicaipi, Wakan-tanka Iyotan waxake cin anpetu tawa tanka kin en zuya awicau-pi kta he on *iyuyapi*.

15. Ito wamanon sa wan iyecen wau ce. Tuwe kiktahan un qa wokoyake kpatan kin he wowaxte yuha, hecen tancodan mani kte xni qa wixtece cin tu-wedan wanyake kte xni.

16. Unkan Heberi iapi kin eciyatanhan tukten Armagedon eciyapi, hen witaya u wicaya.

17. Hehan marpiya ohnihde icixakowin kin wiyatke tawa kin okaduze cin en akaxtan. Unkan marpiya kin ekta tipi wakan kin etanhan qa oiyotanke kin etanhan wicaho tanka wan tanin qa heya, Wanna hena-keca.

18. Unkan ito wicaho tanin-pi, qa wakinyan hotonpi, qa wakanhdi tanin, qa maka xkan-xkan wan tanka, wicaxta kin maka akan iwicacage cin ehan-tanhan maka xkanxkan iyecen tanka wania.

19. Qa otonwe tanka kin ya-mni yuakipam iyeyapi; qa oton-we Ikcewicaxta tawapi kin hena hinrpayapi. Qa Babulon tanka kin he Wakantanka itokam ki-ksuyapi, wocanniye ohitike cin mini xa wiyatke kin qu kta heon.

20. Unkan wita kin owasin najica iyaye, ça re kin hena tuktedan iyeyapi xni.

21. Unkan marpiya kin eci-yatanhan wasu tanka wicaxta kin awicahinhe, otoiyo hi taku

tké utapi opawinge wanjidan inskokeca. Unkan wasu wico-kakije kin on wicaxta kin Wa-kantanka oxtehdapi, he woka-kije iyotan tanka kin heon.

WICOWOYAKE 17.

1. Hehan marpiya ohnihde xakowin wiyatke xakowin yu-hapi qon etanhan wanji u qa omákiye ca hemakiya, Deci ya u wo, wawicirarapi econ sa tanka mini ota akan iyotanke cin he token yacopi kin cicipazo kta ce.

2. He kici wicaxtayatapi ma-ka akan unpi kin wawicirarapi econpi ece, qa tona maka akan unpi kin wawicirarapi tawa mi-ni xa kin on witkopi.

3. Hehan Woniya kin rewo-skan makoce ekta amayan. Un-kan winorinca wan wamanica duta wan akan iyotanke cin he wanmdaka; *wamanica* kin he waoxetinehdapi wicacaje kin oju-dan qa pa xakowin he wikce-mna ko ikoyaka.

4. Unkan winorinca kin hé taku stan duta ko koyake ça maza ska zi, inyan terika, oin-pidan ko hena on wiyatpa un, qa nape kin ohna maza ska zi wiyatke wan yuha waoxetinehdapi wawicirarapi ko axamyapi kin on ojudan.

5. Qa ite kin en caje wan owapi, Woanarbe kin, Babulon tanka, maka kin akan wawicira-rapi qa waoxetinehdapi hunkake kin hee.

6. Unkan wicaxta owotanna we kin winorinca kin he iwitko wanmdaka, qa tona Jesus yao

taninpi kin hena we kin on. He wanmdake ça nina imanihan waun.

7. Hehan marpiya ohnihde kin he, Tokeca e ininihan he, emakiya; Winorinca woanarbe kin he ociciyake kta qa wamanica akan iyotanke cin pa xakowin qa he wikcemna hduhe cin he nakun *ociciyake kta*.

8. Wamanica wandake cin he un qon qa un xni kin hee, woxbe ceteta wanica etanhan hiyu kta qa wicotakuni xni ekta hde kta. Qa tona maka akan unpi, cajepi kin wiconi wowapi kin en kagapi xni, maka icage cin hehantanhan, hena wamanica kin wanyakapi qa yuxinya-yapi, he un qon qa un xni qa hinarin un kin heon etanhan.

9. De en tawacin wicoksape yuha yanka. Pa xakowin kin hena paha xakowin winorinca kin akan iyotanke cin hee;

10. Qa wicaxtayatapi xakowin kin heepi, zaptan wanna hinrpayapi, qa wanji naharin ni un, qa wanji ix hinarin u xni; he hi kinhan ptecedan he kta.

11. Qa wamanica wandake cigon he un qon qa un xni kin he icixahdogan kin ee, xakowinpi kin opeya un qa wicotakuni xni ekta hde kta.

12. Qa he wikcemna wandake cigon hena wicaxtayatapi wikcemna kin eepi, naharin wokiconze yuhapi xni, tuka wihiyayedan wancadan ape cin wicaxtayatapi iyecen wamanica kin kici wicowaxake wicaqupi.

13. Wicotawacin wanjidan yuhapi qa wicowaxake wicokihi

ko tawapi kin wamanica kin qupi.

14. Qa hena Amnos kin kici kicizapi, tuka Amnos kin ohiwicaya, Itancanpi kin Itancan qa wicaxtayatapi kin en Wicaxtayatapi kin hee, qa tona om un kin hena wicakicopi qa wicakarnigapi qa wicakapi.

15. Hehan hecen emakiya, Mini wandake cigon tukten wawicirarapi econ sa iyotanke cin hena oyate qa wicota qa wicaxta qa iapi kin eepi.

16. Qa he wikcemna wandake cigon, wamanica ikoyake cin hena. wawicirarapi econ sa kin xice kidakapi kta qa rewoskantuya tancodan iyaye yapi kta, cerpi kin temyapi qa peta on turnar yapi kta.

17. Hena e Wakantanka token tawacin kin econpi, qa wicotawacin wanjidan he tanyan ronhikiyapi kte ça wokiconze tawapi kin wamanica qupi kta e wacin yus wicakiya, Wakantanka oie kin yuecetu kte cin hehanyan.

18. Qa winorinca wandake cigon he otonwe tanka kin makata wicaxtayatapi kin iwicadake cin hee.

WICOWOYAKE 18.

1. Unkan hena taku kin iyo-hakam marpiya ohnihde wan marpiya kin eciyatanhan kutkiya u wanmdaka, wicowaxake tanka yuha. Qa he wowitan kin on maka kin iyoyanpa;

2. He waxagya hotankakiya hotanin qa heya, Babulon tanka kin he hinrpaya, hinrpaya ce;

taku wakan xicapi en ounyanpi qa wanagi axape cin owasin he otipi qa zitkadan xice cin xice dapi kin owasin he horpi yapi.

3. Wawicirarapi wocantiya-hde mini xa tawa kin hetanhan oyate hiyeye cin owasin yatkanpi; qa he kici wicaxtayatapi maka akan unpi kin wawicirarapi econpi, qa taku terika ota yuhe cin on wopeton maka akan unpi kin wijin içiyapi.

4. Hehan marpiya eciyatanhan wicaho wan tokeca nawaron, kaken eya, Mitaoyate kin tankata inanpa po, hecen woartani tawa kin ehna yaunpi kte xni qa wicokakije tawa kin en oya-papi kte xni.

5. He wartani kin marpiya kin ekta iyahdeya, qa taku xica econ kin hena Wakantanka-kiksuya un.

6. Token ecaniconpi qon he iyecen ecakicon po, qa iye oran kin etanhan nonpa akihde kicu po, wiyatke ojudan ye cin he ohna nonpa akihde okicieaxtan po.

7. Token waraniçida qa takudan icakije xni un qon he iyecen wicokakije, qa iyokixicapi kin qu po. Iye cante kin ekta kaken eya, Wicaxtayatapi winorinca heca iyotankehan waun, qa wiwazica hemaca xni, qa iyokixicapi kin icimana wanmdake kte xni ce.

8. Heon etanhan anpetu wan-jidan en wicokakije tawa kin hiyahde kta, wiconçe qa iyokixicapi qa wicaakiran, qa oco-wasin peta on rurnage kta; tuwe yaco kin he Itancan kin Wa-

kantanka Iyotan waxake cin hee, heon etanhan.

9. Unkan wicaxtayatapi maka ohnaka kin qa tona kici wawicirarapi econpi, qa takudan icakije xni unpi kin hena he aceyapi kta, qa nihinciyapi kta, he rurnage cin xota kin wanyakapi kinhan.

10. Hehan wicokakije kin ikopapi qa itehanyan inajinpi qa heyapi kta, Hehehe, hehehe, Babulon otonwe tanka kin, otonwe waxake cin, ihnuhanna niyacopi kin anihinrpaya.

11. Qa heon wopeton maka akan unpi kin nihinciyapi qa ceyapi kta, hetanhan maza tawapi kin tuwedan opewicakicatton kte xni.

12. Maza kin he maza ska zi, qa maza ska, qa inyan terika, qa oinpidan, qa miniruha waxte, qa xina xa stan, qa miniruha zipzipedan, qa xina xa, qa can waxtemna ocaje owasin, qa huhu wakxica ocaje owasin, qa can terika, qa maza zi, qa maza sapa, qa inyan ska wakxica;

13. Qa canha xa, qa taku waxtemna, qa pejihuta pa, qa can xin, qa mini xa, qa wihdi, qa aguyapi mdu, qa woteca, qa tarin wanuyanpi, qa xuktanka, qa canpahmihma, qa wicaxta tan-canpi wicanagi ko henakiya.

14. Waskuyeca kin ninagi waxte dake cin he wanna hena-keca, qa taku skuya waxte kin hena owasin aniyuxtan qa hena ake tohini iyeyakiye kte xni.

15. Unkan he on wopeton tona wijin içiyapi kin hena itehanyan inajinpi kta, he woka-

kije kin ikopapi, nihinciyapi qa ceyapi,

16. Qa heyapi kta, Hehehe, hehehe, otonwe tanka kin mini-ruha waxte xa stan, xa ko koyake qa maza ska zi, inyan terika oinpidan ko kohdaka; qa ihnuhanna wiwicajica tanka kin he yutakuni xni.

17. Unkan tona wita wata iyupse yuzapi, qa tona ohna yapi qa tona watopapi qa tona miniwanca ohna wopetonpi ece kin hena owasin itehanyan inajinpi kta;

18. Qa tohan he rurnage cin xota kin wanyakapi kinhan hotaninpi qa heyapi kta, Otonwe kin tukte wanji e otonwe tanka kin he iyececa he, *eyapi kta*,

19. Qa pa kin akan maka ahdatapi qa hotaninyan nihinciyapi qa ceyapi qa heyapi kta, Hehehe, hehehe, otonwe tanka kin he eciyatanhan tona miniwanca kin ohna wita wata yuhapi kin hena owasin watonpika, taku terika *opeton* qon heon, he ihnuhanna yutakuni xni iye-yapi.

20. Heon marpiya kin iyuxkin wo, qa ohnihde owotanna yaunpi qa wokcanpi kin nakun *iyuxkin po*, niye wadacopi kin he iyeceen Wakantanka tokiçon.

21. Hehan marpiya ohnihde waxake rinca wan, inyan wan, inyan wiyutpan tanka iyececa, he icu qa miniwanca kin en erpeye qa heya, Hecen wowaxake on Babulon otonwe tanka kin jujuwahan erpeyapi kta qa tohini iyeyapi kte xni.

22. Qa niye kin mahen yajopi sa, qa dowanpi sa, qa cando-

wankiyapi sa, qa yahotonpi sa, wicaho kin tohini naronpi kte xni; qa taku kage sa, ocaje owasin, niye kin en iyeyapi kte xni, qa wiyutpan rmun kin niye en hetanhan tohini naronpi kte xni.

23. Qa anpetu wi ojanjan kin icimana iyoyam niye kte xni, qa niye en hihnayanpi qa tawicuyapi wicaho kin tohini naronpi kte xni. Wicaxta wopeton nitawa kin hena maka akan wicaxta itanceanpi kin eepi, qa oecona ecanon kin on oyate kin owasin wicayahnayan.

24. Unkan he ohna wicaxta wokcan wicaxta owotanna ko we kin wanyakapi qa tona maka akan ktepi kin hena nakun.

WICOWOYAKE 19.

1. Unkan hena iyohakam marpiya kin ekta wicota hotan-kakiya hotaninpi nawaron, kaken eyapi, Jehowa yatan po, niwicaye qa wowitan qa wootanin qa wowaxake *henakiya* Itancan Wakantanka unkitawapi kin he tawa nunwe.

2. Wayaco kin he owotanna qa wicaka; wawicirarapi econ sa tanka kin wiokiyapi kin on maka kin yuxice ein he yaco qa taokiye kin hena we kin he napé kin en tokiçon.

3. Hehan inonpa heyapi, Jehowa yatan po. Unkan wawicirarapi econ sa xota kin owihanke wanin wankantkiya iya-ya.

4. Hehan hunka wicayapi wikcemna nonpa sanpa topa qa taku ni un topa kin hena maka-

ta erpeiçiyapi qa Wakantanka oiyotanke kin akan kiyotanke cin he ohodapi qa heyapi, Amen, Jehowa yatan po.

5. Hehan oiyotanke kin etanhan wicaho wan taninyan heya, Taakiye niyanpi kin owasin, qa tona *Wakantanka* ohodapi, cistinpidan tankinkinyanpi ko Wakantanka nitawapi kin yatan po.

6. Unkan nawaron, wicota hotaninpi kin iyececa, qa mini ota irara kin iyececa, qa wakin-yan tanka hotonpi kin iyececa, kaken eyapi, Jehowa yatan po, Itancan Wakantanka Iyotan Waxake cin he Wicaxtayatapi un.

7. Heon etanhan piundapi qa unkiyuxkinpi kta qa wowitan unqupi kta; Amnos kin tohan tawieu ton kte cin wanna iye- hantu qa winorinca kin taku o- wasin wiyeya ekihuaka.

8. Unkan he miniruha ska wiyatpa kin heca koyake kta e qupi; miniruha ska kin he tona waxte wicoran owotanna kin hee.

9. Hehan hecen emakiya, Kaken wowapi kaga wo, Tona Amnos kin winorinca yuze kta omniciye kin en wicakicopi kin hena wowaxte yuhapi. Hehan ake hecen emakiya, Wakantanka oie wicake cin hena ee.

10. Unkan hehan he siha hdepi kin en makata erpemiçiye ça ohowada kta, tuka iye hema-kiya, Ihnuhan hecanon kin, mix ciei ookiye waun qa nihunka- wanji Jesus yaotanin yuhapi kin hemaca; Wakantanka ohoda wo. Jesus yaotanin kin he wokeanpi woksape kin hee.

11. Unkan marpiya kin yu- zamnupi e wanmdaka, qa ito xuktanka ska wan tuwe akan iyotanke cin he Wicaka Owotanna eciyapi, he owotanna wicayaco qa ozuye econ ece.

12. Ixta kin peta ide kin iyececa, qa pa kin akan watexdake ota yukan; qa caje kin owapi, tuka he tuwedan sdonye xni, ixnana *sdotkiya*.

13. Qa wokoyake we en oputkanpi kin heca koyaka. Qa Wakantanka Oie kin eciyapi.

14. Qa marpiya kin ekta aki- cita kin owasin he ihakam iya- yapi, xuktanka ska akan iyotan- kapi qa miniruha waxte ska qa wakaxote xni kin heca koyaka- pi.

15. Qa iye i kin etanhan ma- za sagye anog ope kin hiyu, he- on oyate kin awicape kta, qa maza icapsinte wan on wicayu- he kta; qa Wakantanka Iyotan Waxake cin he wocantiyahde ohitike cin mini xa iyuxkice kin he naxkica.

16. Qa onrorda ceca sani ko akan caje kin owapi, Wicaxtaya- tapi kin en Wicaxtayatapi qa itancanpi kin Itancan kin he dee.

17. Hehan marpiya ohnihde wan anpetu wi kin en inajin kin wanmdaka; he hotankakiya ho- tanin qa taku kinyanpi kin owa- sin, okotonyan kin en kinyan unpi kin hena hewicakiya, Upi qa Wakantanka he wotapi tan- ka tawa kin en mniciya po;

18. Wicaxtayatapi cerpi kin yatapi kta, qa wicaxta itan- canpi cerpi kin qa tona wa-

xakxakapi cerpi kin he, qa xuktanka cerpi qa tona akan iyotankapi kin, wicacerpi ocaje owasin, wowidake unpi qa ihduhapi kin, cistinpidan tankinkin-yanpi koya.

19. Unkan wamanica kin wanmdaka, qa wicaxtayatapi maka akan unpi kin akicita wicayuhapi ko witaya mniciyapi qa tuwe xuktanka akan iyotan-ke cin akicita wicayuhe cin ko, kici kicizapi kte cin heon.

20. Hehan wamanica kin he niyake yuzapi qa woitonxni wokcan kin he nakun, he wamanica kin itokam wowapetokeca econ qa on tona wamanica wowapetog-ton tawa yuhapi qa iyacinpi kin ohodapi kin hena wicahnaye cin hee. Unkan hena napin niyake peta mde kin cardi on itkonyahe cin he en iyorpewicayapi.

21. Qa umanpi kin owasin tuwe xuktanka akan iyotan-ke cin he maza sagye tawa kin on wicaktepi, maza sagye he i kin etanhan hiyu qon hee on. Unkan hena cerpi kin on taku kin-yan un kin owasin imnanpi.

WICOWOYAKE 20.

1. Hehan marpiya ohnihde wan marpiya kin eciyatanhan kun u wanmdaka, he woxbe ceteta wanica tiyopa iyurdoke kin yuhe qa nape ohna maza icicariia wan tanka.

2. He wamduxka kin icu, sinterda wanakaja tanhan un kin Wakanxica qa Satan hee, qa kaxka ehnaka, waniyetu kektopawinge hehanyan;

3. Qa woxbe ceteta wanica he en erpeye qa onataka qa ipuspe wan apuspa, hecen oyate kin wicahnaye kte xni, waniyetu kektopawinge kin ihuniyanpi xni kin hehanyan. Unkan he iyohakam ptenyedan kiyuxkapi kta.

4. Unkan oiyotan-ke kin heca wanmdaka, qa tona akan iyotankapi kin hena woyaco yuhapi. Unkan tona Jesus oyake cin on qa Wakantanka oie kin on pa baksapi qon, wamanica kin wakagapi ko ohodapi xni qa wowapetogton tawa kin itepi qa napepi kin en yuhapi xni hena wanagi kin wanwicamdaka, ake kinipi qa Mesiya kin kici oonyanpi, waniyetu kektopawinge hehanyan.

5. Unkan wicate cin umanpi kin ake kinipi xni, waniyetu kektopawinge kin ihuniyanpi xni kin hehanyan. Piya iwicacage tokaheya kin hee.

6. Tuwe piya iwicacage tokaheya kin en ope cinhan he wowaxte yuhe qa owotanna un. Hena wiconte icinonpa kin iyo-wicahi kte xni, tuka Wakantanka qa Mesiya kin ekta Woxnapikagapi heca wicayawapi kta qa om oonyanpi kta, waniyetu kektopawinge hehanyan.

7. Unkan waniyetu kektopawinge kin henakeca kinhan Satan wicakaxka tipi kin etanhan kiyuxkapi kta.

8. Qa oyate kin wicahnaye kta e makata tate ouye topa kin ektakiya ye kta, qa Gog Magog kici zuya u wicaxi kta, hena miniwanca wiyaka sukaza kin iye-cen wicota.

9. Unkan maka ohdakinyan ohna yapi qa wicaxta owotanna ewanke cin ihdukxan hinajinpi qa otonwe wakan kin nakun. Unkan marpiya kin etanhan Wakantanka eciyatanhan peta hiyu qa rurnar wicaya.

10. Unkan Wakanxica hena wicahnaye cin he peta cardi ko mde kin en iyorpeyapi, heciya wamanica qa woitonxni wokcan kin unpi, qa anpetu hanyetu ko owihanke wanin kakijapi kta.

11. Hehan oiyotanke ska tanka wan wanmdaka, qa tuwe akan iyotanke cin he ite kin etanhan maka marpiya ko najicapi, qa tukten. wanke kte cin iyeyapi xni.

12. Qa wicate ciqon cistinpi-dan tankinkinyanpi ko hena Wakantanka itokam najinpi, wanmdaka. Unkan wowapi kin yumdayapi; qa wowapi tokeca wan yumdayapi, wiconi wowapi kin hee: Qa wicate ciqon token wowapi kin en kagapi kin he iyecen wicayacopi, iye wicoran kin eciyatanhan.

13. Unkan miniwanca kin wicate cin tona en un kin hena hiyu wicaya, qa wiconte Hades ko wicate cin tona en unpi kin hena hiyu wicayapi. Qa iye wicoran kin eciyatanhan otoiyo-hi wicayacopi.

14. Unkan wiconte qa Hades kin hena peta mde kin en iyorpewicayapi. Wiconte icinon-pa kin hee.

15. Unkan tuwe *caye kin* wiconi wowapi kin en kagapi iyeyapi xni kin he peta mde kin en iyorpeyapi.

WICOWOYAKE 21.

1. Hehan marpiya teca qa maka teca wanmdaka. Marpiya tokaheya qa maka tokaheya kin hena yutokan iyeyapi qa miniwanca wanica.

2. Jan he miye e otonwe wakan kin wanmdaka, Jerusalem teca kin hee marpiya kin etanhan Wakantanka eciyatanhan kun u, winorinca wan wicaxta hihna ton kte cin on wiyeya un kin he iyececa.

3. Unkan marpiya kin eciyatanhan wicaho wan tanka nawaron, kaken eya, Wanyaka wo, Wakantanka wakeya tawa kin wicaxta kin ehna han, qa iye hena om ti kta, qa hena e oyate tawa wicaye kta, qa Wakantanka rince cin hena om un kta qa Wakantanka tawapi kta.

4. Qa wicixta kin etanhan ixtamnihanpe owasin Wakan-tanka wicakipakinte kta, qa hetanhan wiconte wanice kta, wicocante xica, wicaceya, wicokakije ko wanice kta, taku tokaheya un kin wanna henakeca.

5. Unkan tuwe oiyotanke kin akan kiyotanke cin he, Ito taku owasin teca wakaga ce, eya. Hehan, Wowapi ecen kaga wo, hena oie kin wicake qa owotanna, emakiya.

6. Qa ake kaken emakiya, Wanna henakeca. Alpa qa Omega, otokahe qa owihanke kin he miye ce. Tuwe ipuze cinhan he wiconi mini rdoka kin etanhan iyunwin codan yatke wakiye kta.

7. Tuwe ohiye cinhan he taku owasin tawaye kta, qa iye

Wakantanka maye kta qa mix he cinkxi waye kta.

8. Tuka tona wikopapi, qa wicadapi xni, qa wartepi xni, qa tin wicaktepi, qa wawicirarapi econpi sa, qa oecona econpi sa, qa wakagapi ohodapi sa, qa oitompixni kin hena owasin mde wan peta qa card on itkonyahe cin he ohna taku tawapi kta, wiconte icinonpa kin hee.

9. Hehan marpiya ohnihde xakowin wiyatke xakowin wicakakije ehake xakowin kin on ojudan yuhapi qon hena etanhan wanji hi qa omakiye ça heya, U wo, winorinea Amnos kin tawicu ye kte cin he cicipazo kta ce.

10. Unkan Woniya kin re wan tanka tehan wankantuya kin ekta amaye ça otonwe tanka kin ekta emakipazo, Jerusalem wakan, marpiya kin etanhan Wakantanka eciyatanhan kutkiya u kin hee.

11. Wakantanka wowitan tawa kin yuha qa wiyatpa kin he inyan terika iyececa, inyan wan acarxdaya iyececa.

12. Qa conkaxke wan tanka tehan wankantuya aconkaxkapi, qa tiyopa ake nonpa yukan, qa tiyopa kin hena en marpiya ohnihde ake nonpa yukanpi, qa akan wicacaje owapi, Israel cincapi wicoun ake nonpa kin hena eepi.

13. Wiyohiyanpa tanhan tiyopa yamni, qa waziyapa tanhan tiyopa yamni, qa itokaga tanhan tiyopa yamni, qa wiyorpeya tanhan tiyopa yamni.

14. Qa otonwe conkaxke kin taku akan he cin hena ake non-

pa, qa Amnos kin taohnihde ake nonpa cajepi kin he en un.

15. Unkan tuwe omakiye cin he maza ska zi wiyutapi wan yuha, on otonwe qa tiyopa kin conkaxke ko iyute kta.

16. Otonwe kin oise tom yukan, qa ohdekinyan kin ohanske cin kiei akidehankeca. Unkan wiyutapi kin on otonwe kin iyuta, wiyutapi kektopawinge ake nom; ohdakinyan ohanske cin obosdatu ko akidecen han.

17. Qa conkaxke kin he iyuta, wicixpa opawinge sanpa wikcemna topa sam topa, wicaxta ihduta, marpiya ohnihde ihdute cin hee.

18. Conkaxke kin he iyaspis inyan terika on kagapi qa otonwe kin he maza ska zi ecedan, janjan ecedan iyececa.

19. Qa otonwe conkaxke kin taku akan he cin he inyan terika ocaje owasin en un. Taku akan he cin tokaheya kin he iyaspis; inonpa kin he sapiros; iyamni kin he kalkedon; itopa kin he smaragdos;

20. Qa izaptan kin he sardonis; ixakpe kin he sardiyo; ixakowin kin he kusolitos; ixahdogan kin he berulos; inapciwanka kin he topaziyon; iwikcemna kin he kusopasos; iakewanji kin he huakintos; qa iake nonpa kin he amatustos.

21. Tiyopa ake nonpa kin hena inyan terika ocaje ake nom, tiyopa otoiyohi inyan terika wanjidan on kagapi; qa otonwe ocanku kin he maza ska zi ecedan janjan kin iyecen wiyatpa.

22. Qa he en tipi wakan wa-

nica; Itancan Wakantanka Iyotan Waxake cin, qa Amnos kin hena tipi wakan kin eepi.

23. Qa otonwe kin he anpetu wi hanyetu wi ko en iyoyanpa-pi kta cinpi xni; Wakantanka wowitan tawa kin iyoyanpa qa Amnos kin he petijanjan kin hee.

24. Qa oyate kin tona ni wicayapi kin hena iyoyanpa kin he en manipi kta, qa wicaxtaya-tapi maka akan unpi kin hena wowitan qa wootanin tawapi kin en ahipi kta.

25. Qa tiyopa kin hena anpetu icunhan ecen iyeyapi kte xni; qa heciya hanyetu wanica.

26. Oyate hiyeye cin wowitan qa wootanin kin en ahipi kta.

27. Qa taku wixamye axamye cin he en i kte xni, qa taku xicaya econ qa itonxni kin *hena nakun*; tuka tona cajepi kin wiconi wowapi Amnos tawa kin en kagapi kin henanpidan.

WICOWOYAKE 22.

1. Hehan wakpa wan wiconi mini ska kin, cartowata iyecen ska, he makipazo, he Wakantanka qa Amnos oiyotanke kin etanhan kaduza.

2. Unkan canku cokaya qa wakpa kin anokatanhan can wiconi kin icaga, he waskuyeca ocaje ake nonpa aicaga, wi otot-yohi waskuyeca aicar ya ece, qa can wapa kin hena oyate kin okizi wicaya ece.

3. Unkan heciya wicayuxice wanice kta. Wakantanka oiyotanke kin hee qa Amnos tawa

kin heh he ça taokiye kin ta-woahope kin ecen econpi.

4. Qa itohnake kin wanyakapi, qa caje kin iye itepi kin en yuhapi.

5. Qa heciya hanyetu wanice kta, qa anpetu wi iyoyanpa kin he cinpi xni, Itancan Wakantanka iyoyam wicaya ece, qa ohiniyan owihanke wanin heni wicaxtayatapi ounyanpi kta.

6. Hehan hecen emakiya, Hena oie kin owotanna qa wicaka. Qa Itancan kin wicaxta wokcan owotanna Wakantanka tawapi kin hee taku ecadan u kte cin hena taokiye kin owicakiyake kta e on ohnihde tawa kin u xi.

7. Iho ecadan wau kta. Tuwe wowapi kin de wowiyukcan oie kin tanyan yuhe cinhan he wowaxte yuha ce.

8. Unkan Jan he miye e hena wanmdake ça nawaron. Hena nawaron qa wanmdaka unkan marpiya ohnihde hena wanyag makiye cin he siha kin en makata erpemiçiye, ohowada kta tuka.

9. Hehan hemakiya, Ihnuhan hecanon kin; mix eya ookiye cici waun qa nihunkawanji wicaxta wokcanpi kin etanhan waun, qa tona wowapi kin de oie yuhapi kin hena opeya waun; Wakantanka ohoda wo.

10. Hehan ake hemakiya, Wowapi kin de wowiyukcan oie kin hena sutaya apuspe xni wo. Wanna ecadan u kta ce.

11. Tuwe xice cin he xica un kta, qa tuwe ska kin he ska un kta, qa tuwe owotanna kin he owotanna un kta, qa tuwe

waxte kin he waxte en un nunwe.

12. Wanyaka wo, kohanna wau kta, qa taku mitawa kin hduha waun, otoiyohe iye wiconi kin eciyatanhan wicawaqu kta.

13. Alpa qa Omega, otokahe qa owihanke, tokapa qa haka kta kin he miye ce.

14. Tona tawoahope kin eecen econpi kin hena wowaxte yuhapi, hecen can wiconi kin etanhan icupi kta, qa tiyopa kin ohna otonwe kin timahen yapi kta.

15. Tuka xunka, qa oecona econpi sa, qa wiokiyapi sa, qa wawicirarapi econpi sa, qa wakagapi ohodapi sa, qa tuwe itonxni waxtedake qa econ kin hena *owasin* itankan yakonpi.

16. Jesus he miye ce, okodakiciye kin ekta niyepi kin en hena oniciyakapi kta e heon ohnihde mitawa kin u waxi. Dawid can hutkan adetka ko he miye, qa *nakun* anpao wicanrpi nina wiyatpa kin he miye.

17. Woniya Wakan kin, ta-

wicu yapi kin kici, Kuwa, eyapi; qa tuwe naron kinhan he, Kuwa, eye kta; qa tuwe ipuze cinhan he u kta, qa tuwe cin kinhan he iyunwin codan wiconi mini kin etanhan icu nunwe.

18. Tona wowapi kin de wowiyukan oie kin naronpi kin hena kaken ewicawakiya, Tuwe wicoie kin dena en taku sanpa kage cinhan he wicokakije wowapi kin de en cajeyatapi kin Wakantanka qu kta.

19. Qa tuwe wowiyukan wowapi oie kin dena yuaoptetu kinhan he taku tawa kte cin wiconi wowapi kin etanhan Wakantanka icu kta qa otonwe wakan kin etanhan, qa taku tona wowapi kin de en kagapi kin he etanhan.

20. Tuwe hena yaotanin kin he kaken eya, Ito kohanna wau kta. Amen. Itancan Jesus hecen yau nunwe.

21. Jesus Mesiya Itancan unkitawapi kin he towaonxida kin niyepi *owasin* en nicipi un kta. Amen.

JESUS WANIKIYA KIN YATANPI NUNWE.

OWIHANKE KIN.

AYER

Sakata

45

